





## CENTRAL CIRCULATION AND BOOKSTACKS

The person borrowing this material is responsible for its renewal or return before the **Latest Date** stamped below. **You may be charged a minimum fee of \$75.00 for each non-returned or lost item.**

Theft, mutilation, or defacement of library materials can be causes for student disciplinary action. All materials owned by the University of Illinois Library are the property of the State of Illinois and are protected by Article 16B of *Illinois Criminal Law and Procedure*.

TO RENEW, CALL (217) 333-8400.

University of Illinois Library at Urbana-Champaign

JAN 11 2001

JAN 25 2002

JUL 29 2003

SEP 21 2008

When renewing by phone, write new due date  
below previous due date.

L162



This book has been **DIGITIZED**  
and is available **ONLINE.**



UNIVERSITY OF  
ILLINOIS LIBRARY  
AT URBANA-CHAMPAIGN  
STACKS



This book has been **DIGITIZED**  
and is available **ONLINE.**





Digitized by the Internet Archive  
in 2014

<https://archive.org/details/publications8318soci>



SOCIÉTÉ  
DES  
ANCIENS TEXTES FRANÇAIS

---

ŒUVRES POÉTIQUES  
DE  
CHRISTINE DE PISAN

---

III







83

OEUVRES POÉTIQUES

DE

CHRISTINE DE PISAN

PUBLIÉES

PAR

MAURICE ROY

---

TOME TROISIÈME

ORAISONS, ENSEIGNEMENTS ET PROVERBES MORAUX

LE LIVRE DU DUC DES VRAIS AMANTS

LES CENT BALLADES D'AMANT ET DE DAME



PARIS

LIBRAIRIE DE FIRMIN DIDOT ET C<sup>ie</sup>

RUE JACOB, 56

---

M DCCC XCVI



Publication proposée à la Société le 23 avril 1884.

Approuvée par le Conseil le 25 février 1885 sur le rapport d'une commission composée de MM. Meyer, Paris et Raynaud.


*Commissaire responsable :*

M. P. MEYER.











**U**res excellent de grant haultesse  
Couroinne possant princeesse  
Le noble Royne de France  
Le corps endim de vous madiesce  
En saluant par grant hullece  
N'y dieu qui vous tieigne en souffrance  
L'ou temps due et apres soustenance  
De la mort vous dont la fielece  
De paradis qui point ne cesse  
Et au monde sanz deuinance  
Dau iore et toute reconuance  
De quan quel affiert a lece  
D'autre daine en qui sont tous biens  
Et ma tres souuerainne de biens  
Vers vous comme de creature

Pour ce liure en que ie tiens  
Vous presenter ou il na tiens  
En hystoire uen escripture  
Que ne naye en ma pensee pure  
Pas ou stile que ie detiens  
Du seul sentement que retiens  
Des dons de dieu et de nature  
L'uoir que mainte aultre creature  
En ait plus en fait et mantien  
Et sont ou volume compare  
Plus hautes liures esqueuils par  
A prier en mainte maniere  
Differe et pour ce lempas  
Que on en deuant plus appas  
Pour de diuerses matieres









## INTRODUCTION

---

**C**E troisième volume renferme des œuvres de caractères très différents, des prières, des compositions morales et des poèmes d'amour.

Aux personnes qui pourraient s'étonner que nous ayons réuni dans un même tome des compositions aussi diverses, il nous est facile de répondre que nous suivons, autant que possible, dans notre édition, l'ordre de transcription adopté dans les manuscrits, et qui, d'ailleurs, paraît correspondre à la succession chronologique des inspirations poétiques de Christine.

A cette considération s'ajoute encore la nécessité de répartir entre chaque volume une somme de matières à peu près égale.



## I. — ORAISONS

En même temps qu'elle écrivit des dits d'amour, Christine composa quelques œuvres exclusivement religieuses. A ce genre appartiennent les trois prières dont nous donnons le texte et une paraphrase en prose des *Sept Psaumes* <sup>1</sup>.

La première de ces compositions, l'*Oraison Notre-Dame*, comprend dix-huit strophes de douze vers de huit syllabes. Christine invoque successivement la Vierge en faveur de l'Église, de ses pasteurs, du roi, de la reine, de la famille royale et des personnes de toutes conditions.

M. R. Thomassy, qui a publié cette pièce à la fin de son *Essai sur les écrits politiques de Christine de Pisan*, croit qu'elle fut composée vers l'année 1414, à l'époque du Concile de Constance.

Plusieurs raisons nous autorisent, au contraire, à penser que l'on doit assigner à la composition de l'*Oraison Notre-Dame* une date plus ancienne, comme 1402 ou 1403.

En effet, le ms. A <sup>1</sup> (836), l'un de ceux qui renferme les oraisons, n'a pas été transcrit à une date postérieure à 1408, ainsi que nous l'avons établi précédemment; il figure, d'ailleurs, en 1413, à l'inventaire de la Bibliothèque du duc de Berry.

1. Voy. sur cette composition l'article de M. L. Delisle dans les *Notices et Extraits*, t. XXXV, 2<sup>e</sup> partie.



D'autre part, la pièce elle-même nous fournit deux points de repaire :

La strophe VIII est consacrée au duc d'Orléans qui fut, comme on sait, assassiné en 1407.

En outre, Christine fait allusion, dans la strophe II, à l'affaire du schisme et supplie la Vierge de ramener la paix dans l'Église en lui donnant un Pasteur qui réunisse tous les suffrages. Il paraît donc fort probable que ces vers ont été écrits au moment des négociations de Charles VI avec l'antipape Benoît XIII, un peu avant la Déclaration du 30 mai 1403 qui remettait la France sous l'obédience de ce pontife.

La pièce suivante, les *Quinze Joyes Nostre-Dame*, comprend, comme l'indique le titre même, quinze strophes d'invocation à la Vierge pour chacune des joies qu'elle a éprouvées.

L'*Oraison Nostre-Seigneur*, composée sur le même plan, rappelle en soixante strophes les actes de la vie et de la passion du Sauveur <sup>1</sup>.

1. Ces oraisons furent sans doute composées par Christine à l'intention des personnes pieuses qui voulaient ajouter quelques sentiments nouveaux à la récitation de Pater et d'Ave pour gagner des indulgences, ainsi que semble l'indiquer une rubrique placée au-dessous de la miniature du ms. A<sup>1</sup> (836 fol. 63) représentant le Sauveur sortant du tombeau :

« Nostre Seigneur s'apparu a Saint Gregoire, pape, en sa contemplacion en telle semblance, et, pour la compassion qu'ot ledit Saint de la mort et passion Nostre Seigneur Jhesu Crist donna xiiii<sup>m</sup> ans d'indulgence a quelconques personne qui diroit v fois la Pater Noster et l'Ave Maria par devotion devant tel ymage. Et aultres papes, qui depuis ont esté, ont accreu l'indulgence tant qu'elle monte jusque a la somme de xx<sup>m</sup> ans de vray pardon. »



Le texte de ces prières est donné d'après les deux familles de mss. *A* et *B* dont nous avons établi la généalogie dans la préface du tome I.

## II. — ENSEIGNEMENTS ET PROVERBES MORAUX

Comme l'indiquent les rubriques qui précèdent les Enseignements, Christine aurait composé spécialement ce recueil de sentences morales à l'intention de son fils, Jean de Castel; cependant les conseils qu'il renferme en cent treize quatrains paraissent s'adresser aux personnes de tous âges et de toutes conditions.

Par cette œuvre, Christine continue la tradition d'une littérature morale remontant jusqu'à l'antiquité. Sous l'influence des auteurs classiques et de la Bible, les sentences morales furent en grande vogue dès le commencement du moyen âge. Les *Moralités des philosophes* par Alart de Cambrai <sup>1</sup>, les *Proverbes de Sénèque* et autres compositions du même genre, manifestent, plus d'un siècle avant Christine de Pisan, cette tendance à la fois moralisatrice et classique. Mais le livre de morale le plus célèbre et le plus employé au moyen âge pour l'instruction de la jeunesse fut, sans contredit, le recueil de préceptes qui porte le nom de *Distiques de Caton*, et où la sagesse de l'antiquité

1. Voir le *Bulletin de la Société des Anciens Textes*, 1895, p. 96.



s'allie aux enseignements chrétiens. Les *Distiques* furent traduits et imités bien souvent du <sup>xii</sup><sup>e</sup> au <sup>xiv</sup><sup>e</sup> siècle.

C'est sous la même influence que Christine a composé ses *Enseignements* et ses *Proverbes moraux*; laissant de côté les dictons populaires, elle s'attache surtout à reproduire les sentences des anciens philosophes.

Les *Enseignements* furent certainement, parmi les œuvres de Christine, l'une des plus répandues en raison du vif succès qu'elle rencontra dans toutes les classes de la société. Aussi en existe-t-il un si grand nombre de manuscrits que nous n'avons pas la prétention de signaler toutes les copies qui en ont été conservées. Ces copies n'offrent, d'ailleurs, qu'un médiocre intérêt et consistent généralement en transcriptions faites sur papier au <sup>xv</sup><sup>e</sup> siècle, intercalées dans des recueils de pièces morales ou de prières formés pour des religieux et provenant la plupart de fonds d'abbayes.

La Bibliothèque nationale possède quelques-unes de ces copies sur papier, telles que le ms. 1181 du fonds français qui donne, fol. 10, un texte sensiblement altéré, modifié, et ajoute même trois quatrains que l'on ne peut attribuer à Christine, les mss. 24439, fol. 15 et 25434 fol. 117, qui ne sont, en somme, que des copies faites sur des manuscrits de la famille *B*.

Il existe aussi à la Bibliothèque de Clermont-Ferrand un recueil (ms. n° 249) de pièces diverses



qui renferme, fol. 39, les *Enseignements de Christine*. C'est également une copie sur papier du xv<sup>e</sup> siècle et qui a fait l'objet d'une notice dans le *Bulletin de la Société des Anciens Textes*, année 1889, p. 98 à 114.

Un autre ms. se trouve à la Bibl. de Stockholm et est indiqué sous le n<sup>o</sup> 12 des Poèmes divers dans le catalogue G. Stephens.

Notre texte a été établi d'après les manuscrits des familles *A* et *B* dont nous avons donné la description dans l'introduction du tome I. Nous avons cru devoir nous servir, en outre, des quatre manuscrits suivants de la Bibliothèque nationale qui paraissent se classer dans la famille *B* :

*B*<sup>4</sup>. — Le ms. 1551 du fonds français grand in-8<sup>o</sup> sur vélin, xv<sup>e</sup> siècle, contient avec diverses pièces morales les *Enseignements de Caton* et les *Dits moraux* de Christine (fol. 52 à 59). Ce manuscrit, ainsi que l'indique une mention inscrite sur le premier feuillet de garde, provient de la bibliothèque du château de Blois qui fut, comme on sait, transportée en 1544 à Fontainebleau. Il a été porté ensuite sous les numéros 1347 (Cat. Rigault, 1622), 1061 (Dupuy, 1645) et 7593 (Clément, 1682) aux Inventaires de la Bibliothèque du roi. Ce volume est enfermé dans une reliure en bois recouvert de velours noir et qui paraît remonter au xvi<sup>e</sup> siècle.

*B*<sup>5</sup>. — Le ms. 1623 pet. in-4<sup>o</sup> sur velin, xv<sup>e</sup> siècle, avec lettres ornées, renferme des fragments provenant au moins de trois manuscrits différents, dont



un sur papier ; aux fol. 98 à 102 se trouvent les *Enseignements* sous la rubrique suivante : « Ci après s'ensuivent aucuns bons et notables enseignemens moraulx que Xristine de Pizan a baillez a son filz pour son enseignement et doctrine. » Des mentions inscrites sur les feuillets de garde font connaître que ces fragments ont appartenu au xvi<sup>e</sup> siècle à Henry et Anthoine de Tournon. Ce manuscrit porte le n<sup>o</sup> 7629 de l'Inventaire de 1682 et provient de la bibliothèque du cardinal Mazarin. Il est relié aujourd'hui en veau fauve, aux armes de Napoléon I<sup>er</sup>.

B<sup>6</sup>. — Le n<sup>o</sup> 2239, également sur vélin, est un petit manuscrit de la fin du xv<sup>e</sup> siècle qui contient, outre les *Dits moraux* de Christine (fol. 18) les *Enseignements de Caton* en français. Il a été inventorié sous l'ancienne cote 8014 dans le catalogue de 1682, et, comme le précédent, a appartenu au cardinal Mazarin.

B<sup>7</sup>. — Enfin le n<sup>o</sup> 825, grand in-4<sup>o</sup> sur vélin, xv<sup>e</sup> siècle, enrichi de miniatures et de lettres ornées, se compose du *Pèlerinage de la vie humaine*, le poème de Digulleville, et des *dits moraux* (fol. 156 à 158) ; mais la composition de Christine n'a pas été complètement transcrite à la fin du volume et s'arrête au quatrain n<sup>o</sup> civ. Un feuillet paraît manquer. Le fol. 155 v<sup>o</sup> porte après l'Explicit du *Pèlerinage de la vie humaine* cette mention du commencement du xvi<sup>e</sup> siècle : « Ce livre est a dame Jehanne de Cambray, femme de monseigneur messire Henry de Marle, chevalier, seigneur de Lu-



zancy, conseiller et maistre des requestes ordinaire de l'Ostel du Roy. »

Le manuscrit a ensuite fait partie de la Bibliothèque de Blois, puis est passé dans celle de Fontainebleau; il a été inventorié à la Bibliothèque royale sous les numéros 1707 (Rigault), 710 (Dupuy) et 7211 (Clément) et est relié en veau fauve aux armes de Napoléon I<sup>er</sup>.

Les *Proverbes moraux* forment le complément naturel des *Enseignements*. Ils comprennent 101 distiques et paraissent empruntés surtout aux dits des anciens philosophes. Ant. Wicliffe, comte Rivers, les traduisit en anglais, dès la seconde moitié du xv<sup>e</sup> siècle, et les publia sous ce titre : « *The Morale Proverbes of Cristyne. At Westmestre of feverer the XX daye and of kyng Edward, the XVII yere vrave* (1477). Enprinted by Caxton », in-fol. de 4 ff. à 28 lignes par page.

Cette pièce, excessivement rare, a été réimprimée dans la *Bibl. Spenceriana*, de Dibdin, IV, 218-24, des extraits en avaient été donnés par le même bibliographe dans son édition des *Typographical Antiquities*, I, 72. London, 1810<sup>1</sup>.

Les deux manuscrits de la famille A, décrits précédemment (voy. t. I, Introd., p. 5 à 17), contiennent seuls le texte des *Proverbes*. Une copie sur papier, faite au xv<sup>e</sup> siècle, existe à la Bibliothèque de Grenoble sous le titre : « *Les dictz des*

(1) Voir encore W. Blades, *The biography and Typography of William Caxton*, 2<sup>e</sup> édit., Londres 1882, p. 194 et suiv.



saiges, » dans un recueil de fragments en vers et en prose (n° 871, fol. 1).

### III. — LE LIVRE DU DUC DES VRAIS AMANTS.

Ce poème a été composé par Christine à la prière d'un jeune prince qui ne lui a pas permis de divulguer son nom, l'autorisant seulement à le surnommer « le Duc des vrais amoureux ». Comme dans le *Dit de la Pastoure*, où la bergère présente elle-même ses aventures, le jeune duc prend ici la parole et raconte ses premières amours :

A peine au sortir de l'enfance, il éprouvait déjà le désir d'avoir une maîtresse et implorait le dieu d'amours de lui donner satisfaction. Un jour, parti pour chasser des lapins avec un de ses parents et quatre de ses gentilshommes, suivis de veneurs tenant en laisses des lévriers et portant des furêts, il fit la rencontre d'une princesse royale qui était venue récemment habiter un château voisin. Après un entretien au bord d'une source, sur l'herbe verte et à l'ombre d'une « saulsoie », le duc sentit pour la première fois l'amour blesser son cœur et rentra, à la nuit, à la demeure paternelle tout transformé. A partir de ce jour il changea complètement sa manière d'être, devint plus gai et plus gracieux, se procura de beaux destriers, revêtit de riches robes, en distribua largement à sa suite, et prit une devise où se trouvait en anagramme le



nom de la dame de ses pensées. Sous le prétexte d'apprendre à jouter, il fit préparer une fête de tournoi, non sans avoir obtenu auparavant la promesse que sa dame s'y rendrait. Christine trouve ici l'occasion de nous retracer avec une grâce exquise les détails intéressants d'une de ces belles fêtes si fréquentes au *xiv<sup>e</sup>* siècle.

C'est d'abord l'arrivée en litière de la princesse au château du duc, la veille du tournoi, la réception qui lui est faite, le souper d'apparat où elle prend place sous un grand dais, ayant à ses côtés la mère du duc et quatre comtesses, les danses joyeuses qui suivirent ; puis, le lendemain matin, la visite du prince à sa dame qui lui accorde la manche d'hermine de son corset et une couronne de pervenches pour porter sur son heaume. Après avoir dîné assez rapidement dans les chambres, on descend en champ clos ; vingt dames blondes, vêtues de superbes robes de soie blanche brodée d'or, au milieu desquelles se tenait la princesse, prennent place dans de superbes tribunes. Le jeune duc, couvert d'armures blanches et monté sur un destrier caparaçonné blanc et or, accompagné de chevaliers aux mêmes armures blanches, sort tout joyeux de son pavillon et s'avance dans la lice où il attache son heaume et reçoit sa lance des mains d'un noble comte, puis s'élance pour jouter contre un chevalier. Sa vaillance et ses nombreux exploits lui font remporter le prix de la journée que lui décernent les dames, juges du tournoi.



Les joutes terminées à la chute du jour, tout le monde rentre au château où un grand souper était préparé, à la suite duquel les danses recommencent avec un nouvel entrain et se prolongent pendant une grande partie de la nuit.

Le lendemain, un nouveau tournoi s'engage entre les écuyers, couverts d'armures vert et or, en présence de vingt demoiselles vêtues pareillement de vert. La fête dura ainsi trois jours entiers, puis les invités prirent congé, sauf la princesse qui, avec la permission de son mari, demeura pendant un mois au château du duc. Mais ce séjour s'écoule rapidement au milieu des plaisirs les plus divers, et, malgré tous les regrets, il faut se quitter ; le mari de la princesse l'exige maintenant, car il était devenu jaloux du jeune duc sur la dénonciation d'un médisant qui avait assisté à la fête et auquel fut confiée la garde de la princesse. Resté seul, le duc s'abandonne au désespoir et tombe malade. Un cousin dévoué s'efforce de calmer ses inquiétudes et de lui rendre courage en lui promettant de devenir son intermédiaire avec celle qu'il aime et de s'employer pour obtenir des entrevues. Et, de fait, par l'entremise de son cousin, le jeune duc apprend qu'il est aimé et que sa dame, malgré la surveillance étroite dont elle est l'objet, espère le revoir prochainement. A cette nouvelle, il s'empresse d'envoyer à sa bien-aimée une lettre suppliante et deux ballades dont le dévoué cousin se fait encore le messenger. Une correspondance amoureuse s'établit entre eux, puis



un rendez-vous est ménagé ; sous le déguisement d'un valet, le duc parvient auprès de la princesse, et tous deux, pendant une nuit, s'expriment, dans un tendre duo, leurs sentiments d'affection, en se promettant sincèrement de conserver toujours l'idéal de l'amour, c'est-à-dire de ne jamais penser à commettre le mal.

Mais bientôt un nouvel incident se produit qui sépare pour quelque temps les deux amoureux. La confidente de la princesse se trouve forcée de quitter la cour pour une affaire importante, et, sans elle, il n'est plus possible de ménager d'autres entrevues. Dans cette circonstance, la duchesse se souvient d'une dame de la Tour qui l'avait presque élevée et qu'elle savait discrète et de bon conseil ; elle lui écrit pour lui demander de redevenir sa confidente ; mais, en réponse, Sibylle de Monthault, dame de la Tour, lui adresse une longue lettre par laquelle elle lui reproche sa conduite, en fait ressortir les dangers et l'exhorte à renoncer à ses amours, mettant en opposition de ces craintes toutes les satisfactions complètes que peut éprouver une jeune femme en se consacrant aux soins de sa maison et à l'éducation de ses enfants. Cette lettre constitue en somme un véritable petit traité de morale qui a ici un peu l'apparence d'un hors d'œuvre, de sorte qu'on peut se demander si Christine l'a composé spécialement pour être introduit dans le *Duc des vrais amants*. Ce qui est certain, c'est qu'elle s'est plu à reproduire presque textuellement cette lettre au chapitre xxvii de la première



partie de son *Livre des Trois Vertus pour l'enseignement des dames* <sup>1</sup>.

Les conseils de la sage gouvernante eurent momentanément une certaine influence sur l'esprit de la princesse qui fit part à son amant de ses nouveaux sentiments de crainte et de regrets en lui signifiant presque son congé ; mais, à la supplication désolée du duc, la noble dame revient bientôt à d'autres sentiments et lui annonce avec bonheur le retour de sa confidente qui pourra leur procurer d'autres rendez-vous.

Ainsi, pendant deux années, le jeune duc resta attaché à ses amours sans s'éloigner du pays ; mais, le bruit de ses aventures s'étant répandu, il dut, sur l'avis de ses parents, partir dans l'armée pour une expédition en Espagne qui dura toute une année.

Revenant auprès de sa dame, puis repartant pour de nouvelles expéditions, il mena pendant dix ans une existence des plus aventureuses ; traversant les mers à la recherche des continents, fait prisonnier dans une terrible rencontre, nous le voyons à ses retours assailli par les sentiments divers que fait naître l'amour, tantôt comblé d'une joie mitigée par la crainte des médisants, tantôt fou de jalousie et d'appréhensions imaginaires au point de perdre les bonnes grâces de sa dame.

Pendant ce temps, le duc composait des ballades, lais, complaints et autres dits « dont un joyeux

1. Voir plus loin, p. xiv



entre dix doloireux avoit ». La princesse lui répondait de la même façon.

Christine a placé à la suite de son poème une série de ces petites pièces qu'elle met tour à tour dans la bouche du duc et dans celle de la princesse et qui se termine par les lamentations, sous forme de complainte, de la dame qui croit avoir perdu pour toujours l'affection de son amant.

Tel est l'ensemble de cette intéressante composition dont les héros sont très probablement des personnages contemporains; il s'agit sans doute des aventures d'un jeune duc de la maison de France. Nous avons donc recherché quel pouvait être, à la fin du xiv<sup>e</sup> siècle ou dans les premières années du xv<sup>e</sup> siècle, le prince que ce poème devait concerner. C'est, en effet, à cette époque que Christine a composé son livre du *Duc des Vrais Amans*, qui est certainement antérieur au *Livre des Trois Vertus pour l'Enseignement des dames*, où se trouve reproduite, dans la première partie, l'épître mentionnée plus haut de Seville de la Tour<sup>1</sup>; or, il est admis que le *Livre des Trois Vertus* a été

1. L'épître, adressée par Seville de la Tour à la duchesse, reproduite presque textuellement au chapitre xxvii du livre I, est précédée de ce préambule :

« Pour ce que l'Epistre qui est contenue au livre du duc des  
« vrais amans, ou il est mis que Seville de la Tour l'envoya a  
« la duchesse, puet servir au propoz qui ou chapitre cy après  
« ensuit sera de rechief recordée. Sy la puet passer outre qui  
« veult, se au lire luy ennuye ou se autrefois l'a veue, quoy que  
« elle soit bonne et prouffitabile a ouÿr et notter a toutes dames  
« et haultes princesses et a autres a qui ce puet appartenir. »



écrit presque aussitôt après celui de la *Cité des Dames*, c'est-à-dire vers la fin de l'année 1404<sup>1</sup>.

Après avoir passé en revue tous les princes de la maison royale pouvant à cette époque être qualifiés de ducs, un seul nous a paru réunir les conditions nécessaires pour être le héros des aventures retracées par Christine. Malheureusement, nous n'avons pu jusqu'ici déterminer un fait précis qui transforme en certitude notre supposition vraisemblable. Ce prince serait le duc Jean I<sup>er</sup> de Bourbon, fils du duc Louis II et d'Anne, dauphine d'Auvergne, comtesse du Forez. Né en mars 1380, on sait qu'il épousa, le 24 juin 1400, Marie de Berry, fille du duc Jean, qui était veuve de Philippe d'Artois, comte d'Eu, connétable de France (mort le 15 juin 1397) et, en premières noces, de Louis III de Chatillon, comte de Dunois (mort le 15 juillet 1391). Il est même fort possible que le poème du duc des *Vrais Amans* nous retrace les premières amours de Jean de Bourbon et de la duchesse de Berry. Christine n'a-t-elle pas composé une ballade dans laquelle elle fait allusion aux voyages lointains et aux amours du duc de Bourbon ?

Dont ne croy pas que celle qui enlase  
Vo gentil cuer en s'amour, quant le faiz  
Du hault labour, qui nul temps ne vous lasse,  
Ot raconter, que se souffrist jamais

1. Le *Livre des Trois Vertus* est dédié à la princesse Marguerite de Bourgogne, qui venait d'épouser le duc de Guyenne le 31 août 1404.



De vous amer, quoy que tenu  
 Vous soyez loings, mais souvent et menu  
 D'or en avant verrez sa doulce face,  
 Pour au plaisir honorable avenir  
 Que dame peut donner sans que mefface.

(Tome I. *Encore aultres Balades. IX, p. 278.*)

Les deux manuscrits qui ont servi à l'établissement de notre texte sont ceux de la famille A qui renferme seule le poème du *Duc des Vrais Amans*.

#### IV. — CENT BALLADES D'AMANT ET DE DAME

Nous retrouvons dans ce recueil les mêmes sentiments que dans le *Duc des Vrais Amans*. Des alternatives identiques de situation s'y rencontrent même à un tel degré <sup>1</sup> que l'on peut se demander si ce nouveau poème ne forme pas la contre-partie du *Duc des Vrais Amans* et n'aurait pas été écrit par Christine à la prière de la duchesse Marie de Berry <sup>2</sup>. Dès les premiers vers Christine déclare, en effet, que la composition de ces ballades lui a été presque imposée par une personne « doulce et debonnaire qui plaie doit bien a tous » et comme punition pour avoir sou-

1. Cf., par exemple, la Ballade LIII, p. 263, avec les vers 20 à 32 de la complainte qui termine le *Duc des Vrais Amans*.

2. Dans l'introduction du tome I, p. 13, nous avons dit que cette œuvre devait être composée pour la reine Isabelle de Bavière; mais une étude plus approfondie et la relation que nous avons cru apercevoir entre les deux poèmes nous font aujourd'hui modifier sur ce point notre première supposition.



tenu que les dames d'honneur doivent toujours se garder des impressions de l'amour.

Ce recueil de ballades, complètement inconnu jusqu'ici, n'existe que dans le ms. Harley 4.431, du Musée Britannique et est désigné dans notre tableau généalogique des manuscrits sous la lettre A<sup>2</sup>, ainsi que nous l'avons indiqué dans la préface du tome I, p. 12 à 14.

Un autre exemplaire des *Cent Balades d'Amant et de Dame* se trouvait dans la Bibliothèque de Charles le Téméraire, comme le constate un Inventaire dressé à Dijon en 1477 (Barrois, *Bibl. protyp.*, n° 679). Un troisième manuscrit devait également renfermer cette composition à la suite de plusieurs œuvres de Christine, c'est le volume mentionné dans l'inventaire fait à Bruges en 1467 sous le n° 940 (Barrois) et à l'Inventaire de Bruxelles du 15 novembre 1487, sous le n° 1665. Ce dernier manuscrit <sup>1</sup>, est en effet, indiqué comme se termi-

1. Ce manuscrit doit être le même que celui indiqué dans Barrois (*Bibl. protyp.*) sous le n° 940 comme figurant à l'Inventaire de 1467 sous la rubrique suivante : « 940. Ung autre « gros livre en parchemin couvert d'ais rouge, intitulé au dehors : « *C'est le livre des Cent Balades*, començant au second feuillet « après la Table : *Tous mes bons jours*, et au dernier : *Car son « retraire.* »

Nous pouvons, en effet, identifier le n° 940 avec le n° 1665 de l'Inventaire de 1487. Le premier vers du dernier feuillet « *Car son retraire* ou attraire » n'est séparé des derniers mots du même feuillet « *me fera tourner en cendre* » que par 93 vers qui, à deux colonnes par page, ne représentent certainement pas plus de la valeur d'un feuillet complet.

Le second feuillet est indiqué comme commençant par : « *Tous*



nant par les mots « *me fera tourner en cendre* » qui forment bien le dernier vers du lay de *Dame ou Mortel*, complément des *Cent Balades d'Amant et de Dame*.

Nous n'avons pu savoir ce que sont devenus ces deux manuscrits. Le manuscrit de Londres est donc le seul qui nous conserve le texte d'une

*mes bons jours* », mais il paraît y avoir doute sur l'incipit qui est donné en deux leçons au n° 1665 :

« De tous mes  $\left\{ \begin{array}{l} \text{boni ou se mele chose moult dur} \\ \text{biens et de ma norriture.} \end{array} \right.$  » (sic)

Ce manuscrit figure plus tard à l'Inventaire de Charles Quint dressé à Bruxelles en mai 1536 sous la désignation suivante :

« Au XI° pupitre

« Ung gros livre en parchemin, escript à la main, couvert de « meschant cuyr rouge a ix clous et deux clouans de leton, intitulé : *Rondeaulx et Épistres amoureuses*, comenchant au second « feuillet, *Tous mes bons jours*. » (Bibl. Nat. 500 de Colbert, 129 fol. 74 v°, et publié dans *Bull. de la Commision royale d'histoire*, 3° série, XIII, 314. Bruxelles, 1872.)

Il est ensuite recensé dans les Inventaires de mars 1568, 1577 (Viglius, n° 503), 1643 (Sanderus) et 1731 (Franquen), mais on ne le trouve plus à l'Inventaire de Gérard rédigé en 1797. C'est donc entre ces deux dernières dates qu'il est sorti de la Bibliothèque des ducs de Bourgogne (Marchal, *Cat. des manuscrits de la Bibl. roy. des ducs de Bourgogne*, I, 261).

Il est à remarquer que le premier vers du deuxième feuillet de ce manuscrit est le même que celui du manuscrit du duc de Berry conservé à la Bibl. Nat. et dont nous avons donné la description t. I, p. 5 à 12 ; cependant, aucune assimilation n'est possible entre eux, le manuscrit de la Bibl. Nat. ne renferme, en effet, ni la *Cité des Dames* ni les *Cent Balades d'Amant et de Dames*, et fit d'ailleurs aux xv° et xvi° siècles partie de la librairie des ducs de Bourbon à Moulins, puis à dater de 1523, de la Bibliothèque du Roi.



composition, intéressante et pleine d'une douce mélodie, qu'il eût été regrettable de voir perdue pour la postérité.











# NOTE SUR LE MANUSCRIT

## OFFERT PAR CHRISTINE DE PISAN

A ISABEAU DE BAVIÈRE

(MUSÉE BRITANNIQUE, HARLEY 4431)

---

Au présent volume est jointe une reproduction photographique de la miniature de présentation du ms. Harleyen 4431 du Musée Britannique <sup>1</sup>. On a dit,

1. La photographie a été réduite de façon à pouvoir prendre place dans le volume. Les dimensions du manuscrit sont 37 centimètres pour la hauteur et 26 pour la largeur. — Un fac-similé en couleurs de la miniature a été publié par Henry Shaw, *Dresses and decorations of the Middle Ages* (London, 1843, in-4°, non paginé), à sa date (le numéro du manuscrit est transcrit 6441 au lieu de 4431), mais les couleurs n'ont pas été mises exactement. Il n'est donc pas inutile d'en donner une indication correcte. Le plafond est d'or ; les poutres sont alternativement rouges et vertes. L'azur des armes de France est moins foncé que celui des armes de Bavière (dans le fac-similé de Shaw l'azur est uniformément remplacé par une teinte brune). La reine porte une robe de brocard amaranthe. Elle est assise sur un canapé rouge vif, de la même teinte que le lit. Christine porte une robe bleue. Le livre qu'elle présente est relié en rouge avec cinq clous d'or. Les deux



dans la préface du tome I (pp. xii et xiii) que ce magnifique livre avait été fait pour la reine Isabeau de Bavière. Il n'est pas hors de propos de résumer ici ce que l'on sait de son histoire. Le premier feuillet de garde, heureusement conservé, porte diverses signatures qui ont permis à Sir Frédéric Madden, conservateur des manuscrits du Musée Britannique, de déterminer les collections dont il a fait partie avant d'entrer dans la Bibliothèque d'Edward Harley, comte d'Oxford, avec laquelle il a été acquis par le Musée <sup>1</sup>.

Il est probable que le manuscrit de Christine suivit la fortune des livres réunis par Charles V et Charles VI, qui furent acquis en bloc par Jean, duc de Bedford, régent de France, en 1425 <sup>2</sup>. Celui-ci donna sans doute ce beau livre à Jaquette de Luxembourg, sa seconde femme, qu'il épousa en 1432. On lit, en effet, sur le premier feuillet de garde la signature *Jaquete*, dont Sir Frédéric a donné le fac-similé <sup>3</sup>. Le duc de Bedford étant mort (14 septembre 1435), sa veuve se remaria (1437) et épousa Sir Richard Wydeville, créé comte Rivers le 24 mai 1466. L'aîné des enfants issus de ce mariage fut Antony Wydeville, second comte Rivers, qui a laissé son autographe sur le premier feuillet de garde du manuscrit, à côté de la signature de sa mère : *Nulle la vault. A. Rivieres* <sup>4</sup>. C'est ce personnage qui traduisit en anglais les Proverbes moraux de Christine,

dames du fond sont vêtues de robes sombres tirant sur le noir. Les quatre dames placées à droite portent la première une robe verte, la seconde une robe rouge, la troisième une robe bleue, la quatrième une robe brune. Les deux chiens sont blancs.

1. Dans un mémoire intitulé : *Narratives of the arrival of Louis de Bruges, seigneur de la Gruthuyse, in England, and of his creation as Earl of Winchester in 1472*, imprimé dans l'*Archæologia*, t. XXVI (1836), pp. 265 et suiv.

2. Delisle, *Le Cabinet des manuscrits*, I, 52.

3. P. 272 du mémoire précité.

4. Fac-similé dans le mémoire précité, p. 213.



et il n'est pas douteux qu'il a dû en prendre le texte dans son manuscrit. Antony Wydeville mourut sur l'échafaud en 1483. Après sa mort, le manuscrit de Christine passa entre les mains d'un des plus célèbres bibliophiles du x<sup>v</sup>e siècle, Louis de Bruges, sire de la Gruthuyse, qui a écrit sur le même feuillet de garde sa devise et son nom :

*Plus est en vous.  
Gruthuse.*

Louis de Bruges mourut en 1492. La plus grande partie de ses livres fut recueillie par Louis XII, en des circonstances qui sont encore mal connues <sup>1</sup> ; plusieurs cependant passèrent en d'autres mains. De ceux-là les uns arrivèrent plus tard par des voies différentes à la Bibliothèque du Roi, les autres se trouvent actuellement répartis entre diverses collections <sup>2</sup>. A cette dernière catégorie appartient le manuscrit de Christine. On ignore par qui il fut recueilli après la mort de Louis de Bruges. Tout ce qu'on sait, c'est qu'en 1676 il appartenait au duc de Newcastle qui a apposé sa signature sur le premier feuillet de garde, comme suit :

*Henry duke of Newcastle,  
his boke, 1676.*

En 1713, Lady Henriette Cavendish Holles, petite-fille de Henry, duc de Newcastle, épousa Edward Harley, qui devint comte d'Oxford, à la mort de son père Robert Harley (1724) <sup>3</sup>. C'est ainsi que le manuscrit

1. Voy. Delisle, *Le Cabinet des manuscrits*, I, 140 et suiv.

2. Delisle, ouvr. cit., I, 145 ; III, 349.

3. Edward Edwards, *Lives of the founders of the British Museum* (Londres, 1870), p. 234.



offert, entre 1410 et 1415<sup>1</sup>, à Isabeau de Bavière par Christine, entra dans la célèbre collection Harleyenne, qui, acquise en 1753 par acte du Parlement, devint l'un des éléments avec lesquels fut constitué le Musée Britannique.

Paul MEYER.

1. Voy. la préface du tome I de cette édition, p. xxxvij.







## L'OROYSON NOSTRE DAME

---

CY COMMENCE UNE OROISON DE NOSTRE DAME

I **O** Vierge pure, incomparable,  
Pleine de grace inextimable,  
De Dieu mere très glorieuse,  
4 A qui te requiert secourable,  
Ma priere soit acceptable  
Devant toy, Vierge precieuse!  
Doulce dame, si te requier  
8 Que m'ottroies ce que je quier :  
C'est pour toute crestienté  
A qui paix et grant joye acquier  
Devant ton filz et tant enquier  
12 Que tout bien soit en nous enté.

AVE MARIA.

II **E**t, si com saint Bernart tesmogne,  
Celle es par qui nous prolongne

(A<sup>1</sup> fr. 836, fol. 45 v°; A<sup>2</sup> fol. 267; B<sup>2</sup> fol. 154.) *Rubrique manque dans A<sup>1</sup>.* — 12 A<sup>1</sup> n. henté



16 Tout mal et qui adès ne fine  
 De procurer nostre besoigne,  
 Devers Dieu priant qu'il n'esloigne  
 De nous sa grace pure et fine,  
 Pour sainte Eglise requerir  
 20 Ce vueil qu'il te plaise acquerir  
 Paix et vraie tranquillité,  
 Et si bon pastour nous querir  
 Qui tous nous face a Dieu courir  
 24 En foy et en humilité.

## AVE MARIA.

III **V**ierge sacrée, pure et ferme,  
 Si com saint Bernard nous afferme  
 En son saint sermon de l'Advent,  
 28 Celle qui en foy nous conferme  
 Et en purté, et nous defferme  
 Le ciel, si comme il fu convent,  
 Je te pri pour tous les prelaz  
 32 De sainte Eglise que des laz  
 De l'anemi tu les deffendes,  
 Curés et prestres, leur solas  
 Soit en bien faire et jamais las  
 36 Ne soient, et qu'ou ciel les rendes.

## AVE MARIA.

IV **O**nette, pure et enterine,  
 De toute bonté la racine,  
 Si com saint Jerosme nous dit,  
 40 Assise ou plus hault termine  
 Du ciel par la grace divine



Après ton filz, com fut predict,  
Pour le roy de France te pri  
44 Qu'en pitié tu oyes le cry  
De ses bons et loyaulx amis,  
Paix et vraye santé descry  
A lui et ou livre l'escry  
48 Ou Dieu a tous ses eslus mis.

## AVE MARIA.

V  
O tu, Vierge predestinée  
Trés avant que tu fusses née,  
Ainsi le dit saint Augustin,  
52 De la Trinité ordennée,  
Pour nostre sauvement donnée,  
Pure et parfaite par destin,  
Pour nostre roïne de France  
56 Te pry qu'elle n'ait ja souffrance  
De peine infernal, et lui donnes  
Joye et paix, et tiens en souffrance  
Long temps au monde ; après l'outrance  
60 De la mort de son ame ordonnes.

## AVE MARIA.

VI  
D ame des angelz très courtoise,  
Si com tesmoingne saint Ambroise,  
Mirouer de toute vertu,  
64 Vraye humilité qui la noise  
D'orgueil rabat et qui racoise  
D'yre la force, et la vertu,  
Paix, bonne vie et bonne fin  
68 Donne a mon seigneur le Daulphin  
Et science pour gouverner  
Le pueple qui de bon cuer fin



L'aime, et vueilles qu'a celle fin  
 72 Après le pere il puist regner !

AVE MARIA.

VII      **R**oïne, qui des maulx nous leve  
             Lesquelx nous empetra dame Eve,  
             Si com saint Augustin raconte,  
 76      Tu es celle qui n'es pas teve  
             A nous expurgier de la ceve  
             De pechié qui trop nous surmonte ;  
             Pour les enfans du roy priere  
 80      Te fais, Vierge très sainguliere,  
             Que tu leur donnes bonne vie,  
             De vraye science lumiere  
             Et paradis après la biere ;  
 84      En eulx soit ta grace assouvie !

AVE MARIA.

VIII      **T**rés pure, qu'on ne puet louer  
             Souffisemment, tant alouer  
             S'y sache nul, dit saint Jerosme,  
 88      De doctrine le parlouer  
             Et d'onnesté le mirouer,  
             Le pilier de foy et la cosme :  
             Pour le noble duc d'Orliens  
 92      Te pry que gardes des liens  
             De l'anemi qui tousjours veille ;  
             Prie ton filz que de tous biens  
             Il remplisse lui et les siens,  
 96      Et l'ame en paradis recueille.

AVE MARIA.



IX        **V**ierge, qui tous les pechiez donbte,  
Dont en son sermon nous raconte  
Saint Bernard qui dit et recorde  
100      Que de toy louer a droit compte  
Nul n'est souffisant, et pou monte  
Vers ta bonté quanque on recorde,  
Pour les oncles du roy prier  
104      Je te vueil et mercy crier  
Que tu leur donnes paradis,  
Le royaume en paix alier,  
Tout bien, joye sans detrier,  
108      Sapience en fais et en dis.

AVE MARIA.

X        **T**resoriere, qui toutes passe  
Les femmes en qui Dieu mist grace.  
Si com saint Jerosme nous dit,  
112      De sapience la grant masse  
Et celle qui noz maulx efface  
Et que Dieu point ne contredit,  
Tous les nobles royaulx enfans  
116      De mal et de peril deffens,  
Filz, filles, dames, damoiselles,  
Le laz de l'anemi pourfens  
Si qu'il ne leur puist faire offens  
120      N'a ceulx qui sont o eulx n'a celles.

AVE MARIA.

XI        **D**ame, de qui l'umain lignage  
Nese puet en ce monde ombrage



Passer, ce dit Cassiodore,  
 124 Leur patronne, leur nef, leur barge  
 Qui le conduit a droit rivage  
 Ou temps passé et ou temps d'ore :  
 Et pour d'Alembret le bon Charles  
 128 Te suppli qu'a ton doulz filz parles  
 Et pour tout le bon sang royal,  
 Soyent ou femmeles ou masles,  
 Deffens des peines infernales  
 132 Et qui l'aime de cuer loyal.

## AVE MARIA.

XII Fontaine, pleine de pitié,  
 De grace et de toute amistié,  
 Dist saint Bernard en son sermon,  
 136 Commune a tous, bien exploitié  
 A qui de toy s'est acointié,  
 Car de pechié romps le lymon,  
 Je te pri, m'oroison reçois,  
 140 Et le royaume des François  
 De mal et de peril tu gardes  
 Et d'anemis, se l'aperçois,  
 De guerre et de contens, ainçois  
 144 Que tes loyaulx amis y perdes.

## AVE MARIA.

XIII O Lumiere celestiele,  
 De nous conduire la droite elle,  
 Si comme dit saint Anseume,  
 148 Qui tant portas douleur cruele  
 A la mort ton filz qui t'appelle,  
 Tu lui es deffense et heaume :



Pour la noble chevalerie  
152 De France, je te pri, Marie,  
Et pour tous nobles ensement,  
Leur ame ja ne soit perie ;  
Par toy et par eulx soit garie  
156 France de mal et de torment.

## AVE MARIA.

XIV **O** engendrererece de vie,  
Et de Dieu espouse et plevie,  
De toy saint Bernard le recorde,  
160 En corps et en ame ravie,  
Ou hault ciel en gloire assouvie,  
Fontaine de Misericorde :  
Pour le clergié et les bourgeois,  
164 Dame, priere je te fois,  
Et pour marchans et pour commun,  
Prie Cil qui moru en croix  
Que aux ames leur soit courtois,  
168 Et tout bien soit entr'eulx commun.

## AVE MARIA.

XV **D**ame, de grace la droite ente,  
Qui devant Dieu nous represente,  
Et ce tesmoigne saint Bernard,  
172 Nostre moyen et nostre sente,  
Nostre escu quant pechié nous tenpte,  
Qui pour nous prie main et tart ;  
Pour tous les laboureurs de terre  
176 Te pri que leur vueilles acquerre  
Sauvement, et leur donnes grace  
Que tel labour puissent pourquerre,



Dont Dieu soit servi en tout erre  
 180 Et toute la terre en soit grasse.

AVE MARIA.

XVI **C**oulombe simple, sade et blanche,  
 De pechié monde, pure et franche,  
 Si comme ton filz t'appella,  
 184 Quant de la mort passas la planche  
 Et entre ses bras comme branche  
 Ou ciel te porta, pour cela  
 Te pri pour tous les trespassez  
 188 De Purgatoire qu'effacez  
 Soit de leurs pechiez le limon ;  
 Si soient en gloire passez,  
 Et de ton filz soit embracez  
 192 L'esperit Charles roy quint du nom.

AVE MARIA.

XVII **V**ierge mere, de Dieu ancelle,  
 De la Trinité temple et celle,  
 Saint Jerosme en fait mencion,  
 196 Après l'enfantement pucelle,  
 Sur toutes femmes tu es celle  
 Qui de grace eus prevencion :  
 Pour le devot sexe des femmes  
 200 Te pri que leur corps et leur ames  
 Tu ayes en ta saintte garde,  
 Soient damoiselles ou dames  
 Ou autres, gard les de diffames  
 204 Et que feu d'enfer ne les arde.

AVE MARIA.



XVIII      **V**ierge pure, par les fontaines  
De tes chastes yeulz et les peines  
208      Qu'a ton filz veïs en la croix,  
Dist saint Amsiaume, et les vaines  
De son corps qui pendoit en aines  
Ouvertes, te pri qu'os ma voix  
Et a ton filz, qui fut mort mis  
212      Pour moy et pour tous mes amis,  
Il te plaise a faire priere,  
Et la gloire, qu'il a promis  
A ceulx qui ont pechié remis,  
216      Nous ottroit et grace plainiere.

AMEN.

*Explicit*

210 A<sup>2</sup> B<sup>4</sup> p. oy — 217 A<sup>1</sup> AVE MARIA.











# LES XV JOYES

## NOSTRE DAME

---

CY COMMENCENT LES XV JOYES  
DE NOSTRE DAME RIMÉES

**G**lorieuse dame, je te salue  
Trés humblement, de celles quinze joyes  
Qu'en terre eus, doulce dame impolue,  
4 Par ce te pry que reconfort m'envoyes.

AVE MARIA.

**P**rie pour moy, beneurée pucelle,  
I Pour le salu qui vint de Dieu le pere  
Que t'aporta l'archange et la nouvelle  
8 Que du filz Dieu seroies vierge mere.

AVE MARIA.

(A<sup>1</sup> fr. 836, fol. 47; A<sup>2</sup> fol. 269; B<sup>3</sup> fol. 156.) — 2 A<sup>2</sup> B d'icelles  
q. — 5 A Priez — B<sup>1</sup> m. doulce dame p. — 6 B<sup>2</sup> Par — 7 A<sup>2</sup> te  
porta — 8 B<sup>2</sup> de D.



- II        **E**mpetres moy grace pour celle joye  
          Que tu eus quant ta cousine encontras  
          Helizabeth, qui salu en la voye  
12        Te donna lors qu'en sa maison entras.

AVE MARIA.

- III       **D**oulce dame, vueilles pitié avoir  
          De mon ame pour ycelle leesce  
          Que tu eus quant en ton ventre mouvoir  
          Le Filz de Dieu sentis plein de sagece.

AVE MARIA.

- IV       **D**igne Vierge, qui le Sauveur portas,  
          Pour ycelle grant joye, secourir  
          Tu me vueilles, que eus quant l'enfantas,  
20        Et vien a moy quand je devray mourir.

AVE MARIA.

- V        **O** Marie, garde moy des faulx tours  
          Et de l'agait de l'anemi soubtil,  
          Pour la joye que eus quant les pastours  
24        Te trouverent et ton benoit chier fil.

AVE MARIA.

- VI       **P**our la grant joye et consolacion,  
          Doulce Dame, que eus quant les troys roys  
          A ton doulz filz par grant devocion  
28        Vindrent offrir, gard moy de tous desroys.

AVE MARIA.



VII **P**our ycelle joye qu'eus, chiere dame,  
 Quant ton chier filz très digne offris au Temple,  
 De mal garder vucilles mon corps et m'ame  
 32 Et me donnes vivre a ton bon exemple.

AVE MARIA.

VIII **R**econfortes mon las cuer esperdu  
 Pour la joye que eus quant retrouvast  
 Ton chier enfant que avoyes perdu,  
 36 Et au Temple, Dame, tu le trouvas.

AVE MARIA.

IX **V**ierge, pries qu'a moy aidier enclin  
 Soit ton doulz filz, pour ycelle grant joye  
 Qu'eus aux nopces de saint Archetheclin,  
 40 Quant d'eaue vin fist par divine voye.

AVE MARIA.

X **Q**ue mon corps gard de toutes meffaçons  
 Pries ton filz, pour la joye sacrée  
 Qu'eus quant de .v. pains d'orge et .ii. poissons  
 44 Cinq mille hommes replanis en la prée.

AVE MARIA.

XI **P**our la joye qui en toy habita,  
 Très doulce Dame, en ycelle journée  
 Que ton doulz filz de mort ressuscita,  
 48 Me soit joye celestiel donnée.

AVE MARIA.

39 A<sup>2</sup> B<sup>2</sup> Archedeclin — 43 Tous les manuscrits portent et de  
 .ii. — A<sup>2</sup> de .iii. p. — 46 B<sup>2</sup> a y.



- XII **D**oulce Dame, pour la joye plainiere  
 Qu'a Pasques eus quant ton filz t'apparu  
 Ressuscité, essaulces ma priere,  
 52 Et mez en moy la mort dont il moru.

AVE MARIA.

- XIII **P**ries ton filz qu'après lui il me traye,  
 Pour la joye qu'eus a l'Ascension,  
 Quant il monta ou ciel, c'est chose vraye,  
 56 Si vrayement ay je salvacion.

AVE MARIA.

- XIV **D**oulce dame, pour ycellui plaisir  
 Que tu eus quant le Saint Esperit vint  
 Aux Apostres conforter leur desir,  
 60 Ainsi me puist venir com leur avint.

AVE MARIA.

- XV **V**ierge digne, pour la joye enterine  
 Que eus au jour de ton Assompcion  
 Qu'en ciel montas, de pechié la racine  
 64 Ostes de moy et mez devocion.

AMEN.

*Explicit*

63 B Que ou c. — A' AVE MARIA.







# UNE OROYSON DE NOSTRE SEIGNEUR

---

CI COMMENCE UNE OROISON  
DE LA VIE ET PASSION DE NOSTRE SEIGNEUR

I      Sire Jhesus, mon oroison entens  
Et me donnez grace que je recite  
Ta très digne vie et mort, que j'entens  
4      A recorder, vueilles qu'il me proffite.

PATER NOSTER.

II      Conseillez moy pour le conseil très digne  
Qui ou ciel fu pour no redempcion  
Pris, que ça jus descendroies benigne  
8      Et prendroies nostre incarnation.

PATER NOSTER.

III      Fay mon cuer lié en toy pour le salut

(A<sup>1</sup> fr. 836, fol. 63; A<sup>2</sup> fol. 259.) *Rubrique manque dans A<sup>1</sup>.*



- Qu'a la Vierge par Gabriel tramis  
Lui annonçant que pour nostre salut  
12 T'enfanteroit comme il estoit promis.

PATER NOSTER.

- IV O bon Jhesus, pour ta Nativité  
Conforte moy et aide en tout besoing,  
De mes pechiez oste l'iniquité  
16 Et ne sueffres que de toy soye loing.

PATER NOSTER.

- V Très doulz enfant, Emanuel plaisant,  
Je te requier que pour yceulx pastours  
Qui en creche te trouverent gisant  
20 En tous besoins j'aye de toy secours.

PATER NOSTER.

- VI Pour le digne sang que tu respendis  
A cellui jour que circoncis tu fus,  
Sapience me donne en fais et dis  
24 Et ne soit ja mon esperit confus.

PATER NOSTER.

- VII Ottroye moy toy faire oblacion  
Et offrande qui te soit agreable  
Si com firent par grant devocion  
28 Les bons trois roys que tu os acceptable.

PATER NOSTER.

- VIII L'offrande que de toy ta mere au Temple  
Fist, doulz Jhesus, es braz du saint prophete



32 Symeon qui t'attendoit, soit exemple  
De m'ame offrir a toy Dieu qui l'as faitte.

PATER NOSTER.

IX En remembrant ton enfance et joennesce,  
Beau sire Dieux, qui tant fu nette et pure,  
Mes jours passer me donnes en leesce  
36 Sans vice avoir et m'ame prens en cure.

PATER NOSTER.

X Le baptesme, que de saint Jhean receups  
Ou flun Jourdain quant la voix fu oÿe  
De Dieu qui dist : « C'est mon Filz esleüs ! »  
40 Face en vertus mon ame resjoÿe.

PATER NOSTER.

XI Pour la saintte jeune que tu volz faire  
Quand baptisiez fus entrez ou desert  
Quarante jours, ottroye moy perfaire  
44 Tel jeune dont mon pechié soit desert.

PATER NOSTER.

XII Tes grans vertus et tes miracles sainttes,  
Tes doulz sermons et ta digne parole,  
Mon doulz Sauveur, soyent en moy empraintes  
48 Si que n'aye cure de vie mole.

PATER NOSTER.

XIII Doulz Jhesu Crist, sens me donne et memoire  
De recorder en tel compassion  
Ta digne mort que me conduise en gloire  
52 Le digne effect d'ycelle Passion.

PATER NOSTER.



- XIV O bon Jhesus, pour celle saintte cene  
Que tu feïs avec tes bons amis  
Quant ton saint corps leur donnas, m'ame assene  
56 Ou lieu ou as tous tes sains esleuz mis.

PATER NOSTER.

- XV Pour cellui sang qu'adorant a ton pere  
Ou jardin volz espandre pour l'orreur  
De ta grief mort, ensuivant ce mistere,  
60 Me deffende de pechié et d'erreur.

PATER NOSTER.

- XVI Jhesus qui volz a heure de matines  
Des faulz Juifs estre pris et lié  
Pour noz pechiez a celle heure m'enclines  
64 A toy t'aourer de cuer humilié.

PATER NOSTER.

- XVII Sire, qui volz souffrir par ton humblece  
Le faulz Judas toy baisier et traïr,  
Si humble rens mon cuer qu'orgueil ne blece  
68 M'ame et me fay pour toy pechié haïr.

PATER NOSTER.

- XVIII Pardonne moy mes pechiez en l'onneur  
De ton saint col et dignes mains qui tant  
Estroit liez furent a deshonneur  
72 Par les felons qui t'aloient batant.

PATER NOSTER.

- XIX O digne saint filz de Dieu très humain,

64 A<sup>1</sup> t. orer — 70 Le ms. B dont plusieurs feuillets ont été  
arrachés donne seulement à partir de ce vers, fol. 121, le texte de  
l'Oraison.



76 Qui chieux Anne celle nuyt mal mené  
Fus et bandé et ferus jusqu'au main,  
Fay que de toy soit mon desir mené.

PATER NOSTER.

XX Sauve moy, doulz Jhesus, en remembrance  
Qu'a l'evesque Caÿphe on te mena  
Au point du jour ou par irreverence  
80 On t'accusa, frapa et malmena.

PATER NOSTER.

XXI Dieux, donne moy pacience en memoire  
Que fus ferus devant Cayphe a tort  
Et accusé, et pour parole voire  
84 Que tu lui diz te dist digne de mort.

PATER NOSTER.

XXII Beau sire Dieux, qui a heure de prime  
Chieux Pylate fus mené par envie,  
La accusé sans desserte et sans crime,  
88 Donne moy sens de vivre en saintte vie.

PATER NOSTER.

XXIII O mon Sauveur, très doulz aignel sans tache,  
Si vrayement que sans cause batu  
Chieux Pylate fus liés a l'estache,  
92 Ne soit mon sens de deables abatu.

PATER NOSTER.

XXIV Sire Jhesus, pour ycelle couronne  
Dure et poingnant jusqu'au cervel qu'ou chief  
Par grant desdaing te mirent, me pardonne



96 Mes griefs pechiez et me gard de meschief!

PATER NOSTER.

XXV Mon Createur, le gabois et desroy  
Et le mantel de porpre et les bateures  
Qu'on te faisoit, disant : « Dieu te gard, roy ! »  
100 De mes pechiez deffacent les laidures.

PATER NOSTER.

XXVI Tes dignes yeulx bandez, ta sainte face  
De très grans cops noircie et decrachée,  
Ton digne sang qui decouroit a trace,  
104 Me deffendent qu'en griefs pechiez ne chée.

PATER NOSTER.

XXVII Le hydeux cry disant : « Ostez le nous,  
Crucefie le ! » que crierent Juifs  
Encontre toy, mon Createur très doulz,  
108 Me soit d'avoir pacience conduis.

PATER NOSTER.

XXVIII Mon Redempteur, qui condenpné a heure  
De tierce fus par Pylate, ses mains  
Lavant, te pri qu'a mes besoins je cuere  
112 A toy et tu me prengnes en tes mains.

PATER NOSTER.

XXIX Dieu qui souffris sus tes espaules mettre  
La très grant croix, toy menant au martire,  
Ta passion en mon cuer sans desmettre  
116 Vueilles fichier si qu'a t'amer me tire.

PATER NOSTER.



XXX Pardonne moy mes pechiez pour les larmes  
Que tu gittas disant vers la cité :  
« Plourez sur vous, de Jherusalem dames  
120 Et filles, car avez adversité. »

PATER NOSTER.

XXXI Celle douleur qui te fu trop diverse  
Quant arrivé fus au Mont de Calvaire  
A despoullier ta robe qui aherse  
124 Aux plaies fu, face m'ame a toy traire.

PATER NOSTER.

XXXII O mon Seigneur, envoie moy fontaine  
De plour, pensant comme fus estendu  
Dessus la croix ou l'un braz a grant peine  
128 Oz a un clou fichié moult fort tendu.

PATER NOSTER.

XXXIII La cruaulté des Juifs nonpareille  
Qui a cordes pour au trou avenir  
Fort l'autre main tirerent, tant me dueille  
132 Que merite j'aye du souvenir.

PATER NOSTER.

XXXIV Par tes saints piez qui detirez a cordes  
Et estendus furent pour atachier  
A un gros clou en la croix, Sire, accordes  
136 Si m'ame a toy que ne puisse pechier.

PATER NOSTER.

XXXV O mon Sauveur, innocent, amiable,  
Emprains en moy, sans partir, le recors  
De la douleur que eus inextimable



140 Quant la croix fu levée atout le corps.

PATER NOSTER.

XXXVI Mon Redempteur, en celle croix t'aour  
Ou pour moy fus atachié a trois cloux,  
Ta Passion en t'amour et paour

144 Me tiengne si qu'Enfer soit vers moy cloux.

PATER NOSTER.

XXXVII Par les larmes qu'a ta mort gitta maintes  
Et la pitié que ta Mere ot de toy  
Et pour s'amour et ses merites saintes

148 Aye pardon, Sire, et non dur chastoy.

PATER NOSTER.

XXXVIII O digne chief de Jhesu qui pendoies  
Sans place avoir ou peusses reposer,  
Fors que la croix autre oreillier n'avoyes,  
152 Fay que mon cuer puisse en toy tout poser.

PATER NOSTER.

XXXIX Ayes mercy de moy par ta pitié,  
Pour les sainttes paroles que parlas  
Pendant en croix, jusqu'a mort dehaitié,  
156 Pour nous tirer d'Enfer ou tu alas.

PATER NOSTER.

XL Pardonne moy par ta misericorde,  
Sire, qui deis : « Pere, pardonne leur,  
Car ne scevent qu'ilz font ! » mon ame acorde  
160 A ton vouloir soit de joye ou douleur.

PATER NOSTER.



- XL I Doulz Jhesus Crist qui au bon larron deis  
En croix pendant qui demandoit pardon :  
« Huy, tu seras o moy en Paradis! »  
164 Remission m'ottroye aussi par don.

PATER NOSTER.

- XLII Pour la pitié dont regardas ta mere  
Quant lui baillas pour toy saint Jehan a filz,  
Disant : « Femme, voycy ton filz! » ta amere  
168 Mort si me soit vie, saint crucefix.

PATER NOSTER.

- XLIII Sire qui deis : « J'ay soif » pendant en croix  
Et fus de vin aigre et de fiel amer  
Abeuvré, fay que quant aux griefz destroiz  
172 De mort seray te puisse reclaimer.

PATER NOSTER.

- XLIV Tu qui crias : « Heloy! » qui fu signe  
De grant douleur, disant qu'abandonné  
Ton Dieu t'avoit, soies la medecine  
176 Contre le mors qui pechié m'a donné.

PATER NOSTER.

- XLV Otroye moy grace que je commande  
Mon esperit en tes mains au trespas  
De la mort, si com feis payant l'amende  
180 De noz pechiez a ton pere en ce pas.

PATER NOSTER.

- XLVI « Consommé est! » ce deis tu, ce ert a dire  
Qu'acomplies erent les escriptures



Que prophetes orent voulu escripre  
 184 De toy, Sire, qui de mon ame cures.

PATER NOSTER.

XLVII Sire Jhesus, qui a heure de nonne  
 Ton esperit rendis a Dieu le Pere,  
 Ottroye moy que quant celle heure sonne -  
 188 Souvenance de ta mort en moy pere.

PATER NOSTER.

XLVIII Grace te rends, mon doulz Sauveur, qui volz  
 Pour noz pechiez en croix estre penenez,  
 Ta Passion face noz cuers devoz  
 192 Si qu'en Enfer ja ne soyons menez.

PATER NOSTER.

XLIX O très saintte deïté ! qui brisas  
 Enfer avec l'ame Jhesus, quant hors  
 Tyras les tiens, l'esperit qu'en moy mis as  
 196 Tires a toy quant ystra de mon corps.

PATER NOSTER.

L Dieu, ayde moy pour les signes tremblables  
 Dont le soleil mesme mua sa fourme  
 Qui a ta mort parurent redoubtables  
 200 Certefians qu'estoies Dieu et homme.

PATER NOSTER.

LI Très saint costé de Jhesus que Longis  
 Navra, dont sang et eauve hors sailli,  
 Par merite de toy, soye ou loughis  
 204 De Paradis qui jamais n'yert failli.

PATER NOSTER.

LII Mon Redempteur qui de la croix jus fus



A heure de vespres mis et osté  
Tes bons amis presens, ne fay reffus  
208 De moy, ains metz mon ame a ton costé.

PATER NOSTER.

LIII Pour les larmes qui respandues furent  
Sevelissant et oingnant ton corps saint  
Et pour ta mere et ceulz qui pitié eurent,  
212 Dieu, fay mon cuer d'ycelle pitié çaint.

PATER NOSTER.

LIV Mon doulz Sauveur, qui en sepulcre mis  
A heure de complie fus, te pry  
Que deffendes et moy et mes amis  
216 De touz perilz et oyes mon depry.

PATER NOSTER.

LV En l'onneur du sepulchre ou Magdaleine  
Le samedi matin ala cerchier  
Ton digne corps, pour l'amour et la peine  
220 Des trois dames, ayde moy, Sire chier.

PATER NOSTER.

LVI Beau Sire Dieux qui volz de mort a vie  
Ressusciter le jour de Pasques, fays  
Ressusciter mon ame qui desvie  
224 Par grief pechié se tu n'ostes le fais.

PATER NOSTER.

LVII Conforte moy en mon adversité  
Si com tu feis ta Mere, a qui en joye  
Tu t'apparus en corps ressuscité



228 Et aussi a Magdaleine en la voye.

PATER NOSTER.

LVIII Envoye moy secours pour le confort

Qu'a tes amez disciples et a Pierre

Donnas, adonc que ressuscis de mort

232 Leur apparus, yssus hors de la pierre.

PATER NOSTER.

LIX Mon doulz Sauveur, pour celle Ascension

Ou tu montas ou ciel, presens les tiens,

Quarente jours puis ta surreccion,

236 M'ame et mon corps en toy servant maintiens.

PATER NOSTER.

LX Beau Sire Dieux, et si qu'a Penthecoste

Enluminas tes Apostres du Saint

Esperit, vueilles que celle doulceur gouste

240 Qu'ilz sentirent que ta vertu ençaint.

*Explicit*

228 A Et ainsi — 233 Le texte de B<sup>1</sup> s'arrête ici par suite de  
feuilletts arrachés. — A<sup>2</sup> B<sup>1</sup> c. Assompcion — 239 A<sup>2</sup> qu'icelle d.







LES  
ENSEIGNEMENS MORaux

---

LES ENSEIGNEMENS QUE JE CRISTINE DONNE A  
JEHAN DE CASTEL, MON FILZ.

I **F**ILZ, je n'ay mie grant tresor  
Pour t'enrichir; pour ce très or  
Aucuns enseignemens noter  
Te vueil, si les vueilles noter.

II Aimes Dieu de toute ta force,  
Crains ley et du servir t'efforce,  
La sont, se bien les as apris,  
Les dix commandemens compris.

III Très ta joennece pure et monde

(A<sup>1</sup>, fr. 836, fol. 42; A<sup>2</sup> 263<sup>vo</sup>; B<sup>1</sup> fol. 118; B<sup>2</sup> fol. 149<sup>vo</sup>).

*Rubrique BC y commencent les notables moraulz de Cristine de Pizan a son filz. — Rubrique A<sup>2</sup> Ci c. l. enseignemens que Cristine donne a son f. — I 3 B<sup>6</sup> e. monstrer. — II 4 A<sup>2</sup> Ces d. — III 1 B<sup>6</sup> Des ta — III et IV intervertis dans B.*



- Aprends a congnoistre le monde  
Si que te puisses par apprendre  
Garder en tous cas de mesprendre.
- IV      Tant t'estudies a enquerre  
Que prudence puisses acquerre,  
Car celle est des vertus la mere  
Qui chace Fortune l'amere.
- V        En quelque estat que soyes mis  
Par Fortune ou tu es soubz mis  
Gouvernes toy si en tel ordre  
Que de vivre en sens ayes ordre.
- VI       Se tu veulz en science eslire  
Ton estat par les livres lire,  
Fays tant, et par suivre l'estude,  
Qu'entre les clers ne soyes rude.
- VII      Se tu es noble et veulz les armes  
Suivre, il fault que souvent t'armes,  
Ou l'en te tendroit pour faillis,  
Sans honneur, lasche et deffaillis.
- VIII     Gar toy de servir mauvais maistre,  
Car mauvais te couvendroit estre  
S'avoir vouloies benefice,  
Si vault mieulx fuïr tel service.
- IX       Soies loyal a ton seigneur  
Naturel, tu ne dois grigneur

IV 3 A<sup>1</sup> de v. — VII 3 et 4 B En mainte terre ou deffaillis —  
On te tendroit et pour faillis. — VIII 1 à 4 B Mauvais maistre ne  
sers pour rien — Car bon fruit n'yست de mal merrien — Et son  
meneur il couvient suivre — Si te fauldrait ses meurs ensuivre  
ou tost s. — 3 B<sup>6</sup> En ses meurs il te couvient s.



Foy a homme, saches de voir,  
Ne faulses pour quelconque avoir.

X Veulz tu vaincre et long temps durer ?  
Aprends ton cuer a endurer,  
Car par bien endurer apprendre  
Pourras paix et beneurté prendre.

XI Se tu as maistre, serfs le bien,  
Dis bien de lui, garde le sien,  
Son secret celes, quoy qu'il face  
Soies humble devant sa face.

XII Trop covoteux ne soies mie,  
Car covoitise est anemie  
De charité et de sagece,  
Et te gar de fole largece.

XIII Se d'armes avoir renommée  
Tu veulz, si poursui mainte armée ;  
Gard qu'en bataille n'en barriere  
Tu ne soies veü derriere.

XIV Se es capitaine de gent,  
N'ayes renom d'amer argent,  
Car a peïnes pourras trouver  
Bonnes gens d'armes s'es aver.

XV Se Fortune t'a tant amé  
Que tu soyes seigneur clamé  
Entre tes subgiez perilleux  
Ne soies, ne trop orgueilleux.

IX 4 B Faulx ne soyes pour nul a. — X *omis dans B* — XII 4  
A' Et te garde de f. — B' Te garde de — XIV 1 B Se tu es. — 4 B<sup>6</sup>  
Bons g. d'a. s'en veulx avoir. — XV *Placé dans B après le n° L.III*  
— 1 A' t'ai t.



- XVI      Se païs as a gouverner  
Et longuement tu veulz regner,  
Tien justice et cruel ne soyes  
Et de grever gens ne quier voyes,
- XVII     Se tu as estat ou office  
Dont tu te mesles de justice,  
Gardes comment tu jugeras,  
Car devant le grant juge yras.
- XVIII    S'as disciples, ne les reprendre  
En trop grant rigueur, se mesprendre  
Les vois; pense que foible et vaine  
Est la fragilité humaine.
- XIX      Se tu es homs d'eglise ou prestre,  
Religieux ou moine en cloistre,  
Gard toy que dessoubz faintte chape  
Souffisance et paix ne t'eschappe.
- XX       S'a toy n'apertient n'a ta vie,  
Ne te mesles, n'aies envie  
Sus prince ne sus qui gouverne,  
N'en fay tes devis en taverne.
- XXI      Portes honneur aux renommez  
Aux anciens, aux bons nommez,  
De vaillans gens toudis t'acointes,  
Mieulz en vauldras que des plus cointes.
- XXII     Ne soyes entre gent honteux  
Ne trop bault, fel ne rioteux,

XVI 1 B<sup>5</sup> Se pou a. — 4 B Ne d. — XVIII 1 A l. mesprendre —  
XIX 3 et 4 B N'ayes en toy grant convoitise — Papelardie ne  
faintise. — XX 3 B Des p. — 3 B<sup>6</sup> ne ceulx q.



Mais debonnaire a toute gent ;  
Tiens estat selon ton argent.

XXIII Se de marchandise te vifs  
Vens et achate a ton advis  
Si que ne perdes ou marchié,  
Mais ne deçoys nul, c'est pechié.

XXIV Se tu as besoing et mestier  
De toy vivre d'aucun mestier,  
Soies soingneux et prens en gré,  
Car ou ciel est le hault degré.

XXV Se tu viens en prosperité  
A grant chevance et herité,  
Gardes qu'orgueil ne te surmonte ;  
Penses qu'a Dieu fault rendre conte.

XXVI Tiens toy a table honnestement  
Et t'abilles de vestement  
En tel atour qu'on ne s'en moque,  
Car on congnoist l'oeuf a la coque.

XXVII Se tu es joennes et polis,  
De pou de coust soyes jolis  
Sans toy grever pour mettre en robes,  
Tiens toy net et nul ne descobes.

XXVIII Aies pitié des povres gens  
Que tu vois nudz et indigens  
Et leur aide quant tu pourras ;  
Souviengne toy que tu morras.

XXII 4 B T. toy net s. — XXIII 4 B' omet Mais — XXVI 3 A' ne se m. — XXVIII Placé dans B après XXXI — XXVIII 1 A' p. de p.



- XXIX Soies constant, tien ton propos  
Du bien faire qu'as en propos,  
Car homme qui change souvent  
Ne puet estre preux ne savent.
- XXX Aimes qui te tient a ami  
Et te gard de ton anemi;  
On ne puet avoir trop d'amis  
N'il n'est nulz petiz anemis.
- XXXI Soies veritable en parole,  
A point tais et a point parole,  
Car qui trop parle par usage  
Est souvent tenus a pou sage.
- XXXII Ne croy pas de legier raport  
Haïneux qu'autrui te raport,  
Pense se haïne ou grant yre  
Ou flaterie lui fait dire.
- XXXIII Tiens ta promesse et petit jure,  
Gard ne soies trouvé parjure,  
Car le menteur est mescreü  
Et, quant voir dit, il n'est creü.
- XXXIV Pour perte d'amis ou de biens  
Ne chées en desespoir et tiens  
Qu'assez est poissant Dieu celestre  
Pour toy aidier et pour toy paistre.
- XXXV Du bien d'autrui n'aies envie,  
Car l'envieux trés en sa vie

XXX placé dans B après XXXIII — XXXI vient dans B après  
XXIX — XXXII 3 B<sup>4</sup> P. s'œuvre ou — XXXIII 2 A<sup>1</sup> Car — XXXIII  
placé dans B après XXVIII



Possede les peines d'enfer,  
C'est plus pesant fardel que fer.

XXXVI Lis volentiers belles hystoires  
Quant tu porras, car les nottoires  
Exemples sont souvent valables  
Et font gent devenir savables.

XXXVII Ne promèz mic de legier  
Qu'on ne te tiengne a mençongier,  
Mais ce qu'as promis si le tien,  
Car le don promis n'est plus tien.

XXXVIII Ne croy pas toutes les diffames  
Qu'aucuns livres dient des femmes,  
Car il est mainte femme bonne,  
L'expérience le te donne.

XXXIX Gardes toy bien, ja ne t'aherdre  
A jeux ou chevance on puist perdre ;  
Paume et dez font souvent au bas  
Mettre maint, je n'en doute pas.

XL Se tu veulx vivre a Court en paix  
Voy et escoute et si te tays,  
Ne te courroces de legier,  
Dongereux ne soit ton mengier.

XLI Fuis compaignie riouteuse  
Et femme petit cremeteuse,  
Trompeurs, moqueurs et mesdisans,  
Et gent qui sont autrui nuisans.

XXXVI<sub>4</sub> B Et si en est on plus s. — XXXVIII A<sup>2</sup> de f. — XXXIX  
3 et 4 B Jeux de paulme et dez defenduz — Sont souvent, maint  
en sont penduz ou maintes gens p.



- XLII Se tu vois ton seigneur mesprendre  
Ou tu os ton maistre reprendre,  
Gard que de ce ta bouche n'euure,  
Ains l'excuse et son meffait cueuvre.
- XLIII Se tu es noble ou tu t'i tiens  
Ou moult riche toy et les tiens,  
N'en soies pour tant orgueilleux,  
Car tout n'est qu'un vent perilleux.
- XLIV Cest enseignement tiens et nottes :  
De nyce femme ne t'assotes  
Se tu veulz amer par amours,  
Car pis en vauldroient tes mours.
- XLV Se tu vois Fortune propice  
A toy en chevance ou office,  
Pour toy et pour les tiens t'atourne  
D'acquérir ains qu'elle se tourne.
- XLVI Aies contenance plaisant,  
Trop estourdi ne trop laisant  
Ne soit ton maintien, ains t'arreste  
Et meine a point et mains et teste.
- XLVII Ne soies deceveur de femmes,  
Honoures les, ne les diffames ;  
Souffise toy d'en amer une  
Et ne prent contens a nesune.
- XLVIII Ne vueilles trouver a redire  
Sus chascun ne d'aultrui mesdire,

XLII 1 A<sup>2</sup> voix — 4 A<sup>1</sup> son fait c. — XLIII 3 B Ne s. — 4 B que v. — A que un — XLIV 4 A<sup>1</sup> mors — XLVI 3 A<sup>2</sup> et B *supprimant* t'a.



Gardes que bien soyes apris,  
N'aies chaloir d'autrui mespris.

- XLIX Se tu congnois homme envieux,  
Ne le hente, soit joenne ou vieux,  
Car envie est si male tache  
Que le lieu courrompt ou s'atache.
- L Le blandissement des flateurs  
Ne crois, car dient les auteurs  
Que le flateur souvent la moe  
Fait en derriere a cil qu'il loe.
- LI Se tu veulz femme espouse prendre,  
Par la mere pues tu aprendre  
Ses meurs, non obstant que, sans faille,  
Il est pou rigne qui ne faille.
- LII N'aies en desdaing nul chastoy,  
Ne desprises mendre de toy,  
Car il est de telz mauvestus  
Ou plus qu'en toy a de vertus.
- LIII Se tu es joenne et esbatant,  
Ne fay pas si le fol pour tant  
Qu'il appere aux gens en tout sens  
Qu'il n'ait en toy arrest ne sens.
- LIV A jeux d'eschas n'a jeux de tables  
N'a aultres, legiers ou notables,  
Ne soies fel ne oultrageux  
Et te joue a gracieux jeux.

LIV 1 à 4 B Joue toy a gracieux jeux — Fel ne soyes ne oultrageux A jeux d'eschez n'a jeux de tables — N'a autres tant soient notables.



- LV        Se tu as femme bonne et sage  
          Croy la du fait de ton mainage,  
          Adjouste foy a sa parole,  
          Mais ne te conseille a la fole.
- LVI       Gardes ne prens males coustumes  
          N'en parler lait ne t'acoustumes,  
          Car le fol plus qu'a la karole  
          Est apperceu a la parole.
- LVII      Souvent ne menaces de battre,  
          De teste rompre ou braz abatre,  
          Car c'est signe de couardie,  
          Personne ou fole ou pou hardie.
- LVIII     Bienfait d'autrui ne celes pas  
          Mais du mal te tais en tout pas,  
          Ne te vantes de tes bienfais,  
          Car ton loz en seroit deffais.
- LIX       Se tu es ja vieux devenus,  
          Les joennes qui ne sont chanus  
          Ne soient de toy trop confus,  
          Souviengne toy que joennes fus.
- LX        Se Fortune t'a bien hault mis  
          Par seigneurs ou ayde d'amis,  
          Ne sueffre trop te faire honneurs  
          Qu'envie n'en sourde es meneurs.
- LXI       En ta vieillece en nulle guise  
          De vestement ne te desguise  
          Ne de mignote cointerie,



Car sourdre en pourroit moquerie.

- LXII Soies diligent en tes fais  
Et prudemment soustiens grans fais,  
Si acquier, se pues, en joennece  
Pour avoir repos en vieillesce.
- LXIII Ne soies malencolieux  
Entre gent et en temps et lieux  
Fais requeste, se as afaire,  
Tousjours n'est pas temps de la faire.
- LXIV S'il avient que riches deviengnes,  
Gard que trop grant estat ne tiegnes,  
Pour aux plus grans t'acomparer  
Tu le pourroyes comparer.
- LXV Se service d'aucun reçois  
Guerdonne lui, se pues, ainçois  
Qu'il t'en demande benefice,  
Ne soies ingrat, c'est grant vice.
- LXVI A poissant homme decepvable,  
S'il te puet estre moult grevable  
Fay lui acroire, s'il puet estre,  
Qu'il est ton ami et ton maistre.
- LXVII Ton secret a nul ne reveles  
Sans achoison, n'autrui nouvelles  
Ne gehis quant de riens ne sert,  
Car qui se descueuvre il s'assert.

LXII 2 *A* s. tes f. — LXIII 1 *A*<sup>2</sup> merencolieux — LXV 1 à *B* Garde  
l'amour de tes amis — Et tiens ce que tu as promis — Ne soyes  
ingrat de service — Qu'on t'ait fait, dessers benefice — 3 *A*<sup>1</sup> te d.  
— LXVI 1 *B* ajoute et d.



- LXVIII L'avoir qu'as a grant peine acquis  
Se il t'est a prester requis  
Soies ent si aperceü  
Que tu n'en soyes deceü.
- LXIX S'une personne en toy se fie,  
Poson qu'après il te deffie,  
Ce qu'il t'a dit ne dois gehir  
Tant te puist grever ne haïr.
- LXX Fay volentiers en champs ou ville  
Ce en quoy te sens plus habile,  
Car maint par bien pou de savoir  
Sont venus a grant avoir.
- LXXI Acquiers amis par beau service,  
Se puez, sans pechié et sanz vice,  
Mais bien gardes a qui t'emploies  
Et a quel requeste te ploies.
- LXXII Ne prens estrif contre autrui conte  
De chose qui a toy ne monte,  
Ne blasmes a nul son païs,  
Car maint en ont esté haïs.
- LXXIII Fuis oyseuse, se veulx acquerre  
Honneur, chevance, loz et terre,  
Gard toy de delit non valable,  
Eschives fait deshonnorable.
- LXXIV Se tu as en toy parler sage  
Et de bien dire aies usage,  
Gard qu'on ne puist de toy retraire  
Que ton fait soit au dit contraire.



LXXV Deshonneur d'autrui ne racontes  
Ne volentiers n'en tiens tes contes,  
Ains, s'aulture le dit, fays ent paix,  
Se tu puez, ou se non t'en tais.

LXXVI Se tu veulz fuïr le`dongier  
D'amours et du tout l'estrangier,  
Eslongne toy de la personne  
A qui ton cuer le plus se donne.

LXXVII Se bien veulx et chastement vivre,  
De la Rose ne lis le livre  
Ne Ovide de l'Art d'amer,  
Dont l'exemple fait a blasmer.

LXXVIII Se tu veulz lire des batailles  
Et des regnes les commençailles,  
Si lis Vincent et aultres mains,  
Le Fait de Troye et des Rommains.

LXXIX Pour devocion acquerir  
Se tu veulz es livres querir,  
Saint Bernard et aultres auteurs  
Te seront en<sup>r</sup>ce fait docteurs.

LXXX S'en amours tu as ton vouloir  
Et veulz amer pour mieulz valoir,  
Ne t'en mez tele rage ou pis  
Que tu en puisses valoir pis.

LXXXI Pour sembler plus grant et plus riche  
Ne te pares d'autrui affiche,  
Car cil, cui elle est, s'on t'en loe,  
Tost dira que la chose est soe.



- LXXXII S'a ton besoin de ton ami  
Empruntes, ne jour ne demi  
N'oblies qu'il le te fault rendre  
Et penses de tant mains despendre.
- LXXXIII Se pues par bel ou par grant cure  
Le tien pourchacier, n'aies cure  
De mouvoir plait ou a maint triche,  
Car a peine est grant plaideur riche.
- LXXXIV Ne tiens maignée a ton loyer  
Si grant que ne puisses paier,  
Car souvent par trop gent avoir  
On despent la terre et l'avoir.
- LXXXV Se tu te sens de chaude cole  
Fay que Raison a son escole  
T'aprengne a tes sens ordenner,  
Par ce te pourras reffrener.
- LXXXVI Ne raportes parole aucune  
De quoy sourdre puisse rancune;  
Ton ami rapaise en son yre,  
Se tu pues, par doucement dire.
- LXXXVII Trop ne te dois humilier  
Ne moult estre familier  
A tes serfs ne jouer des mains,  
Car prisier t'en pourroient mains.
- LXXXVIII Se tu reprens l'autrui meffait  
Si gardes si bien en ton fait

LXXXIII 4 B C. onc g. p. ne fut r. — LXXXIV 3 B Souvent p.  
t. maisgnie a. — LXXXVI 2 B q. il puist s. r. — LXXXVII 2 B  
Ne trop — 3 B gens ne



Qu'il n'ait en toy ce mesmes blasme;  
Fol est diffamé qui diffame.

LXXXIX Ne fay pas longuement requerre  
Ce que veulz donner n'aler querre,  
Car qui tost le don abandonne  
Qu'on veult donner deux fois le donne.

XC Se es par Fortune desmis  
D'office et a povreté mis,  
Penses qu'on se muert en pou d'eure  
Et qu'ou ciel est nostre demeure.

XCI Selon ton pouoir vestz ta femme  
Honnestement et si soit dame  
De l'ostel après toy, non serve,  
Fay que ta maignée la serve.

XCII A ton pouoir gard toy d'acquerre  
Anemis n'a nul mouvoir guerre,  
Sans grant cause ja ne t'y boute,  
Car en guerre chiet mainte doubte.

XCIII Ne soyes rioteux a table  
Mais avec ta gent si traitable  
Qu'on ait ta compaignie chiere,  
Ne fay entr'eulx despite chiere.

XCIV Fay toy craindre a ta femme a point  
Mais gard bien ne la batre point,  
Car la bonne en aroit despis  
Et la mauvaise en vouldroit pis.

LXXXVIII 4 A Quar f. e. le blasmé q. blasme — LXXXIX et  
XC B les intervertit — XC 1 B<sup>4</sup> Se tu es — 4 A que ou — XCI 4  
A<sup>1</sup> le s. — XCII 4 B C. n'es pas aises se tu d. — XCIII omis dans  
A — 2 B<sup>4</sup> M. avecques g.



- XCV    Tes filz fay a l'escole aprendre,  
Bat les se tu les vois mesprendre,  
Tien les subgiez et en cremour  
Et leur celes ta grant amour.
- XCVI    Tien tes filles trop mieulx vestues  
Que bien abuvrées ne peues;  
Fay les aprendre bel maintien  
Ne point oyseuses ne les tien.
- XCVII    Reffrain ta langue en ta grant yre,  
Et s'adonc te tiens de trop dire  
Ce sera vray signe et message  
Que tu es constant, ferme et sage.
- XCVIII    S'a moyen estat puez venir  
Souffise toy du maintenir  
Se tu ne puez grigneur avoir  
Sans grever gent ne decepvoir.
- XCIX    Ains que tu parles si t'avise  
Que veulz dire et en quel devise,  
Tu parleras plus sagement  
Devant gent et en jugement.
- C    Nouveaulz argumens ne debas  
Ne meus, souvent ne t'en debas,  
Car haïr se fait l'estriveau  
Qui trop d'argumens est trouveur.
- CI    Donne liement, se tu donnes,  
Meffait au repentant pardonnes,

XCV 4 A<sup>1</sup> 1. celle — XCVI 3 B F. leur a. — XCVII 3 A<sup>1</sup> tel m.  
— XCVIII A *partir de ce n° le texte de B<sup>1</sup> fait défaut par suite  
de feuillets arrachés* — XCIX 2 B ajoute tu v. — CI omis dans A



T'amour ne change de legier  
Tes acointes tost n'estrangier.

CII Gardes bien qu'yvrece ne face  
Changier ton parler ne ta face  
Ne ton sens, car c'est trop grant honte  
Quant vin le sens d'omme surmonte.

CIII Ta parole soit ordonnée,  
Tost ne trop laisamment menée  
Ne soit, n'en parlant par usage  
Ne fais grimaces du visage.

CIV Se Dieu t'a envoyé victoire  
En quelque cas belle et nottoire,  
Les vaincus trop mal n'atourner,  
Tu ne scés ou tu puez tourner.

CV Se tu scés que l'en te diffamme  
Sans cause et que tu ayes blasme  
Ne t'en courcer ; fay toudis bien,  
Car droit vaintra, je te di bien.

CVI S'aucun parle a toy, bien pren garde  
La fin que le parlant regarde,  
Et, se c'est requeste ou semonce,  
Pense un petit ains la response.

CVII Se tu as a faire requeste  
Gard que raisonnable et honneste  
Soit, ne travailles tes amis  
Sans cause, quoy qu'on t'ait promis.

CVIII Ains que commences grant ouvrage



N'a toy vengier d'aucun oultrage  
Ou bataille ou chose a venir,  
Pense a quel fin ce puet venir.

CIX N'entreprens sans conseil des sages  
Grans fais ne perilleux passages  
Ne chose ou il chée grant doubte ;  
Folz est qui perilz ne redoubte.

CX N'embraces tant d'estranges fais  
Que nul ne soit par toy parfaits,  
Ce qu'as emprís tost expedie  
Que trop soyes long on ne die.

CXI Ne te dampnes pas pour acquerre  
A tes enfans avoir et terre ;  
Fay les aprendre et introduire  
A science ou a mestier duire.

CXII Bon exemple et bonne doctrine  
Oz volentiers et t'y dottrine,  
Car pour neant son oreille euvre  
Homs a ouïr sans mettre a oeuvre.

CXIII Ne laisses pas a Dieu servir  
Pour ou monde trop t'asservir,  
Car biens mondains vont a defin  
Et l'ame durera sans fin.

EXPLICIT LES DIZ MORAULX.

CX 1 B<sup>2</sup> N'embracer — 4 A ajoute t. ne s. — CXI placé dans B après CI — CXII 4 B Pour ouïr qui ne met a o. — Rubrique A' Explicit.







## PROUVERBES MOURAULX

---

**C**I COMMENCENT PROVERBES MOURAULX

1

Les bonnes meurs et les saiges notables  
Ramentevoir souvent sont prouffitables.

2

Prudence apreint l'omme a vivre en raison,  
La ou elle est eureuse est la maison.

3

Homs attrempez, froit et amesurez,  
Estre ne puet longuement meseurez.

4

Couraige fort, constant et affermé,  
N'est de legier ne tost mal infermé.



5

Pais ou lieu ou justice ne raigne  
Ne puet long temps durer, tant soit grant raigne.

6

Impossible est sans foy a creature  
Estre plaisant a Dieu, dist l'Escripture.

7

Propice au monde et a Dieu acceptable  
Estre ne puet homs, s'il n'est charitable.

8

Esperance conduit les faiz humains  
Mais ne tient pas ses promesses a mains.

9

En grant estat ne gist mie la gloire  
Mais en vertu est double la memoire.

10

Prince cruel et rapineur d'argent  
Je tiens a fol s'il se fie en sa gent.

11

Donner a point, sagement retenir,  
Fait en estat le riche homme tenir.

12

Louer autrui, puis blasmer par usage,  
D'estre inconstant est signe et petit saige.



13

Cour de seigneur sans prudent gouverneur  
Estre ne puet maintenue en honneur.

14

Diligence, grant soing et souvenir  
Homme souvent fait a grant bien venir.

15

Homs qui est fol ne prise autre une plume  
Mais saige est cil qui de soy pou presume.

16

Prince poyssant a qui d'estre repris  
Ne luy desplaist est signe de grant pris.

17

Cil est prudent qui au temps futur vise,  
S'il y pourvoit et son meilleur avise.

18

Homme orgueilleux, en cuidier affichiez,  
Ne craint peril, mais tost y est fichiez.

19

La terre est moult eureuse dont le sire  
Est saige et bon et bien vivre desire.

20

Trop de legier croire et amer flatteurs  
Engendre erreur, ce dient les auteurs.



21

Cil est trop folz qui cuide avoir seür  
Estat pour tant s'il a propice eür.

22

Le vray repos ne gist mie en l'avoir  
Mais seullement en souffisance avoir.

23

Hanter les bons et les mauvais banir  
Fait homme en scens et en bonté tenir.

24

Prince ou il a clemence et bonnes meurs  
De ses subgiez et d'autres trait les cuers.

25

Cil est eureux qui puet et a voloir  
De son prochain aidier qu'il voit douloir.

26

Homs qui ne craint Fortune n'est pas sage  
Car moult souvent conduit a dur passage.

27

Trop enquerir n'est mie prouffitable  
Ne d'autruy fait trop estre entremetable.

28

Cuidier deçoit, souventes foiz avient,  
Par trop fier moult souvent grant mal vient.



29

Homme bourdeur, de mentir mescreü,  
Quant il dit voir a paine est creü.

30

Cil saiges est qui son yre puet fraindre  
Et en courroux sa langue scet refraindre.

31

Cuer saoul ne croit le jeun qui se garmente  
De sa grant fain, ainçois cuide qu'il mente.

32

Falace n'est nulle a paine si caute  
Qu'apperceue ne soit d'aucun sans faulte.

33

C'est un renom qui dure a herité  
Que d'avoir los de tenir verité.

34

A grant paine puet homs changier ses meurs  
Puis qu'il est ja viellart, chanus et meurs.

35

Cil qui desir a de monter en pris  
Il fault qu'il ait a bien souffrir apris.

36

Faveur deçoit et moult souvent destourne  
A bien jugier et droit en tort retourne.

37

Le temps perdu on ne puet recouvrer,  
Pour ce, tandis qu'on l'a, doit on ouvrir.



38

Petit soussy ou trop grant soing fait estre  
L'omme oublieux qui de mains faiz s'enpestre.

39

Viellesce ou scens n'abite et biau maintien  
Est un vaissel sans vertu, com je tien.

40

Trouver souvent sur autruy a redire  
Donne achoyson d'oïr de soy mesdire.

41

Gentillesce vraye n'est autre chose  
Fors le vaissel ou vertu se repose.

42

Cil est eureux qui dispose sa vie  
En simple estat juste sans autre envie.

43

Pacience fait vaincre mains grans faiz  
Et de legier soustenir pesans faiz.

44

Croire conseil des saiges es grans cures  
Fait traire a cler maintes choses obscures.

45

Gieux dissolus, quelqu'en soit la plaisance,  
A la parfin tournent a desplaisance.

46

Pou d'achoisson souvent muet grant debat  
Et petite pluye grant vent rabat.



47

Ly jeunes homs qui se tient en oyseuse  
Legierement chiet en voye noiseuse.

48

Les biens mondains acquerir mal a point  
Font ame et corps souvent metre en dur point.

49

Mieulx vault honneur, bonne grace et bon los  
Qu'avoir flourins mal acquis, dire l'os.

50

Estre avisié sur les choses doubtables  
Fait prendre soing sur les plus proufitables.

51

Honneurs mondains sont des gens chier tenus,  
Mais quant on muert on n'en emporte nulz.

52

Parler a point et contenance saige  
Est de prudent homme signe et message.

53

Yvresce occit le scens, l'ame et le corps,  
Et fait cheoir l'omme en villains acors.

54

Homme prudent qui le scien bien dispense  
Souventes foiz prent garde a sa despence.

55

Le jeunes homs qui voulentiers entent  
Chastiment signe est qu'a grant bien tent.



56

Trop est meilleur la crainte d'amour née  
Que celle qui par rigueur est menée.

57

L'ost ou il n'a principal capitaine  
A bon effect voit on venir a paine.

58

Petit voit on homme qui moult promette  
Tenir serment ne nul terme qu'il mette.

59

Humilité en riche homme bien siet :  
Plus se tient bas et plus hault on l'assiet.

60

Fol hardement deçoit souvent son maistre  
Par trop cuidier fort, poissant et saige estre.

61

Trop conseiller appart entre homme et femme,  
Present pluseurs, puet tourner a diffame.

62

Prouffitable est le travail en jeunesce  
Qui eschiver fait souffreste en viellesce.

63

Pour neant met [l'on] l'omme a apprendre  
S'user ne veult de scens et le bien prendre.

64

Juge cruel et d'amasser jaloux  
Mengut les gëns com les brebis li loups.



65

Fol est celluy qui cuide sa malice  
Toudiz celer, comment qu'il la palisse.

66

Parler a temps et taire bien a point,  
Sens, soing, travail, mettent homs en hault point.

67

C'est moult grant scens que de laisser la place  
Au furieux a lyonnesce face.

68

Petit voit on grant amistié avoir  
Entre le riche et le povre d'avoir.

69

Pou souvent nuyst taire, mais trop langaige  
Maintes fois fait a son maistre dommaige.

70

Bien est celluy de tout bien deshaitié  
Qui bonté voit et juge mauvaistié.

71

Qui ne se puet du mauvais pas garder  
Au moins s'en doit mettre hors sans tarder.

72

Cil est trop folz qui se prent si près garde  
D'autruy meffait et au sien ne regarde.

73

Neccessité a la foiz consentir  
Fait maint grant maulx par famine sentir.



74

On a veü souvent repentir mains  
De mettre aux piez ce qu'on tient a ses mains.

75

Courtois parler refraint souvent grant yre,  
Car moult attrait les cuers doucement dyre.

76

Souvent voit on homme plain d'indigence  
En hault degré venir par diligence.

77

Oppinion, non pas vraye science,  
Conduit les faiz mondains plus que science.

78

Nul ne se doit contre autruy fier tenir,  
Car homs ne scet qui luy est a venir.

79

Mieulx vault ployer que rompre, n'est pas fable;  
Humilité souvent est prouffitable.

80

Celluy est fol qui sa despence croit  
Pour promesse d'autruy faicte qu'il croit.

81

Diffamer femme a homme trop messiet,  
Car le blasme sur soy meismes assiet.

82

Qui courtoisie et don tost habandonne  
Double service sy fait et deux foiz donne.



83

Saige maintien et non moult de parolle  
Bien siet a femme a qui qu'elle parolle.

84

Service a Court sy n'est mie heritaige,  
Car souvent fault a petit d'avantaige.

85

Recalcitrer encontre la pointure  
De l'eguillon redouble la bateure.

86

Tourner a truffe aucune foiz injure  
En certain temps est scens, je le vous jure.

87

Belles raisons qui sont mal entendues  
Ressemblent fleurs a pourceaulx estendues.

88

D'omme jaloux ou forment surpris d'yre  
On ne doit foy adjouster a son dire.

89

Le fel parler de matiere hayneuse  
Responce attrait despite et rancuneuse.

90

Le bien qui vient seullement d'une part  
Ne puet long temps durer, ains se depart.

91

L'oyseux plaisir, quoy qu'il face a blasmer,  
N'est pas legier a desacoustumer.



92

Pour parolle mauvaise rapportée  
A tort souvent grant hayne est portée.

93

Neccessité, besoing, n'avoir nient,  
Livre plusieurs a inconvenient.

94

Il vault trop mieulx a moyen estat tendre  
Que le trop grant toute sa vie attendre.

95

Laissier aler de son droit mainte fie  
Tourne a grant scens et preu, je vous affie.

96

De bien faire s'ensuit bien au defin,  
Car bonne vie attrait la bonne fin.

97

Oublier Dieu pour richescs mondaines  
Pourpenser fait maintes fraudes soubdaines.

98

Il n'est nul bien ou n'ait aucun amer  
Fors seullement servir Dieu et amer.

99

Trop petit vault bons exemples ouÿr  
A qui ne veult contraires meurs fouÿr.

100

Quoy que la mort nous soit espouventable  
A y penser souvent est prouffitable.



101

Soy departir par bel en fin de compte  
Est neccessaire a qui de paix fait compte.

EXPLICIT.











# LE LIVRE DU DUC DES VRAIS AMANS

---

CY COMMENCE LE LIVRE DU DUC  
DES VRAIS AMANS

**C**OMBIEN que occupacion  
Je n'eusse ne entencion  
A present de dittiez faire  
D'amours, car en aultre affaire  
5 Ou trop plus me delittoye  
Toute m'entente mettoye,  
Vueil je d'aultrui sentement  
Comencier presentement  
Nouvel dit, car tel m'en prie  
10 Qui bien puet, sanz qu'il deprie,  
Comander a trop greigneur  
Que ne suis : c'est un seigneur  
A qui doy bien obeïr,  
Si m'a voulu regehir



- 15 De sa grace la doulour,  
 Ou fust sens ou fust folour,  
 Ou maint yver et esté  
 Il a par long temps esté  
 Pour amours, ouquel servage  
 20 Est encor son cuer en gaige,  
 Mais ne veult que je le nomme :  
 Lui souffist qu'on le surnomme  
 Le duc des vrays amoureux  
 Qui ce dittié fait pour eulx.  
 25 Si lui plaist que je raconte,  
 Tout ainsi comme il me conte,  
 Les griefs anuis et les joyes,  
 Les fais, les estranges voyes  
 Par ou est depuis passez,  
 30 Pluseurs ans a ja passez.  
 Si veult qu'ad ce renouvel  
 Du temps en soit dit nouvel  
 Fait par moy qui lui consens;  
 Car tel et de si bon sens,  
 35 Je le sçay, que son humblece  
 Prendra en gré la foiblece  
 De mon petit sentement,  
 Et par son assentement  
 Je diray en sa personne  
 40 Le fait si qu'il le raisonne :

## LE DUC DES VRAIS AMANS

Joenne et moult enfant estoye  
 Quant ja grant peine mettoye  
 A amoureux devenir.



Pour ce qu'ouoye tenir  
45 Les amans plus qu'autres gens  
Et gracieux entre gens  
Et mieux duis, si desiroie  
A l'estre; pour ce tiroye  
Es lieux ou choisir peüsse  
50 Dame que servir deüsse,  
Mais long temps ainsi sans dame  
Fus, car n'avoye, par m'ame!  
Pas le sens d'une choisir,  
Tout eusse je assez loisir,  
55 Mais trouver n'y sceusse voye.  
Et, pour le desir qu'avoye,  
Mainte compagnie belle  
Hantay ou dame et pucelle,  
Et damoiselle vey mainte  
60 Ou toute beaulté emprainte  
Estoit, mais enfance encore  
Me tenoit ou temps de lore  
Si que nulle part ne sceusse  
Arrester, qui que j'esleusse.  
65 Si fu ainsi longue piece  
Gay, jolis et en leesce  
Et en cellui doulz demour.  
A Amours mainte clamour  
Fis, disant en tel maniere,  
70 Pour le temps qui trop long m'iere :

Vray dieu d'Amours qui des amans es sire,  
Et toy Venus, l'amoureuse deesse,  
Vueilles mon cuer briefment mettre en adrece  
D'estre amoureux, car riens plus ne desire.

75 A celle fin qu'a vaillance je tyre,



.Vueilles moy tost pourveoir de maistrece,  
Vray dieu d'Amours qui des amans es sire.

Et m'ottroyez grace que puisse eslire  
Telle qui mon ignorance et joennece  
80 Sache amender et a honneur me drece,  
Car le desir que j'en ay me fait dire :  
Vray dieu d'Amours qui des amans es sire.

Ainsi souvent devisoye,  
Pour le desir ou visoye,  
85 Tant que vraye Amour m'ouÿ  
Qui mon vouloir resjouÿ.  
Si compteray la maniere  
Coment Amours la premiere  
Fois mon cuer prist et saisi,  
90 Ne puis ne s'en dessaisi.  
Un jour, pour m'aler esbatre,  
Entre un mien parent et quatre  
Aultres de mes gentilz hommes,  
Sus noz chevaulz montez sommes.  
95 Faim me prist d'aler chacier  
Et, pour deduit pourchacier,  
Fis aux veneurs levriers prendre  
Et fuirons; lors sans attendre  
Entrames en un chemin  
100 Qu'assez souvent je chemin,  
Mais n'eusmes pas moult erré  
Quant un grant chemin ferré  
Nous mena en une voye  
Ou connilz assez savoye;  
105 Près de la un chastel ferme

76 A<sup>2</sup> Pourvoyez moy de dame et de maistresse — 79 A<sup>1</sup> T.  
dame qui ma folour et j.



Siet moult bel, je vous afferme,  
Mais du nommer je me passe.  
Adonc fut en celle place  
Une princesse venue  
110 Qui ert de chascun tenue  
Bonne, belle et bien aprise,  
Tele que chascun la prise.  
Mie la ne la savions  
Mais a l'aventure alions ;  
115 Ses gens dehors s'esbatoyent  
Ça et la, aucuns chantoyent,  
Aultres lançoient la barre  
Et aultres a une barre  
S'apportoient en estant.  
120 Et, ainsi la eulx estant,  
Vers eulx nous sommes dreciez ;  
Si ont tost les chiefs dreciez  
Quant ilz nous ont apperceu  
Et qui nous estions sceü.  
125 Après, quant la reverence  
Nous orent fait, demourance  
N'y ont fait, comme il me semble,  
Ains ou troys ou deux ensemble  
Devers leur maistresse alerent,  
130 Et croy qu'ilz ne lui celerent  
Que nous estions la venus,  
Car si tost que pervenus  
Fumes ou chastel sans doubte,  
De dames veismes grant route  
135 Encontre de nous venir.  
Par gracieux maintenir,  
Si nous saluerent celles ;  
Nous tournames tost vers elles,  
Si les avons saluées  
140 Et de genoulz relevées.  
La eut et dame et pucelle



Des parentes a ycelle  
Qui de toutes ert maistresse ;  
La pucelle a blonde trece,  
145 Sans villennie et sans blasme  
Je baisay, aussi la dame.  
La pucelle que l'en prise  
Et la dame bien aprise  
Mon cousin et moy menames,  
150 Ainsi en l'ostel entrames.  
La dame fut ja venue  
Hors de sa chambre, et tenue  
S'est la de haulte maniere,  
Non orgueilleuse ne fiere,  
155 Mais tout ainsi qu'il aduit  
Au noble estat qui la duit  
Et a sa royal personne  
Dont chascun en bien raisonne.  
Si tost que l'avons veüe  
160 L'avons en maniere deue  
Saluée, et elle passe  
Avant un petit d'espace  
Et me prent par la main nuc,  
Me baise et dist : « Vo venue,  
165 Beau cousin, pas ne savoie .  
Bien viengniez, et quelle voye  
Si seulet ores vous meine ? »  
Lors mon cousin dist : « Certaine-  
Ment, ma dame, nous alions  
170 Jouer, cy ne vous savions ;  
Aventure ycy nous chace,  
Mais Dieux soit louez qui grace  
Nous a faitte si a point  
Que vous avons en ce point  
175 Trouvée a chiere joyeuse. »  
Lors la bonne et gracieuse  
S'en rist, puis dist : « Or alons



Jouer. » Adonc devalons  
En un prael verdoyant,  
180 Et lors, elle coustoyant,  
Entray en un très bel estre,  
Et celle a son costé destre  
Pour seoir vers soy me tire.  
L'en aporta, sans plus dire,  
185 Grans coissins d'or et de soye  
Soubz l'ombre d'une saulsoye  
Ou le ru d'une fontaine  
Court bel et cler par certaine  
Voye faitte et entaillée  
190 Par maistrie soubz fueillée,  
Sur l'erbe vert et menue.  
Plus en piez ne s'est tenue,  
Ains s'assist, et moy coste elle,  
Et loings, sus la fontenelle,  
195 Ça et la, adonc s'assistrent  
Les aultres de nous et mistrent.  
Lors me prist a desrener,  
Car ne sceusse arraisonner  
Elle n'aultre, croy, encore,  
200 Car joenne estoye assez lore.  
Si commença son lengage  
Moy demandant d'un voyage  
Dont de nouvel venu yere,  
Le maintien et la maniere  
205 Des dames de par dela,  
Comment la court de dela,  
Que roïne et roy tenoit,  
En estat se contenoit.  
Et je lui en respondoye  
210 Selon ce que j'en savoye.  
De pluseurs choses, me semble,



La devisames ensemble.  
Or est il temps que je dye  
Comment la grief maladie  
215 Commença qui pour amer  
M'a fait souffrir maint amer.  
Si est merveille a comprendre  
Coment Amours vult lors prendre  
Mon cuer de celle qu'avoye  
220 Cent fois veue, et n'y avoye  
Oncques pensé en mon age.  
Si sembloye cil qui nage  
Par mer cerchant mainte terre  
Pour trouver ce qu'il peut querre  
225 Près de soy et point n'y vise  
Tant qu'un autre l'en advise ;  
Tout ainsi m'avint sans doubte,  
Car n'apercevoye goutte  
La beaulté, par ma folour,  
230 De ma dame de valour  
Jusqu'a tant qu'Amours en voye  
Me mist, et ne desiroye  
Fors une telle veoir  
Pour mon cuer y asseoir,  
235 Et souvent a long sejour  
La veoye et fors cel jour  
Garde je ne m'en donnoye.  
Ainsi en ma main tenoye  
Ce qu'ailleurs alloye querre.  
240 Mais Amours de celle guerre  
Vult lors mon cuer apaisier  
Pour mon enfance accoisier.  
Car lors, si com la parfaite  
Qui mainte peine m'a faite,  
245 Parloit a mon, son langage  
Et son maintien doulz et sage  
Plus qu'oncques mais me plaisoit



- Et tout muët me faisoit.  
D'entente la regardoye  
250 Et moult fort je m'entendoye  
De remirer sa beaulté,  
Car plus especiaulté  
Me sembla avoir adonques  
Que ne lui en avoye oncques  
255 Veu avoir et trop plus grace  
Et de douceur greigneur mace.  
Lors Amours, l'archier plaisant,  
Qui veit mon maintien taisant  
Et qu'estoye en point de prendre,  
260 La fleche, dont seult surprendre  
Les amans, prent et entoyse  
L'arc, et trait sans faire noise;  
Ne m'en donnoye regard :  
La fleche de doulz regard  
265 Qui tant est plaisant et riche  
Au travers du cuer me fiche.  
Lors fus je moult esperdu;  
Bien cuiday estre perdu  
Quant l'amoureux cop senty,  
270 Mais mon cuer se consenti  
A l'amoureuse bleceure;  
Tout ne fust la playe seure  
De mort, ains en aventure  
M'en mist puis celle pointure.  
275 Adonc ses doulz yeulx riâns,  
Tous pleins d'amoureux liâns,  
Mon cuer venoient semondre  
Par tel party que respondre  
Ne sçavoye a sa parole.  
280 Bien devoit tenir a fole  
Ma contenance et maniere,



- Car souvent par tel maniere  
Contre son regard muoie  
Couleur et ne remuoye  
285 Pié ne main, qu'il vous semblast  
Que de paour mon cuer tremblast.  
A brief parler, qu'en diroye ?  
S'a estre pris desiroye  
Or n'y eus je pas failly.  
290 Adonc la vie failly  
De mon enfance premiere.  
A vivre d'aultre maniere  
Vraye Amour m'aprist en l'eure.  
Ainsi fus pris en celle heure.  
295 La me tins longue piecete,  
Et de maniere nycete,  
Comme assez enfant, disoye  
Mes raisons et atysoie  
Adès le tyson ardent  
300 En mon cuer ; en regardant  
Sa beaulté, com papillon  
A chandoille ou oysillon  
A glus se prent, me prenoye,  
Ne garde ne m'en prenoie.  
305 Quant j'eus en ce lieu esté  
Près du tiers d'un jour d'esté,  
Mon cousin n'a plus songié,  
Si m'a dit : « Prenez congié,  
Tart est, je me doubt, par m'ame,  
310 Que trop tenez cy ma dame,  
Il est temps que souper voise. »  
Adonc la franche et courtoise,  
Que belle et bonne on appelle,  
Moult me pria d'avec elle  
315 Soupper, mais m'en excusay ;



La gaires plus ne musay,  
Si me levay et volz prendre  
Congié, mais ainçois attendre  
Nous convint le vin, si beusmes,  
320 Et quant beu et mengié eusmes  
La priay que de sa grace  
Lui pleust que la convoyasse  
Jusqu'a l'ostel, mais la belle  
Ne vout; si pris congié d'elle  
325 Et de toutes sans tarder.  
Adonc Amours, pour larder  
De plus en plus mon cuer tendre,  
Un doulz regard sans attendre  
Me fist d'elle recueillir  
330 Qui doucement accueillir  
Au departir de la place  
Me vint, car devers sa face  
En alant mes yeulz tournay,  
Et, si com me retournay,  
335 Le doulz espart savoureux  
De ses beaulz yeulz amoureux  
Lança sur moy par tel guise  
Qu'oncques, puis que l'amour mise  
Y fut, il n'en departi;  
340 Et atant je m'en parti  
Atout l'amoureuse fleche.  
Et, quant hors de la bretesche  
Fusmes, tantost nous montasmes  
Et d'errer tost nous hastames  
345 Pour la nuit qui ja venoit.  
Mon cousin moult s'en penoit,  
Mais quant est de moy, sans doubte,  
En ce chemin grain ne goute  
Ne parlay, ains me tenoye



- 350 Coy, et chief enclin tenoye  
De maniere moult pensive,  
Car la flamme ardent et vive  
Que doulz regard m'ot fichée  
Ou cuer et fort atachée  
355 Ne me laissoit; si pensoie  
Adès ne point ne cessoie  
Aux beaultez du doulz visage  
Ou mon cuer laissoie en gage,  
A son corps gent et faittis  
360 Et a ses yeulx attraittis,  
Tout me venoit au devant;  
Ainsi chevauchant devant  
Pensivement m'en aloye.  
Mon cousin en celle voye  
365 Maintes fois m'araisonna  
Et de mainte raison a  
Parlé, mais ne l'entendoie,  
Car a penser entendoie,  
Tant que cil me dist : « Beau sire,  
370 A quoy ainsi sans riens dire  
Pensez ore et pour quoy est ce ?  
N'avez vous assez leesce  
Eue la dont vous venez  
Qui si pensif vous tenez ?  
375 Car, se Dieu me vueille aidier,  
Il m'est vis que souhaitier  
Dame on ne pourroit plus belle  
Et plus parfaite qu'est celle  
Dont ores venez sans doubte.  
380 Qu'en dites vous ? Mens je goute ?  
N'est elle courtoise et sage ?  
Veistes vous oncq en vostre age  
Dame en tous cas plus parfaite ?



- Quant a mon gré, elle est faitte  
385 Pour regarder en beaulté,  
Et a especiaulté  
De sens, d'onneur et de grace,  
De noblece toutes passe,  
Et a tout dire, par m'ame,  
390 Oncques ne vei, fors ma dame  
Qui de mon cuer est maistresse,  
Sa pareille, car haultece  
D'onneur son noble cuer pere  
Si qu'aulture ne s'y compere,  
395 Fors sans plus celle qu'ay ditte  
Qui des dames est l'eslitte ;  
De ce la vould Dieu douer. »  
Quant j'ouÿ aulture louer  
Plus que celle ou je pensoye,  
400 Non obstant qu'ains me taisoye,  
Adès pour tout l'or du monde  
Ne me teusse, ains de perfonde  
Pensée je souspiray  
Et dis : « Certes, j'en diray  
405 Mon avis, mais ne croy mie  
Que, se maistresse et amie  
Dieu vouldist choisir en terre,  
Qu'il convenist autre querre  
Pour avoir la plus souveraine  
410 Du monde, chose est certaine,  
Et de ce mon corps mettroye  
En gage et m'en combatroye.  
Si que jamaiz ne clamez,  
Se ceste meisme n'amez,  
415 Vo dame la non pareille  
Du mond, car ne s'appareille  
Dame autre, plus ne le dites,



- A ceste ne que petites  
Flammeches font ou chandoilles  
420 A la lueur des estoilles. »  
Quant cil m'ouï ainsi dire  
Tout bas s'en prist a soubzrire,  
Et croy bien qu'il advisoit  
Que ja mon cuer y visoit.  
425 Si se passa lors atant,  
Et nous, chevauchant batant,  
Venimes en petit d'eure  
Ou lieu ou ert ma demeure,  
Et ja estoit nuit serrée.  
430 Adonc sur la court querrée  
Monseigneur mon pere estoit  
Qui durement enquestoit  
Ou le jour alé estoye,  
Et moy qui fort me hastoye  
435 Pour ce que je le craingnoye  
Et son yre ressoingnoye,  
L'avisay a sa fenestre,  
Bien le voulsisse ailleurs estre;  
Toutesfois j'alay descendre,  
440 Puis a genoulz sanz attendre  
Me mis en le saluant.  
Lors dist, son chief remuant :  
« Et dont venez vous, beau sire ?  
Est il temps que l'en se tire  
445 Vers l'ostel quant nuit devient ?  
Mais bien va qui s'en revient ! »  
Mot ne lui dis ne demy,  
Il se departi de mi  
Et j'en ma chambre m'en tourne.  
450 Si souppay pensif et mourne,  
Non obstant qu'assez avoye



Joennes gent qui moult en voye  
De m'esbatre se mettoient  
Et maint compte me comptoyent,  
455 Mais sachiez que sans cesser  
Estoit ailleurs mon penser,  
Car adès m'estoit advis  
Que veoye vis a vis  
Celle qui pas ne savoit  
460 Comment mon cuer pris avoit.  
Quant fut temps d'aler couchier  
En lit bien paré et chier  
Me couchay, mais ne croy mie  
Que dormisse heure et demie.  
465 Si n'avoy je chose aucune  
Qui point me grevast fors qu'une :  
C'estoit que je me doubtoye  
Que celle par qui sentoye  
La doulce plaisant pointure  
470 Ne peusse par aventure  
Veoir si com je vouldisse,  
Car ou monde n'eslisisse  
Soulas qui tant me pleüst  
Et dont mon cuer tel joye eust,  
475 Ce me sembloit, si pensoye  
Et en ce penser disoye :

*Balade.*

A mours, certes, assez ne te pourroye  
Remercier de ce que de ta grace  
480 D'estre amoureux tu m'as mis en la voye  
Et de dame qui toutes autres passe  
Tu m'as pourveu, car de beaulté et grace  
Et de valeur est souveraine, a voir dire,



Si ne puis dire assez et ne cessasse :  
 Graces te rends qui la m'as fait eslire.

485 Or ay je ce que je tant desiroye,  
 C'estoit avoir dame en qui j'emploiasse  
 En lui servir mon temps et qui en joye  
 Mon cuer tenist, par qui en toute place  
 Gay et jolis je fusse et que l'amasse  
 490 De tout mon cuer, si ay ce que desire :  
 Choisie l'ay, tu m'en donnas l'espace.  
 Graces te rends qui la m'as fait eslire.

Si te suppli, Amours, a qui m'ottroye,  
 Que tu me donnes grace que je face  
 495 Tant par servir qu'encor ma dame voye,  
 Que tout sien suy, et que sa belle face  
 Et son regard qui tout mon mal efface  
 Très doucement par pitié vers moy tire.  
 Plus ne demand d'elle ou tout bien s'amasse.  
 500 Graces te rends qui la m'as fait eslire.

Ha! Dieu d'Amours, ainçois que je trespasse,  
 Ottroiez moy que je puisse souffire  
 Pour seul ami a celle qui m'enlasce,  
 Graces te rends qui la m'as fait eslire.

505 Ainsi je me debatoye  
 A par moy, et ne sentoye  
 Encore le dur assault  
 D'ardent desir qui assault  
 Les amoureux et fait frire,  
 510 Palir, sechier et deffrire ;  
 Encore n'estoit venu.



- Si ne m'est lors souvenu  
Fors de penser comment feusse  
Jolis et gay et que j'eusse  
515 Très belle monteure et riches  
Robes, et, sans estre chiches,  
Trés largement en donnasse,  
Et si bien me gouvernasse  
En honneur qu'en toutes sommes  
520 Le raport des gentilz hommes  
Me loast en toute place  
Par si que ma dame en grace  
Me prensist par mon bien faire;  
Ainsi vouloie parfaire  
525 Mon maintien, d'or en avant  
L'enfance, qui par avant  
Me vouloit tenir folage,  
Laissier, ne penser volage  
Jamais ne me surprensist  
530 Et que mon cuer apprennist,  
La droitte voye a tenir  
Qui fait vaillant devenir.  
Tous ces pensers lors j'avoye  
Et si queroye ja voye  
535 Coment en maintien et fait  
Tout ce je meisse a effait.  
Si changay bien ma maniere,  
Car toute m'entente n'yere  
Fors de penser, dire et faire  
540 Chose qui en tout affaire  
Fust plaisante et gracieuse,  
Ne chose malgracieuse  
Ne feisse pour chose nulle.  
Si n'y fus morne n'entulle,  
545 Mais gay, jolis, lié et cointe,  
Et pour d'amours estre accointe  
Peine mettoye a apprendre



Chanter, dancier et moy prendre  
Ja a armes poursuivre,  
550 Et m'yert vis que de suivre  
Amours, armes et vaillance,  
Venoit honneur sans faillance,  
Si fait elle vrayement.  
Adonc sans deslaïement  
555 Devers Monseigneur mon pere  
Et vers Madame ma mere  
Par moyen tant pourchay  
Qu'avins ad ce que chay :  
C'estoit que or et argent eusse  
560 Pour grans despens faire, et feusse  
Richement en toute guise  
Habillié, si pris devise  
Et mot propre ou le nom yere  
De ma dame en tel maniere  
565 Que nul nel pouoit savoir,  
Si volz des destriers avoir  
Pour jouter, et fis emprendre  
Une feste pour aprendre  
A jouter, si com disoye,  
570 Mais aultre chose avisoye.  
Si fut celle feste emprise  
Ou mainte dame qu'on prise  
Fut a la feste semonse,  
Mais tout avant j'eus response  
575 Se ma dame a nostre feste  
Venroit, je fis la requeste  
A qui il apertenoit  
Qui de loing m'apertenoit,  
Mais de bon cuer l'ottroya  
580 Et chieux lui me festoya.  
La veis a loisir ma dame,  
Mais comment de corps et d'ame  
L'amoye et tenoye chiere



Ne lui dis pas, mais ma chiere,  
585 Croy, assez le demonstroït,  
Car Amours qui me monstroït  
De ses tours pour myeux m'esprendre,  
Palir puis couleur reprendre  
Et tout muer me faisoit,  
590 Mais la belle s'en taisoit  
Com se ne l'apperceüst,  
Mais ne croy qu'elle sceüst,  
Si pou qu'el n'eust cognoissance,  
De quoy venoit la naiscence  
595 De tout quantque il m'advenoit  
Et que tout d'amour venoit,  
Dont elle estoit cause et celle  
De qui sourdoit l'estincelle  
Amoureuse qui poingnoit  
600 Mon cuer qui ne s'en plaingnoit.  
Touteffois vivoie en joye  
Et souvent je la veoie,  
C'estoit ce qui confortoit  
Mon cuer qui se deportoit,  
605 Et a par moy tout ainsi  
Disoie a celle qu'aim si :

*Ballade.*

Trés haulte flour, ma dame souveraine,  
De tout honneur et valeur la deesse,  
De grant beaulté, sens et bonté fontaine,  
610 Et celle qui m'est chemin et adrece  
De parvenir a vaillance, et qui drece  
Trestous mes fais, dame a qui je suis lige  
Trés humble serf, comme a doulce maistresse,  
A vous servir tant com vivray m'oblige.



615 Faire le doy, belle de doulceur pleine,  
Car vous passés toutes, et vo haultece  
Si me sera exemple et ja me meine  
Au port d'honneur et conduit a leesce,  
Et, pour le doulz plaisir qu'ay, je ne cesse  
620 D'estre joyeux, ma dame, et pour ce dy je  
De cuer et corps, non obstant ma simplece :  
A vous servir tant com vivray m'oblige.

Vous le verrés, et si serez certaine,  
Un temps venra, haulte noble duchece,  
625 Coment mon cuer de vous servir se peine,  
Et j'aray lors souffisance a largece  
Quant percevrez qu'a tousjours sanz paresce  
Obeiray; dame, l'arbre et la tyge  
De tout honneur et de valeur l'adrece,  
630 A vous servir tant com vivray m'oblige.

Haulte, poissant, très louée princesse,  
A vous amer de très bonne heure apris je,  
Car j'en vaulz mieulx; pour ce en très grand hum-  
A vous servir tant com vivray m'oblige. [blece

635 Or m'esteut tourner arriere  
A ma matiere premiere.  
La feste fut aprestée,  
Grant et belle, et tost hastée,  
Ou maintes gens grant joye eurent.  
640 Les joustes criées furent  
Ou jouel de grant avoir  
Devoit et le pris avoir  
Cil qui les forsjousteroit,  
Et qu'a celle joute avroit  
645 Vint chevaliers advenans  
Pour jouser a tous venans.



Et ad certain jour fu prise  
Celle assemblée et emprise  
En une praerie cointe  
650 Ou un chastel sur la pointe  
D'un estanc est bien assis  
Ou de grosses tours a six.  
En ces prez furent herbarges  
Et eschauffaulx grans et larges  
655 Fais et paveillons dreciez,  
Et tous arroiz adreciez  
Pour la feste et pour la jousté.  
Et, sans que plus y adjouste,  
Vous dy que quant la journée  
660 Vint que avions ordonnée,  
Trés le soir y vint devant  
Ma doulce dame, au devant  
Lui alay a belle route  
De nobles gens, et sans doubte  
665 Menestrelz, trompes, naquaires  
Y avoit plus de troys paires  
Qui si haultement cournoient  
Que mons et vaulx resonnoient.  
Si sachiez que grant leesce  
670 Avoye quant ma deesce  
Veoye chieux moy venir,  
Ne onc pouoit avenir  
Chose dont j'eusse tel joye.  
Si l'encontray en la voye  
675 A moult noble chevauchée,  
Sa litiere ay approchée,  
Si la saluay et elle  
Moy, adonc ma dame belle  
Me dist : « Grant peine prenez,  
680 Beau cousin, quant cy venez



- A present n'est pas raison, »  
Ainsi, de mainte raison  
Devisant a lie chiere  
A ma doulce dame chiere,  
685 Venimes en approchant  
Le chastel, et chevauchant  
Couste sa litiere (certes,  
J'avoye pour mes dessertes  
Assez guerdon, me sembloit,  
690 Car ma grant joye doubloit  
De ce qu'il m'yert vis qu'adoncques  
Meilleur semblant que n'ot oncques  
Fait me monstroït) arrivames  
Ou chastel ou nous trouvames  
695 De dames moult bel encontre,  
Qui agenoillées contre  
Elle sont en guise deue.  
En la court fu descendue,  
De la litiere est yssue,  
700 A grant joye y fut receue.  
Si la pris a costoier  
Et par sales convoier  
Jusqu'en la chambre a parer.  
Tout l'ostel ot fait parer  
705 Cil a qui m'en attendoye,  
Dont l'erité attendoie.  
Adonc ceulz de telz offices  
Ont le vin et les espices  
Aportez ; si vult la belle  
710 Que je les preisse avec elle.  
Après ce nous retraïmes  
Et autre part nous traïmes  
Pour la laissier un pou estre  
A son privé, et a destre  
715 En autre lieu me tyray,  
Me vesty et atyray.



Pour dancier sus l'Alemagne,  
Et, a fin qu'il n'y remagne  
Riens a la feste parfaire,  
720 Riches robes oz fait faire  
De livrée a ma devise  
Jusqu'a cent, et si m'avise  
Que les vint et cinq en furent  
De veloux vert, celles eurent  
725 Les chevaliers a celle heure,  
De drap d'or ouvré desseure.  
L'endemain après la joste  
Vestirent, et, quoy qu'il couste,  
De satin brodé d'argent  
730 Orent, non mie sergent,  
Mais escuiers, gentilz hommes.  
Quant vestuz fumes, nous sommes  
Alez devers ma maistresse.  
Ja y trouvames grant presse  
735 De dames et damoiselles  
Du paÿs et de pucelles  
Venues a celle feste.  
Lors ma dame, sans arreste,  
Et toutes je saluay ;  
740 Bien croy que coulour muay,  
Si dis : « Ma dame, il est heure  
De soupper. » Lors sans demeure  
La prins et menay en sale.  
Adonc chascun s'en devale ;  
745 Chevaliers dames menoient,  
Et ces menestrelz cournoient  
Si que tout retentissoit,  
Dont la feste embelissoit  
Qu'assez faisoit bel veoir.  
750 Ma dame alay asseoir  
Au grant days en haulte place,  
Si ne croy qu'il lui desplace,



- Madame ma mere après  
 J'assis, et d'elle assez près  
 755 Quatre contesses se seirent  
 Après elle qui bien sirent,  
 Et par la sale ensuivant,  
 Chascune son renc suivant ;  
 Les gentilz femmes assises  
 760 Furent, toutes de renc mises.  
 Et ailleurs des gentilz hommes  
 Sistrent ; et en toutes sommes  
 De viandes et de vins  
 Furent, je ne le devins,  
 765 Bien serviz, croy, au soupper.  
 Et, sans plus m'y assouper,  
 Vous di que, quant souppé eusmes,  
 Après espices nous beumes ;  
 Puis menestrelz s'avancierent  
 770 Et a corner commencierent  
 Par gracieuse acordance.  
 Adonc commençay la dance,  
 Nouvelle, joyeuse et gaye,  
 Et la tout homme s'esgaye  
 775 La belle feste esgardant.  
 Adonc plus n'y vois tardant,  
 Ains ma dame alay prier  
 De dancier sans detrier ;  
 Un petit s'en excusa  
 780 Mais ne me le refusa.  
 Si la prins et la menay  
 A la dance et ramenay  
 En sa place ; et ne doubtez  
 Que j'estoye si boutiez  
 785 En s'amour qu'il m'yert a vis



Que j'estoye tout ravis  
De joye d'emprès elle estre;  
J'en quittasse le celestre  
Paradis, croy, ad ce point,  
790 Ne mieulx ne voulsisse point;  
Et ce qui m'abellissoit  
Plus fort et esjoÿssoit  
C'estoit sa très doulce chiere  
Qui, sans dongier ne renchiere,  
795 Estoit vers moy si plaisant  
Et si bon semblant faisant,  
Par doulz regart amiable,  
Qu'il me sembloit qu'agreable  
Avoit tout mon dit et fait.  
800 Le veoye par effait,  
Dont gayement je houoye  
Pour la grant joye qu'avoye  
Si qu'il sembloit que volasse;  
Bien estoit drois que j'alasse  
805 Present elle liement.  
Et ainsi jollement  
Avons dancié grant partie  
De la nuyt, quant s'est partie  
La feste, car temps estoit  
810 Du giste qu'on aprestoit.  
Lors la blonde comme l'ambre  
Je convoyay en sa chambre;  
La fut maint gracieux mot  
Dit, et, quant de ses yeulx m'ot  
815 Resgardé pour mieulx m'espandre,  
Après les espices prendre,  
Congié pris d'elle et de toutes.  
En beaulz lis sus riches coultes  
Nous couchames ça et la,

810 A' que on



820 Mais a la beaulté qu'elle a-  
 Voit, toute nuit sanz cesser,  
 Je ne finay de penser,  
 Et ces paroles disoye  
 Qu'en ma pensée lisoye :

*Rondel.*

825 **T**ant esjoïst mon cuer vostre venue  
 Que de parfaite joye il en sautele,  
 Flour de beaulté, rose fresche, nouvelle,  
 A qui serf suis par doulce retenue.

830 Dame plaisant, et de chascun tenue  
 La très meilleur de toutes et plus belle,  
 Tant esjoïst mon cuer vostre venue.

Par vous sera la feste maintenue  
 En grant boudour ; autre je n'y appelle  
 Pour m'esjouïr, car vous seule estes celle  
 835 Par qui vie et joye m'est soustenue,  
 Tant esjouïst mon cuer vostre venue.

840 Au matin ja me tardoit,  
 Com cil qui d'amours ardoit,  
 Que je veisse ma maïstresse.  
 Si me levay du lit très ce  
 Que j'en veys temps et saison.  
 Ja y ot pleine maison  
 De chevaliers preux et cointes,  
 Et escuiers qui a pointes



- 845 De rochez ja jouteront  
Et pluseurs jus gitteront.  
Quant je fus prest et la messe  
Fut ditte, je yssi hors, mais ce  
Que ma dame veu n'avoye  
850 Me tint pensif; lors en voye  
Me mis pour aler vers elle.  
Trouvay la fresche, nouvelle,  
Qui ja a sa messe estoit  
Et de l'oïr se hastoit  
855 Pour apprester son attour.  
Lors son gent corps fait a tour,  
Bel sur tous, c'est chose voire,  
A l'yssir de l'oratoire,  
Saluay courtoisement ;  
860 Et elle amoureusement  
Dist : « Beau cousin, bien viengnez ;  
Bien estes enbesoingnez,  
Et qui belle dame ara  
A la joute i aparra. »  
865 Lors commençay a soubzrire  
Et pris hardement de dire :  
« Ma dame, je vous vueil faire  
Requeste, et, se la perfaire  
Voulez, j'en seray moult ayse :  
870 C'est que moy donnez, vous plaise,  
D'un de voz corsez la manche  
Et un chappel de parvanche  
Pour porter sus mon hëaume ;  
Se me donniez un royaume,  
875 Je croy, mieulz ne l'aimeroie  
Ne plus joyeux n'en seroye ! »  
Adonc ma dame pensa  
Un petit, puis commença



- A dire : « Beau cousin, certes  
880 Mieulx vous vault pour voz dessertes  
D'autre dame avoir present  
Pour qui faciez a present  
Chevalerie et bernage.  
Mainte dame de parage  
885 A cy, et sans dongier d'ame  
Ne puet que n'y aiez dame,  
Et ce est bon assavoir,  
Si devez de celle avoir  
Don a sus vo tymbre mettre  
890 Pour qui vous devez tramettre  
De faire chevalerie ;  
Si soit vo peine merie  
De vo maistresse et amie,  
Non de moy, mais ne dis mie  
895 Que reffuser je vous vueille  
Vo requeste et que me dueille  
De ce faire, car feroye  
Plus pour vous, et toutevoye  
Ne vueil je que nul le sache. »  
900 Adonc elle mesme sache  
Un coutel soubz ses courtines,  
Et la manche o les hermines  
D'un de ses corsez hors taille  
De drap d'or, si la me baille ;  
905 Dont forment la merciay,  
Et après, d'elle aussi, ay  
Eu le chappel verdoiant,  
Dont je fus liez et joyant ;  
Si dis que la porteroie  
910 Sus mon tymbre et jousteroye  
Pour s'amour, mais vouldist prendre  
Tout en gré, car a apprendre



Avoye encore ad ce faire.  
Lors ma dame debonnaire  
915 Se teut sans que semblant feist  
Qu'il lui pleüst ne desseist ;  
Et je plus n'osay parler.  
Congié pris, temps fut d'aler.  
Le disner tost apresté  
920 A a cellui jour esté.  
Tous en noz chambres disnames  
Assez brief, et puis alasmes  
Ou champ ou les joustes estre  
Devoient, par la champestre  
925 Es beaulz paveillons tendus  
Sommes adonc descendus ;  
Le harnois ja y estoit,  
Ces lances on apprestoît  
Et essaioit on destriers.  
930 Haultes selles a estriers,  
Blanches et rouges et vertes  
Et de devises couvertes,  
Et targes de couleurs maintes  
Y veissiez et lances peintes,  
935 Et grant appareil y ot,  
Grant hutin et grant riôt  
Ja de gent en maint sillon.  
Adonc en mon paveillon  
Je m'armay et apprestay,  
940 Mais une piece y estay,  
Car ne me doz avancier  
De la joute commencer.  
Vint fumes d'un parement  
Et tous d'un estorement,  
945 Et tous chevaliers estions  
Qui a ceulz de hors joustions.



- Mon cousin dont j'ay compté  
Ci dessus, en qui bonté  
Ot assez, fu le premier  
950 Ou champ ; de ce coustumier  
Fut assez ; en tel arroy  
Entra que parent a roy  
Bien sembla en tout atour.  
Hëaume lancié a tour-  
955 Noye de belle maniere,  
Lances peintes et baniere,  
Et compagnie moult belle,  
Maint joueur de chalemelle  
Veissiez et peussiez ouïr  
960 La en droit, qui esjouïr  
Faisoit tout a l'environ ;  
Mais de ce plus ne diron.  
Plusieurs paveillons fait tendre  
J'avoye ou lieu pour attendre  
965 Ceulz de hors, ou eulx logier  
Se peurent et hebergier.  
Si croiez qu'ains que passez  
Fust le jour y vint assez  
De gentilz hommes vaillans  
970 Qui ne nous furent faillans  
A la joustes ; aultres se tindrent  
A cheval qui veoir vindrent.  
Mon cousin sans longue arreste  
Trouvé a sa joustes preste  
975 D'un chevalier qui a point  
Contre lui, mais il n'a point  
Guenchy, ains si le rancontre  
Qu'il l'abat a cel encontre  
Si qu'il fault que sang en saille.  
980 Nostre en fut la commençaille,



Adonc ouïssiez crier  
Hairaulx et hault escrier  
Son nom qui en Angleterre  
Ert congneu et mainte terre.  
985 Des pavillons lors saillirent  
Cinq des nostres, ne faillirent  
Mie a tost la joustre avoir,  
Mais chascun d'eulx y a, voir,  
Son devoir si très bien fait  
990 Que renom de leur bienfait  
Devoit bien par raison estre.  
Or commence en la champestre  
La joustre aval et amont,  
A doubles renc et a moult  
995 Enforciez les nostres furent  
Hors sailliz qui, comme ilz deurent,  
Jousterent hardiement.  
Lors menestrelz liement  
Cournoient, hairaux crioient,  
1000 Et ces chevaliers joustoient  
A effort par divers rencs  
Sus grans destriers aufferens.  
Ma dame et dame autre mainte,  
Ou beaulté fu toute empreinte,  
1005 Sus eschaffaulz bien parez  
Par maints degrez separez  
Estoient, les belles nées,  
En couronnes atournées,  
Vint dames a blonde trece  
1010 Dont la souveraine et maïstresse  
Estoit celle ou je pensoie ;  
Tout d'un parement de soye  
Blanc, brodé d'or a certaine  
Devise, chose est certaine,



- 1015      Estoient ces vint vestues.  
             Deesses du ciel venues  
             Sembloient ou fées faictes  
             A souhait toutes parfaittes.  
             Si pouez savoir de certes
- 1020      Que maintes cources apertes  
             Firent la journée faire,  
             Car ne devoit pas pou plaire  
             A ceulz qui telz creatures  
             Veoient, par quoy grans cures
- 1025      Mettoient d'en pris monter  
             Et l'un l'autre surmonter  
             Pour mieulx acquerir leur grace.  
             Si veissiez en celle place  
             Maint cop d'assiete diverse
- 1030      Et comment l'un l'autre verse  
             De hurt et l'autre en lumiere  
             Assegne d'autre maniere  
             Ou fiert ou targe ou hëaume ;  
             La l'un l'autre desheaume
- 1035      Ou a un mont tout abat ;  
             L'autre vient qui le rabat ;  
             Lances brisent, cops resonnent,  
             Et ces menestrelz hault sonnent  
             Si qu'on n'oïst Dieu tonnante.
- 1040      Ainsi vont grans cops donnant  
             D'ambedeux pars l'un a l'autre.  
             Et atant, lance sus faultre,  
             G'is hors de mon paveillon  
             Plus gay qu'un esmerillon,
- 1045      Fort affermé en l'estrier,  
             Tout blanc armé sus destrier  
             Qui ot blanche la couverte ;

1030 *A*<sup>2</sup> ajoute y après autre — 1037 *Les mss portent L.* brises  
 — 1044 *A*<sup>1</sup> que un



N'i ot ne rouge ne verte  
Nulle aultre couleur quelconques  
1050 Fors fin or; o moy adoncques  
Tous ceulz de dedens yssirent  
Qui puis maint bel cop assirent,  
Et tous blancs armez estoient,  
Et les lances que portoient  
1055 Noz gens fors que couleur blanche  
N'y ot; si os fait la manche  
Que ma dame m'ot donnée,  
Moult richement ordennée,  
Fort sus mon timbre atachier,  
1060 Que on ne la peust errachier;  
Et, sur mon hëaume mis  
Le chappel vert, lors me mis  
Bien a compaignie en voye;  
Car moult grant desir avoye  
1065 De ma trës doulce deesse  
Veoir; lors plein de leesce  
Arrivay ou l'en joustoit.  
L'ueil hauçay ou elle estoit  
Et receus son doulz regart,  
1070 Si n'oz de nul mal regard.  
Mon tour fis par devant elle,  
Puis me hëaume ysnelle-  
Ment et en renc vins; present  
Elle, ma lance en present  
1075 Me bailla un noble conte  
En me disant que grant honte  
Seroit se bien ne joustoie  
Quant si noble tymbre avoye.  
Adonc la lance baissée,  
1080 Desirant que bien l'assiee,  
Poins destrier sans retenir  
Contre un aultre; adonc venir  
Vers moy le veissiez; la course



- Ne faillimes pas, mais, pour ce  
1085 Que c'est honte de compter  
Son mesmes fait, raconter  
Ne vueil plus en ce cas cy  
De mon fait, fors tant qu'a si  
Bien fait tint la belle née  
1090 Ce que fis celle journée  
Que trop grant loz m'en donna,  
Sienne mercy, et donna  
De ceulz de dedens le pris  
En la fin, et je le pris  
1095 Par le bon assentement  
Des dames, parfaitement  
Joyeux, ce sachiez de voir  
Qu'a mon pouoir mon devoir  
Y fis, selon mon joenne age,  
1100 Tout le jour, et, se bernage  
Y fis, aucun loz avoir  
N'en doy, car on peut savoir  
Qu'Amours faisoit tout l'affaire,  
Non pas moy, si n'en fault faire  
1105 Compte; et si n'est mie doubte  
Qu'il avoit en celle route  
Mains chevaliers esprouvez  
Trop meilleurs que moy trouvez,  
Car de toutes pars venus  
1110 Y furent grans et menus  
Et qui mieulx gaignié avoyent  
Le pris et bien le savoyent;  
Mais croy que pour ce le firent  
Les dames, car elles veirent  
1115 Coment je yere entalenté;  
Pour ce bonne voulenté,  
Je croy, pour fait reputerent  
Lorsque le pris me donnerent  
A fin que fusse rentiers



- 1120 De joster plus volentiers.  
A un Alemant, abyllé  
Et fort jousteur entre mille,  
De ceulz de dehors donné  
Fut le pris qu'iert ordonné.
- 1125 Ainsi dura tout ce jour  
Celle joste, et sans sejour  
Nouveaulx jousteurs y venoient,  
Et les nostres maintenoient  
La joste contre tout homme.
- 1130 Qu'en diroye toute somme?  
Trestous bien et bel le firent,  
Mais tous les cops qu'ilz assirent,  
Qui, quòy, comment n'en quel guise,  
N'est besoing que le devise,
- 1135 Car la ne gist mon propos  
Ne ce que dire propos.  
Nuit vint, la joste failly;  
Atant chascun s'en sailli;  
Tous et toutes s'en tournerent
- 1140 Et ou chastel retournerent  
Ou le soupper queux hastoient.  
Es logeis qui hors estoient  
Mes gentilz hommes tramis  
Pour prier, comme a amis,
- 1145 De par les dames de pris  
Et de par moy, qui depris  
Faisoie a tout gentil homme,  
Estrange et privé, tant comme  
Je pouoye, qu'ilz venissent
- 1150 Et la feste o nous tenissent.  
Ainsi tout a la reonde  
Fis crier table reonde,  
Que qui y vouloit venir



- Vensist la feste tenir.  
1155 Lors puis le grant jusqu'au meindre  
Y vindrent sans nul remaindre ;  
Si y ot de maintte terre  
Barons, et ne fault enquerre  
S'il y ot grant assemblée,  
1160 Car a joye redoublée  
Y furent receus a plain  
Tant de gent qu'esté a plein  
Le chastel. A lie face  
Les receus; la ot grant maçe  
1165 De barons de maint païs  
Et de gentilz homs naïs,  
Et chascun en son degré  
Y honnouray tout de gré.  
Le soupper grant et notable  
1170 Y fut; quant levez de table  
Fumes, menestrelz cornerent,  
Et de dancier s'ordennerent  
Compagnons de noble sorte;  
N'y a celui qui n'y porte  
1175 Riche habit de broderie  
Tout semé d'orfaverie  
D'or et d'argent a grans lames,  
Et d'une livrée dames  
Vestues veissiez; pareil  
1180 Se mettent en appareil  
Pour dancier joliment.  
Adonc veissiez liement  
Commencier feste joyeuse,  
La ou mainte gracieuse  
1185 Dame et damoiselle gente  
Courtoisement, par entente,  
Ces estrangers vous prioient



- De dancier et les prenoient.  
Lors veissiez tresches mener  
1190 Par sale, et chascun pener  
De dancier en gaye guise.  
Et moy, en qui Amour mise  
Ot la desireuse flamme,  
N'avoye fors a ma dame  
1195 Pensée, regard n'entente ;  
De dancier un pou d'attente  
Fis, a fin qu'on n'aperceust  
Ma pensée ne sceüst,  
Ains me tenoye o les sages  
1200 Chevaliers, tant que messages  
Me vindrent dire qu'alasse  
En la sale et ne tardasse,  
Car ma dame me mandoit  
Qui trop fort me demandoit ;  
1205 De ce fus je lié sans doubte.  
Adonc a moult belle route  
De gentilz hommes m'en tourne  
En sale ou nul ne fut mourne,  
Ains dançoient a l'estrive,  
1210 Et quant vers ma dame arrive :  
« Beau cousin », me va elle dire,  
« Que ne danciez vous, beau sire ! »  
Je dis : « Ma dame, venez  
Dancier et si me menez. »  
1215 Elle dist qu'ainçois dançasse.  
Lors, a fin que commençasse  
Prins une dame jolie  
A la dance, a chiere lie,  
Un tour ou deux la menay  
1220 Et en son lieu ramenay ;  
Puis ma dame par la main  
Prens, a la dance la main  
Gayement par accordance.



- Ainsi dura celle dance  
 1225 De la nuit moult grant partie,  
 Et après s'est departie;  
 Chascun s'ala reposer  
 Et en beaulz blancs draps poser.  
 Mais moy qui dame et maistresse  
 1230 Avoye, et qui la destresse  
 De desir d'estre amé d'elle  
 Sentoye soubz la mamelle,  
 Dont je fus feru par my,  
 Disoye ainsi a par my :

*Rondel*

- 1235 **R**ians vairs yeulx dont je porte l'emprainte  
 Dedens mon cuer, par plaisant souvenir,  
 Tant m'esjoïst l'espart a souvenir  
 De vous, très doulz qui me tenez en crainte.

- Et d'amoureux mal fust ma vie exteintte,  
 1240 Mais vous faites ma vigour soustenir,  
 Rians vairs yeulx dont je porte l'emprainte.

- Car il m'est vis que par vous a l'atteinte  
 Venray de ce ou desir avenir :  
 C'est qu'a son serf ma dame retenir  
 1245 Me vueille, et que sera par vous contrainte,  
 Rians vairs yeulx dont je porte l'emprainte.

- Le jour vint, et qu'en diroye?  
 Pour quoy plus esloingneroye  
 Sans achoison ma matiere ?  
 1250 L'endemain trestoute entiere



La journée aussi jousterent  
Escuiers qui se y porterent  
Bien et bel en toute guise.

De vert vestus a devise

1255 Furent vint aussi qui tindrent

La journée, et y vindrent

Les dames pour les veoir

Et pour le pris asseoir.

Vint damoyselles y furent

1260 Vestues de vert et eurent

Chappeaulx d'or dessus leurs treces,

Et toutes très grans maistrecs

Estoient, gentes et belles.

Mains destriers a haultes selles

1265 Firent le jour de rencontre

Jetter jus et ferir contre

Targes et lances brisier.

La maint cop qu'on doit prisier

Veist on donner et attendre;

1270 Mais je ne vueil plus entendre

A de ce tenir long compte,

Car mieulx me plaist que je conte

Ce pour quoy je commençay

Ce dit, et ce que pensay,

1275 Fis et dis en celle amour

Ou puis fis mainte clamour.

Trois jours entiers, n'est pas fable,

Dura la feste agreable

Ou toutes gens bien venus

1280 Furent et aise tenus;

Puis la feste departi,

Mais ma dame ne parti

D'un moys entier de cel estre.

J'en fis prier cil qui maistre

1268 A' dot p.

T. III.



- 1285    Estoit de ce ottroier  
         Qui l'ottroya, dont loyer  
         Moult volentiers lui donnasse  
         De cel ottroy se j'osasse.  
         Si pouez assez savoir  
1290    Quel joye devoie avoir  
         De celle plaisant demeure.  
         Si ne pensoie nulle heure  
         Fors visier parfaitement  
         Par quel voye esbatement  
1295    Mieulx lui peüsses donner :  
         Un jour faisoie ordonner  
         Baings et chauffer les estuves,  
         En blancs paveillons les cuves  
         Asseoir en belle place;  
1300    La convenoit que j'alasse  
         Quant ma dame ou baing estoit  
         Qui pas ne me dehaittoit,  
         Ains joye avoye parfaite  
         Quant je veoie sa faitte  
1305    Char blanche com fleur de lis.  
         Se ce m'estoit grant delis  
         Assez penser le pouez  
         Vous qui recorder l'ouez.  
         Aultre jour chacier alions,  
1310    Et autre nous devalions  
         Descendans sus la riviere  
         Pour voler; en tel maniere  
         Suivant maint joyeux sentier  
         Passames ce moys entier.  
1315    Mais sachiez qu'en ce soulas  
         Ou je fus, Amours son las  
         Plus qu'oncques mais estraigny  
         Mon cuer et si contraigny



- 1320 Que un grant desir d'estre amé  
Fu en moy si enflammé  
Qu'ainçoys que cessast la feste  
Oncques si dure tempeste  
Ne souffry autre povre homme.  
Bien n'avoye fors tant comme  
1325 Je la pouoye veoir  
Et mes yeulx fort asseoir  
Sur elle, dont ja lassez  
Je n'en fusse, n'estre assez  
Ne pouoye en sa presence,  
1330 Ce m'yert vis, mais celle aisance  
Me faisoit par doulz vouloir  
Si desirier que doloir  
Me convenoit durement,  
Si que croiez seurement  
1335 Que si sage pas n'estoye  
Que le grief mal que portoye  
Je sceusse très bien couvrir,  
Tout ne voulisse je ouvrir  
Mon penser a homme né  
1340 N'a femme, mais si mené  
Estoye et en si grant rage  
Que mon semblant le courage  
Demonstroït, maulgré qu'en eusse;  
Et convenoit que je fusse  
1345 Puis pensif, puis reveillé;  
Et comme homs desconseillé,  
Souvent si fort je plouroie  
Qu'a vis m'yert que je mouroie  
En grief dueil par un despoir  
1350 Et deffaillance d'espoir  
D'a s'amour jamais atteindre,  
Dont palir, fremir et teindre,



- Et souvent couleur muer  
Me convenoit et suer  
1355 En tremblant, puis tressaillir,  
Si que aucunes fois faillir  
Mon cuer du tout convenoit,  
Dont moult souvent avenoit  
Qu'au lit tout coy en estoie.  
1360 Ne beuvoye ne goustoye  
Viande ou saveur je eusse,  
Ne dormir je ne peüsse  
Pour riens, dont si m'atiray  
Que durement empiray ;  
1365 N'on ne savoit que j'avoye,  
Car dire par nulle voye  
Mon fait a nul ne vouldisse,  
Ne je ne le regehysse  
Pour morir, meismes a celle  
1370 Qu'amoye, et touteffois elle  
Souventes fois m'enqueroit  
Que j'avoye et requeroit  
Que lui deisse et ne cellasse  
Mon estre et que je parlasse  
1375 A elle sans avoir doubte,  
Car peine elle mettroit toute  
De m'en gitter, n'en doubtasse.  
Et ainsi par long espace  
Ma dame me confortoit,  
1380 Mais le faissel que portoit  
Mon cuer, pour tant, regehir  
N'osasse ne lui gehir  
Pour tout l'or qui est ou monde,  
Ains de pensée perfonde  
1385 Larmoyoye et souspiroie.  
Ne sçay que plus en diroye,



Ainsi alors m'acointay  
De desir, mais acointe ay  
Eu en lui dur et penible,  
1390 Car depuis lors la paisible  
Jolye joye failly  
Qu'avoye ainçois, et sailli  
Mon cuer en aultre dongier,  
Car me convint estrangier  
1395 Tout soulas et de tristece  
Faire ma très dure hostesse.  
Et longuement en ce point,  
Sans ce que j'osasse point  
Requerir mercis, je fus,  
1400 Pour doubtance de reffus.  
Si disoye en complaignant  
Ces moz en mon mal plaignant :

*Balade*

A mours, jamais ne cuidasse  
1405 Qu'a ton servant procurer  
Deusses tel doleur qui passe  
Toutes, car ne puis durer.  
Si te puis sur sains jurer  
Qu'a la mort m'en vois le cours  
Se de toy n'ay brief secours.  
1410 Car ardent desir me lasse  
Tant que ne puis endurer  
La peine qu'il me porchace,  
C'est par toy; vueillez curer  
Mon mal et de moy curer,  
1415 Car aillours ne sçay recours  
Se de toy n'ay brief secours.

1407 A' saints



Et certes mieulz mort amasse,  
Je te jur sans parjurer,  
Que souffrir long temps la masse  
1420 D'ardeur que fais enmurer  
En mon cuer, et murmurer  
N'ose; si vais en decours  
Se de toy n'ay brief secours.

De joye veulz espurer,  
1425 Amours, mon cuer et purer,  
Si qu'a douleur je recours  
Se de toy n'ay brief secours.

Au chief du moys ma maistrece  
Pour qui vivoye a destrece  
1430 Convint partir du manoir  
Devant dit, et plus manoir  
N'y pot, si s'en departi;  
Dont moult fus en dur parti  
Puis que perdoye la veue  
1435 De la belle très esleue  
Sans qui ne pouoye vivre.  
Or fus je du tout delivre  
De joye, car sans sejour  
La souloye a long sejour  
1440 Veoir et estre avec elle;  
Mais, sans en ouïr nouvelle  
Ne la veoir, convendra,  
Peut estre tel fois vendra,  
Trois moys ou quatre passer,  
1445 Qui m'estoit chose a passer  
Moult dure; si regraittoye  
Le temps passé et sentoye  
Pour ce depart tel dolour



1450 Que j'en perdoie coulour,  
Sens, maniere et contenance.  
Si croy que mon ordenance,  
Ce peut bien estre, aperceurent  
Pluseurs gens dont ilz esmeurent  
Paroles que l'en pesa ;  
1455 Et de ce tant me pesa  
Que de dueil cuiday morir.  
Quant je ouï la voix courir  
Que ma belle dame amoye,  
Si engreiga plus la moye  
1460 Doleur, car par ce j'oz doubte  
Que la grant amistié route  
Fust de moy et ses amis,  
Et ceste douleur a mis  
En moy peine trop rebourse,  
1465 Car j'oz grant paour que pour ce  
Aler lors on l'en faisoit,  
Et ce tant me desplaisoit  
Que ne le savoye dire.  
Toutefois ma dolente yre  
1470 A mon pouoir je celoye  
Encor mieulx que ne souloye,  
Et disoye en souspirant  
Ces moz cy, grant dueil tyrant :

*Balade*

1475 **O**r est du tout ma joye aneantie  
Et mon soulas tourné en amertume,  
Trés doulce flour, puis que la departie  
Je voy de vous, et la doulce coustume,  
Las ! que j'avoye  
De tous les jours vous veoir, qui en joye  
1480 Me soustenoit, sera tourné[e] en yre.  
Hé las ! comment vous pourray je a Dieu dire !



Ma doulce amour, ma dame et ma partie,  
 Celle de qui ardent desir m'alume,  
 Et que feray quant, n'en tout n'en partie,  
 1485 Ne recevray d'amours fors que l'escume?  
                   C'est que ou que soye  
 N'aray confort ne chose qui m'esjoye  
 De vo beaulté qui loing de moy se tire.  
 Hé las ! comment vous pourray je a Dieu dire !

1490 Ha ! mesdisans, ceste euvre avez bastie  
 Et pour ma mort forgé[e] a dure enclume ;  
 Fortune s'est a mon mal consentie,  
 Qui chiere n'a ne ma char ne ma plumc.  
                   Or n'y sçay voye  
 1495 Fors que morir, Dieu pri qu'il m'y convoie,  
 Car sans vous n'est riens qui me peust souffire.  
 Hé las ! comment vous pourray je a Dieu dire !

                  Ha ! simple et coye,  
 Au moins voiez comment plour et larmoye  
 1500 Pour vo depart qui me met a martire.  
 Hé las ! comment vous pourray je a Dieu dire !

Le jour de la departie  
 Vint, lors ma dame est partie  
 Et croy que se reposast  
 1505 Encor d'aler se elle osast,  
 Mais obeïr convenoit  
 Lors, si qu'il apertenoit  
 A son noble cuer apris ;  
 Tous remercie et a pris  
 1510 Congié et se met en voye.



Et moy, las! qui la convoye,  
Aloye lez sa litiere,  
Et la belle, qui entiere-  
Ment pouoit apercevoir  
1515 Comment sans la decepvoir  
L'amoye de vraye entente,  
Me regardoit par entente  
Affermée, de maintien  
Si très doulz que je maintien  
1520 Que reconforter vouloit  
Mon las cuer qui se douloit,  
Et plus avant ce peut estre  
Me deïst, mais a senestre  
D'elle un aultre chevauchoit  
1525 Et de nous si s'approuchoit  
Que loisir n'eussions de dire  
Chose ou trovast a redire,  
Dont durement le heoie ;  
Mais souffrir, bien le veoie,  
1530 Mains dongiers me convendroit,  
Souventes fois avendrait.  
Et ainsi nous chevauchames  
Tant que cheux elle arrivames  
En journée et demie,  
1535 Mais long ne me sembla mie  
Le chemin mais tost passé,  
Car je n'y fus pas lassé  
Tout fusse je vray martir.  
Si me vouldz d'elle partir,  
1540 Mais le maistre, pour maniere  
Faire d'assez feinte chiere,  
Se pena de me tenir,  
Et sçoy a son maintenir  
Que de moy en frenaisie  
1545 Estoit ; celle jalousie  
Lui avoit boutée en teste



Un qui fu a nostre feste,  
 A qui depuis je rendi  
 Le loyer, mais j'attendi  
 1550 Que l'en ne s'en donnast garde.  
 Si ot ce mauvais en garde  
 La belle que j'aouroye,  
 Dont de doulour je moroye.  
 Si prins congié et en voye  
 1555 Me mis, et le dueil qu'avoye  
 Dissimulay et couvry,  
 N'oncques l'ueil n'y descouvry,  
 Pour regarder ma souveraine  
 Qui me fu diverse peine,  
 1560 Et a peine s'en tenoit  
 Mon cuer, mais le convenoit  
 Pour paour du mesdisant,  
 Si aloye ainsi disant :

### *Balade*

1565 **A** Dieu, ma redoubtée dame,  
 A Dieu, sur toutes souveraine,  
 A Dieu, parfaite et sanz nul blasme,  
 A Dieu, très noble et d'honneur pleine,  
 A Dieu, vraye loyal certaine,  
 A Dieu, la flour de tout le monde,  
 1570 A Dieu sans a Dieu, blanche et blonde.

A Dieu, sage et qui hait diffame,  
 A Dieu, flun qui grant joye ameine,  
 A Dieu, le port de noble fame,  
 A Dieu, doulce voix de seraine,  
 1575 A Dieu, doulz loyer de ma peine,  
 A Dieu, celle en qui grace habonde,  
 A Dieu sans a Dieu, blanche et blonde.



A Dieu, très doulz oeil qui m'entame,  
A Dieu, trop plus belle qu'Helaine,  
1580 A Dieu, bonne de corps et d'ame,  
A Dieu, très gracieux demaine,  
A Dieu, joyeuse tresmontaine,  
A Dieu, de toute valeur l'onde,  
A Dieu sans a Dieu, blanche et blonde.

1585 A Dieu, princesse très haultaine,  
A Dieu, accueil que crainte meine,  
A Dieu, de tous les vices monde,  
A Dieu sans a Dieu, blanche et blonde.

Ainsi a par moy parloye  
1590 Et gemissant m'en aloye,  
Et tant d'errer estrivay  
Qu'a mon manoir j'arrivay.  
Si me trouvay envay  
De grief dueil et esbahy  
1595 Quant plus n'ay chieux moy veüe  
Celle que os a dame esleue  
Que mon cuer tant tenoit chiere.  
Or ay dit comment premiere-  
Ment je desiroye estre  
1600 Amoureux et ou doulz estre,  
Coment Amours me navra  
Du dart dont mon cuer n'avra  
Jamais santé, si diray  
Du mal que depuis tyray,  
1605 Aussi est droit que je die  
Le bien : celle maladie  
Moulteplioit et croissoit  
Dont ma vigour descroissoit,  
Si que pale, maigre et las  
1610 Estoie et souvent, hé las !  
Disole par desconfort,



Car je n'avoie confort  
 De nulle part puis que voye  
 Bonne trouver ne savoye  
 1615 De veoir ma doulce dame,  
 Car tant craignoie son blasme  
 Que je ne m'osoie traire  
 Vers elle, quelque contraire  
 Que eusse, et ce me fendoit  
 1620 En larmes et confondoit ;  
 Si en fus au lit malade  
 Et lors dis ceste balade :

*Balade*

Puis que veoir vo beaulté souveraine  
 Ne puis, m'amour, ma dame et seule joye,  
 1625 Mon cuer livré est a mortelle peine,  
 Car se les biens de tout le monde avoie  
 Sans vous veoir souffisance n'aroye,  
 Et j'en suis loing ! dont me convient complaindre  
 En regraitant le bien qu'avoir souloie ;  
 1630 Si ne m'en sçay a autre que vous plaindre.

Car vraye amour, de ce soyez certaine,  
 Le souvenir comment je vous veoye  
 Ne laist partir de moy qui me rameine  
 Vostre beaulté au devant, simple et coye,  
 1635 Par quoy desir si durement guerroye  
 Mon povre cuer que je le sens esteindre  
 Ne plus de mal en mourant je n'aroye ;  
 Si ne m'en sçay a autre que vous plaindre.

Hé las ! au moins, belle, pour qui j'ay peine,



- 1640 Se pour vous muir, de quoy je suis en voye,  
 Priez pour moy, et m'ame sera saine,  
 Et se vo doulz oeil un pou en larmoye  
 M'ame en sera plus ayse, se la moye  
 Douleur vous fait par de pitié contraindre  
 1645 Un pou gemir, car pour vous plour me noye,  
 Si ne m'en sçay a autre que vous plaindre.

- Ha ! doulce flour a qui tout je m'ottroye,  
 Je sens mon cuer par trop amer estraindre,  
 Et Fortune ne veult que vous revoye ;  
 1650 Si ne m'en sçay a autre que vous plaindre.

## COMMENT L'AMANT SE COMPLAINTE A SON COMPAGNON

- Ceste douleur me dura  
 Un tandis ou endura  
 Mon cuer trop greveuse ardeure,  
 Et, sans faille, ceste dure  
 1655 Peine m'eust a mort mené  
 Se Dieu tost n'eust ramené  
 Le devant dit mien parent  
 Qui de mort me fut garent.  
 De hors du païs venoit  
 1660 Et le mal qui me tenoit  
 Assez avoit parceü  
 Par mon semblant et sceü.  
 Si me trouva moult malade,  
 A couleur destainte et fade,  
 1665 Dont il lui pesa griefment.  
 Ver moy vint le plus briefment  
 Qu'il peut, si fus esjouÿ



- Si tost que sa voix j'ouÿ,  
Car moult chierement l'amoye;  
1670 Et adonc celui larmoye  
Quant si me voit empirié;  
Si l'ay près de moy tirié  
Et l'acol par amour chiere,  
Et il me dist : « Dieux ! quel chiere  
1675 Faites vous, et est ce adcertes ?  
Il fault que je sache, certes,  
Vostre estat, sans rien celer,  
Ne me devez receler  
Vo courage ne vostre estre  
1680 Ne plus que feriez au prestre  
A qui vous confesseriez,  
Et certes vray fol seriez  
De tenir ou cuer enclose  
La douleur qui tient forclose  
1685 Vostre joye et vo santé;  
Et tant le monde ay hanté  
Que je voy, congnois et sçay  
Vostre mal, car a l'essay  
Ay esté de tel malage.  
1690 Ce n'est pas mal, ains est rage,  
Car d'amours vous vient sans faille  
Qui vous art com feu en paille ;  
De ce riens ne m'apprendrez.  
Et grandement mesprendrez  
1695 Vers nostre vraye accointance  
Se de moy aviez doubtañce  
Qu'en riens je vous descelasse  
Et que je ne vous celasse  
Plus que mon fait proprement.  
1700 Et le mal qui asprement  
Vous tient quoy comment me dites,  
Et vo douleurs plus petites  
En trouverez, n'est pas doute,



- Car trop grant mal en soy boute  
1705 Cil qui sueffre maladie  
D'amours sans qu'a nul la die.  
Si me dittes tout vostre estre,  
Mon doulz cousin, sire et maistre,  
Sans que riens ou cuer remaigne,  
1710 Ou se non, en Alemaigne  
M'en ryray jusqu'a grant piece,  
Car ne cuidiez qu'il me grief ce  
Petit d'ainsi vous veoir ;  
Ne me doit mie soir. »  
1715 Quant celui qui chier m'avoit  
M'eut tout au mieulx qu'il savoit  
Ainsi preschié que lui deisse  
Tout mon penser et gehysse,  
Son doulz parler si lia  
1720 Mon cuer et amolia  
Qu'a sangloutir et plourer  
Me pris si fort qu'acourer  
Sembloit que de douleur deusse  
N'a lui parler ne peüsse,  
1725 Qui me donnast tout le monde.  
Et celui, a très grant onde  
A plourer, par grant pitié,  
Se prist, mat et dehaitié  
Du mal que me voit souffrir,  
1730 Et moult commence a s'offrir  
A moy de corps et d'avoir  
Pour me faire joye avoir,  
Et peine en toute maniere  
Y mettra, ja si grant n'yere  
1735 La chose, n'y failliroit  
Et bien me conseilleroit,  
Mais que je me confortasse



- Et que plus je ne plourasse,  
Car sens ne honneur n'estoit.  
1740 Et ainsi m'amonnestoit  
Mon chier ami de reprendre  
Joye en moy; lors, sans attendre,  
Dis : « Doulz cousin et ami,  
Je sçay bien qu'avez a my  
1745 Grant amour, si ay je certes  
A vous, dont joyes ne pertes  
N'aulture aventure quelconques  
Celer l'un a l'autre doncques  
Ne devons; si vous diray  
1750 Tout mon fait, n'en mentiray,  
Combien qu'oncques n'en parlasse  
A personne tant l'amasse.  
Trés doulz cousin, vous savez,  
Se souvenance en avez,  
1755 Comment vous et moy alames  
Pieça en lieu ou trouvames  
Assez près de cy venue  
Tel dame dont la venue  
Ay depuis chier comparée,  
1760 Car très lors fut separée  
De moy ma très simple enfance,  
Et sans cuidier faire offense  
Amours me fist celle amer  
Par qui je muir, mais blasmer  
1765 Ne m'en doit nul, car sans faille  
Il n'est dame qui la vaille  
En beaulté, en sens n'en pris.  
Si savez comment j'empris  
Nostre feste qui fut belle  
1770 Et tout fut pour l'amour d'elle.  
Après la feste faillie



- A cil qui l'a en baillie  
Je fis prier de laissier,  
Pour esbatre et esleescier,  
1775 Ma doulce dame manoir  
Tout l'esté en no manoir,  
Pour chacier en la forest  
Qui vert yere et encor est.  
Si savez que volentiers  
1780 L'ottroya, mais, croy, entiers  
Trois jours puis n'y arrestastes,  
Car tantost vous en alastes,  
Et je demouray en joye  
Pour ma dame que veoie,  
1785 A loisir ce temps durant.  
Mais Meseur, qui procurant  
Va maint mal aux amoureux,  
Pour me faire doloureux  
Fist a tel, que mau feux arde !  
1790 De mon maintien prendre garde,  
Et comme hom plein de malice  
De moy qui fus trop novice  
Bien aperceut le courage  
Et comment mon cuer en gage  
1795 A elle estoit seulement ;  
Si ne sçay je nullement  
Comment le peut percevoir,  
Car pour chascun decepvoir  
En ces cas peine mettoie  
1800 De me celer, et hantoye  
Autant ou plus autre dame,  
N'oncques je ne dis a ame  
Mon penser, mesmes nel dis je  
Oncque a celle a qui suis lige  
1805 Qui riens n'en scet, dont me poise ;

1780 A<sup>1</sup> L'ottroyay — 1781 A<sup>2</sup> .vii. j. — 1791 A homme



- Et ce desloyal tel noyse  
 En a fait et tel nouvelle  
 Que le jaloux fist la belle  
 Partir sans plus de demour ;  
 1810 Dont, se je n'eusse eu cremour  
 De l'onneur d'elle empirer,  
 J'en eusse fait souspirer  
 Et jusqu'a mort repentir  
 Cil par qui ce yert et sentir  
 1815 Ma douleur et ma pesance.  
 Et ainsi en desplaissance  
 Ay despuis vescu l'espace  
 De troys moys, et mieulx amasse  
 Mourir pour estre delivre  
 1820 De ce grief mal qu'ainsi vivre,  
 Puis qu'aultrement ne la puis  
 Veoir, combien qu'elle a puis,  
 Siennne mercis, demandé  
 De mon estat et mandé  
 1825 Que un pou de temps me teneisse  
 D'elle veoir et n'en fuisse  
 Semblant et qu'un temps vendroit  
 Qu'autrement en avendroit,  
 Et que fuisse bonne chiere.  
 1830 Si sçay que ma dame chiere,  
 Au moins si comme je pense,  
 Congnoist et scet sans doubance  
 Que je l'aime entierement,  
 Mais ne puis legierement  
 1835 Souffrir l'effort du desir  
 Que j'ay, car trop la desir.  
 Si l'ay je depuis veüe  
 Mais non mie a la sceüe  
 Des gens, car me desguisié,



- 1840 Que je ne fusse advisié ;  
De loins l'ay veue passer.  
Ainsi, comme ouez, passer  
M'a falu depuis ma vie  
En tel dueil que n'ay envie  
1845 Fors de bien briefment morir ;  
Si ne voy que secourir  
Vous ne autre me peüst,  
Car que ne l'aperceüst  
Le jaloux ou ses agaites  
1850 Est impossible, et n'en faites  
Doubte qu'il me convient cuire  
En ce sain ou que je muire,  
Et ainsi pouez ouïr  
Comment me doy resjouïr  
1855 De ceste dure accointance  
D'amours, et comment j'y tence  
En ma balade escoutez,  
Cy un pou vous accoutez :

*Balade*

- 1860 **H**<sup>A</sup>! Amours, bien m'as traÿ  
Qui au premier pour moy prendre  
Me fus doulz, puis envaÿ  
M'as si qu'il me fault mort prendre  
Par toy, l'en te doit reprendre  
De porter double visage ;  
865 Mais l'un a couleur de cendre  
Et l'autre a d'un ange ymage.

Dont je me truis esbaÿ

1856 A je y t.



- D'en tel obscurté descendre  
Par desir qui esmaÿ  
1870 M'a, mais desespoir fait fendre  
Mon cuer, et espoir entendre  
A moy ne veult : l'un fait rage  
Et a mort obscure tendre,  
Et l'autre a d'un ange ymage.
- 1875 Mais bon espoir enhaÿ  
M'a, et desir et toy rendre  
Me voulez mort, dont haÿ !  
Mi dolent, diz de cuer tendre,  
Car tu pris pour mieulx m'espandre  
1880 Accueil et dongier sauvage :  
L'un est au deable gendre  
Et l'autre a d'un ange ymage
- 1885 Amours, tu m'as fait entendre  
Qu'après joye dueil attendre  
Puet cil qui te fait hommage ;  
Deux manoirs as : l'un d'esclandre  
Et l'aulture a d'un ange ymage.
- 1890 Ceste balade pris  
Moult mon cousin, mais pris a  
Grant doulour en mon anuy,  
Et moy qui ne m'en anuy  
En plourant dont ne finay  
Ainsy ma raison finay  
Et mon mal en alegoit,  
1895 Mais mon cousin enragoit  
Dont ainsi desconforter  
Me veoit sans deporter.  
Si me prist a dire : « Avoy !



- 1900 Bien congnoys que pou d'avoy  
Et d'arroy vers vous se tire.  
Quel cause avez vous, beau sire,  
De vous ainsi demener ?  
Certes vous devriez mener  
Bonne vie, ad ce qu'entens,  
1905 Quant vo dame en lieu et temps  
Vous promet par son message  
Du bien ; vous n'estes pas sage  
Quant esperance n'avez  
Qui vous conforte, et savez  
1910 Que vo dame se prent garde  
Que l'amez et qu'il lui tarde  
Que faire vous puist plaisir ;  
Coment puet tel desplaisir  
En vo nyce cuer s'embatre  
1915 D'ainsi vous laissier rabatre  
Et tuer a desespoir ?  
Mains amans, sanz nul espoir  
D'estre amez de leur maistresse,  
Ont long temps a grant destrece  
1920 Servi sanz nul bien avoir,  
Ne pour sens ne pour avoir,  
Un seul regart n'en avoient  
Ne repairier n'y osoient  
Pour doubance de mesdis.  
1925 Si vous souffrez et mes diz  
Croiez, car n'avez que plaindre  
Par ce que j'oz, et atteindre  
Pourrez tost a vo desir.  
Puis que vo dame a plaisir  
1930 Prent vo fait, vous n'avez garde,  
Ja n'y ara si grant garde  
Qui l'en puisse destourner ;



- Mais a folie tourner  
Vous puet de si longue piece  
1935 Avoir mis, a qui qu'il griefce,  
Sans de vostre estat savoir  
Lui faire; bon assavoir  
Est qu'elle ne venra mie  
Vous prier, et ne sçay mie  
1940 Comment si fol vous estiez,  
Quant a loisir vous estiez  
Avec elle sans dongier,  
Que, sans longuement songier,  
Ne lui disiez l'amour toute  
1945 Dont l'amiez! » Adonc sans doubte  
Dis : « Cousin, las! je n'osasse,  
Si avoye je assez espace  
Voirement, mais je doubtoye,  
Et si fort la redoubtoye  
1950 Que ne lui osasse dire,  
Pour mourir; dont j'en souspire  
Et m'en repens grandement,  
Mais oncques le hardement  
N'en oz, car mon cuer trembloit  
1955 Devant elle, et me sembloit  
Toutevoye quant j'estoye  
A par moy que lui diroye.  
Ainsi souvent m'avenoit,  
Mais certes ne m'en tenoit  
1960 Quant j'estoye en sa presence;  
Tant m'enyvroit la plaisance  
De son regart amoureux,  
Qui tant m'estoit savoureux,  
Qu'il me sembloit que sans dire  
1965 Apercevroit mon martire. »  
Lors mon cousin me respont :



« Fol est l'amant qui repont  
Et cele l'amour a dame  
Dont il l'aime, car, par m'ame!  
1970 L'attente lui peut trop nuire;  
Mais, puis que ne l'osiez dire  
Pour la craintte que aviez,  
Quant escrire bien saviez,  
Pour quoy en lettre ou escript  
1975 Ne lui mettiez en escript?  
Et plus esbahir me puis  
De vo folour quant depuis  
Le temps qu'esloingnié en fustes,  
Quant son message receustes,  
1980 Que vous ne lui remandastes  
Vostre estat, pour quoy tardastes?  
Car bien a propos venoit,  
Mais enfance vous tenoit,  
Certes je dis de ce voir,  
1985 Car pouyez apercevoir,  
Puis que tant donner vous faire  
Vouloit que de vostre affaire  
Nouvelle ouïr s'apensoit,  
Qu'elle a vostre amour pensoit.  
1990 Si vous doyt tenir pour nyce  
Quant ne lui mandiez. Et n'ysse  
Jamais jour de vostre bouche  
Parole qui en riens touche  
Desconfort, ains esleesciez  
1995 Vostre cuer et me laissiez  
Faire, et je vueil qu'on me tonde  
S'il y a homme en ce monde,  
Tant savray tous aourber,  
Qui vous puisse destourber



- 2000      Que vous ne voiez la belle,  
             Sans qu'il en soit ja nouvelle,  
             S'elle veult et vous voulez.  
             Sus, doncques, ne vous dolez  
             Plus! mais faites chiere bonne,  
2005      Car, sans que plus vous sermonne,  
             Je vous promet et affie  
             Que verrez plus d'une fie  
             Vo dame ains que la sepmaine  
             Soit hors; se Dieu la m'ameine,  
2010      Bien y trouveray maniere. »  
             Adonc, si com la lumiere  
             Le temps tenebreux esclaire  
             Et du soleil la très claire  
             Luour oste l'obscurté,  
2015      Ainsi la griefve durté  
             De ma douleur fu garie  
             Par cestui cy et tarie,  
             Qui si bien me conforta  
             Que joye et reconfort a  
2020      Mis en moy et fait remaindre  
             Ma douleur, si n'oz que plaindre.  
             Et cil ne s'oblia mie :  
             Ains que fust heure et demie  
             Parti, vers ma dame ala.  
2025      A le faire brief, a la  
             Belle parla sagement,  
             Et pour mon alegement  
             Procura toute leesce,  
             Et de ma griefve tristece  
2030      Dist, de son auctorité  
             Trestoute la verité,  
             Et comment trouvé m'avoit  
             Presque mort et ne savoit



Se pourroye revenir  
2035 Du mal qui tout coy tenir  
Me faisoit au lit griefment,  
Tout lui dist, et que briefment  
Ne me pouoit conforter.  
Si la venoit enorter  
2040 Que, pour Dieu! pas ne souffrist  
Qu'un tel joenne enfant s'offrist  
A mort pour la trop amer,  
Et que on la devroit blasmer  
Se de ma mort cause estoit!  
2045 Et ainsi amonnestoit  
Par son parler doulz et sage  
Ma dame que du malage  
Ou pour elle languissoie  
Eust pitié, car point n'ysoie  
2050 Du desir qui m'empiroit  
Et a la veoir tyroit.  
Quant sa raison ot finée,  
La belle très affinée,  
Si comme il me raporta,  
2055 Vid que coulour de morte a-  
Voit et moult fist mate chiere;  
Si vid bien a sa maniere  
Que mon mal lui desplaisoit  
Et pitié lui en faisoit;  
2060 Mais non obstant, toutevoye  
Aler vult par aultre voye;  
Si commence ainsi a dire :  
« Merveilles dites, beau sire,  
Que mon cousin et le vostre  
2065 Est en tel point; par l'Apostre  
Saint Pol! a peine le croy je  
.....

2055 A<sup>1</sup> de mort — 2066 *Il doit manquer un vers à la suite de celui-ci*



- Nullement qu'il s'appensast  
De ce ; Dieux, qui le pensast !  
Mais s'il est ainsi, sans doubte  
2070 Ce fait enfance qui boute  
Son cuer et trop grant joennesce  
En amer, autre riens n'est ce,  
Si en sera en peu d'eure  
Desmeü, se Dieux sequeure;  
2075 Mettez l'en hors, si pouez,  
Conseilliez lui et louez  
Que de ce il se retraye  
Et autre part son cuer traye,  
Car ja a moy n'avendroit  
2080 Et grant mal en avendroit  
S'il estoit aperceü;  
Ne sçay comment l'a sceü  
Tel veillart, que Dieu maudie!  
Par qui ne suis tant hardie  
2085 Qu'a homme né je parlasse,  
Et, s'il fust ceans, n'osasse  
A vous ainsi divisier.  
Coment pot il avisier  
Que cel enfant eust courage  
2090 De m'amer, si a fait rage  
Cellui plein de punaisie,  
Car eveillié jalousie  
A contre moy telement  
Qu'a personne nullement  
2095 En secret je n'oseroye  
Parler ; o moy, ou que soye,  
Fault que soit li estalons  
Et toudis l'ay aux talons,  
Car commis est pour ma garde ;  
2100 Si me suis donné de garde



Que tout ce n'est que pour doubte  
De vo cousin, si escoute  
Ce que on me dit et raporte,  
Et souvent va a la porte  
2105 Pour guetier qui ceans entre.  
Et, par Dieu et dos et ventre!  
Se ne fust pour conscience,  
Je vous promet, et fiance,  
Je l'eusse fait si bien battre  
2110 Par mes parens que rembatre  
Pour moy gaitier n'oseroit  
Jamais, ou trop fol seroit.  
Et, a fin que ceste gaitte  
Cessast qui tant me dehaitte,  
2115 A vo cousin je manday  
Et sy m'y recomanday  
Que une piece se tenist,  
Que point ceans ne venist,  
Que ne le veïst l'espie,  
2120 Et, quant seroit ceste espie  
Un pou cessé, il vendroit  
Nous veoir, moult n'attendroit;  
Se me semble bien, sans faille,  
Que pou a pou elle faille,  
2125 Et si croy que sans doubtaunce  
Jalousie plus n'y pense,  
Si pourra prochainement  
Y venir, mais bonnement  
Croy qu'il vault mieulx qu'il s'en tiengne,  
2130 S'il pense a moy, et n'y viengne;  
Car, si com chascun tesmoingne,  
L'amour que on ne voit s'eslongne. »  
Ainsi celle estrangement  
Respont, ne d'aligement



- 2135 Me donner mot ne demy  
Ne parloit fors a demi.  
Mais ne s'en souffry atant  
Cellui, ains dist : « Il a tant  
De pitié en vous, ma dame,  
2140 Que perdre le corps et l'ame,  
Quelque chose que disiez,  
Ne croy que vous laississiez  
A cellui qui est tout vostre,  
Voir vous dis com patenostre.  
2145 Et avez dit que retraire  
Je l'en puis ; voire, par traire  
Lui l'ame du corps ! n'y sçay  
Aultre tour ! certes mis ay  
Toute peine a l'en desmettre,  
2150 Mais je vous dis a la lettre  
Qu'il se muert s'il n'a secours,  
Riens n'arez gaignié se cours  
Sont ses jours par deffaillance  
De vous ! Dame de vaillance,  
2155 Dites moy vostre response ;  
Car ne prise pas une once  
Le jaloux, ne ses agaites  
Ja ne feront si grans gaittes  
Que moult bien ne les deçoive ;  
2160 Mais, que voye et aperçoive  
Que vous en ayez pitié,  
Faites lui tel amistié ;  
Et tant de lui vous souviengne  
Que vueilliez que o moy ça viengne,  
2165 Et bien et bel lui mettray,  
Si bien m'en entremettray  
Que congneu ne sera d'omme,  
Mais que vous me dissiez comme  
Vous voulez qu'il se maintiegne  
2170 Et pour vous veoir se tiengne.



Si n'alez plus retardant,  
Car il lui va trop tardant. »

Celle dit : « Ne croiez mie  
Que soye si s'anemie

2175 Que de son mal et mesaise  
Grandement ne me desplaise ;

Car je l'aim, sachiez de voir,  
De bon cuer, et son devoir

Face de m'onneur garder,

2180 Et sans gaire retarder

J'en feray tant que souffire

Lui devra, plus n'en vueil dire

A present, mais se maintiegne

Sagement et ça ne viegne

2185 Encor, mais vous y vendrez

Souvent et ne me tenrez

Gaires plait devant les gaites.

De vos nouvelles me faites

Savoir par tel qui est sage ;

2190 Vers vous yra ; ce message

Est loyal, je vous affie,

Mais vous ne lui ne se fie

En aultre, il m'en peseroit,

Aussi venir n'oseroit

2195 Autre vers moy. Si avons

Assez parlé, ne savons

Se nous sommes agaitiez.

Si soit joyeux et haitiez,

Ce dites a vostre ami,

2200 Et que avez tant fait a mi

Que, s'oultrage ne demande,

Ne fauldra a sa demande.

Si m'y recommanderez

Et le reconforterez



- 2205 Disant qu'ains .viii. jours passez  
Veoir me pourra assez ;  
Et ne conseillons plus ore,  
Mais n'en yrez pas encore.  
Et bien nous est venu
- 2210 Que dongier n'est survenu  
Tant qu'avons a long loisir  
Devisié a no plaisir.  
Si attendrez Monseigneur  
Qui joye pieça greigneur
- 2215 N'ot, bien le sçay, qu'il avra  
Quant vo venue savra ;  
Et un jeu d'eschiez jouerons  
En tandis; ainsi pourrons  
Aucunes fois nous esbatre. »
- 2220 Et adonc, sans plus debatre,  
Comencierent a jouer  
Tous droiz sur un dreçouer.  
Au chief de piece, le maistre  
Et seigneur entre en cel estre.
- 2225 Lors mon cousin a l'encontre  
Lui ala ; quant cil l'encontre  
A merveilles lui fait chiere,  
Et lui dist que moult a chiere  
Sa venue et que bien viengne.
- 2230 Brief, sans que plus je vous tiegne,  
Moult l'onnora grandement,  
Et en son commandement  
Dist que tout le sien estoit,  
Que, s'eu païs arrestoit,
- 2235 Autre logeis ne prenist  
Que layens, et y venist ;  
Du tout joyeux en seroit,  
Ou il s'en courrouceroit.



- Et celluy moult l'en mercie.  
2240 L'endemain, après ressie,  
Congié prist et s'en parti ;  
De retourner s'esparty,  
Car savoit quel desiroie  
Et que tost grant joye aroye.  
2245 Quant celui fut revenu,  
Tout ce qui ert avenu  
Ou voyage dont venoit  
Me dist, et que il tenoit  
Que mon fait se porteroit  
2250 Moult bien, car il hanteroit  
Leans souvent et menu,  
Par quoy et grant et menu,  
Comme a ma dame ot promis,  
Feroit tant que tous soubsmis  
2255 Seroient a sa cordele,  
Puis qu'il avoit l'accord d'elle ;  
Si me dist tout et compta.  
Dont de joye eü moult a  
Mon cuer qui devant estoit  
2260 En deul qui le tempestoit.  
Mais, pour plus tost avancier  
Mon fait, ad ce commencer  
Me conseilla que feïsse  
Unes lettres ou meïsse  
2265 Mon fait tout entierement  
Et comment trop durement  
Amours me menoit pour elle,  
Et qu'elle ouïst la querele  
De son serf qui requeroit  
2270 S'amour, plus riens ne queroit,  
Et toutes si faittes choses  
Meisse en unes lettres closes ;  
Si en seroit messagier  
Pour mon mal assouagier.



- 2275 Et je le creus, si dittay  
 Unes lettres ou dit ay  
 Coment pour s'amour m'aloit  
 Et tout ce qui me doloit.  
 Deux balades enclouy  
 2280 Es lettres que je clouy,  
 Dont la copie entendez  
 Vous qui a amer tendez :

## LETTRES CLOSES EN PROSE

*A celle qui toutes passe, que mon cuer craint  
 et aoure.*

Dame, la fleur de toutes les souveraines, très redoubtée et loée princesse, le desir de mon cuer et la plaisance de mes yeulx, très humble recommandacion devant mise, ma très amée et désirée dame, vueillez en pitié ouïr et recepvoir la doloureuse complainte de vostre servant, lequel, comme contraint, ainsi comme celui qui est a mort et prent remede perilleux pour estre a fin ou de mort ou de vie, très doulce dame, a vous qui par vostre escondit me pouez paroccire et par le doulz reconfort de vostre ottroy remettre en vie, je viens requerir ou mort hastive ou garison prochaine. Très belle, je sçay bien qu'en vous a tant de sens que bien avez peu apercevoir coment Amours ja pieça pour vous m'avoit et a en ses laz, et comment la paour<sup>1</sup> et crainte que grant amour en mon cuer mettoit me tolloit le hardement de le vous dire, doulce dame; et je sçay tant de toute grace en vous que, se eussiez sceü et saviez tout le mal et tourment que depuis ay souffert et

1. A<sup>2</sup> ajoute amour avant la p.



sueffre desirant vostre doulce amour, que, non obstant que je n'aye encore fait tant de vaillance et que en moy n'ait valeur souffisant pour avoir desservi l'amour de assés moins haulte <sup>1</sup> de vous, la doulce pitié de vostre benigne cuer ne m'eüst peü souffrir en tel langueur. Ha! dame, et se vous prenez garde a vostre valeur et haulte renommée encontre ce que n'ay encores acquis le nom de vaillant pour ce que trop joenne suis, vous m'arez mort. Mais, ma redoubtée dame, advisiez que vous me pouez tant enrichir comme de me donner cuer et hardement d'emprendre et achever selon ma poissance toutes choses honorables que cuer d'amant ose penser et faire pour l'amour de dame. Et, doulce dame et ma deesse en terre, puis que assez legierement pouez mettre en hault degré cellui qui vous aime et aoure comme sa plus désirée joye, vueilliez advisier comment par vostre doulz reconfort il soit respité de mort et lui rendu la vie. Et, se vous demandez ou voulez savoir qui en ce point l'a mis, je vous dis que ce ont fait voz <sup>2</sup> très doulz plaisans beaulz, rians et amoureux yeulx. Ha! dame, et, puis que par eulx a esté trait le cop mortel, il m'est advis que bien est raison que par la doulceur de vostre pitié doit estre assouagié et gary. Si vous plaise, très plaisante dame honnourée, me faire assavoir vostre bonne volenté et quelle voye vous voulez que je prengne, ou mort ou garison. Et ne vous vueil mie ennuyer de longue escripture, mais soiez certaine que ne savroie tout dire n'escire comment il m'en est, et l'apercevrez de fait, ou aviengne ou non a vostre amour; car, se je y fail, vous verrez ma mort, et, se par grace je y adviens, l'effet du bon vouloir en servant se monstrera. Si vous envoie ces .ii. balades cy encloses, lesquelles recevoir en gré vous plaise. Très belle et bonne, que assez louer je ne pourroye, a Dieu pri qu'il vous ottroit

1. A<sup>2</sup> m. souffisante -- 2. A<sup>1</sup> vous



autant de biens et de joyes que pour vostre amour  
ay de larmes plourées. Escript de cuer ardent et  
desireux.

Vostre très humble serf obeïssant.

Dame plaisant, sur toutes belle et bonne,  
Ayez mercy de moy qui tout m'ottrie  
3285 A vous servir, ame et corps abandonne  
A vo vouloir, et humblement deprie  
Que tost courir  
Facies pitié pour mon mal secourir,  
Ou pour vous muir, veuillez l'apercevoir,  
2290 Si me daignez pour ami recevoir.

Hé las! plaisant flour a qui je me donne,  
Ne m'occiez pas, mercy je vous crye,  
Priant, pour Dieu! que le mal qui s'entonne  
En moy vueilliez garir, je vous en prie,  
2295 Car recourir  
Ne sçay ailleurs, ne me laissez perir,  
Et regardez que j'aim sanz decevoir,  
Si me daingniez pour ami recevoir.

Ne voiez vous comment en plours m'ordonne  
2300 Et que se vo secours trop me detrie  
Je suis perdu, dont, sans que plus sermonne,  
Vueilliez m'amer, car Amours me maistrie,  
Dont acourir  
Faites mercis, car je suis au morir  
2305 Et vous savez que je dy de ce voir,  
Si me daigniez pour ami recevoir.

Dame, mercis, et quant fais mon devoir  
Si me daigniez pour ami recepvoir.



*Autre Balade*

2310 Ayez pitié de moy, ma dame chiere ;  
Achiere vous ay plus que dame du monde,  
Monde d'orgueil, ne me faites vo chiere  
Chiere achater par reffus, blanche et blonde ;  
L'onde de plour m'ostez si que revoye  
Voye d'avoir soulas qui me ravoye.

2315 Et se je y fail, pour ce qu'a moy n'affiere,  
Fiere moy mort, et en dolour parfonde  
Fonde mon cuer et plus vivre ne quiere,  
Quiere douleur ou tout meschief responde,  
Responde a tous : Amours point ne m'envoye  
2320 Voye d'avoir soulas qui me ravoye.

Belle plaisant et de tous biens rentiere,  
Entiere en foy, sans pareille ou seconde,  
Com de vo serf faites, sans m'estre fiere,  
Fierement non, qu'en douleur je n'affonde ;  
2325 Fonde qui fiert mon cuer, faites que voye  
Voye d'avoir soulas qui me ravoye.

Dame, vueillez que vo secours m'avoye  
Voye d'avoir soulas qui me ravoye.

2330 Ainsi comme ouez, escripts  
A ma dame, ou les escripts  
De mes douleurs assavoir,  
Pour son alegence avoir,  
Lui fis. Mon cousin porta  
Les lettres ; a sa porte a

2327. A<sup>1</sup> repète après Dame, d'avoir soulas qui me ravoye



- 2335 Esté en pou de demeure,  
 Et bien eut espié heure  
 Qu'il peüst parler a elle  
 Sanz dongier, lors la nouvelle  
 De mes lettres lui nonça
- 2340 Dont elle en riens ne grouça,  
 Ains les receut en riant;  
 Deux ou trois fois soubstant  
 Leut la lettre et la balade,  
 Puis a dit la belle sade :
- 2345 « A vo cousin rescripray,  
 Plus adès ne vous diray,  
 Et je y vois; ains que se passe  
 Mon loisir en cel espace,  
 Aux eschez vous esbatez
- 2350 Et ma cousine matez. »  
 Lors elle et son secretaire,  
 Qui bien savoit secret taire,  
 Et sans plus une autre dame  
 Secrete, n'y ot plus ame.
- 2355 En une chambre se tyre,  
 Son penser commence a dire  
 Et teles lettres ditta  
 Comme cy en escript a :

#### RESPONSE DE LA DAME AUX LETTRES DEVANT DITTES

A mon gracieux ami.

Mon bel et gracieux chevalier, vueilliez savoir que j'ay receu voz doulces et amoureuses lettres et ballades esquelles me faites savoir l'estat ou vous dites que, se brief secours n'avez <sup>1</sup>, vostre vie convient finer. Si vous

1. A' omet n'avez



rescripts mes lettres pour respondre ad ces choses. Sy sachiez que s'il est ainsi que pour cause de moy aiez tant de mal, il m'en poyse de tout ' mon cuer; car ne vouldroye estre achoison de grevance a nulluy <sup>2</sup>, et plus de vous me peseroit, en tant que vous congnois, que d'autre quelconques. Et quant est de vous donner allegance, laquelle me requerez, mon chier ami, je ne sçay quelle est l'entente de vostre requeste, mais, a vous dire de mon entencion, sachiez de vray que, ou cas que m'en requerriez ou que j'apperceüse que entente eüssiez a chose qui a deshonneur tourner peüst ne a mal reproche, jamais n'y avendriez et du tout vous vouldroie je extrangier; de ce pouez estre certain, car pour chose née ne vouldroye ameindrir mon honneur, ainçois mourroye. Mais, se ainsi estoit qu'amour de dame donnée honnourablement et sans villain penser vous peust souffire, sachiez que je suis celle qu'Amours a ad ce menée qui vous vueil asmer très or et très ja. Et, quant je savray par certaine congnoissance que vostre volenté ait souffisance de ce que la moye lui vouldra ottroier, encor vous dy tant de mon penser que pour ami seul très amé vous vouldray je tenir <sup>3</sup> par si que je voye continuer vostre amoureux propos et bon vouloir. Et s'il est ainsi, comme vous m'avez en voz dittes lettres touchié, que je puisse <sup>4</sup> estre cause de vostre exaulcement en vaillance, je suys celle qui ne demanderoye a Dieu plus grant grace. Si me vueilliez sus les dittes choses escrire vostre plain vouloir, et toutes-voyes gardez que nul desir ne vous face estre menteur de chose dont l'effet soit monstre ou temps a venir contraire aux paroles en quelconques cas, car du tout je vous banniroye de moy. Si vueil que vous chaciez de vous toute malencolie et tristece, et soiez liez, jolis et

1. A' tou — 2. A' omet g. a nulluy — 3. A' retenir — 4. A' peus



joyeux, mais sur toutes riens je vous charge et enjoing que secret soiez, et deffens de tel pouoir comme je y ay que n'aiez la coustume commune que pluseurs ont de l'age dont vous estes : c'est de ne savoir riens celer et eulx vanter <sup>1</sup> mesmes de plus de bien avoir qu'ilz n'ont. Si gardez qu'a ami ou compaignon, tant vous soit privé, ne vous descouvriez, fors de ce que pour vostre secours neccessairement convendra que vostre plus amé sache. Et s'ainsi le faites et continuez, soiez certain qu'Amours ne vous faudra mie de ses bien donner a largece. Mon chier et bel ami, je pry a Dieu qu'il vous doint tout ce que vouldriez souhaitier, car je tiens que ce ne seroit fors tout bien. Escript en joyeuse pensée.

Vostre amée.

- Quant ceste lettre achevée  
 2360 Fut, ma dame s'est levée  
 Et vers mon cousin retourne ;  
 Si lui baille et dit que mourne  
 Plus ne soye et le me die,  
 Et que de ma maladie  
 2365 Garir bien se penera  
 Et que jour assignera,  
 Temps et heure, et en quel place  
 Parler, ains que long temps passe,  
 Porray a elle sanz faille,  
 2370 Et que la lettre me baille,  
 Disant que se recommande  
 A moy et qu'elle me mande  
 Que plus je ne me soussie.  
 Cil s'en part et la mercie,  
 2375 Et a son retour conté  
 M'a la doulceur et bonté

1. A<sup>1</sup> venter — 2375 *Les mss. portent retourner*



Qu'il ot trouvée en ma dame.

Et je, qui en feu et flamme

De grant desir l'attendoie,

2380 De joye les mains tendoye

Disant : « Dieu ! je te mercy

De ce qu'as de moy mercy. »

Les lettres me presenta,

Et moy qui ce present'a-

2385 Voye chier a grant leesce

Le receus et sans paresce.

Si tost que eues les ay,

Cent foys, je croy, les baisay,

Les leus non seule une fie

2390 Mais plus de vint, vous affie,

Car saouler ne m'en pouoye

Quant telz nouvelles j'ouoye

Dont je yere reconforté.

Par quoy je me deporté

2395 Et souffris de demener

Dueil, ains vouldz joye mener,

Puis qu'ainsi le commandoit

Ma doulce dame et mandoit.

Si fu m'esperance toute

2400 Recouvrée et plus n'oz doubte

De reffus, si com souloie,

Mais je dis que je vouloie

Faire a ses lettres response.

Si pris papier, plume et ponce,

2405 Et ancre, et m'alay retraire.

Lors en joye et sans contraire

Escrips en si faite guise

Comme ycy je vous devise :



## A LA FLEUR DES PLUS BELLES

Ma très redoubtée maistresse,

Très belle et bonne, et plus que ne savroie dire de tout mon cuer très amée, redoubtée et désirée dame, par qui Amours par l'attrait de vos beaulz yeulz me fist de franche volenté devenir vostre vray subgiet, ouquel doulz servage sanz repentir me plaist et vueil user toute ma vie tant comme je puis et non tant comme je doy, vous remercy de voz très doulces et savoureuses lettres, lesquelles a mon povre cuer desconforté et presque a fin par desesperoir de jamais a vostre amour avenir ont rendu vigueur et force par le confort de doulce esperance. Et, ma très désirée et honnourée dame, pour respondre a aucuns poins que en ycelles vous touchiez, c'est assavoir que ne savez l'entencion de ma requeste, mais de la vostre voulez que je sache que pour morir n'empireriez vostre honneur, je vous fais certaine, très doulce maistresse, et vous assure que mon vouloir n'est aultre chose fors seulement et entierement le vostre ; car, se plus vouloie que vostre bon plaisir, doncques ne vous tendroie mie pour maistresse de mon cuer et moy vostre subgiet. Et ad ce que vous dites que je garde que je ne soye tel que grant desir me face promettre chose dont après soye trouvé mençongier, ma très belle dame, je vous promet seurement et sur ma foy jure leaument que toute ma vie tel me trouverez, et, ou cas que non, vueil et m'oblige estre banni de toute joye et tenu pour mauvais. Et quant a celer et me garder de dire mes secrez a compaignon ne a ami fors ce que celer ne pourray, doulce dame, soiez certaine que de ce suis tout avisié, ne en ce n'en aultre cas a mon pooir ne trouverez faulte, et vous



mercy du bon admonnestement que m'en faites, doulce dame; et puis que vous assure de toutes les condicions qui me pourroyent empeschier, plaise vous enteriner ce que me promettez en voz dittes lettres, c'est que de vostre grace me reteniez pour seul ami, et, quant desobeissant me trouverez en nul cas, je vueil estre banni par grant deshonneur recevoir, et ja Dieu tant <sup>1</sup> ne me laist vivre que maintenant ne aultrefois aye vouloir d'estre faulz ne faint vers vous. Et quant au surplus que dites que avez joye d'estre cause de mon avancement, doulce dame, sachiez que jamais ad ce n'avendray se par vous n'est, car vous seule me pouez faire et deffaire. Doulce dame, si vous plaise me reconforter et donner parfaite joye par vostre doulce amour moy ottroier, et rassasier vueilliez mon cuer et mes yeulz affamez par leur donner espace de veoir vostre doulce presence très désirée. Et de ce me vueilliez envoyer les très joyeuses nouvelles que je desire. Doulce, plaisant, sur toutes loée, a vous me recommande plus de fois que dire ne sçaroye et pri a Dieu qu'il vous ottroit bonne vie et vouloir de moy bien amer. Escript joyeusement en esperance de mieulx avoir.

Vostre humble sert.

Ainsi mes lettres finay,  
Et aussi en la fin ay  
Mis une balade briefve  
A fin qu'au lire ne grieve.  
Si en oiez la devise,  
Car elle est d'extrange guise :

2410

1. A<sup>2</sup> place tant après laist



*Balade*

- 2415            **P**laisant et belle,  
                  Ou se repose  
                  Mon cuer, et celle  
                  En qui enclose  
                  Est toute et close  
2420            Bonté et grace,  
                  Prenez m'en grace.
- Fresche nouvelle  
                  Plus que la rose,  
                  A la querelle  
2425            Que j'ay desclose  
                  Pitié forclose  
                  Ne soit, ains passe ;  
                  Prenez m'en grace.
- Ha ! turterelle  
2430            Doulce et reclose,  
                  Vous seule appelle  
                  A qui m'expose,  
                  Et, se dire ose  
                  Que vous amasse,  
2435            Prenez m'en grace.
- Sanz que s'oppose  
                  Vo cuer a chose  
                  Que desirasse,  
                  Prenez m'en grace.
- 2440            Par mon cousin renvoyay  
                  Mes lettres et en voye ay  
                  Mis ainsi cil que j'amoye,  
                  En lui priant que la moye  
                  Dame vouldist bien prier



- 2445 Que tost et sans detrier  
Lui pleust qu'a elle parlasse,  
Ou ma pouvre vie lasse  
Convendroit tost definer.  
Et cil ala sans finer
- 2450 Tant que chieux elle arriva ;  
La a lui nul n'estriva  
Ains y fut moult bien venu ;  
Si s'est sagement tenu  
Tant qu'il voit temps et saison
- 2455 De raconter sa raison.  
Lors pour mon alegement  
Parla bien et sagement  
Lui priant, pour Dieu merci,  
Que moy qui muir d'amer si
- 2460 Languir plus souffrir ne vueille  
Que tel mal ne m'en accueille  
Que ja ne me puist remettre  
En bon point ; et lors la lettre  
Lui bailla, si l'a leüe
- 2465 Et tout a loisir veüe.  
A brief parler, sa response  
Fu telle que la semonse  
Que de s'amour lui faisoie,  
Bien creoit que le disoie
- 2470 De bon cuer, et que faintise  
En si joenne cuer n'est mise  
Pas communement, sy pense  
Qu'est voir et que sanz doubance  
Jalousie partira
- 2475 Dedens trois jours et yra  
Loins assez ; Dongier, me semble,  
Yroit avec ; lors ensemble  
Pourrions parler a loisir,  
Et, quant a l'eure choisir,
- 2480 Veult qu'au soir, sanz mener noise,



- Avec mon cousin je voyse  
Vestu com s'un varlet fusse,  
Encor veult que l'en me muce  
Quant la seray arrivé,  
2485 Si que estrange ne privé,  
Fors sans plus son secretaire,  
Nel sache; et tout cel affaire  
Par cellui mesmes sans doubte  
Mandera la guise toute  
2490 Comment voudra que je y aille,  
Mais qu'il me die et n'y faille,  
Que si sagement me tiengne  
Vers elle qu'il ne m'aviengne  
Que face chose qui toche  
2495 Son desplaisir ou reproche.  
Et cil bien l'en asseüre,  
Disant qu'elle en soit seüre;  
Car faire je n'oseroye  
Fors son vueil, ainçois morroye.  
2500 Si s'en vint o ces nouvelles  
Qui si bonnes et si belles  
Me furent que de grant joye  
M'iere avis que je songoye;  
Si y pensoie a toute heure,  
2505 Mais longue m'iert la demeure.  
Celle qui mon cuer lia  
Au jour pas ne m'oublia  
Qu'elle ot promis d'envoier  
Vers moy; si dos festoier  
2510 Le message très notable  
Qui la nouvelle agreable  
M'aporta que desiroye :  
Ce yert qu'a l'anuitier yroie  
Vers celle ou mon cuer tendoit



- 2515 Qui par cellui me mandoit  
Coment vouloit que fëisse  
Et qu'a nul ne le deïsse  
Fors seulement a cellui  
Qui le savoit, moy et lui  
2520 Et le secretaire yrions,  
Ne nul aultre n'y menrions.  
Trés lors nous sommes partis  
Et de noz gens departis  
Sagement qu'ilz n'y pensassent,  
2525 Et que bonne chiere facent,  
Leur disons, car un affaire  
Nous fault entre nous trois faire  
Ou tout le jour nous tendrons  
Et l'endemain revendrons.  
2530 Chevauchames sans arreste  
En menant joyeuse feste,  
Droittement a l'eure dite  
Arrivames ou habite,  
Tel fois est, ma dame chiere.  
2535 Descendismes sanz lumiere,  
Lors ma robe desvesti  
Et une autre revesti.  
Mon cousin, le bon et sage,  
Monte en hault de plain visage,  
2540 Et je les chevaulx garday,  
D'estre congneu me garday ;  
Escusacion en l'eure  
Trouva que la a celle heure  
Ere alé pour un pesant  
2545 Afaire qui en present  
Lui est survenu sanz faille,  
Dont lui fault, comment qu'il aille,  
Parler au seigneur en haste,  
Car moult grant besoing le haste,  
2550 Ce n'est pas chose endormie.



- On lui dist qu'il n'y est mie  
Ne des moys ne revendra.  
Et cil dist qu'il convendra  
Doncques qu'il y ait dommage.  
2555 Et adonc a une cage  
Qui regardoit sur la court  
Ma très doulce dame acourt  
Et vint la tout a esture.  
Si a dit : « Quele aventure  
2560 Meine mon cousin ? alez  
Et tost le pont avalez.  
Si savray ce qu'il demande ;  
Je ne sçay se l'en me mande  
Par lui hastives nouvelles. »  
2565 Adonc par deux damoiselles  
Mon cousin vers elle mande.  
Quant venu fu, lui demande  
Après que l'ot salué :  
« Y a il ame tué  
2570 Ou quel cas si tart vous meine ?  
Ne vous vis de la sepmaine.  
Dites moi qu'alez querant ? »  
Adonc cil dit « qu'enquerant  
Plus ne lui voit de son estre  
2575 Puis que le seigneur et maistre  
N'a trouvé, dont il lui poise ;  
Si convient qu'il s'en revoie. »  
Celle dit « que non fera  
Et tout ce que affaire a  
2580 Sans faille lui fault savoir ».   
Dont dist il : « Convient avoir  
Mon varlet qui a la porte  
Tient mes chevaulz qu'il m'apporte  
Unes lettres qu'a garder



- 2585 Lui baillay et sans tarder  
Viengne, si fault qu'on lui die. »  
Adonc a chiere hardie  
Ma dame a son secretaire  
A comandé cel affaire,  
2590 Et lui, très entremetable,  
Les chevaulz en une estable  
Met et puis en hault me meine.  
Mon cousin, qui assez peine  
Prenoît, a l'uis de la chambre  
2595 Vient et contre moy se cambre  
Disant : « Baille moy, tost baille  
Ces lettres. — Et qu'il s'en aille  
Tost, dist il au secretaire,  
Car n'a cy dedens que faire  
2600 Ne il n'apertient qu'a ceste heure  
Varlet en chambre demeure. »  
Mon cousin tout ce disoit  
Pour ce que clarté luisoit  
En la chambre, dont congneu  
2605 Peusse estre, et ce m'avroit neu.  
Unes grans lettres a prises  
Que j'avoye en mon sein mises,  
Et puis ma dame a part meine  
Et en lisant se demeine  
2610 Com se grant cas e escript  
Eust en ces lettres escript.  
Et tandis le secretaire  
Sans clarté me fist retraire  
En la chambre d'une dame  
2615 Sage, secrete et sans blasme,  
Si com ma dame l'avoit  
Commandé, et tout savoit,  
Et joingnoit la chambre a celle



- De ma doulce dame belle.  
2620 Quant la lettre fut leüe  
Mon cousin a la vetie  
De tous partir s'en vouloit  
Et durement se douloit  
Par semblant, mais qu'il s'en aille  
2625 Lui deffent celle et sans faille  
Dist au giste remaindra  
Ou au seigneur s'en plaindra,  
Et ainsi l'a retenu.  
Long plait ne lui a tenu,  
2630 Ainsi dist qu'il estoit saison  
De couchier ne n'yert raison  
Que homme en sa chambre veillast,  
Que l'en ne s'en merveillast ;  
Et a fin que l'en n'eust goute  
2635 De souspeçon ou de doubte  
Pour quoy a celle heure estoit  
La venu, on apprestoit  
Son giste en une longtaine  
Chambre ou couchier on le meine,  
2640 Et si fu acompaigniez  
Des gens les plus ressoingniez  
De leans et qui la garde  
Avoient d'elle, mais garde  
N'avoit d'eulx quant pour celle heure.  
2645 Lors couchée sans demeure  
Devant ses femmes s'est nue ;  
Mais moult ne se y est tenue,  
Ains s'est vestue et levée  
Et achoison a trouvée  
2650 Que un bien petit se douloit  
Et pour ce du feu vouloit  
Que on feist ou lieu ou j'estoie ;



- Si fus mis adonc hors voye  
Tant que la femme de chambre  
2655 Eust fait du feu en la chambre.  
Si vint ma dame affublée  
D'un grant mantel, assemblée  
N'y ot de femmes nesune  
Avec elle ne mais une,  
2660 C'estoit la dame susditte  
Qu'elle ot sur toute eslite  
Et en son giron s'appoye,  
La femme couchier renvoye,  
2665 Car dit que ne veult que veille  
A fin qu'elle ne s'en dueille.  
Après elle l'uis on serre.  
Lors la dame me vint querre  
Et vers ma dame me meine;  
Si la saluay a peine,  
2670 Car tel mouvement sentoye  
Que ne savoye ou j'estoie,  
Touteffois dis : « Doulce dame,  
Dieu vous sault et corps et ame.  
— Amis, bien viengnez », dist celle.  
2675 Lors me fist seoir coste elle,  
Car si tost com je la vis  
Je devins com homs ravis.  
Ma dame bien l'aperceut  
Qui en baisant me receut,  
2680 Dont humblement merciée  
Je l'ay et regraciée.  
Lors ma dame redoubtée  
De mon cuer crainte et doubtée  
Comença ainsi a dire :  
2685 « Ay je fait vos vueil, beau sire,  
Qui ycy si faittement  
Vous ay fait secretement  
Venir ? Est ce fait d'amie ?



- Or ne me decevez mie  
2690 Et me dites, se savez,  
Tandis que loisir avez,  
Vo penser entierement,  
Je vous en pry chierement. »  
Lors tout de joye esbaï  
2695 En souspirant dis : « Haï !  
Doulce dame, et que diroye  
Par ma foy, je ne savroye  
Parler ! si le recevez  
En gré et apercevez  
2700 Comment suis de corps et d'ame  
Tout vostre, très chiere dame,  
Plus ne vous savroie dire. »  
Et adonc celle se tire  
Plus près et d'un bras m'acole,  
2705 En riant dist tel parolle :  
« Dont pour nous deux me convient  
Parler quant ne vous souvient  
De riens dire, et toutevoye  
Je croy bien qu'Amours m'envoye  
2710 De ses mets si bonne part  
Que je croy que tout ne part  
De ce que je vous cuidoye  
Parler ne que dire doye,  
N'en savroie un seul mot dire. »  
2715 Adonc s'en prist a soubsrire  
L'autre dame qui fu la,  
Si dist nel dissimula :  
« Sage compaignie a cy,  
Vous voy je en ce point ja si,  
2720 Bien voy qu'Amours le plus sage  
Fait foloyer, ce bien scay je. »  
Ma dame me dist : « Amis,



Puis qu'Amours ainsi a mis  
Noz deux cuers en une serre,  
2725 Il ne convient plus enquerre  
Se m'amez et se vous aime,  
Je croy bien qu'Amours nous clame  
Ou puet clamer ambedeux  
Ses servans, dont ne me deulx;  
2730 Mès, doulz amis, toutefie,  
Pour tant s'en vous je me fie,  
Si vous vueil je descouvrir  
Tout mon vueil sans riens couvrir,  
Ne sçay quele entencion  
2735 Avez, mais je mencion  
Vous fois que ja ne croiez,  
Quelque amour que vous voiez  
En moy, ne pour priveté,  
Doulceur ou joliveté,  
2740 Parole ou semblant que face,  
Quoy que vous baise ou embrace,  
Que jamais jour de ma vie  
J'aye volenté n'envie  
De faire chose villaine  
2745 Et dont je ne soye saine  
De reproche en toute guise;  
Doulz ami, si t'en avise,  
Car je neouldroie mie  
Que tu deisses qu'a demie  
2750 Je me fusse a toy donnée,  
Car jamais jour sermonnée  
Tant ne seray que je face  
Chose dont m'onneur defface;  
Et si te jure de vray  
2755 Qu'aussi tost qu'apercevray,  
En semblant n'en contenance,  
Que tu eusses retenance  
D'autre vouloir, je t'affie



- Que une toute seule fie  
2760 Jamais puis ne me verras.  
Je ne sçay se m'en herras,  
Mais de tout autre plaisir  
Dont dame amant puet saisir  
Riens ne te quier reffuser,  
2765 A ton vueil en puez user  
Et entierement te donne  
Mon cuer et tout abandonne  
Quunque j'ay, sans que je face  
Folie ne me mefface,  
2770 Et te promet loyaulté  
Et amer en feaulté,  
Et sur tous te vueil eslire  
S'il te puet ainsi souffire;  
Car la verité t'en dis.  
2775 Si me dis ton vueil, tandis  
Que as loisir et saison,  
Car ouïr vueil ta raison. »  
Quant celle que je redoubte  
Ot sa raison dite toute  
2780 Je respondis : « Ha ! ma dame,  
A pou que mon cuer ne pasme  
De vous ouïr ainsi dire !  
Ne me doit il bien souffire  
L'amour, le bien et la grace  
2785 Que m'ottroiez, je cuidasse  
Que jamais ne pensessiez  
Que tout quunque vouldissiez  
Ne vouldisse entierement.  
Or me croiez seurement,  
2790 Ainsi com le vous rescrips  
Pour respondre a voz escrips,  
Que je vous promet et jure,



- Et vueil, si ne m'en parjure!  
N'estre jamais honnouré,  
2795 Mais du tout deshonnouré,  
Se jamais jour de mon age  
En fait, en dit n'en courage  
Fais ne pense chose aucune,  
N'en secret ne en commune  
2800 A mon pouoir, dont aiez  
Desplaisir, et m'essaiez  
Tout ainsi qu'il vous plaira,  
Car ja ne me desplaira  
Chose que vostre cuer vueille,  
2805 Ne n'avendra que me dueille  
De riens qui soit vo vouloir,  
M'en doy je doncques douloir,  
N'estes vous pas ma maistrece?  
N'est ce drois que je me drece  
2810 Selon vostre volenté?  
Quant seray entalenté  
De faire autrement, la vie  
Et l'ame du corps ravie  
Me soit et mise a martire!  
2815 Dieux! ne me doit il souffire  
Puis que je voy que m'amez  
Et doulz ami me clamez!  
N'ay je ce que desiroie,  
A autre riens ne tiroie,  
2820 Je me tiens pour bien paiez;  
Mais que toudis vous aiez  
Voulenté d'ainsi m'amer  
Mais ne fausseté n'amer  
Sçay je bien qu'en vo courage  
2825 N'a nesune, et encor ay je  
Opinion que feray



- Tant par servir que seray  
De vous plus amé encore.  
Si me commandez très ore,  
2830 Car je suis vostre homme lige  
Et cuer, corps et ame oblige  
A vous, belle; or commandez  
Vo plaisir, ou me mandez  
Ou vous plaira, je yray  
2835 Et en tout obeïray  
Sans desdire a vostre guise.  
Si pouez a vo devise  
Faire de moy plus que dire  
Ne sçaroye, et Dieu vous mire  
2840 Et rende très haultement  
Ce qu'ainsi parfaitement  
Me promettez a amer.  
Je ne me doy pas blasmer  
D'amours qui me mist en voie  
2845 D'attaindre a si haulte joye.  
Si vous mercy, belle et bonne,  
Humblement, car la couronne  
Des amoureux porteray  
D'or en avant, s'osteray  
2850 De moy toute laide tache  
Et a honneur prendray tasche  
Que je voudray poursuivre  
Pour les vaillans ensuivre.  
Ainsi me ferez preudomme.  
2855 Doulce dame, en toute somme,  
Estre plus liez ne pourroie  
Tant que dire nel saroie. »  
Lors ma dame, ou toute grace  
Maint, très doucement m'embrace  
2860 Et plus de cent fois me baise.



- Si demouray en cel ayse  
Toute la nuyt, et croiez  
Vous, amans qui ce oyez,  
Qu'a mon aise bien estoie :  
2865 Mains doulz moz remplis de joye  
Furent la nuyt racontez,  
Et celle, ou toutes bontez  
Sont, m'enseigna voye et place  
Comment, a qui qu'en desplace,  
2870 La verroye assez souvent :  
Si n'aloye plus rovant,  
Car tout mon vouloir avoie.  
Bien me chargia toutevoie  
Que bien son honneur gardasse,  
2875 Et que avant me retardasse  
D'elle veoir aucuns jours,  
Quoy qu'anuyast li sejours,  
Qu'en peril je la meïsse  
Mais que sagement veïsse  
2880 Temps et heure de venir  
Ainçois, et de revenir  
Elle m'assenna journée.  
Celle vie avons menée,  
Mais pou me dura la nuit ;  
2885 Quant le jour vint qui m'anuit,  
En embraçant et baisant  
Cent mille fois et faisant  
Doulce et amoureuse chiere  
Me dist : « A Dieu m'amour chiere »,  
2890 Et en son lit s'en rala  
Et tout seul m'enserra la.  
Après en l'abit d'un page  
Me mist hors cil qui fu sage,  
Ce yert le secretaire apris,



- 2895 Et, tout ne l'eusse je apris,  
Repris mon premier office,  
Mais pour si fait benefice  
Il fait bon garder a porte  
Chevaux a qui en emporte  
2900 Si doulz et plaisant loyer,  
Et quant a moy employer  
Ne meouldroie, sans faille,  
A autre office, et me baille  
Souvent ce plaisant mestier.  
2905 Si voiez comment mestier  
Est aucune fois au maistre  
Qu'il soit varlet, et puet estre  
Que souvent ainsi advient  
A qui a s'entente avient.  
2910 Mon cousin matin leva,  
Ne noise n'en esleva,  
Et ne vout que on esveillast  
Personne qui sommeillast,  
A ma dame ot pris congié  
2915 Trés le soir, plus n'a songié ;  
Hors s'en yst : je l'attendoie  
Et ses chevaux pourmenoye  
Comme bon varlet et sage,  
Si dist : « Rameine, que rage  
2920 Te puisse prendre, garçon,  
Com tu penches sus l'arçon. »  
Ainsi dist devant les gens,  
Car chevaliers et sergens  
Jusques chieux lui le vouloient  
2925 Convoyer et le blasmoient  
Dont de ses gens plus n'avoit  
Avec soy, mais il l'avoit  
Fait tout de gré pour certaine  
Cause, ce leur acertaine;  
2930 Si y cuidoit le seigneur



- Trouver, car besoing greigneur  
N'en ot oncques en sa vie  
Ne d'y parler graindre envie.  
Si ne veult que on le convoie.  
2935 Et adonc se mist en voye.  
Et ainsi nous nous partismes  
Et en chevauchant deïsmes  
Maint doulz mot et gracieux,  
Car si très solacieux  
2940 M'estoit le doulz souvenir  
Qu'avoye de revenir  
Et de la doulce plaisance  
Dont eue avoye l'aisance,  
Qu'il n'est homs qui joye avoir  
2945 Peust greigneur pour nul avoir.  
Ainsi sommes approchiez  
Tant avons chevaulz brochiez ;  
Mais j'oz ma robe reprise.  
Lors ma gent qui m'aime et prise,  
2950 Si tost que nous aperceurent,  
A grant joye nous receurent,  
Et aussi joyeux estions  
Et de grant joye chantions  
Par gracieux renouvel  
2955 Ce virelay tout nouvel :

*Virelay*

- Belle ou est toute ma joye,  
Pour vostre amour se resjoye  
Mon cuer, dont a chiere lie  
Je chante : Dame jolye  
2960 Pour qui tout vif j'enragoye ;

Mais vous m'avez envoyé



Doulx secours qui conforté  
M'a, dont je suis convoyé  
A joye et bien enorté.

2965 Si est drois que faire doye  
Gaye chiere, car perdoye  
Soulas par melancolie,  
Mais tout mon mal amolie  
Vo secours que j'attendoie,  
2970 Belle ou est toute ma joye.

Puis que m'avez ottroyé  
Vo doulz cuer, je suis porté  
Hors d'anuy et ravoyé  
A joye et reconforté.

2975 Ha! ma dame, Amours m'envoye  
Doulz secours quant par tel voye  
Suis ressours, chiere palie  
Plus n'aray quant il m'alie  
A espoir que vous revoie,  
2980 Belle ou est toute ma joye.

Or vous ay je raconté  
Comment fus d'Amours dontté  
Et surpris premierement,  
Et puis comment durement  
2985 Fus par grant desir mené,  
Et comment tant s'est pené  
Mon chier parent et a fin  
Que de mon mal fus afin  
Par ma dame qui mercy  
2990 Ot de moy, siene mercy.  
Si diray comment puis l'ore  
M'en ala et va encore.



Trés lors je fus resjouÿ  
 Ainsi comme avez ouÿ  
 2995 Et en la joye qu'avoye  
 Ceste balade disoye :

*Balade*

Il n'est de moy plus euren en ce monde,  
 Car joye n'est autre per a la moye  
 Quant celle qui n'a pareille ou seconde  
 3000 M'a a mercy pris, et se je l'amoye  
 Jusqu'au morir; certes bien m'est la moye  
 Peine et douleur granment guerdonnée.  
 Or m'a gari celle que reclamoye,  
 Puis qu'elle m'a sa douce amour donnée.  
 3005 Ha! belle, en qui toute valeur habonde,  
 Vous ne voulez plus que pour vous larmoye  
 Ainçois vous plaist qu'a tous amans responde :  
 « Je suis cellui qui des biens affamoie  
 Qu'Amours depart, dont dolent me clamoye,  
 3010 Mais la belle de bonté couronnée  
 M'a respité : Amours a tort blas moye  
 Puis qu'elle m'a sa douce amour donnée. »

Or est en jeux et ris retourné l'onde  
 Du très grief plour qu'en desespoir semoye,  
 3015 Dont gay, jolis et de pensée monde  
 Plus qu'oncques mais seray, Amours en voye  
 M'en a mis et ma dame qui m'envoye  
 Tant de plaisirs que joye abandonnée

2998 A<sup>1</sup> C. leece autre n'est per a ma joye — 3002 *Les mss.*  
 portent grandement — 3003 A<sup>1</sup> De par celle que humblement  
 reclamoye



M'est de tous lez, et a tous biens m'avoie  
3020 Puis qu'elle m'a sa doulce amour donnée.

Princes d'amours, plaindre ne me devoie  
Pour peine avoir quant joye redonnée  
M'a celle qui mon cuer du tout ravoye  
Puis qu'elle m'a sa doulce amour donnée.

3025 Si me tins cointe et abille,  
Robes, chevaux, plus de mille  
Choses belles voulz avoir  
Et mis grant peine a savoir  
Toutes choses qui bien siéent  
3030 Aux bons; celles qui messiéent  
A mon pouoir eschivoye;  
Et toudis l'entente avoye  
A croistre ma renommée  
A fin que ma dame amée  
3035 Se tenist d'omme vaillant.  
Si n'espargnoie vaillant  
Que j'eusse, pour en largece  
Emploier, et de richece  
Sembloit que ne tinse conte.  
3040 Et pour abrigier mon conte  
Vous dy pour vray que autre entente  
N'avoye fors a la sente  
Suivre des vrays amoureux,  
Et des doulz biens savoureux  
3045 Qu'Amours et dames departent  
Aux loyaulx qui d'eulx ne partent,  
Dieux mercis! souvent avoye,  
Car le chemin bien savoye,  
Quoy qu'il y convenist peine



- 3050 Auques chascune sepmaine,  
La ou ma doulce deesse  
Reveoye a grant leesce,  
Sans que arme le sceüst  
Né que on s'en aperceüst  
3055 Fors ceulx a qui l'en s'en fie.  
Et a la premiere fie  
Que je retournay vers elle  
Ceste balade nouvelle,  
Qui moult lui plot, lui portay  
3060 Et une aultre en raportay :

*Balade*

- Comandez moy, ma dame redoubtée,  
Vo bon plaisir, prest suis a le parfaire,  
Com de vo serf ; dont amée et doubtée  
Estes, pouez de moy vo vouloir faire,  
3065 A bon droit est ce,  
Je y suis tenus, car par vous j'ay leesce  
Plus qu'oncques n'ot, certes, nul amoureux,  
Car voz biens sont plus qu'autres savoureux.

- Puis que m'avez toute douleur ostée  
3070 Et donné ce qui m'estoit neccessaire  
N'est ce raison que vous soiez rentée  
D'un cuer d'amant qui vous desire a plaïre?  
Ha ! quel maïstresse  
Qui son servant guerdonne de largece  
3075 Des dons d'amours ! tous autres laïs pour eulx,  
Car voz biens sont plus qu'autres savoureux.

De bonne heure pour moy amours boutée  
Fu en mon cuer quant reçoï tel salaire  
Pour bien servir, si n'en sera ostée



3080 Tant quant vivray. Ha ! doulce, debonnaire  
 Conforterresse,  
 De ma vigour, dame de grant haultece,  
 Aultre bien m'est fors cestui doloireux,  
 Car voz biens sont plus qu'autres savoureux.

3085 Doulce princece,  
 J'ay tout plaisir, vous en estes l'adrece,  
 Plus ne desir, plus ne suis langoureux,  
 Car voz biens sont plus qu'autres savoureux.

Avant que je me partisse  
 3090 De la très doulce faitisse,  
 De ma balade oz response  
 Qui me donna plus d'une once  
 De joye très amoureuse,  
 Car la belle savoureuse  
 3095 En la lisant me lia  
 Ses braz au col; il y a :

### *Balade*

Benoite soit la journée,  
 Le lieu, la place et demeure,  
 Doulz amis, qu'ad ce menée  
 3100 Fus, trop y os fait demeure  
 Que vous donnay  
 Toute m'amour, amis, meilleur don n'ay,  
 J'en lo Amours qui la commence a faite,  
 Car j'en reçoï joye toute parfaite.

3105 Et quant je me suis donnée  
 A cil qui pour moy labeure



En honneur bien assennée  
Seray, ce fu de bonne heure,  
Dont raison ay

3110 De lui amer, et se l'araisonnay  
Pour lui garir ne me suis pas deffaitte,  
Car j'en reçoï joye toute parfaite.

Si entray en bonne année,  
Amis, se Dieux me secueure,

3115 Car par plaisant destinée  
Tout soulas en assaveure,  
Dont guerdonnay

De bonne heure le mal que j'entonnay  
Pieça en vous puis que j'en suis refaitte,

3120 Car j'en reçoï joye toute parfaite.

Quant m'adonnay  
A vous amer, mon cuer abandonnay  
A tous deliz sans point m'estre meffaitte,  
Car j'en reçoï joye toute parfaite.

3125 Joye ainsi me fu donnée,  
Com vous oez, et mennée  
Fu par moy leesce et feste.

Mais Fortune, qui est preste,  
Quant elle puet, de destruire

3130 Les amans, me cuida nuire  
Tost après assez griefment,  
Si com vous diray briefment :

Il avint, moult ne tarda,

Que la dame, qui garda

3135 Nostre fait et qui savoit  
Noz amours, affaire avoit  
En son païs ou dommage  
Eust eu de son heritage



- Se elle n'y fust tost alée,  
 3140 Par quoy triste et adoulée  
 S'en est de la Court partie.  
 De quoy j'oz, de ma partie,  
 Grant tristour; car bien savoie  
 Qu'il n'y avoit tour ne voye  
 3145 Sans elle que ma maistresse  
 Veisse; dont j'oz grant destrece,  
 Car certes sans la veoir  
 Ne me peüst riens seoir.  
 Ma dame bien le savoit,  
 3150 Si croy qu'elle n'en avoit  
 Mie moins de sa partie.  
 Si s'est alors avertie  
 D'une dame qui servie  
 L'ot aucques toute sa vie,  
 3155 Qui sage estoit et discrete,  
 Bonne, loyal et secrete,  
 Mais a Court ne demouroit  
 Plus lors; se elle la pourroit  
 Ravoir se vouldt essayer;  
 3160 Si escript sans deslaier  
 Ces lettres ycy a celle,  
 Et rot la response d'elle :

*A ma très chiere et bonne amie la dame de la Tour,*

*La Duchece*

Trés chiere et bonne amie, de mon estat vueilles<sup>1</sup> savoir que je suis en santé, Dieu mercy qui ainsi le vous ottroit; et escripts par devers vous pour le desir que j'ay de vous veoir et parler a vous, car je n'ay pas

1. A' vuelles



oublié le bien et bon service que m'avez toujours fait, par quoy je me tiens tant tenue a vous que desservir ne le pourroie. Et soiez certaine que vous avez une amie en moy, et le poez essayer quant vous plaira. Chiere mere et amie, vous savez assez l'estat comment je suis gouvernée et tenue en grant subgecion et crainte et rudement menée, et que j'ay assez dure partie qui pou me fait de plaisir, et je n'ay ame a qui m'en complaindre et dire de mes secretes pensées, lesquelles ne gehiroie a ame qu'a : vous a qui riens ne celeroye ne qu'a mon confesseur : car je vous sçay si seure que je m'y pourroye fier. Si pouez savoir que c'est moult grant destrece a joenne cuer de tousjours vivre a desplaisance et sans aucune joyeuseté. Si vouldroye que fussiez près de moy, je vous diroye de bien gracieuses choses, lesquelles je ne vous escrips mie et pour cause. Si aroye bien affaire de vostre aide et bon conseil, par quoy je vous pry sur toute l'amour que avez a moy que, tantost ces lettres veues, le plus hastivement que vous pourrez, que vous ordeniez de voz besoignes en tel maniere que soiez preste dedens huit jours après pour venir vers moy, et je vous enverray querir si honnorablement qu'il devra souffire. Et de vostre mainage laissier ne vous doulez aucunement, car je vous promet ma foy le guerdonner si grandement qu'a tousjours en sera de mieulz a vous et aux vostres. Si vous pry qu'en ce n'ait faite, et me mandez par le porteur de ces presentes vostre bonne response. Saluez moy vostre belle fille. Chiere et bonne amie, le Saint Esperit vous ait en sa saintte garde. Escript en mon chastel le viii<sup>e</sup> jour de janvier.

Ma dame un message en voye  
Met, et ces lettres envoye



- 3165 A la dame que clamoit  
 Moult s'amie et très l'amoit.  
 Response lui renvoya  
 Tele qu'il m'en anoya,  
 Car contre moy trop estoit,  
 Et ainsi l'amonnestoit :

Ma très redoubtée dame, très humble recommanda-  
 tion devant mise, plaise vous savoir que j'ay receu  
 voz très doulces et amiables <sup>1</sup> lettres, desquelles de  
 tout mon povre cuer je vous mercie, dont tant d'on-  
 neur me faites comme d'avoir souvenance du povre  
 service que vous ay fait le temps passé, non mie si <sup>2</sup>  
 souffisamment comme a vostre digne et noble per-  
 sonne apertendroit et comme je suis tenue plus que  
 desservir toute ma vie ne pourroie. Ma très chiere  
 dame, quant est d'aler a present devers vous vueillez <sup>3</sup>  
 moy tenir pour excusée, je vous en suppli très hum-  
 blement; car, par ma foy, ma fille est très griefment  
 malade que je ne la pourroie laisser nullement, et  
 Dieux scet comment a cause de sa ditte maladie suis  
 troublée. Ma très redoubtée dame, pour ce qu'a vous  
 ne puis parler si tost comme je vouldisse, et je suis  
 tenue de vous amonnester vostre bien comme a celle  
 qui a esté en ma gouvernance depuis enfance aucques  
 jusques a ore, tout n'en fusse je mie digne, me semble  
 que je mesprendoie a moy taire de ce que je sçaroye  
 qui vous peust tourner a aucun grief se ne le vous  
 segnefioye. Et pour ce, chiere dame, je vous escrips en  
 ces presentes ce qui s'ensuit, de laquelle chose très  
 humblement vous supplie que mauvais gré ne m'en  
 vueilliez savoir aucunement, car vous pouez estre cer-  
 taine que très grant amour et desir de l'acroissement  
 de mieulx en mieulx de vostre noble renommée e

1. A<sup>2</sup> amoureuses — 2. A<sup>2</sup> *supprime* si — 3. A<sup>1</sup> vueillez



honneur me meut ad ce faire. Ma dame, j'ay entendu aucunes nouvelles de vostre gouvernement telles que j'en suis dolente de tout mon cuer pour la paour que j'ay du decheement de vostre bon loz, et sont telles, comme il me semble, que, comme il soit de droit et raison que toute princesse et haulte dame, tout ainsi comme elle est hault eslevée en honneur et estat sur les autres que elle doye estre en bonté, sagece <sup>1</sup>, meurs, condicions et manieres, excellente sur toutes a fin que elle soit l'exemplaire par lequel les autres dames, et mesmement toutes femmes, se doyent riuler en tout maintien. Et comme il apertiengne que elle soit devote vers Dieu et que elle ait contenance asseurée, coye et rassise et en ses esbatemens attrempée et sans effroy, rie bas et non sans cause, ait haulte maniere, humble chiere et grant port, soit a tous de doulce response et amiable parole, son abit et son atour riche et non trop cointe, a estrangers d'acuel seigneuri, parlant a dongier non trop acointable, de regard tardive et non volage, a nulle heure n'appere male, felle ne despite ne a servir trop dongereuse, a ses femmes et serviteurs humaine et amiable, non trop hautaine, en dons large par raison ordennée, sache congnoistre de toutes gens lesquelz sont plus dignes en bonté et preudommie et de ses servans les meilleurs et ceulz et celles tire vers soy et leur guerdonne selon leurs merites, ne croye n'ajoute foy a flateurs n'a flateuses ains les congnoisce et chace de soy, ne croye de legier paroles raportées, n'ait coustume de souvent conseillier a estrange ne privé, en lieu secret ne a part, mesmement a nul de ses gens ou de ses femmes, si que on ne puist jugier que plus sache de son secret l'une que l'autre, et ne die devant gens a personne quelconques en riant aucuns moz couvers que chascun n'entende a fin que les oyans

1. A<sup>2</sup> ajoute et avant sagece



ne supposent aucun nyce secret entre eulx, trop enclose en chambre et trop solitaire ne se doit tenir ne aussi trop commune a la veue des gens, mais a certaine heure se retraye, et aultre fois plus communale. Et comme ces dittes condicions et toutes autres manieres convenables a haulte princece fussent en vous le temps passé, estes a present toute changée si comme on dit : car vous estes devenue trop plus esgayée, plus emparlée et plus jolie que ne soliez estre, et c'est ce qui fait communement jugier les cuers changiez quant les contenance se changent, car vous voulez estre seule et retraitte de gens fors d'une ou de deux de voz femmes et aucun de voz serviteurs a qui vous conseilliez et riés mesmes devant gens et dites paroles couvertes comme se vous vous entendissiez bien, et ne vous plaist fors la compagnie de ceulz ne les autres ne vous peuent servir a gré, lesquelles choses et contenance sont cause de mouvoir a envie voz autres servans et de jugier que vostre cuer soit enamourez ou que ce soit. Ha! ma trèsdoulce dame, pour Dieu mercy, prenez garde qui vous estes et la haultece ou Dieu vous a eslevée ne ne vueillez vostre ame et vostre honneur pour aucune fole plaisance mettre en oubli, et ne vous fiez es vaines pensées que pluseurs joennes femmes ont qui se donnent a croire que ce n'est point de mal d'amer par amours mais qu'il n'y ait villennie (car je me rens certaine que autrement ne le vouldriez penser pour mourir), et qu'on en vit plus liement et que de ce faire on fait un homme devenir vaillant <sup>1</sup> et renommé a tousjours mais. Ha! ma chiere dame, il va tout autrement, et, pour Dieu ! ne vous y decevez ne laissez decevoir, et prenez exemple a de teles grans maistresses, avez vous veu e vostre temps, qui, pour seulement estre souspeçonnée de tele amour, sanz ce <sup>2</sup> que la verité en fust oncque

1. A<sup>1</sup> vallant — 2. A<sup>1</sup> omet ce



tainte, en perdoient l'onneur et la vie, de teles y ot; et tiens sur mon ame que pechié ne coulpe villaine n'y voient; et leurs enfans en avez veu reprochiez et moins prisiez. Et combien qu'a toute femme, soitovre ou riche, telle fole amour soit deshonnourable, encore trop plus est messeant et prejudiciable en prince et en haulte dame de plus en plus de tant comme le est plus grande, et la raison y est bonne, car le nom d'une princece est porté par tout le monde, par quoy, s'il a en son renom aucune tache, plus est peu par les estranges contrées que des simples femmes, aussi pour cause de leurs enfans qui doivent seigneurir les terres et estre princes des aultres gens. Si est grant meschief quant il y a aucune soupeon qu'ilz soient drois hoirs et maint meschief en puet venir; par poson qu'il n'y ait meffait de corps, si ne le croient de ceulz qui seulement orront dire : tele dame est courtoise; et pour un petit de nyce semblant, par aventure fait par joennesce et sans malice, les mauvaises langues jugeront et y adjousteront de choses qui oncques ne furent faittes ne pensées <sup>1</sup>, et ainsi va le langage de bouche en bouche qui mie n'est apesiez, ains <sup>2</sup> tousjours acreu. Et aussi est neccessaire a une chascune grant maistresse avoir plus grant regard en toutes ses manieres, contenances et paroles que a autres femmes; la cause si est, car, quant on est en la presence d'une haulte dame, toute personne baisse son regard a elle et ses oreilles a ouïr ce que elle dira et son entendement a noter tout son fait. Ne puet la dame ouvrir l'ueil, dire parole, rire ou avoir semblant aucun que tout ne soit recueilli, avisie et retenu de plusieurs personnes et puis raporté en diverses places. Et que cuidez vous, ma très chiere dame, que ce soit très mauvaise contenance a une

<sup>1</sup> pensées ne faittes — 2. <sup>2</sup> mais



grant maistrece, voire a toute femme, quant plus que elle ne seult devient esgayée, jolie et plus veult ouïr parler d'amours; et puis, quant son cuer se change par aucun cas, tout a cop devient rechignée, malgracieuse, tensesresse, et ne la puet on servir a gré et ne lui chaut de son abit ne atour. Certes, adonc dient les gens que elle soloit estre amoureuse, or ne l'est plus. Ma dame, si n'est mie maniere que dame doye avoir; car elle doit prendre garde, encore quelque pensée que elle ait, que tousjours soit d'un maintien et contenance a celle fin que telz jugemens ne puissent estre fais sur elle, mais puet bien estre que fort seroit en la vie amoureuse garder tel mesure, et pour ce le plus seur est du tout l'eschiver et foudir. Si pouez savoir, chiere dame, que toute grant maistresse et semblablement toute femme doit trop plus estre convoiteuse d'acquiescer bon renom que quelconque autre tresor, car il la fait reluire en honneur et demeure a tousjours a elle et se en enfans. Redoubtée dame, ainsi comme cy devant ay touchié, je suppose bien et pense les raisons qui peuent mouvoir une joenne dame a soy encliner a si fait amour, c'est que joennesce, aise et oyseuse lui fait penser : « Tu es joenne, il ne te faut fors que plaisance, tu pues bien amer sans villennie, ce n'est point de mal quant il n'y a pechié, tu feras un vaillant homme, ou n'en sçara riens, tu en vivras plus joyeusement et acquiesceras un vray serviteur et loyal ami, et ainsi toutes choses. » Ha ! ma dame, pour Dieu soiez avisiée que telles folles opinions ne vous deçoivent ! car, quant la plaisance, soiez certaine qu'en amours a cent mille fois plus de dueil, de cuisançons et dongiers perilleux par especial du cousté des dames, qu'il n'y a de plaisance. Car, avecques ce que Amours livre de soy main diverse amertume, la paour de perdre honneur et que soit sceu leur demeure ou cuer continuellement qui chier acheter leur fait tel plaisance. Et quant a dire : ce



seroit <sup>1</sup> mie mal puis que fait de pechié n'y sera, hé las! ma dame, ne soit nul ne nulle si asseurée de soy qu'elle se rende certaine, quelque bon propos qu'elle ait, de garder toujours mesure en si faitte amour, et qu'il ne soit sceu comme j'ay cy devant dit; certes, c'est chose impossible, car feu n'est point sans fumée mais fumée est souvent sans feu. Et a dire : je feray un homme vaillant, certes je dis que c'est trop grant folie de soy destruire pour acroistre un autre, poson que vaillant en deust devenir, et celle bien se destruit qui pour reffaire un aultre se deshonnoure. Et quant a dire : j'aray acquis un vray ami et serviteur, Dieux! et de quoy pourroit servir si fait ami ou serviteur <sup>2</sup> a la dame? car se elle avoit aucun affaire il ne s'oseroit porter en nul cas pour elle pour paour de sa deshonneur; doncques de quoy lui pourra servir si fait serviteur qui ne s'osera employer pour le bien d'elle? Et mès ilz sont aucuns qui dient qu'ilz servent leurs dames quant ilz font beaucoup <sup>3</sup> de choses soit en armes ou autres fais, mais je di que ilz servent eulx mesmes quant l'onneur et le preu leur en demeure et non mie a la dame. Encore, ma dame, se vous ou aultre vous voulez excuser en disant : je ay diverse partie qui pou de loyauté et de plaisir me fait, pour ce puis sans mesprendre avoir plaisir en aucun autre pour oublier melancolie et passer le temps; mais certes telle excusacion, sauve vostre bonne reverence et de toutes autres qui ce dient, ne vault riens, car trop fait grant folie cil qui met le feu en sa maison pour ardoir celle de son voisin, mais se celle qui a tel mary le porte paciemment et sans soy empirier tant accroist <sup>4</sup> plus le merite de son ame et son honneur en bon los. Et quant a avoir plaisance, certes une grant maistresse, voire toute femme, se elle veult,

1. A<sup>2</sup> sera — 2. A<sup>1</sup> *supprime* ou serviteur — 3. A<sup>2</sup> beaucoup —

4. A<sup>3</sup> croistra



puet assez trouver de loïsibles et bonnes plaisances a quoy s'entendre et passer le temps sans melancolie sans telle amour. Celles qui ont enfans, quelle plus gracieuse plaisance puet on demander et plus delictable que de souvent les veoir et prendre garde que bien soient nourriz et dotrinés <sup>1</sup>, si comme il appertient a leur hautece ou estat, et les filles ordenner en telle maniere qu'en enfance prengnent rigle de bien et deue-ment vivre par exemple de bonne compagnie. Hé las! et, se la mere n'estoit toute sage, quel exemple seroit ce aux filles? Et a celles qui enfans n'ont, certes ce n'est se honneur non a toute haulte dame, après ce que elle a dit son service <sup>2</sup>, de soy prendre a faire aucun ouvrage pour eschiver oyseuse, ou faire faire fins linges estrangement ouvrez, ou draps de soye, ou autres choses de quoy elle puet user justement, et telles occupacions sont bonnes et destourbent a penser choses vaines. Et ne dis mie que une joenne grant maistresse ne se puisse bien esbatre, rire et jouer convenablement en temps et lieu, mesmement ou il ait seigneurs et gentilz hommes, et qu'elle ne doye honnourer les estrangiers, selon qu'a sa haultece appartient, chascun selon son degré, mais ce doit estre fait si rassisement et de si bel maintien qu'il n'y ait pas un tout seul regart, un ris, non une parole qui tout ne soit a mesure et par raison, et tous-jours doit estre sus sa garde que on ne puist appercevoir en parole, en regart ou en <sup>3</sup> contenance, en elle chose desconvenable ne mal seant. Ha Dieux! se toute grant maistresse, voire toute femme, savoit bien comment ce bel maintien lui est avenant, plus le mettroit peine a avoir que quelconques autre parement, car il n'est jouel precieux qui tant la peust reparer. Et encore, ma très chiere dame, reste a parler des perilz et dongiers qui sont en tel amour, lesquelz sont sans

1. A<sup>2</sup> endotrinés — 2. A<sup>2</sup> servisse — 3. A<sup>2</sup> *supprime* en



nombre : le premier et grengneur c'est que l'en courrouce Dieu, après que, se le mary s'en aperçoit ou les parens, la femme est morte ou cheoite en reproche, ne jamais puis n'a bien. Encore, supposé que ce n'avienne, disons du cousté des amans, encore que tous fussent loyaulx, secrez, voirs disans, ce qu'ilz ne sont mie <sup>1</sup>, ains scet on assez que communement sont fains et pour les dames decepvoir dient ce qu'ilz ne pensent <sup>2</sup> ne voudroient faire, toute fois est chose vraye que l'ardeur de telle amour ne dure mie longuement, meismes aux plus loyaulx et c'est chose certaine. Ha ! chiere dame, comment cuidiez vous, quant il avient qu'icelle amour est defaillie et que la dame qui ara esté aveuglée par l'envelopement de fole plaisance se <sup>3</sup> repente durement quant elle s'avertist et pourpense les folies et divers perilz ou maintes fois s'est trouvée, et combien elle voudroit, qu'il lui eust cousté, que oncques ne lui fust avvenu et que tel reprouche d'elle ne peust estre dit, certes vous ne porriez penser la grant repentence et desplaisant pensée qui ou cuer lui en demeure. Et oultre cela, vous et toutes dames, pouez veoir quelle folie c'est de mettre son corps et son honneur ou dongier des langues et es mains de telz servans, puis que serviteurs s'appellent, mais la fin du servise est communement telle que, quoyqu'ilz vous aient promis et juré de <sup>4</sup> tenir secret, ilz ne s'en taisent mie et en la fin de telle amour souventes fois le blasme et parler des gens aux dames en demeure, ou a tout le moins la craintte et paour en leurs cuers que ceulx mesmes en qui se sont fiées le dient et s'en vantent ou aucun aultre qui le tour <sup>5</sup> sache, et ainsi se sont mises de franchise en servage, et veez la fin du service de telle amour. Comment cuidiez vous, ma dame, qu'il leur semble a

1. *A*<sup>1</sup> omet mie — 2. *A*<sup>1</sup> ajoute mie — 3. *A*<sup>1</sup> omet se — 4. *A*<sup>1</sup> du — 5. *A*<sup>2</sup> le fait



ses servans grant honneur de dire et eulx vanter qu'ilz soient amez ou ayent esté d'une bien grant maistresse ou femme de renom, et comment en tairoient ilz la verité? Car Dieux scet comment ilz en mentent; et pleust a Dieu qu'entre vous, mes dames, le sceussiez bien, car cause auriez de vous en garder. Et pour ce, ma dame, que amez balades et dittiez, je vous envoie une ad ce propos faitte d'un bon maistre, si la vueilliez bien noter. Oultre plus les servans qui scevent vos secrez et en qui convient que vous vous fiez <sup>1</sup>, cuidiez vous, par vostre foy, qu'ilz s'en taisent combien que leur ayés fait jurer? Certes la plus grant partie sont telz que ilz seroient bien dolens que l'en ne sceust que plus grant priveté et hardiece ont vers vous que les autres, et, se ilz ne dient de bouche voz secrez, ils les monstrent au doy par divers semblans couvers qu'ilz veulent bien que on notte. Hé Dieux! quel servitude a une dame, et a toute autre femme en tel cas, qui n'osera reprendre ne blasmer son servant ou servante, poson que elle les voye grandement mesprendre, quant elle se sent en leur dongier et seront <sup>2</sup> montés contre elle en tel orgueil que mot n'osera sonner, ains convendra que elle leur sueffre ce que elle <sup>3</sup> n'endureroit de nul autre, et que pensés vous que dient ceulz et celles qui ce voyent et nontent? Ilz n'y pensent fors ce qui y est, et soiés certaine qu'ilz en murmurent assez, et, s'il avient que la dame se courrouce ou donne congié a ses servans, Dieux scet se tout est revellé et dit en plusieurs places! Et touteffois souvent avient que ilz sont et ont esté moyens et procureurs d'ycelle amour bastir, laquelle amour ilz ont volentiers pourchacée et a grant diligence pour traire a eulx dons ou offices ou autres emolumens. Très redoubtée dame, que vous en diroye?

1. A<sup>1</sup> v. soiez fiées — 2. A<sup>1</sup> seroit — 3. A<sup>2</sup> s. a faire et dire choses que n'e.



Soiez certaine que aussi tout on espuiseroit un abysme comme l'en pourroit raconter tous les perilz mauz qui sont en ycelle vie amoureuse, et ne doubtez du contraire, car il est ainsi. Et pour ce, très chiere dame, ne vous vueilliez fichier en si fait peril, et, se aucune pensée y avez eue, pour Dieu! vous en vueillez retraire <sup>1</sup> ains que plus grant mal vous en ensuive, car il vault trop mieulx tost que tart et tart que jamais, et ja pouez veoir quelz paroles en seroient, se plus se continuoient voz nouvelles manieres quant ja sont apperceues, par quoy paroles s'en espandent en mains lieux. Si ne vous sçay plus que escrire fors que de toute ma poissance vous suppli <sup>2</sup>. humblement que de ce ne me sachiez aucun mauvais gré, mais vous plaise avisier le bon vouloir qui le me fait dire, et au fort mieulx doy vouloir faire mon devoir de vous loyaument amonester, et en deusse avoir vostre maltalent, que de vous conseil-lier vostre destruction ou de la taire pour avoir vostre bon gré. Ma dame, vueilliez bien noter ma ballade qu'enclose en ces <sup>3</sup> presentes vous envoie. Très redoub-tée princece et ma chiere dame, je pri a Dieu qu'il vous doint bonne vie et longe et paradis. Escript a la Tour le xviii<sup>e</sup> jour de jenvier.

Vostre très humble creature,

Sebille de Monthault, dame de la Tour.

### *Balade*

DAMES d'honneur, gardez vos renommées,  
 Pour Dieu mercis! eschivez le contraire  
 De bon renom, que ne soiez blasmées;  
 N'aiez chaloir d'acointances attraire

1. A<sup>2</sup> vueilliez vous en r. — 2. A<sup>2</sup> supplie — 3. A<sup>1</sup> ses

3173 A<sup>2</sup> De deshonneur q.



3175 Telles qu'on puist recorder ne retraire  
 Par voz maintiens que legiers cuers aiez  
 Ne qu'en nul cas vous daignissiez meffaire,  
 Et de ces faulx gengleurs vous retraiez.

Car pou vauldroit cuidier bien estre amées  
 3180 De pluseurs gens pour avoir tel salaire  
 Com deshonneur par paroles semmées  
 En divers lieux, qu'il eust en vostre affaire  
 Legiereté; si vous est neccessaire  
 Avoir recort, sans que vous l'essaiez,  
 3185 Du mal qui vient souvent par folour faire,  
 Et de ces faulx gengleurs vous retraiez

Or soiés donc de parfait sens armées  
 Contre ceulx qui tant tachent a soubtraire  
 L'onneur de vous, et de qui diffamées  
 3190 Estes souvent sans cause, et pour vous plaire  
 Font le courtois; pour ce ne me puis taire  
 Que j'oy souvent telz, que vous attraiez,  
 Qui vous blasment; vueilliez vous en soustraire,  
 Et de ces faulx gengleurs vous retraiez.

3195 Dames d'onneur, ne vous vueille desplaire  
 Se vous conseil que de vous fortraiez  
 Les deceveurs, croiez moy sans plus braire,  
 Et de ces faulx gengleurs vous retraiez.

Ainsi la dame de la Tour,  
 3200 Qui me mist en moult dur atour  
 Par ses lettres qu'elle rescript,  
 Tel response a ma dame escript

3175 A<sup>1</sup> que on — 3178 A<sup>1</sup> ses f. — 3186 A<sup>1</sup> v. retraire — 3188  
 A<sup>2</sup> place tachent *avant* tant — 3196 A<sup>1</sup> Ce — 3200 A<sup>1</sup> d. tour



Qui en fut moult esbahye,  
Mais ne l'a pour ce enhaïe  
3205 Ainçois se prist lors a dire :  
« Hé! que pleust a nostre sire  
Que tousjours eust o moy esté  
Celle, le bien amonnesté  
M'aroit, si ne feusse mie  
3210 Par mal conseil endormie,  
Mais au fort je m'en retrairay  
Et a son conseil me trairay,  
Car bien voy le peril amer  
Qui est en la vie d'amer,  
3215 Mais cil de qui trop me souvient  
Qu'il s'en retraye aussi convient. »  
Adonc telz lettres a escripre  
Me prist com cy vous orrez dire :

## LETTRES CLOSES

Mon bel ami, il est bien la verité que folle amour, qui plusieurs deçoit, et la nisse pitié que j'ay eue de vos complaints moult m'ont <sup>1</sup> menée a oublier <sup>2</sup> ce de quoy il me devroit souvenir sans cesser, c'est assavoir mon ame et mon honneur; et je l'ay bien montré qui me suis mise ja en plusieurs grans dongiers et perilz pour acomplir voz joennes desirs et les miens. Combien que, Dieux mercis! n'y ait point de villennie ne ja n'ara, ne me doint Dieux tant vivre! mais pour tant ne le croiroit mie le monde se aucune mauvaise aventure m'en avenoit, dont Dieux me gard! Et voy bien que quiconques se boute en telle folle amour qu'il n'est mie maistre de soy ne de ses manieres, par quoy il convient

1. *A' omet* m'ont — 2. *A' houblier*

3204 *A' ce haïe*



qu'il soit aperceü ainsi comme vous pouez veoir par ces grandes lettres que je vous envoie que la bonne preude femme la dame de la Tour m'a rescriptes, a fin que vous voiez quel cause me meut a m'en retraire. Car, quant en ceste amour je me mis, je ne me donnoye garde des perilz ou je me fichoye, mais ceste sage dame m'a ouvert les yeulx de raison et d'avisier en mon fait ou, se non, je seroye honnie <sup>1</sup> et perdue, et, chier ami, ce ne devriez vous mie vouloir. Et pour ce vous pry que vous en vueilliez retraire, et sachiez que ceste requeste vous fais malgré mon cuer et a yeulx pleins de larmes, car riens ne pourroit plus estre amé que je vous aime. Si ne cuidiez mie que par faulte d'amour soit, car je vous jure par ma part de Paradis et vous promet sur tous les sermens qui faire se puent que, tant quant vivray, vous serez mon seul ami et tousdis sans autre vous ameray s'en vous ne tient, ne je ne vous donne congié de m'amour, car ne le m'avez mie desservi ne mon cuer qui vous aime ne le pourroit consentir, mais seulement couvient que vous deportiez de moy veoir pour le mal qui avenir m'en pourroit, laquelle <sup>2</sup> chose, je sçay bien, vous sera moult grieve et très douloureuse, mais quant vostre cuer en sera malade le mien n'en sera mie sain <sup>3</sup>. Si ne vous en sçay plus que escripre ne <sup>4</sup> ne puis, car mon las cuer, mes yeulx et mon viaire sont tous reamplis de larmes, et a Dieu vous dis, ma belle amour.

Vostre dolente dame.

Quant ces lettres de doulour

3220 Oz leues, poulz et coulour

1. *A*<sup>2</sup> intervertit honnie et perdue — 2. *A*<sup>3</sup> ajoute mie après pourroit — 3. *A*<sup>1</sup> laquel — 4. *A*<sup>1</sup> sien — 4. *A*<sup>1</sup> supprime le premier ne



Perdi et com mort devins,  
De grant piece ne revins  
A moy, car pasmez estoye  
De la doulour que sentoye  
3225 De telle nouvelle ouïr  
Qu'il me convensist fouïr  
Et esloingnier et retraire  
De ma dame; onc tel contraire  
Ne m'avint, dont je plouray  
3230 Tant qu'a pou je n'acouray.  
La grande lettre ay leüe  
Qui ceste chose ot meüe,  
Et Dieux scet, quant la lisoie,  
Se la vieille maudisoie  
3235 Qui la lettre ot envoyée!  
La voulsisse avoir noyée  
Mais qu'il n'en deüst plus estre.  
Quant celle douleur senestre  
J'oz longue piece menée,  
3240 Sans qu'elle fust deffinée,  
Ay escriptes telles lettres,  
Moillant de larmes les lettres :

A la souveraine des dames.

Hé las! ma doulce dame redoubtée, ma souveraine amour que je sers, crains, obeïs et aour, et ou pourray je prendre parole souffisant a vous declairier et faire a savoir entierement ma grant doulour? Car larmes et plours me troublent le sentement et ma memoire si que ne sçay ou je suis ne que je fois. Ha! ma dame, or m'avez vous desconfit par vos dures lettres de dire qu'il conviengne que de vous me retraye! Certes, il est bien la verité, quoy que celle dame de la Tour die des amans, que je suis plus vostre que chose que vous aiez



en ce monde et que je vous ay promis, laquelle chose tendray toute ma vie que je vous obeïray entierement sans riens passer de vostre vouloir, voire c'est a entendre a mon pouvoir. Mais quant est de m'en retraire, ad ce ne puis je obeïr, car a vie m'i suis donnés; si ne seroit en ma poissance, pour en recevoir mort, de m'en oster. Mais, chiere dame, de obeïr a vostre commandement que plus ne vous voye, s'il vous plaist a toutes fins <sup>1</sup> que ainsi soit, ad ce convendra par grant contraire que je deffende, mais se vous me commandez que je n'en muire ou perde le sens, ad ce ne pourray je obeïr, je le sçay de vray. Et, a fin que vous voiez que plus voudroie vostre honneur que celle qui tant vous en a escript, pour oster toute soupeon que soiez cause de ma mort, je m'en yray mourir outre mer ne jamais de ça ne revendray, je le <sup>2</sup> vous jure sur ma foy et ainsi le trouverez. Hé las! et ou a celle trouvé, pour bastir ma mort, que ja soit de nostre amour nouvelles et paroles? Et vrayement elle l'a songié; sauve sa reverence, ce ne puet estre; car oncques chose ne fu menée plus sagement ne plus secretement qu'a esté jusques cy nostre doulce amour et tousjours sera, se Dieu plaist. Car ce scet Dieux que plus tost soufferroye mort que faire chose ou vous eussiez deshonneur. Ha! ma dame, Ha! ma dame, et ne vous verray je doncques plus? Quant il convendra que ce soit, Dieux me doint perdre la veie et que plus ne voye jamais chose, car autre riens ne me pourroit plaire. Et comment doncques dureroit ne demoureroit mon cuer en vie qui plus n'aroit la joye qu'il reçoit quant il est près du vostre. Ha! Hay moy! Las! ceste pensée m'est une lance qui mon douloureux cuer par mi trespierce! et que je doye ainsi perdre, et sans cause, les doulz reconfors, les amoureux plaisirs, les plaisans regars et savoureuses paroles que de vous

1. A<sup>t</sup> t. fois — 2. A<sup>t</sup> supprime le.



recepvoye, dont le doulz recort et souvenance, qui en ma pensée demouroit en esperance d'y <sup>1</sup> retourner, me tenoit joyeux et liez plus que nul autre, ne pourroit estre. Et, ma très doulce dame, puis qu'il convient que je muire sans l'avoir desservi, un seul don vous requier pour toute l'amour que vostre doulz et noble cuer ot oncques a moy, ne tant de cruaulté ne vueilliez faire a vostre povre servant qu'il en soit escondit, ce est que ainçois que du tout soye congeiez que une fois puisse parler a vous a fin que je prengne congié et die a Dieu a toutes les doulces choses que m'aviez si amoreusement données, ou oncques, par mon ame ! n'oz penser villain ne oultre vostre gré. Hé las ! ma dame, bien sçay que leur faittes tort et souffrir mal sans cause, car je me rens fort que cestui congié n'est mie de leur assentement ne vouloir. Chiere dame, si me soit ce don ottroyé. Et plus ne vous sçay que dire, mais soiez certaine que jusques a la mort vous obeïray. Si vous plaise a me mander briefment quel voye voulez que je tiengne, et se voulez que j'emprenge la voye oultremer, si comme je ay dit, ou ce qu'il vous plaira. Et me vueilliez pardonner que ainsi sont ces lettres effacées de mes larmes, car, sur mon ame ! il n'estoit en ma poissance de les restraindre ne faire cesser jusques je les eusse escriptes ! Redoubtée dame, a vous me recommande plus que ne saroye dire, et pry a Dieu qu'il vous doint tous les biens que l'en saroit souhaitier. Escript très amerement en larmes et plours.

Vostre povre amant, de tous le plus douloureux.

Ces lettres cy envoyay  
A ma dame et larmoyay



- 3245 Durement en les baillant.  
 Mat, dolent et tressaillant  
 Demouray et moy plaignant ;  
 Disoye en moy complaignant :

*Balade*

- 3250 **H**<sup>A</sup>! Mort, Mort, Mort, viens a moy, je t'appelle,  
 Oste moy tost de ce doloieux monde,  
 Car vivre plus ne vueil ; puis que la belle  
 Me veult du tout estrangier, fais que fonde  
 Mon povre cuer a dueil et a martire ;  
 Car congié prens a joye et a leesce  
 3255 Ne je ne vueil fors que toy, Mort, eslire,  
 Puis que congié me donne ma maistrece.

- Hé las ! hé las ! quel dolente nouvelle !  
 Oncques ferus de lance ne de fonde  
 Ne d'autre dart ne fu homs qui si felle  
 3260 Nouvelle ouïst com moy par qui j'abonde  
 En tout meschief plus que je ne say dire.  
 Quant eslongner amour de tel haultece  
 Me fault, je vois a dueil mourant de tire,  
 Puis que congié me donne ma maistrece.

- 3265 Ha! ma dame, me serez vous si felle  
 Que vous souffriez qu'en si grief dueil ja fonde  
 Pour vous amer ; a tesmoing je t'appelle,  
 Amours, qui sces que ou siecle a la reonde  
 On ne pourroit nul autre amant eslire,  
 3270 Plus vray servant de fait et de promesse !  
 Mais tout mon fait s'en va de mal en pire,  
 Puis que congié me donne ma maistresse.



Ha! Dieux d'amours! pour quoy souffrez, beau sire,  
Que muire ainsi sans desserte en tristece?

3275 Car je pers tout, nul ne m'en seroit mire,  
Puis que congié me donne ma maistrece.

Ainsi com je vous descrips

A ma dame je rescrips.

Et quant mes lettres ouvertes

3280 Ot, et les vid si couvertes

De larmes et deffaciées

Les lettres et despeciées,

Certes on me raporta

Que trop se desconforta,

3284 Et en les lisant plouroit

Si fort que lui decouroit

L'iaue contreval la face.

Et adonc a de sa grace

Me rescripst très bien en haste,

3290 Au message qu'il se haste

De les porter bien en charge;

Il de non finer se charge

Tant qu'il les m'ait apportées.

Le message o les hastées

3295 Lettres toute nuit ne fine

D'aler tant qu'il se termine,

Au point du jour, a la porte

Du chastel; adonc m'apporte

Les lettres qui conforterent

3300 Mon grief plour et dueil m'osterent.

Et grant besoing en avoye,

Car certes j'estoye en voye

De vie perdre ou le sens.



Si entendez cy le sens  
 3305 Des lettres qu'elle envoya  
 Dont mon cuer eu grant joye a :

Au plus bel et meilleur de tous, mon vray et loial ami.

Mon vray, loyal, très doulz et bel ami, voir est que comme je fusse espoventée de mon honneur perdre, que je doy ressongnier sur toutes choses, de ce amonnestée par les lettres, comme vous avez peü veoir, de la dame de la Tour a qui j'en sçay bon gré, car je sçay bien que elle l'a fait pour mon grant bien, vous escrips derrainement en mes lettres, malgré mon cuer, ce que je vous manday en ycelles; mais, mon doulz et gracieux ami, je voy bien que la departie de vous et de moy Amours ne pourroit souffrir, et me repens grandement de vous avoir ce signifié, car je sçay que grant douleur en avez eu et avez. Dont je vous pri que pardonner le me vueilliez et je vous en cry mercy. Et me poise bien que nostre bon ami vostre cousin n'est avec vous pour vous reconforter, et me desplaît dont en si long voyage est alez. Si vous pri <sup>1</sup>, sur tout le commandement que je puis sur vous avoir et l'amour que vous avez a moy, que vostre cuer en vueilliez du tout apaisier comme devant, car je ay trop grant paour que n'ayez pris si grant tristece en vous que je ne viengne ja a temps a vous reconforter et que aucune maladie, dont Dieux vous gart! vous en prengne. Par quoy aise ne seray jusques je oye nouvelles de vous. Si vous escrips bien en haste en vous priant que faciez très bonne chiere et joyeuse, car je vous <sup>2</sup> sçay a dire très <sup>3</sup> bonnes nouvelles : c'est que nostre bonne amie en qui nous nous fions sera cy dedens .iiii. jours. Si me vendrez veoir, et je le vous

1. A<sup>2</sup> prie — 2. A<sup>1</sup> supprime vous — 3. A<sup>2</sup> supprime très



manderay, et ferons bonne chiere comme devant. Car, se Dieux m'aïst ! se mourir en devoie, je ne vous pourroye laisser, et je ay esperance a l'aide de Dieu que nostre fait sera bien cellé, et aussi vous garderez tous-jours bien mon honneur, car g'y ay fiance. Mon doulz et bel amé, je pri a Dieu qu'il vous doint parfaite joye. Escript hastivement.

Vostre vraye et loyal<sup>1</sup> amie.

Ainsi ces lettres receus,  
Si fus du tout au dessus  
De mon anuy, ne plouray  
3310 Plus, ainçois Dieu aouray  
De ces très bonnes nouvelles.  
Si fis la response a celles  
Lettres et moult merciay  
Ma doulce dame, aussi ay  
3315 Lui prié que la veïsse  
Brief a fin que lui deïsse  
Le mal qu'avoye eü  
Des lettres qu'os receü.  
Ne sçay a quoy j'en tenisse  
3320 Plus long conte, que j'en ysse  
Est temps. Tout avez ouÿ  
Coment d'amours je jouÿ  
A mon gré sans villennie,  
Car qui dira, je lui nye,  
3325 Qu'en nostre amour il eust oncques  
Lait fait ne vilain quelconques  
Ne dont loyaulté brisiée  
Fust en riens, dont mieulx prisee  
En doit estre nostre amour.

1. A<sup>2</sup> loiale — 3319 A<sup>2</sup> je t.



- 3330 Aussi la peine et clamour  
Vous ay dit que j'enduray  
Ainçois et com procuray  
Tant que ma dame ot pitié  
De moy. Si est du dittié
- 3335 Temps qu'on le doye a fin traire,  
Car se vouloye retraire  
Trestoutes les aventures,  
Unes plaisans, autres dures,  
Qui en celle amour m'avindrent,
- 3340 Les maulx et biens qui m'en vindrent,  
Puet estre que j'anuyeroye;  
Car assés a dire aroye  
Et procès ert sans finer.  
Mais, pour en brief parfiner,
- 3345 Vous di que puis mainte fie  
La belle, en qui je me fie,  
Vi très amoureusement  
Et os savoureusement  
D'elle, dont mon cuer ne part,
- 3350 Des amoureux biens grant part.  
Et bien deux ans sans mentir  
Me dura, que departir  
Du paÿs ne me laissoit,  
Et aussi bien me plaisoit,
- 3355 Car si ardent en estoye  
Qu'a nulle riens n'acomptoye  
Fors que près d'elle je feusse.  
Si croy que plus que ne deusse  
Y hantay, tant que fumée,
- 3360 Par male langue alumée,  
Du fait de nous deux sailli,  
Dont dolent et mal bailli  
Fus, car ne la pos estaindre,  
Si n'oz plus pouoir d'ataindre
- 3365 A veoir, si com souloie,



- Ma dame, dont me douloie  
Durement ; si fus blasmé  
De mes amis et clamé  
Recreant, dont tant estoie  
3370 Ou paÿs ou ne hantoye  
Fors joustes, tournois et festes  
Qui près de moy fussent prestes,  
Mais de loings aler neant.  
Si n'estoit pas bien seant  
3375 A gentil homme, a voir dire ;  
Si seroye tout le pire  
De mon lignage s'estoye  
Plus la et se ne hantoie  
Les armes en mainte terre  
3380 Pour los et vaillance acquerre.  
Tout ce sermon me notterent  
Mes parens, si me chanterent  
Tel chançon que j'escoutay  
Pour mon mieulx, mès me doubtay  
3385 Qu'a ma dame peust desplaire  
De ce sans son congié faire  
Et tout mon cuer s'en doulsist.  
Lui manday qu'elle vouldist  
Tant faire qu'a lui parlasse,  
3390 Car convenoit que j'alasse,  
Pour son honneur mesmement,  
Un pou hors, et fermement  
Creust que ne l'oublieroye  
Jamais jour ; si m'en yroie  
3395 En Espagne ou l'en aloit,  
Et que mieulx faire valoit  
Ainsi que pis en venist ;  
Et qu'aussi lui souvenir  
Que promis je lui avoye



- 3400 Que pour s'amour je feroye  
Tant que nom de vaillant homme  
Acquerroye en toute somme.  
Tant fis et tant pourparlay  
Qu'a peine a elle parlay,  
3405 Car moult estoit court tenue,  
Et en grant peril, venue  
Est en un lieu ou je yere;  
Plours, grant dueil et mate chiere  
Y ot moult au departir,  
3410 Et a peines consentir  
Me vout qu'en la guerre alasse;  
Et en moillant piz et face  
De plours, et estroittement  
Baisant, bien destroittement  
3415 A Dieu je la commanday  
Et si m'y recommanday  
Mille fois et me soubmis  
A son vueil; si lui promis  
Que partout la ou g'yroye  
3420 Nouvelles lui escriproie,  
Et aussi me rescriproit  
Tout comment a elle yroit.  
Et ainsi je departy,  
Plourant et en dur parti  
3425 De laisser ma bien amée.  
En Espagne en une armée  
M'en alay, et par dela  
Fus un an et loings de la  
Belle, puis m'en vins tyrant  
3430 D'elle veoir desirant.  
Quant de mon retour nouvelle  
Sot, elle fist tant qu'a elle

3408 *A*<sup>1</sup> omet dueil — 3409 *A*<sup>2</sup> Y ot grant au d. — *A*<sup>1</sup> ajoute  
dueil après moult — 3411 *A*<sup>2</sup> M'en v.



Parlay sans qu'il fust sceüs ;  
A joye y fus receüs,  
3435 Très bonne chiere feïmes  
Et de noz regraiz deïmes.  
Ainsi par fois y aloie,  
Mais en peril y parloie,  
Et ainsi comme en emblant  
3440 Venoit paoureuse et tremblant  
De paour d'estre gaitie,  
Dont toute estoit dehaitie ;  
Par quoy, quant si esperdue  
La veoie, aucques perdue  
3445 Estoit grant part de ma joye  
Pour le peril que veoie  
En quoy pour moy soubmettoit  
Son honneur et soy mettoit.  
Pour ce entrepris maint voyage,  
3450 Oultremer alay a nage  
Pour dongier des mesdisans.  
Ainsi me dura .x. ans  
Celle vie que j'aloye  
Souvent hors, puis revenoye ;  
3455 Et au retour avenoit  
Aucunes fois, quant venoit  
A point, que ma dame chiere  
Veoye ; et par tel maniere  
Alay cerchant mainte terre.  
3460 Prisonnier je fus en guerre  
En une dure assemblée,  
Dont ma dame fut troublée.  
Ainsi os du mal assez  
Ainçois les .x. ans passez.  
3465 Amours mesmes m'en livra  
Maint et ne m'en delivra ;  
Car, non obstant qu'en ma dame  
Je ne veisse oncques, par m'ame !



- Chose dont doubter deüsses  
3470 D'elle, que j'apperceüsses,  
Jalousie, qui est rage,  
Me destrempa tel buvrage  
Que comme homme fol devins!  
Car une fois je revins  
3475 De hors et me fu advis,  
Aussi tost que la vis,  
Que son cuer estoit changié  
Vers moy et tout estrangié  
M'avoit d'elle, me sembloit,  
3480 Dont tel dueil s'en assembloit  
En mon cuer que j'enragoye.  
Si en perdi toute joye  
Et ne m'en pos apaisier  
De long temps ne amaisier  
3485 Mon cuer qui grant dueil avoit,  
Et ma dame m'en savoit  
Si mal gré qu'en cel espace  
A pou qu'en perdi sa grace.  
Aussi, se dire je l'ouse,  
3490 Un temps un petit jalouse  
La vi, dont grant dueil avoie,  
Car achoison n'y savoye  
Ne la cause pour quoy ce yere,  
Car en pensée n'en maniere  
3495 Dieux scet que oncques ne faussay  
Vers elle ne oeil ne hauçay  
Pour penser a autre dame;  
Mais bien voy que qui la flamme  
D'amours a ou cuer fichiée  
3500 Fault qu'en jalousie chée,  
Car a peine se deporté  
De jalousie qui porte  
En soy grant amour parfaite.  
Si fu mainte chançon faite,



- 3505 Puis de dueil, puis de repos,  
De nostre fait ; a prepos  
De divers cas je disoie  
Balades que je faisoie,  
Lais, complaints, autres diz,  
3510 Dont un joyeux entre dix  
Doloureux avoit : c'est guise  
De fol cuer qu'Amours desguise,  
Ma dame m'en renvoioit  
A son tour quant lui seoit.  
3515 Si orrez presentement  
Ci après le sentement  
De quoy noz dittiez estoient  
Qui noz maulx reconfortoient  
Quant loings l'un de l'autre estions,  
3520 Car ad ce nous esbations  
D'avoir mieulx en esperance,  
Quel qu'en fust la demourance.  
Dit ay le commencement,  
Moyen et fin ensement,  
3525 Jusqu'a bien .x. ans passez,  
Des amours ou j'oz assez  
Peines et dures pensées,  
Mais ne sont mie passées  
Ces amours ne passeront,  
3530 Ains les corps trespasseront.  
Mais mesdisans, que confonde  
Dieux, car trop en a au monde,  
M'ont fait laissier la hentise  
De celle a qui j'ay promise  
3535 M'amour sans ja repentir ;  
Dont ne m'en verra mentir,  
Mais deshonneur lui veoye  
Avoir pour moy dont heoye



- Ma vie qui tant duroit,  
 3540 Car chascun en murmuroit;  
 Pour ce, pour s'onneur garder  
 Et sa paix, me retarder  
 D'elle veoir mieulx amay,  
 Non obstant que m'en clamay  
 3545 Las, dolent, mainte journée,  
 Que ce qu'elle fust tournée  
 Pour moy a tel blasma avoir.  
 Mais non pour tant, corps, avoir  
 Et quanque finer pourroye,  
 3550 Est sien, pour elle mourroie,  
 Se besoing ert, n'est pas fable.  
 Si pri Dieu esperitable  
 Qui paix, honneur, bonne vie  
 Lui ottroit et assouvie  
 3555 Joye qui jamais ne fine.  
 Et ycy mon dit deffine.

EXPLICIT LE LIVRE APPELLÉ LE DUC DES VRAIS AMANS

- A tous ditteurs, qui savoir  
 Ont en eulx, celle savoir  
 Fait, qui ce dittié ditta,  
 3560 Qu'en trestous les vers dit a  
 Rime leonime ou livre,  
 Et tel tout au long le livre.  
 Voire de si forte forge,  
 Ne sçay se nul le voit fors je,  
 3565 Que si foible rime en vers  
 N'a, voiant droit et envers,  
 Que un voieul devant ne sonne

3566 A<sup>2</sup> N'en y a et d.



Ains la sillabe que on sonne  
 Derraine aux rimes parfaire.  
 3570 Ainsi l'a voulu parfaire  
 Pour monstrier son essence ;  
 Car labour a et science  
 De long procès demener  
 Par tel rime et de mener  
 3575 A fin matieres diverses,  
 Puis doulces et puis diverses.  
 Et qui nel croira l'espreuve  
 Par essayer, lors l'espreuve  
 Fors et de penible affaire  
 3580 A qui a long compte a faire :

## BALADES DE PLUSEURS FAÇONS

## I

BELLE, il me fault departir  
 Et esloingnier vo presence,  
 Dont grant dueil me fault sentir,  
 4 Car je mourray de pesance  
 Puis que plus n'aray l'aisance  
 De veoir vostre doulz vis  
 Qui est, a ma congnoissance,  
 8 Le plus parfait qu'onques vis.

— Amis, ne puis consentir  
 De bon gré vostre partence,  
 Car sans vous sera martir  
 12 Mon cuer en grief penitence,



Si me fait mal quant je pense  
 Qu'ainsi soit de moy ravis  
 Cil qui est par excellence  
 16 Le plus parfait qu'onques vis.

— Dame, bien doit amortir  
 Tout mon bien quant souffisance  
 Avions tous .ii. et partir  
 20 La convient sans qu'aye offense  
 Faitte, et si n'y puis deffense  
 Mettre, dont j'enrage vifs  
 Pour vous, cuer plein d'essience,  
 24 Le plus parfait qu'onques vis.

— Ou que faciez residence,  
 Foy, amis, je vous plevis,  
 Car vous estes sans doubtaunce  
 28 Le plus parfait qu'onques vis.

## II

## BALADE A RESPONSE

**P**RENDRE congié je viens, doulce maïstresse,  
 Pour m'en aler, venus suis a Dieu dire.  
 — Hé las ! amis, ce m'est dure destrece,  
 4 Car ton depart me fera mourir d'ire.  
 — Belle, a vous me recomande  
 Et pri a Dieu que tous voz biens vous rende.  
 — Amis, en grant dueil je mains,  
 8 Mais ne m'oubliez pas au mains.

Las ! que feray quant ma confortarresse  
 Je n'aray plus, car vous estiez mon mire.

I. 14 A<sup>1</sup> Que a. — II. 1 A<sup>2</sup> c. de vous d. — 2 A<sup>2</sup> a. s. v. a —  
 6 A<sup>2</sup> prie — 7 A<sup>2</sup> je remains — 10 A<sup>2</sup> v. estes



— Amis, mais moy, car en femme a foiblece  
 12 Plus qu'en homme n'a, si fault que je muire.

— Doulce flour, m'est vis que fende  
 Mon cuer de dueil et qu'a la mort je tende.

— Amis, confortes tes reclaims,  
 16 Mais ne m'oubliez pas au mains.

Ma doulce amour et dame, je vous laisse  
 Mon cuer; pour Dieu! ne vueilliez autre eslire.

— Ne doubtez ja, amis, que changerresse  
 20 Soye nul jour, de toy me doit souffire.

— Dame, sans que plus j'attende  
 A mon depart il convient que je tende.

— A Dieu donc, amis que tant aims,  
 24 Mais ne m'oubliez pas au mains.

Belle, a Dieu, qui vous deffende  
 De tout anuy et voz haultz biens vous rende.

— A Dieu te di en dueil et plains,  
 28 Mais ne m'oubliez pas au mains.

### III

#### BALADE A DOUBLES RIMES

D<sup>AME</sup>, je pars de vous pale et destaint,  
 3 Ataint de dueil m'en vois, dont je souspire  
 En pire point qu'onques ne fus rataint,  
 Taint de coulour mortele qui m'empire,  
 6 Despire doy ma vie qui trop dure,  
 Car sure mort ne me seroit si dure.

Ha mesdisans! deables vous enmaint  
 A maint nuisez, Dieux vous vueille maudire!

II. 14 A<sup>1</sup> m. retende — 15 A<sup>2</sup> te r. — 22 A<sup>2</sup> q. j'entende —  
 III. 4 A<sup>2</sup> ajoute de devant mortele — 8 A<sup>1</sup> nuisiez



9 Dire le doy, car celle ou tout bien maint  
 Remaint en dueil et je, par vo mesdire  
 D'yre rempli, pas ne sçay com l'endure,  
 12 Car sure mort ne me seroit si dure.

Et certes plus, belle, voz durs complains  
 Plains que les miens, non obstant mon martire,  
 15 Tire a tire languiray en reclains  
 Pleins n'en seray fors de vous, dont m'aÿre,  
 Sire Dieux, tost ostez moy ceste ardure,  
 18 Car sure mort ne me seroit si dure.

Tost finer vueil, de plus vivre n'ay cure,  
 20 Car sure mort ne me seroit si dure.

## IV

Q U'EN puis je mais se je plains  
 Et complains  
 Ma très douloureuse perte,  
 Trop aperte  
 Sur moy, car le bien qu'avoye  
 6 Me renvoye  
 A dueil dont mon cuer est plains.  
 Si me plains,  
 Car a la mort suis offerte  
 Sans desserte,  
 Par quoy regraitant, larmoye,  
 12 L'amour moye,

Quant cil que doulz amis claims,  
 Qui est plains  
 De valour, c'est chose aperte



Et ouverte,  
 Plus ne voy ; c'estoit ma joye,  
 18 Or n'esjoye  
 Riens mon cuer qui plus n'est sains  
 Mais ençains  
 De tourment ; si suis deserte  
 Et aherte  
 A dueil sans cil que clamoye  
 24 L'amour moye.

Mais trop se debat en vains  
 Mon cuer vains,  
 Car voye ne m'est soufferte  
 Ne rouverte  
 Par quoy jamais je le voye,  
 30 Dont s'avoye  
 Mon cuer a trop durs reclaims,  
 Non pas fains,  
 Mais de cuer qui tout s'esserte,  
 Chose est certe,  
 Pour cil en qui j'affermoye  
 36 L'amour moye.

Estre ne puis si couverte,  
 Soubz couverte,  
 Que celler puisse qu'amoye  
 40 L'amour moye.

## V

**T**RISTE, dolent, presque mort,  
 Sans confort,  
 Ma douce dame et amour,



4 Loins de vous suis, dont je port  
Pale et mort  
Viaire et en desconfort  
7 Je demour.

Ne je n'ay de vous raport  
Qui m'enort  
A joye, et pour ce en cremour  
11 Vif que vous n'aiez recort  
De l'accort  
De nous deux, pour ce en remort  
14 Je demour.

Certes, vous me feriez tort,  
Belle, au fort,  
De m'oublier, car clamour  
18 Et duel me mettroit a port  
De dur sort  
Puis qu'en vous amant très fort  
21 Je demour.

Ma dame et le doulz demour,  
Ou mon cuer est sans transport,  
Le ressort  
De mon bien, sans reconfort  
26 Je demour.

## VI

3 **S**E de toy suis oubliée,  
Doulz ami, estre liée  
Je ne doy mie,  
Mais je me doubt qu'aliée  
Aies t'amour et liée  
6 A aultre amie:



Car pieça, dont anuyée  
 Suis, ne m'as lettre envoyée,  
 9 Dont je fermie  
 De paour que ottroyée  
 Soit t'amour sans detriée  
 12 A autre amie.

Si m'aroies deffiée  
 A mort, car me suis fiée  
 15 Et endormie  
 En t'amour, se affiée  
 L'avoies ceste fiée  
 18 A autre amie.

Pale et blesmie,  
 Pri que t'amour desliée  
 Ne me soit ne raliée  
 22 A aultre amie.

## VII

M<sup>A</sup> dame, très humblement  
 A vous je me recommand,  
 Et si vous fais assavoir  
 4 De mes nouvelles.  
 Sachiez que desir forment  
 Vous veoir et que briefment  
 Nouvelles j'en puisse avoir  
 8 Bonnes et belles.

Sain de corps suis, mais tourment  
 De moy ne part nullement,  
 Car desir ramentevoir,  
 12 Pointures felles



Me vient quant j'ay pensement  
 Aux graces entierement  
 Qui y sont, a dire voir,  
 16 Bonnes et belles.

Et j'en suis si longuement  
 Longtain, si m'en dueil griefment,  
 Mais j'en feray mon debvoir  
 20 Mal a gré celles  
 Et ceulx qui encombrement  
 Y mettent, car temprement  
 Yray vos doulçours veoir  
 24 Bonnes et belles.

Dieux voz querelles  
 Vous ottroit sans finement.  
 Escrit au comencement  
 D'Aoust ou lieu ou n'a, voir,  
 Bonnes et belles.

## VIII

T<sup>RÉS</sup> doulz ami, tu m'as reconfortée :  
 Puis qu'ay de toy bonne nouvelle oÿe,  
 3 C'est qu'en bon point  
 Es, Dieu mercy, et que tu ne m'as point  
 Oubliée, dont je suis resjouÿe,  
 6 Ne me pourroit meilleur estre aportée.

De mon estat saches que confortée  
 Suis a present, mais comme esvanoÿe  
 9 Et de dur point



Pointe souvent ay esté, mais a point  
As mis mon cuer dont joye estoit foÿe,  
12 Ne me pourroit meilleur estre aportée.

Et avec ce m'as grant joye enortée  
De ton retour ou seray com joye,  
15 Dieux le me doint  
Briement veoir et ton cuer y adoint!  
Car lors seray de grant grace esjoye,  
18 Ne me pourroit meilleur estre aportée.

Tel nouvelle tost viengne a mon oÿe,  
20 Ne me pourroit meilleur estre aportée.

## IX

D'OU LCE dame, plus durer ne pourroye  
Se loings de vous, si convient que revoise  
3 Prochainement  
Par devers vous, autrement je mourroye,  
Et de si long sejour faire il me poise  
6 Certainement.

Et bien me doit tarder que je vous voye,  
Belle plaisant, car riens n'est qui racoise  
9 Mon grief tourment  
Fors vous sans plus, autre ne me resjoye;  
Croiez le ainsi, doulce, franche et cortoise,  
12 Certainement.

Si m'en revois et plus ne m'en tenroye,  
Et, si convient a Dieu, langue tyoise  
15 Et ensement



Li Alemant, et pour vous, simple et coye,  
 Tirer me fault vers contrée françoise,  
 18                   Certainement.

Joyeusement  
 Pour vous veoir, belle, me metz en voye  
 Vers France et laiz le pais de servoise  
 22                   Certainement.

## VIRELAIS

## I

Tu soies le bien venu,  
 Plus que ne sçaroie dire,  
 Amis, j'ay ce que desire  
 4                   Puis que tu es revenu.

Et certes moult me tarδοit  
 Que te peüsse veoir,  
 Mon cuer de desir arδοit  
 8                   Sans autre part asseoir.

Hé las! t'est il souvenu  
 Tousjours de moy sans eslire  
 Autre dame, j'en souspire,  
 Ne sçay s'il est avenu,  
 13                   Tu soies le bien venu.

Mon las cuer joye perδοit,  
 Mais adès, par reveoir  
 Ton gent corps qui me gardoit  
 17                   Tout bien, me fera seoir

En soulas qui soustenu  
 Me sera par toy sans yre,



22 Puis que je t'ay doit souffire,  
Ne sçay qu'est dueil devenu,  
Tu soies le bien venu.

## II

4 P<sup>OUR</sup> Dieu! ma très doulce dame,  
Se faire se puet sans blasme  
Que vous voye,  
Je vous suppli, simple et coye  
Qui m'entame,  
7 Que ce soit tost, ou, par m'ame!  
Je mourroye.

11 Car venus en celle entente  
Je suis de longtain païs,  
Et se g'y fail, belle et gente,  
Je cuideray que haïs

15 Soye de vous, car soubz lame  
Me fera mettre la flamme  
Qui maistroie  
Mon cuer. Hé las! receu soye,  
Car j'affame  
De desir qui tout m'enflamme,  
Ou que soye,  
19 Pour Dieu! ma très doulce dame.

23 Si ne vueilliez estre lente,  
Ou trop seray esbaïs,  
De moy veoir, plus ne sente  
Le mal dont suis envaïs.

Si puet estre que nul ame  
Nel sache, car voz diffame



- Ne vouldroie  
 27 Ainçois la mort soufferroie,  
     Si reclame  
 Vostre aide, hé las! mon cuer pasme  
     Qui vous proye,  
 31 Pour Dieu! ma très douce dame.

## III

- A MIS, n'y puis avenir  
     Que venir  
 Puissiez vers moy, dont me dueil  
 4 A present, et soustenir  
     Et tenir  
 M'en convient dur souvenir  
 7 Et grief dueil.

- Car je n'ose lever l'ueil  
     Ne le sueil  
 Passer pour y parvenir,  
 Car garde ay plus que sueil.  
     Dont recueil  
 13 Douleur qui me fault tenir

- Secrete en moy retenir,  
     Ou banir  
 Me fauldroit honneur que vueil  
 17 Tout mon age maintenir  
     Et furnir,  
 Par quoy pers a parfurnir  
     Ton bon vueil;  
 22 Amis, n'y puis avenir.

Ainsi le felon esveil  
     Que recueil



De dongier, qui veult honnir  
Tout mon bien par son orgueil,  
Me fait dueil  
27 Et a meschief revenir.

Si m'en fauldra deffenir  
Et fenir,  
Car toute de plours me mueil  
31 Toy desirant retenir  
Et garnir  
De joye par doulz accueil  
En recueil,  
35 Amis, n'y puis avenir.

## RONDEAULX

## I

O<sup>R</sup> me doy je bien douloir  
D'ainsi faillir a m'entente  
De veoir ma dame gente,  
4 Car n'avoie autre chaloir.

Mon desir et mon vouloir  
Y estoit sans autre attente;  
7 Or me doy je bien douloir.

Mais n'y vault mon desvouloir,  
Y convient que tout dueil sente;  
Puis qu'elle ne m'est presente  
Nul bien ne me puet valoir,  
12 Or me doy je bien douloir.



## II

**S** e a faulte suis retourné  
 Et tourné  
 3 Vers vo corps bien atourné  
 Et sans veoir vo doulz oeil  
 Sans orgueil,  
 6 Dame, je mourray de dueil.  
  
 Mon bien sera destourné,  
 Bestourné  
 En langour et trestourné,  
 10 Se a faulte suis retourné.  
  
 Las ! mal seray atourné  
 Se tourné  
 13 N'est vo vis vers moy, tour n'é  
  
 D'avoir autre part recueil,  
 Dont je vueil  
 Mourir du mal, dont me dueil,  
 17 Se a faulte suis retourné.

## III

**H** é las ! je ne sçay que dire,  
 Je muir d'yre.  
 3 Belle, il convient que m'en aille  
 Et que saille  
 Hors de ce crueux martire  
 6 Qui m'aÿre.  
  
 Puis que ne vous voy, souffire  
 Ne deduire



10 Riens ne me pourroit sans faille;  
Hé las! je ne sçay que dire.  
  
Ne je ne sçaroye eslire  
Le moins pire  
13 De mes mauls, comment que faille  
Et deffaille  
Mon cuer sans que j'aye mire  
Ou je tire,  
17 Hé las! je ne sçay que dire.

## IV

3 **B**ELLE plaisant, pour qui tout mal endure,  
En dur ardour me fault de vous partir,  
Partir bien doit mon cuer au departir.

5 Car je vous lais très douce pourtraiture,  
Belle plaisant, pour qui tout mal endure.

9 Et si m'en vois, qui m'est douleur obscure,  
Cure n'avez de mon bien assentir,  
Sentir me fault torment sans alentir,  
Belle plaisant, pour qui tout mal endure.

## COMPLAINTE

4 **P**LUS que nulle aultre dolente,  
Amours, a toy me guermente  
Du mal qu'il fault que je sente  
Et du martire



Dont tu m'as mis a la sente,  
Par quoy desespoir tourmente  
Mon cuer sans promettre attente  
8               Fors d'avoir yre;  
Et ne sçay ou trouver mire,  
Car par toy mon dueil empire  
Tous les jours de mal en pire  
12               Et ma tourmente,  
Et a quanque je desire  
Je fail, dont pleure et souspire;  
Si ne me doit pas souffire  
16               Si mortel rente.

Car de toy fus deceüe,  
Or vient il a ma sceüe,  
A tart suis aperceüe,  
20               Et c'est ma mort  
Quant fais devant ma veüe  
Venir cil par qui peüe  
Suis de dueil et qui meüe  
24               A grief remort  
M'a, dont mon cuer se remord,  
Car a vis destaint et mort  
Me disoit qu'il estoit mort  
28               Et qu'esleüe  
M'avoit sur toutes et fort  
M'amoit, si com son recort  
Disoit, et qu'a son acort  
32               Fusse esmeüe.

Et tant fist par soy complaindre,  
Souspirer, gemir et taindre,  
Que, cuidant qu'il ne sceust faindre,  
36               Mon cuer blasmay  
Dont si le laissoit tant plaindre.  
Lors, cuidant au mieudre attaindre



De tous, m'i fyay sans craindre  
40 Et si l'amay.

Ce m'avint ou mois de may,  
Mais lors de joye en esmay  
Me mis, car je m'enfermay

44 En dongier graindre  
Que n'estoye ains, si fermay  
Mon cuer en lui, que clamay  
Doulz ami, et l'en amay

48 Sans moy reffraindre.

Au premier mon cuer emblant  
Aloit par son doulz semblant,  
Car tout pali et tremblant

52 Sembloit qu'il fust  
Devant moy, et ce doublant  
Aloit l'amour et comblant  
Par telz signes assemblant,

56 Car qu'il morust  
Qui tost ne le secourust  
Sembloit plus roide qu'un fust,  
Et que l'eaue li courust,

60 En redoublant,  
Sus son vis, et qu'il ne peust  
Parler; si grant douleur eust  
Si qu'au lit de tous poins geust,

64 Mort ressemblant.

Tous ces signes en lui vis  
Et trop plus a mon avis,  
Par quoy mon cuer fut ravis,

68 Lasse! en s'amour.

Si avoye, a mon avis,  
Ami, de corps et de vis  
En beauté tous assovis.

72 En ce demour



Fus long temps et y demour  
 Encor, mais sang et humour  
 Me tolt la dure clamour

76

Que je devis,  
 Car adès vifs en cremour  
 De perdre lui et m'onnour,  
 Mais adès m'en enamour,

80

Je vous plevis.

Puis que le reconforté  
 Un temps s'est si bien porté  
 Vers moy, et tel foy porté

84

M'a qu'amender  
 N'y sceusse, et si enorté  
 L'avoit Amours qu'aporté  
 M'iert par lui et raporté

88

Joye, et mander  
 Lui pouoye et comander  
 Comme a serf et sans tarder  
 Ma pais desiroit garder,

92

Et conforté  
 Mon cuer par son regarder  
 Estoit, a droit recorder,  
 Ne peüst mieulx demander

96

Nul cuer morté.

Hé las ! mais il est changié  
 A present et estrangié  
 De moy, dont tout enragié

100

Mon cuer se treuve,  
 Car bien voy que chalengié  
 On le m'a, car eslongié  
 Son vueil est et hebergié

104

En amour neufve



A son cuer, le fait le preuve;  
Car plus ne prie ne reuve  
Qu'aucune voye retreuve,

108

Ainsi com j'é

Apris, par quoy je m'espreuve  
Estre sa dame par oeuvre  
De pitié qui l'uis lui reuvre,

112

Si soit logié.

Dont je suis a mort conquise,  
Puis que celui, qui requise  
Tant m'avoit et ou assise

116

Je m'estoie,

A ailleurs s'entente mise  
Ne plus ne m'aime ne prise,  
Et de s'amour suis esprise

120

Ou que je soye,

Car sans repentir avoye  
En lui mise l'amour moye;  
Si est bien drois que je doye

124

En dure guise

Dueil mener sans jamais joye  
Avoir, puis que par tel voye  
Je pers celui que j'amoye

128

Et sans faintise.

Et, au moins se congié pris  
Eust de moy, estre repris  
N'en deust tant; si a mespris

132

Puis qu'il dessemble

De moy en qui avoit pris  
Honneur, valeur et tout pris,  
Dont ne me deust en despris

136

Avoir, me semble,



Mais ailleurs son cuer assemble,  
 Bien le voy, dont mon cuer tremble  
 De douleur pensant qu'ensemble,  
 140 Com j'ay appris,  
 Plus ne serons, dont j'assemble  
 En mon cuer dueil qui ressemble  
 Mort qui ja nous desassemble  
 144 Par dur pourpris.

Mais riens n'y vault ma complaintte  
 N'estre de plours palle et taintte,  
 Car jamais, fors d'amours fainte,  
 148 Ne m'amera,  
 Puis qu'aulture amour a attainnte  
 Et la moye a hors empainnte.  
 Si remaindray de dueil ceintte,  
 152 Il clamera  
 Autre dame et reclamera  
 Et en elle s'affermiera,  
 Dont mon las cuer en semera,  
 156 Ha ! larme maintte,  
 Mais ja ne s'en deffermera,  
 Ainçois toudis s'affermiera  
 Jusques mort l'en deffermera  
 160 Qui m'a ratteintte.

EXPLICIT LE DUC DES VRAIS AMANS

151 A' remandra — 152 Les mss. portent Et il







# CENT BALADES<sup>1</sup>

## D'AMANT ET DE DAME

---

CY COMMENCENT CENT BALADES D'AMANT  
ET DE DAME

Q uoy que n'eusse corage ne pensée, *f. 376 a*  
Quant a present, de dits amoureux faire,  
Car autre part adès suis apensée,  
Par le command de personne qui plaire  
Doit bien a tous, ay empris a parfaire  
D'un amoureux et sa dame ensement,  
Pour obeïr a autrui et complaire,  
Cent balades d'amoureux sentement.

Et tout comment ont leur vie passée  
Ou fait d'amours, qui maint mal leur fist traire

1. Ce recueil ne se trouve que dans le ms. Harley 4431 du Musée Britannique, *f*<sup>os</sup> 376 à 398.



Et mainte joye aussi entrelassée  
 12 De pointure, d'ennuy et de contraire,  
 Tout me convient conter, sans m'en retraire,  
 En ce livret ycy presentement  
 Ou j'escripray de joye et du contraire  
 16 Cent balades d'amoureux sentement.

Or pry je a Dieu que n'en soye lassée,  
 Car mieulx me pleust entendre a autre afaire  
 De trop greigneur estude, mais taussée  
 20 M'i a personne doulce et debonnaire  
 Pour amende de ce que ay dit que traire *fol. 376*  
 En sus se doit d'amoureux pensement  
 Toute dame d'onneur; si m'en fault traire  
 24 Cent balades d'amoureux sentement.

Prince, bien voy que il se vauldroit mieux taire  
 Que ne parler a gré; voy cy comment  
 Payer m'en fault d'amende volontaire  
 28 Cent balades d'amoureux sentement.

# I. — L'AMANT

PLUS ne vous puis celer la grant amour  
 Dont je vous aim, belle plus que autre née,  
 Qu'ay longuement portée sans clamour  
 4 Faire ne plaint, mais or voy la journée  
 Que ma vigour est du tout affinée  
 Par trop amer qui m'occit et cueurt seure,  
 7 Se de vous n'ay reconfort sans demeure.

Et contraint suis, tout soit ce en grant cremour,  
 Du dire, afin que garison donnée  
 Me soit par vous, car sanc, vie et humour  
 11 Me deffaillent, et, quoy que mainte année



- Aye souffert, adès est destinée  
Sans reschaper ma mort, il en est l'eure  
14 Se de vous n'ay reconfort sans demeure.
- Si vous requier, très belle, en qui demour  
Entierement mon cuer fait, que ordenée  
Me soit mercy, lonc n'en soit le demour,  
18 Car plus ne puis ne soir ne matinée  
Ce mal porter, si soit adès finée  
La grant durté dont fauldra qu'en dueil pleure,  
21 Se de vous n'ay reconfort sans demeure.
- Ha! très plaisant, en bonté affinée,  
Vo doulce amour soit a moy assenée,  
Car mon cuer est ja noircy plus que meure,  
25 Se de vous n'ay reconfort sans demeure.

## II. — LA DAME

*fol. 376 c*

- O**NCQUES ne sceu qu'est amer, ne aprendre  
Encor n'y vueil, alieus suis apensée,  
Par quoy en vain vous y pourriez atendre;  
4 Je le vous dy, ostés en vo pensée,  
Car ne m'en tient,  
Ne telle amour a dame n'appartient  
Qui ayme honneur; si ne vous en soit grief,  
8 Car vous ne autre je ne vueil amer brief.
- Et me quid bien de telle amour deffendre.  
La Dieu mercy, ne seray enlassée  
Es las d'amours, dont aux autres mal prendre  
12 Communement je voy, et ja passée,  
Bien m'en avient,  
M'en suis long temps, encores ne m'en tient,



16 Qui que m'en parle, escripse lettre ou brief,  
Car vous ne autre je ne vueil amer brief.

Si ne vous sçay autre response rendre,  
Plus n'en parlez, et desja suis lassée  
De l'escouter, aillieurs vous alez rendre,  
20 Car cy n'iert ja vo requeste passée,  
Et qui y vient  
Fait grant folour, car point ne me revient  
Si faicte amour, nul n'en vendroit a chief,  
24 Car vous ne autre je ne vueil amer brief.

N'y pensez plus, le vous dy derechief,  
26 Car vous ne autre je ne vueil amer brief.

### III. — L'AMANT

A vous est du reffuser  
Assez et de me estre fiere,  
Mais non pas de me ruser  
4 De l'amour, ma dame chiere,  
Qu'ai a vous, tout me soit chiere,  
Sans ja departir, plevye,  
7 Car c'est a mort et a vie.

Et m'agrée d'y user *fol. 376 d*  
Mes dolens jours, quelque chiere  
Que me faciez; sans ruser  
11 Le vous dy : plus tost en biere  
Seroie qu'en fusse arriere  
N'estre n'en pourroit ravie,  
14 Car c'est a mort et a vie.

Et, s'en vain y puis muser  
Et que de oeil ne de maniere



18 Ne de bien dont puisse user  
Chose n'aye que je quiere  
De vous, par qui fault que acquiere  
Mort, n'ay d'en retraire envie,  
21 Car c'est a mort et a vie.

Prince, est ce droit que on me fiere  
A mort pour amour entiere  
Porter? Fault que j'en devie,  
25 Car c'est a mort et a vie.

## IV. — LA DAME

Vous perdez vostre lengaige,  
Je le vous dy plainement,  
Pou y arés d'avantaige  
D'y muser plus longuement.  
5 Et que y vault le preschement,  
Cuidiez vous que me rigole?  
Je n'en feray autrement,  
Ne m'en tenez plus parole,  
9 Je vous en pry chierement.

Car amer ne fol ne sage  
Ne un ne autre vraiment  
Ne vueil ne n'en sçay l'usage,  
Croiez le ainsi fermement.  
14 Ne sçay quel alegement  
Demandez, n'est que frivole,  
Je croy que tout homme y ment,  
Ne m'en tenez plus parole,  
18 Je vous en pry chierement.

*fol. 377 a*

Et voy cy bien droite rage,  
Que me cuïdiez tellement



Enchanter que autre corage  
 Aye que au commencement;  
 23 N'y trouverés changement,  
 Je n'ay pas pensée mole;  
 Et se respons rudement,  
 Ne m'en tenez plus parole,  
 27 Je vous en pry chierement.

Dames, respondes briefment  
 A qui vous prie ensemment :  
 Ne m'en tenez plus parole,  
 31 Je vous en pry chierement.

## V. — L'AMANT

VOSTRE escondit m'est si dur a porter  
 Qu'il n'est chose que estre me peust plus dure,  
 Et me vendroit tantost mort emporter  
 4 S'Espoir n'estoit, mais il a pris en cure  
 Le mal que j'ay et m'aferme et me jure  
 Qu'aray secours et le puis desservir  
 7 Par obeïr, souffrir et bien servir.

Quoy que m'aiez, pour moy desconforter,  
 Mis en reffus, Espoir dit que si sure  
 Ja ne serés que vo cuer ennorter  
 11 Ne voit Amours quelque fois, quoy qu'il dure,  
 Que vous m'amiez, si me dit que j'endure,  
 Car avoir puis mercy par m'aservir,  
 14 Par obeïr, souffrir et bien servir.

Dont je me vueil desormais deporter  
 De mener dueil et mettre entente et cure  
 A vous servir et pour me conforter,



18 En esperant estre gay, et l'ardure  
Que j'ay en cuer endurer sans murmure, *fol. 377 b*  
Puis que Espoir dit que vo cuer puis ravir  
21 Par obeïr, souffrir et bien servir.

Belle, plaisant plus que autre creature,  
Vous et Amours me feriez grant injure  
S'en dueil mes jours me failloit asouvir  
25 Par obeïr, souffrir et bien servir.

## VI. — LA DAME

A YME qui vouldra amer,  
Quant a moy je n'en fois conte,  
Joye avoir n'en quier n'amer,  
4 Folz est qui riens y a conte,  
Car s'onneur en vient ou honte,  
Joye ou se de dueil est porte,  
7 Aux ouvriers je m'en raporte.

Mais je voy dolens nommer  
Souvent tous ceulx qu'Amours dompte,  
Mains en sont peris en mer,  
11 Autres occis a grant compte,  
Si est digne que on l'effronte  
Qui amour vuet de tel sorte;  
14 Aux ouvriers je m'en raporte.

Voit on nul eureux clamer  
En la fin, qui a droit conte,  
Pour celle amour qui blasmer  
18 Fait maint et ne vault ne monte,  
Foloyer roy, duc et conte,



Fait, et gent de toute sorte;  
 21 Aux ouvriers je m'en raporte.

Prince, qui bien le raconte,  
 Amours n'est que le mesconte  
 De droit ou raison est morte;  
 25 Aux ouvriers je m'en raporte,

## VII. — L'AMANT.

Quoy que je ne soye amez *fol. 377 c*  
 Et que tant vous treuve ombrage,  
 Mon cuer tellement fermez  
 4 Est en vous que tout mon age  
 Vostre, soit sens ou folage,  
 Seray, ma belle maistresce.  
 Je prendray en ce servage  
 8 Vie ou mort, joye ou destresce.

N'en doit estre Amours blasmez  
 Se je lui ay fait hommage  
 Ne moy fol ne diffamez,  
 12 Car ce m'est grant avantage  
 D'estre en si doulz seignourage  
 Ou de tous biens prens l'adresce.  
 Si me donnez pour partage  
 16 Vie ou mort, joye ou destresce.

Mais j'espoir qu'encor clamez,  
 Quoy qu'adès soiez sauvage,  
 Seray de vous et nommez  
 20 Amy, et que yeulx et visage



Vous beseray, belle et sage;  
Dieu doint que tost y adresce!  
Car j'ai soubz vo bailliaige  
Vie ou mort, joye ou destresce.

Princesse, ou mon cuer en gaige  
Est, et qui mes fais radresce,  
Qu'aray je pour heritaige,  
Vie ou mort, joye ou destresce?

## VIII. — LA DAME.

NE trop ne pou au cuer me sens frappée  
Des dars d'Amours que on dit qui font grant guerre  
A mainte gent, mais ne suis atrappée  
La Dieu mercy! es las ne en la serre  
Du dieu d'Amours.

Je ne lui fais requestes ne clamours,  
Je vif sans lui en plaisance et en joye, *fol. 377 d*  
Par amour n'aim ne amer neouldroie.

Ne n'ay paour que je soie happée  
Ne par regars, par dons ne par long erre,  
Ne par parler mignot enveloppée,  
Car il n'est homs qui mon cuer peust acquerre;  
Ne a secours

N'y viegne nul, car escondit le cours  
De moy seroit, et tantost lui diroie :  
Par amours n'aim ne amer neouldroie.

Et beau mocquier m'ay de femme atrappée  
En tel donger ou mieulx lui vaulsist querre  
Pour soy tuer ou coustel ou espée,  
Car perdu a du tout honneur sur terre.



21 Pour ce a toujours  
 En cest estat je pense user mes jours,  
 A tous diray, s'il avient que on m'en proie :  
 24 Par amours n'aim ne amer neouldroie.

Prince d'amours, a vo Court que feroie ?  
 26 Par amours n'aim ne amer neouldroie.

IX. — L'AMANT. — COMPLAINTÉ A AMOURS.

AMOURS, vueilliez moy vengier  
 A De l'orgueilleuse d'amours  
 Qui ne daigne assouagier  
 4 Mes angoisseuses doulours.  
 Je n'ay fors a toy recours  
 Du mal dont suis dehaitié.  
 Ma vie va en decours  
 8 Pour la belle sans pitié.

Elle me fait enragier,  
 Car plus apperçoit mes plours,  
 Moins conte en tient, n'alegier  
 12 Ne les veult, ains le rebours  
 De mes plaisirs fait tousjours, *fol. 378 a*  
 C'est bien petit d'amistié.  
 Mourray je dont sans secours  
 16 Pour la belle sans pitié ?

Mais, s'il te plaisoit, changier  
 Feroies bientost ses mours,  
 Car tout mettre en ton dongier  
 20 Pues folz et sages ; dont cours  
 A mon ayde et mes labours  
 Au moins guerdonne a moitié,



24 Si n'acourcisse mes jours  
Pour la belle sans pitié.

28 Dieu et prince, mie sours  
Ne soiez a mon dictié,  
Voy le mal ou suis encours  
Pour la belle sans pitié.

X. — AMOURS A LA DAME.

4 TROP est folle ta vantise,  
Ma fillette belle et gente,  
Qui cuidiez qu'en telle guise  
Amours te lait ta jouvente  
Passer sans avoir entente  
Aux plaisans biens amoureux  
8 Qui maint cas mettent en vente,  
Puis joyeux, puis douloureux.

12 N'en ert pas a ta devise,  
N'est drois qu'Amours s'i consente,  
Ains fauldra, je t'en avise,  
Que ton jeune et gay cuer sente  
Le dart d'Amours qui de rente  
T'envoiera desireux  
Pensers par diverse sente,  
16 Puis joyeux, puis douloureux.

Et se tu es donc requise  
De bel et bon, sans qu'il mente,  
Un doulz regart par franchise

X. — 17-28 *Ces vers omis par le copiste ont été ajoutés dans la marge inférieure par une main contemporaine.*



20 Ait au moins sans longue atente.  
 Que te vault estre si lente  
 Pour le tenir langoureux?  
 Souspirs giete plus de trente,  
 24 Puis joyeux, puis doulereux.

Mignotelle qui bien chante,  
 Cuides tu fuir l'eureux  
 Temps qui vient et se presente,  
 28 Puis joyeux, puis doulereux.

# XI. — L'AMANT.

**T**OURNEZ VOZ yeulx vers moy, douce maistresse,  
 Quelque petit, et voyez mon martire *fol. 378*  
 Et comment vif pour vous a grant destresse.  
 4 Si vous plaise, pour Dieu, estre le mire  
 De mes griefs maulx, car riens je ne desire  
 Fors vostre amour, chose autre plus ne vueil  
 Plus ne demand, c'est tout a quoy je tire  
 8 Ou que ay' au moins de vous aucun accueil.

Car, se du tout ne voulez mon aspresce  
 Mettre au neant, ne m'aiez si en ire  
 Qu'a tout le moins je n'aye aucune adresce  
 12 De reconfort par regart ou doulx rire  
 Ou quelque mot plaisant sans m'escondire  
 Si durement, car n'ay autre recueil  
 Qu'a vous, belle, ne m'en vueilliez desdire  
 16 Ou que aye au moins de vous aucun accueil.

Sera si dur vo cuer qu'en ceste presse  
 A tousjours mais me lait ainsi deffrire?  
 S'il est ainsi, riens n'est qui me radresse,



20 Je suis perdus, nul mal n'est du mien pire,  
Mais en voz yeulx, pour qui souvent souspire,  
Gist le secours qui peut garir mon dueil,  
Leur doulz regars un pou vers moy se tire,  
24 Ou que aye au moins de vous aucun accueil.

Belle plaisant qu'Amours m'a fait eslire,  
Ayez pitié du mal dont je me dueil;  
Secourez moy, car je fons com la cire,  
28 Ou que aye au moins de vous aucun accueil.

## XII. — LA DAME

SE j'estoie certaine que on m'amast,  
S Sans requérir ne penser villenie,  
Et qu'a l'amant, sans plus, que on le clamast  
Trés doulz amy souffisist, pas ne nie  
5 Que ce ne fust  
Vie plaisant qu'amer et qu'el ne deust  
Plaire a toute dame, tant soit parfaicte,  
8 Mais autrement me doubt qu'amours soit faicte. *fol. 378 c*

Et droit seroit que la dame on blasmast  
Qui ne vouldroit d'amy estre garnie,  
Bon et loyal, qui dame la nommast,  
Quant ne seroit de son honneur banie  
13 Et que elle sceust  
Que loyauté telle a tousjours lui eust,  
Du refuser seroit fole parfaicte,  
16 Mais autrement me doubt qu'amours soit faicte.

Pour ce de paour que on m'en diffamast,  
Ou que fusse par faulx semblant honnie,  
N'oseroie, quoy que on m'en affermast,



- Nullui amer, qui que s'en ensonnie ;  
 21 Mais, se estre peust  
 Content tel sçay qu'en grace on le receust,  
 M'amour aroit sans que honneur fust deffaicte,  
 24 Mais autrement me doubt qu'amours soit faicte.  
  
 Prince, on me dit qu'en seroie reffaicte,  
 26 Mais autrement me doubt qu'amours soit faicte.

## XIII. — L'AMANT

- H<sup>A</sup>! très doulz yeulx, plains d'amoureux liens,  
 Vous plaist il dont a mes maulx conforter !  
 Un seul regart de vous ja tant de biens  
 4 M'a fait qu'en moy sens aucques deporter  
 Le grief assault, que j'avoye a porter,  
 Du desespoir de jamais avenir  
 7 A vostre amour, belle, ou tens a venir.

- Doulce pitié, ainsi com je le tiens,  
 Un petiot est allée enorter  
 Vostre doulz cuer, qu'il vueille en quelque riens,  
 11 Les très griefs maulx que j'ay reconforter,  
 Et ce m'a fait le regart apporter  
 Qui esperer me fait a parvenir  
 14 A vostre amour, belle, ou tens a venir.

- Or suis garis, et reschappé me tiens *fol. 378 d*  
 Puis qu'a pitié je m'en puis rapporter  
 Qui doulz regart resveille et ses maintiens,  
 18 Car tous mes maulx chacent, et rapporter  
 Pour dueil soulas me font et deporter  
 Joyeusement, pensant par souvenir  
 21 A vostre amour, belle, ou tens a venir.



23 Dame, tout temps vous plevi me tenir  
A vostre amour, belle, ou tens a venir.

## XIV. — LA DAME

4 S<sup>E</sup> je suis adès pensive,  
Plus que ne sueil, devenue,  
A bon droit, car si soubtive  
Femme au jour d'ui n'est tenue  
Que, se elle avoit soustenue  
Tant la peine qui m'empire  
Pour contre Amours estriver  
Comme j'ay, je l'ose dire,  
9 Qui n'eust paour d'y arriver.

13 Mais, tant quan je puis, j'estrive  
A l'amoureuse tenue,  
Quoy que le plus bel que vive  
Souvent de sa retenue  
Me presse, et sa survenue,  
Tout non obstant l'escondire,  
Me plaist; cuer n'est, tant sauver  
Se sceust, sentant tel martire,  
18 Qui n'eust paour d'y arriver.

22 Car amours en moy s'avive  
Par très plaisant souvenue,  
D'autre part je suis craintive  
Que honneur n'y feust maintenue,  
Et ainsi me sens si nue  
De conseil que trouver mire  
N'y sçay ne m'en bien laver.  
Ou pourroit on celle eslire  
27 Qui n'eust paour d'y arriver?

*fol. 379 a*



Prince, quant Amours fort tire  
 Vers sa rive et vent lever  
 Fait, ou est cuer, tant sceust fuire,  
 31 Qui n'eust paour d'y arriver ?

## XV. — L'AMANT

SE la très plaisant promesse  
 De vostre amoureux regart,  
 Qui très doucement my blesse,  
 4 Ne me ment, je n'ay regart  
 De perir ne tost ne tart  
     Ne mal avoir,  
 7 Dieu doint qu'il me die voir !

Et tant m'est de grant richesse  
 Que quant sur moy il s'espart,  
 Soit ou par ville ou a messe,  
 11 Il m'est vis, se Dieu me gart,  
 Qu'a droit comble j'ay grant part  
     De tout avoir,  
 14 Dieu doint qu'il me die voir !

Mais, ma très douce maistresse,  
 Se de traÿr savoit l'art,  
 Je seroie de haultesse  
 18 Mis en exil, mais a part  
 Espoir m'aseure et n'en part  
     Ne main ne soir.  
 21 Dieu doint qu'il me die voir !

Belle, de veoir m'est tart  
 L'ueil duquel me fait le dart  
     Tout esmouvoir.  
 25 Dieu doint qu'il me die voir !



## XVI. — LA DAME.

J<sup>E</sup> ne sçay auquel entendre, *f. 379 b*  
De tous lez suis assaillie,  
Amours m'asault pour moy prendre,  
4 Dont toute suis tressaillie,  
Car d'autre part rassaille  
Suis de Honneur qui Paour assemble,  
Et chantent d'autre façon,  
Dont souvent je sue et tremble  
9 En escoutant leur leçon.

Dieux! ou me pourray je prendre?  
Car raison m'est deffaillie  
Tant me vient Amours surprendre,  
13 Et si sçay que mal baillie  
En seroie et accueillie  
De mesdisans, ce me semble,  
Qui cornent laide chançon,  
Dont souvent je sue et tremble  
18 En escoutant leur leçon.

Ou pourray je voie aprendre  
Par quoy en moy fust faillie  
Ceste pensée? Car rendre  
22 Ne me vueil en la baillie  
De l'amour ou suis saillie.  
Ainsi .ii. vouldoirs ensemble  
Mettent en moy la friçon,  
Dont souvent je sue et tremble  
27 En escoutant leur leçon.

Doulz prince, Amours mon cuer emble,  
Raison rechante autre son,



31 Dont souvent je sue et tremble  
En escoutant leur leçon.

## XVII. — L'AMANT

UN doulz accueil par regart convoyé,  
D'un gracieux salu acompaigné,  
Que voz doulz yeulx, belle, m'ont envoyé,  
4 Ont ja mon cuer de tout mal eslongné. *f. 379 c*  
Si vous mercy quant vous avez daigné,  
Pour me garir, vers moy tourner vostre oeil  
7 En saluant doucement sans orgueil.

Or congnois je que je suis avoyé  
A joyeux port ; amours ont besongné  
Pour mon secours, si ay bien employé  
11 Tous mes labours, plus ne seray baigné  
En amers plours se ne suis engigné.  
J'ay apperceu, me semble, vo bon vueil  
14 En saluant doucement sans orgueil.

Ha ! se pouoye estre tant festoyé  
De bel accueil, sans plus, qu'eusse gaingné  
Un seul baisier par amours octroyé,  
18 Adont seroit du tout mon mal rongné ;  
Mais je l'aray, ce me fu tesmoigné  
Par bon espoir, hersoir, dessus vo sueil,  
21 En saluant doucement sans orgueil.

Octroyez le i et m'en faictes reccueil  
24 En saluant doucement sans orgueil.



## XVIII. — LA DAME

CERTES, tant suis de près prise  
Que ne sçay quel part tourner :  
Amours m'assault et atise,  
4 Et plus me cuid destourner  
Plus me sens mal atourner.  
Ne sçay quel response rendre.  
7 Hé Dieux ! me fauldra il rendre ?

Car quant cil, qui m'amour quise  
A long temps sans qu'asener  
M'y voulsisse en nulle guise,  
11 Je voy vers moy retourner  
Pour moy prier sans finer,  
Ne sçay quel response rendre.  
14 Hé Dieux ! me fauldra il rendre ? *f. 379 d*

Si doucement me devise  
Comment m'ayme et que donner  
M'amour, que tant a requise, .  
18 Je lui vueille et pardonner  
Qu'il m'en ose araisonner,  
Ne sçay quel response rendre.  
21 Hé Dieux ! me fauldra il rendre ?

Amours, vueilliez ordonner  
De moy, car au parfiner  
Ne sçay quel response rendre.  
25 Hé Dieux ! me fauldra il rendre ?



## XIX. — L'AMANT

QUANT vous savez que vostre sans partir  
Suis, très plaisant, bonne, gente et jolie,  
Et que vous vault me faire tant sentir  
D'ennuyeux maulx et de merencolie?

5 Et se doubtez  
Qu'ainsi ne soit, toute peine mettez  
A m'essayer, et lors ne m'amez point  
8 Quant je seray faulx trouvé en nul point.

Assez languï ay com povre martir,  
Souffise vous, vueilliez a chiere lie  
A moy, vo serf, vostre amour consentir  
Sans que reffus plus la me contralie.  
13 Ja arrestez  
Y suis long temps, joye me raportez,  
Car bien, honneur, confort Dieu ne me doint  
16 Quant je seré faulx trouvé en nul point.

Et vous promet et jure sans mentir  
Que fors vo vueil, ne par sens ne folie,  
Ja ne feray n'en querray departir.  
Vostre seray sans que autre m'alie;  
21 Or vous hastez  
De me garir et ma douleur ostez, *f. 380 a*  
Et de tout bien soye du tout despoint  
24 Quant je seré faulx trouvé en nul point.

Belle, ne quier jamais qu'on me pardoint  
26 Quant je seré faulx trouvé en nul point.



## XX. — LA DAME

SE j'estoie bien certaine  
Que tout vostre cuer fust mien  
Et sans pensée villaine  
4 M'amissiez, je vous dy bien,  
Que tant vous vueil ja de bien,  
Que m'amour vostre seroit  
7 N'autre jamais ne l'aroit.

Mais mains hommes par grant peine  
Font a croire, et n'en est rien,  
Que ilz ayment d'amour certaine  
11 Les dames, et par maintien  
Faulx font tant que on leur dit : « Tien  
Mon cuer qui tien est de droit,  
14 N'autre jamais ne l'aroit ».

Par quoy s'ainsi amour vaine  
M'avugloit sur toute rien  
Me seroit douleur grevaine ;  
18 Mais s'estiez en tel lien,  
Comme vous dictes, je tien,  
Que mon penser s'i donroit  
21 N'autre jamais ne l'aroit.

Le cuer dit : « Je vous retien » ;  
Mais doubance y met du sien,  
Mon vueil point ne vous lairoit  
25 N'autre jamais ne l'aroit.



## XXI. — L'AMANT

HÉ LAS ! pour quoy, belle, faictes vous doubte  
 Qu'entierement ne soye a vous donnez  
 Quant vous voyez que mon entente toute *f. 380 b*  
 4 N'est autre part et que si mal menez  
 Pour vous je suis  
 Que nul bien n'ay n'aucun repos ne truis,  
 Tant mal m'avoy,  
 8 Ne je ne puis durer se ne vous voy.

Appercevoir le puet bien qui voit goutte  
 L'amoureux coup, dont suis mal atournez,  
 Que j'ay receu par voz yeulx, qui me boutte  
 12 En mal de mort, se tost n'en ordonnez;  
 Et, quant vous puis  
 Choisir, mes yeulx, qui n'ont autres deduis,  
 Vous font convoy,  
 16 Ne je ne puis durer se ne vous voy.

Chacez donger, belle, qui me deboute,  
 Et celle paour par qui tant me tenez  
 En grief langour ; or soit durté deroute,  
 20 Et par pitié tout mon fait demenez,  
 N'ainsi destruis  
 Ne soye, hé las ! a vous seulle j'affuis  
 Pour tout renvoy,  
 24 Ne je ne puis durer se ne vous voy.

Les griefs ennuys  
 Mettez a chief, belle, ou suis jour et nuys  
 En dur desvoy,  
 28 Ne je ne puis durer se ne vous voy.



## XXII. — LA DAME

FOLLEMENT me suis vantée,  
Or le puis apparcevoir,  
Qui cuidoie estre arrestée  
Plus que autre et que decevoir  
Amours ne me peust n'avoir ;  
Mais or congnois ma folie,  
Riens n'y vault le contrestre,  
Amours trop me contralie,  
Pouvoir n'ay de m'en oster.

*f. 380 c*

Cuidoie estre en sens montée  
Plus qu'autre, en greigneur savoir  
Que Salemon : asotée  
Bien estoie, a dire voir ;  
Et qui y aroit pouvoir ?  
Quant a moy, si fort me lie  
Qu'en place ne puis ester ;  
Amours trop me contralie,  
Pouvoir n'ay de m'en oster.

Et ja si avant boutée  
Y suis que c'est sans ravoir,  
Par quoy rendre com matée  
M'esteut, j'en ay mon devoir  
Assez fait d'en desmouvoir  
Mon cuer, mais plus s'i ralie  
Quant vueil l'en amonnester.  
Amours trop me contralie,  
Pouvoir n'ay de m'en oster.

Prince, il fault que m'umilie,  
Plus ne m'y puis tempester.



Amours trop me contralie,  
 31 Pouoir n'ay de m'en oster.

## XXIII. — L'AMANT

**J**E vous supply humblement, doulce dame,  
 Qu'il vous plaise trouver maniere et voye  
 Qu'a vous puisse parler, car vostre blasma  
 4 Redoubte tant qu'en maison ou en voye,  
 Ne autre part que soit, ou que vous voye,  
 Hardement n'ay de le vous aler dire  
 7 Pour mesdisans que Dieu vueille maudire.

Car vostre honneur plus que mon corps ne m'ame  
 Je vueil garder; neiz se mourir devoie  
 Ne vouldroie faire chose ou diffame  
 11 Peussiez avoir, quelque grief que m'envoye *f. 380 d*  
 Loyalle amour qui me frit et desvoye,  
 Mais non pour tant je n'ose, ains loings m'en tire  
 14 Pour mesdisans que Dieu vueille maudire.

Et s'ay tel fain qu'a pou que je ne pasme  
 De vous conter comment Amours m'avoye  
 Pour vostre amour qui mon cuer tient en flame;  
 18 Mieulx m'en seroit se dit le vous avoye.  
 Or y trouvez, très belle, aucune avoye,  
 Car devant gent chemin n'y sçay eslire  
 21 Pour mesdisans que Dieu vueille maudire.

Belle, vers vous n'ose aler, dont souspire  
 23 Pour mesdisans que Dieu vueille maudire.



## XXIV. — LA DAME

S<sup>È</sup> vous me voulez promettre,  
Loyaument jurer sur Sains,  
Que m'amerés sans remettre  
Si que vous dictes, ne fains  
5 N'estes en voz durs complains,  
L'amour qu'avez demandée  
J'acorde et que demandez,  
Mais que honneur y soit gardée,  
9 Autrement ne l'entendez.

Car je vous dy a la lettre,  
Et de ce soiez certains,  
Que pour riens qui en puist naistre  
Jamais riens dont vaille mains  
14 N'y feray, vous jur les Sains.  
Si n'y ert plus retardée  
La requeste ou vous tendez,  
Mais que honneur y soit gardée,  
18 Autrement ne l'entendez.

C'est m'entente, s'il puet estre,  
Qu'il vous plaise ainsi, et, que ains  
En jurant vous voye mettre  
Dessus le livre les mains  
23 Que n'en ferés plus ne mains  
Sans que j'en soye fraudée *f. 381 a*  
Et qu'a moy tout vous rendez,  
Mais que honneur y soit gardée,  
27 Autrement ne l'entendez.

M'amour vous est accordée  
Se a ce vous accordez.



31 Mais que honneur y soit gardée,  
Autrement ne l'entendez.

## XXV. — L'AMANT

BELLE plaisant, pour qui plus ne puis vivre  
Se mercy n'ay, soiez toute asseurée,  
Car je vous jur sur Sains dessus le livre  
Que jamais jour ne sera procurée  
5 Chose par moy dont aiez desplaisir,  
Car riens ne vueil fors que vo doulz plaisir,  
Vo seul vouloir est tout celui de my,  
Obeïr doy, je n'ay autre desir,  
9 Il me souffit qu'aye le nom d'amy.

Et qu'aye aussi vostre amour a delivre  
En tout honneur, par ce sera curée  
Ma très pesant maladie et delivre  
Ne ja ma foy n'en sera parjurée,  
14 N'en doubtez point, si me vueilliez choisir  
Pour vostre amant et de l'amour saisir  
Que je desir, pour qui tant ay gemy,  
Donnez la moy tandis qu'avez loisir,  
18 Il me souffit qu'aye le nom d'amy.

Et se vo cuer telle grace me livre  
Oncques si grant ne me fu aürée,  
Si emploieray en vous servant mon vivre  
Sans m'en partir tant quan j'aray durée.  
23 Hé las ! m'amour, vueilliez vous dessaisir  
De ce dongier, ne me laissez gesir  
Plus ou point ou bon jour n'ay ne demy,  
Pour ma douleur un petit amesir,  
27 Il me souffit qu'aye le nom d'amy. *f. 381 d*



Prince, priez ma dame qu'adoucir  
Vueille le mal dont je tremble et fremy  
Et que l'octroy me doint que je desir,  
Il me souffit qu'aye le nom d'amy.

## XXVI. — LA DAME

A SSEZ lonc temps a duré vo martire,  
Souffire doit par droit, a dire voir,  
Mais de tant plus qu'avez souffert, beau sire,  
Tant plus devez de moy de bien avoir  
Se vers Amours vueil faire mon devoir,  
Et pour ce, amis, pour vous rendre guerdon,  
En doucement baisant par bon vouloir  
Toute m'amour je vous octroie en don.

Et certes mieulx je ne pourroye eslire,  
Car de valour, de grace et de savoir  
Et de tout ce que l'en pourroit bon dire  
Estes remply, et, si puis bien savoir  
Qu'estes tout mien et que cuer et chaloir  
Y emploiez tout entierement, don,  
A fin que mieulx vous en peussiez valoir,  
Toute m'amour je vous octroye en don.

Trés doulz amy, et puis qu'Amours me tire  
A vous amer vueilliez sans decevoir  
Toudis m'amer, ne vo cuer ne s'empire  
Vers loyaulté qui mieulx vault que autre avoir,  
Et quant a moy, cuer et corps et pouoir,  
M'onneur gardant, du tout vous abandon :  
A brief dire, sans jamais le ravoir,  
Toute m'amour je vous octroye en don.



Très bel et bon, toudis vueilliez m'avoir  
 En loyauté, et je tiens qu'a bandon  
 De doulz plaisirs arons en cel espoir ;  
 28 Toute m'amour je vous octroye en don.

## XXVII. — L'AMANT

*f. 381 c*

SE humblement comme plus puis  
 Mais tant comme je doy non mie  
 Vous mercy, belle a qui serf suis,  
 4 De ce que vous plaist m'estre amie  
 Si que m'avez ressuscité  
 Et pitié eu de ma clamour,  
 Dont je suis hors d'aversité  
 8 Par le don de vo douce amour.

De tout bien m'avez ouvert l'uis,  
 Plus n'aray la couleur blemie  
 Puis que par vous seray conduis,  
 12 Joye en moy sera desdormie.  
 Qui me eust donné une cité  
 Tel joye en moy ne feist demour.  
 Je suis hors de nécessité  
 16 Par le don de vo douce amour.

Et je seray desormais duis  
 Sans laisser heure ne demie  
 De vous servir, c'ert mes deduis;  
 20 Puis qu'Amours ma douce anemie  
 A tournée en benignité  
 Je vivray en plaisant cremour,



24 Car de mon vueil suis herité  
Par le don de vo doulce amour.

Dame, par vostre humilité  
Il vous plaise qu'en vo demour  
Voise et y soye visité  
28 Par le don de vo doulce amour.

## XXVIII. — LA DAME

T<sup>R</sup>ÉS doulz amy, que j'aim sur tous et prise,  
Je lo Amours par qui j'ay esté prise  
Et vous aussi quant vous faictes l'emprise  
4 Pour moy surprendre,  
Car je sens ja qu'en la doulce pourprise  
D'Amours, par vous, de qui je suis surprise, *f. 38 r d*  
Grant joye aray, et que de l'entrepise  
8 Bien m'en doit prendre.

Mais j'ay long temps fait comme mal aprise  
De mettre tant dont doy estre reprise  
A vous amer, Dieu lo quant m'y suis prise,  
12 Car sans mesprendre  
Vous puis amer, car on ne me desprise  
D'estre d'omme si très vaillant esprise.  
Puis qu'estes tel que nul ne vous mesprise  
16 Bien m'en doit prendre.

Or suis vostre : par droit m'avez acquise,  
Plus n'est mestier que j'en soye requise,  
Amours le veult, et la voye avez quise  
20 A mon cuer prendre  
Sans mal engin par très loyal pourquise,  
Ce sçay de vray, je m'en suis bien enquise,



Et quant ainsi me plaist en toute guise  
 24 Bien m'en doit prendre.

Ainsi aprendre  
 Vous m'avez fait, doulz amy, la devise  
 De tours d'Amours que chascun pas n'avise,  
 Mais puis qu'amy ay tout a ma devise  
 29 Bien m'en doit prendre.

## XXIX. — L'AMANT

C'EST sans retolir jamais  
 Que remais  
 Suis soubz vostre seignourie  
 4 Ou garie  
 Est la grief peine ou j'estoye  
 Et qu'avoye,  
 Dont vous mercy, damoiselle  
 8 Toute belle.

Bien vous doy servir quant trais  
 Et retrais  
 M'avez de la desverie  
 12 Ou perie  
 Ma vie estoit et n'avoye  
 Bien ne joye,  
 Mais or ay autre nouvelle,  
 16 Toute belle.

Si me feront voz doulz trais,  
 Tous parfaits,  
 Vivre en plaisance serie  
 20 Qui tarie  
 Ja ne sera, c'est la proye  
 Qui resjoye

*f. 382 a*



24 Mon cuer qui souvent appelle,  
Toute belle.

Ou que soye,  
Certes bien doy querir voye  
20 De servir m'amour nouvelle,  
Toute belle.

## XXX. — LA DAME

D<sup>E</sup> bonne heure fus je née  
Quant Amours m'a assenée  
Et donnée  
Au meilleur que on peust eslire;  
5 Je ne pourroie descripre  
Ne tous dire  
Ses grans biens, il n'a pareil  
Et veult en tout appareil  
9 Ce que je vueil.

Ha ! quel plaisant destinée  
M'a joyeux eur amenée  
Ceste année  
Et Amours, Dieu le lui mire,  
14 Quant de m'amour ay fait, sire,  
Sans desdire,  
Tel que grant joye en recueil  
Et a qui plaist sans desueil  
18 Ce que je vueil.

*f. 382 b*

Si me suis toute ordonnée  
A l'amer, ne deffinée  
Ne finée  
N'iert ja l'amour qui souffire  
23 Me doit bien, car je me mire



Et remire  
 En sa beauté sans orgueil,  
 Et il fait en tout accueil  
 27 Ce que je vueil.

Prince, je suis sur le sueil  
 De joye quant voy a l'ueil  
 30 Ce que je vueil.

## XXXI. — L'AMANT

AUTRE plaisir ne autre entente  
 N'ay, ne cuidiez que je mente,  
 Qu'a vous seulle et c'est la rente  
 Qu'Amours en don et en vente  
 5 En toute place  
 Me met au devant, n'espace  
 N'ay qu'autre chose je face  
 Fors vous servir, ne m'en lasse :  
 C'est de tous mes fais la mace,  
 10 Ma dame gente.

Car vous seulle estes la sente  
 Qui de mon bien est l'atente,  
 L'escot ou mon espoir sente,  
 Dont souvenir me presente  
 15 La douce face  
 En tous lieux, ne riens n'efface  
 La pensée qui m'enlace,  
 N'autre chose je ne brace  
 Mais qu'a estre en vostre grace,  
 20 Ma dame gente.

*f. 382 c*

Et si doucement m'entente  
 Vostre oeil, quant m'estes presente,



Que droit est [que] me consente  
 A lui sans que m'en repente;  
     Amours m'y lasse  
 Qui mon cuer fiert sans menace  
 Par doulz regart qui me chace  
 Vers vo biauté qui tout passe,  
 Et tout ce bien me pourchace,  
     Ma dame gente.

Par vostre grace,  
 Belle, qui chemin et trace  
 Estes qui ma joye entasse,  
 Jusqu'a ce que je trespasse,  
 Vueilliez que l'amour ne casse,  
     Ma dame gente.

## XXXII. — LA DAME ET L'AMANT

**M**ON doulz amy, venez a moy parler.  
 — Très volentiers, ma dame, a lie chiere.  
 — Or me dictes, amis, sans riens celer.  
 — Que vous diray, ma doulce dame chiere ?  
     — Se vo cuer est en moy entez ?  
     — Ouÿl, tout, dame, n'en doubtez.  
     — Certes, si est en vous le mien.  
     — Grant mercis, belle, or amons bien.

Mestier n'arés de vous plus adouler.  
 — Non, puis que j'ay vo doulce amour entiere.  
 — M'onneur gardant, vous plaist il m'acoler ?  
 — Hé las ! ma dame, autre chose n'ay chiere.  
     — Gardez bien, ne vous en vantez.  
     — Mieulxouldroie estre en mer boutez.  
     — Mon cuer te donne pour le tien.  
     — Grant mercis, belle, or amons bien.



Vous plaira il ainsi sans saouler ? *f. 382*

— Quoy ? maistresse, de mon bien la lumiere.

— Qu'ayez baisier sans plus au long aler.

20 — Il me souffit vo voulenté plainiere.

— Amis, grant foy me portez.

— Proumis vous ci a estre telz.

— Si vous feray assez de bien.

24 — Grant mercis, belle, or amons bien.

A tout mon vueil vous consentez ?

— Ce fois mon, g'y suis arrestez.

— Si t'ameray plus que autre rien.

28 — Grant mercis, belle, or amons bien.

### XXXIII. — L'AMANT

SUIS je bien remply de joye,  
Ay je mestier d'autre chose

Quant celle ou mon cuer repose

4 M'a dit que s'amour est moye ?

Or ay quanque je vouloie,

Toute douleur m'est hors close,

Amours m'a a la parclose

8 Mis de tout honneur en voie.

Dont est bien droit que m'employe

A estre bon, car dire ose

Que la fresche comme rose

12 Tient de loyauté la voye

Et elle s'amour m'octroye.

Si voy bien qu'Amours m'alose

Quant m'a, si que je suppose,

16 Mis de tout honneur en voye.



Si seray gay, ou que soye,  
Pour elle a qui tout m'expose  
Et a estre tel propose  
Que chascun meilleur m'en voye.  
Droit est que faire le doye  
Quant tel amour est enclose  
A moy qui m'a sans forclose  
Mis de tout honneur en voye.

*f. 383 a*

Prince, celle qui m'envoye  
Tout bien, se ne s'i oppose,  
M'a en leesce desclose  
Mis de tout honneur en voie.

## XXXIV. — LA DAME

**T**IENNE toute  
Suis sans doubte,  
Mon bel amy gracieux,  
Et j'en vaulx mieulx  
De corps et d'ame,  
Ne choisir ne pourroit dame  
Mieulx sans faille,  
Car autre n'est qui te vaille.

Ne ja route  
Grain ne goute  
Tu ne verras, se m'aist Dieux,  
Juene ne vieux,  
Non fera ame,  
Ceste amour dont je n'ay blasme  
Ou que j'aille,  
Car autre n'est qui te vaille.



Or escoute,  
 Ne redoubte  
 Riens, car il n'a soubz les cieulx  
 20       Tel a mes yeulx,  
           Dont dessoubz lame  
 Est mon corps ains que la flame  
           En deffaille,  
 24       Car autre n'est qui te vaille.

Ne reclame  
 Que toy seul que amy je clame  
           Sans que faille,  
 28       Car autre n'est qui te vaille. *f. 383*

## XXXV. — L'AMANT

PUIS que vous m'avez retenu,  
           Ma dame belle,  
 Pour vostre, vo vueil m'ordenez,  
 4       Car a obeïr suis tenu  
           Si comme a celle  
 A qui serf suis lige donnez;  
 Si commandez de vostre grace  
 8       Ce qu'il vous plaira que je face.

Quant a Pitié a souvenu  
           De la querelle  
 Dont je m'estoye tant penez,  
 12       A tout bien je suis avenu,  
           N'il n'est nouvelle  
 Qui me feist estre a dueil tournez,  
 Mais que sache, ains que long temps passe,  
 16       Ce qu'il vous plaira que je face.



Ce que vous dy sera tenu,

Et j'en appelle

Amours en tesmoing qui menez

M'a au bien ou je suis venu

En la nouvelle

Saison ou yver est finez ;

Si me dictes a lie face

Ce qu'il vous plaira que je face.

Faire vueil, dame, en toute place

Ce qu'il vous plaira que je face.

XXXVI. — LA DAME

Puis que as d'obeïr voulenté,

Amis, soyes secret et sage ;

Aimez moy bien parfaictement,

Gardez en tous cas mon honneur ;

Ensuivre honneur soit ton desir,

Ne soit mesdit en toy enté,

Hez mençonge et son labourage,

Tiens toy pour m'amour liement,

Ayez loyal et ferme cuer,

Se tu veulz faire mon plaisir.

*f. 383 c*

Soyes large et entalenté

De donner a joyeux visage

Selon pouoir, et bonnement

Ayde a chascun, mais a nul fueur

Ne nuys a nul, prens desplaisir

En orgueil, et soyes renté

De courtoisie et en langaige

Doulz, salue amiablement ;

Soyes aux dames serviteur,

Se tu veulx faire mon plaisir.



Tout vice mets en orphenté  
 Hors de toy et de ton usage,  
 Penses de ton avancement  
 En vaillance plus qu'a faveur  
 25 D'argent n'a richesses saisir,  
 Suis les bons et leur parenté;  
 Entreprends a ton avantage,  
 Net et propre en abillement;  
 Aimes bonté, fuis deshonneur,  
 30 Se tu veulz faire mon plaisir.

Et de faillir ayes cremeur,  
 32 Se tu veulz faire mon plaisir.

## XXXVII. — L'AMANT

SE me tiens gay, renvoisié, plain de joye,  
 Cause ay pour quoy, car dame ay belle et bon  
 Qui son vray cuer, ce dist elle, me donne.  
 C'est riche non que vraie amour m'envoye,  
 5 Sienne mercis, car, se j'estoie sire  
 De tout le mond me devroit il souffire  
 D'elle estre amez, car c'est la souveraine  
 Des trés meilleurs, nulle autres ne la passe;  
 C'est mon tresor, ma deesse mondaine, *f. 383*  
 10 N'oncques ne vy chose que tant amasse.

Et, quant present elle suis, tant m'esjoye  
 Son trés plaisant regart qu'il n'est personne  
 Qui le pensast, et, se elle m'araisonne,  
 Son doulz parler et sa maniere coye,  
 15 Son trés biau corps, son vis, son trés doulz rir  
 Son gentil port, son maintien, a tout dire  
 Tant m'agrément qu'il n'est douleur ne peine



Qui me peüst grever en cel espace,  
Lors mon regart de s'i mirer se peine,  
20 N'oncques ne vy chose que tant amasse.

Hé! Dieux me doint tenir chemin et voye  
Tel qu'a tousjours elle, a qui m'abandonne,  
M'ayme ensemment, si aray la couronne  
Des eüeux amans qu'Amours resjoye;  
25 Puis qu'a ami il lui plaist moy eslire  
N'ay je pas dont tout quanque je desire,  
Que me fault il mais que Dieu la lait saine,  
J'ay tout acquis puis que suis en sa grace,  
S'en suis plus liez que Paris n'iert de Helaine,  
30 N'oncques ne vy chose que tant amasse.

Ha! doulce fleur, ma princesse haultaine,  
Aimez moy bien d'amour qui ja ne passe,  
Car plus vous aim que moy, chose est certaine,  
34 N'oncques ne vy chose que tant amasse.

## XXXVIII. — LA DAME

VENEZ vers moy, très doulz amy, a l'eure  
Que vous savez et si n'y faillez mie,  
Car mesdisans ja vuellent courir seure  
A nostre amour, dont de paour fremie.

5 Et vous gaictiez  
Sagement d'eulx, car ilz sont apointiez  
A nous grever, j'en suis toute avisée;  
Si est mestier que nous en donnons garde,  
Leur maniere m'a esté devisée; *f. 384 a*  
10 Ilz nous nuyront, le feu d'enfer les arde!

Et ne faillez par trop longue demeure  
Ne par trop tost venir, car endormie



- Ne seray pas, et, se Dieu me seccueure,  
 Je vous desir de loyal cuer d'amie,  
 15           Quoy que sentiez  
 Pareil desir que j'ay, et que mettiez  
 Un abit brun et robe desguisée  
 Vous pry, amis, pour decevoir la garde  
 Que ceulx m'ont mis, ce ne m'est pas risée,  
 20           Ilz nous nuyront, le feu d'enfer les arde !
- Tant me tarde, doulz ami, que j'en pleure  
 Que soye o vous ou une heure ou demie,  
 Car a autre bien ne sçay ou je queure  
 Et sans vous suis comme chose entommie.  
 25           Bien agaictiez  
 Ce qu'ilz feront ains que vous vous partiez  
 Pour y venir, moins seroye prisée  
 S'on vous veoit, par quoy, quoy qu'il me tarde,  
 J'ay grant paour d'estre de eulx avisée;  
 30           Ilz nous nuyront, le feu d'enfer les arde !
- Ha ! doulz ami, je fusse asegrisée  
 S'estoie entre voz bras, trop suis couarde  
 Pour mesdisans et leur faulse visée ;  
 34           Ilz nous nuyront, le feu d'enfer les arde !

## XXXIX. — L'AMANT ET LA DAME

- O<sup>R</sup> suis je vers vous venu,  
 Ma doulce loyal maistresse ;  
 Hé las ! et qui m'eust tenu  
 D'y venir, ma blonde tresse ?  
 5           Vous seulle estes ma richesse,



Je n'ay autre bien, par m'ame!  
Faictes moy joyeuse chiere.  
Comment vous est il, ma dame?

9 Baisiez moy, doulce amour chiere. *f. 384 b*

— Amis, t'est il souvenu  
Point de moy? Dis moy que d'esse  
Que plus souvent et menu  
Ne te voy; as tu promesse  
14 Fait a autre ou pour quoy esce?  
Ou c'est pour paour de mon blasme?  
Tirons nous vers la lumiere  
Et m'acole, il n'y a ame;  
18 Baisiez moy, doulce amour chiere.

— Dame, ne suis revenu  
Plus tost vers vous, qui destrece  
M'estoit grant, mais astenu  
M'en suis pour la genglaresse  
23 Langue d'aucun qui me blesse,  
Car doubtoie vo diffame,  
Pour ce alay un pou arriere,  
De ce a vous je me desblasme,  
27 Baisiez moy, doulce amour chiere.

— Doulz ami, mon cuer se pasme  
En tes bras, t'alaine entiere  
Me flaire plus doulz que basme,  
31 Baisiez moy, doulce amour chiere.



## XL. — LA DAME

QUI vid oncque homme semblable ?  
Ay je ami a droit souhaïd  
Bon, bel, sage et amiable ?  
4 Tel que chascun de son fait  
En grant louenge tient plait ;  
Mais tant y a qu'a devise  
7 J'en fais du tout a ma guise.

Mon plaisir a agreable  
Ne riens ne lui en desplait,  
M'onneur garde, n'est pas fable;  
11 Mieulx vouldroit estre deffait  
Que s'estre vers moy meffait.  
Il m'aime, craint et me prise ;  
14 J'en fais du tout a ma guise.

*f. 384 c*

Et quant il m'est si fiable  
Qu'en tous cas le truis parfait  
Si que riens deshonnorable  
18 Ne quiert, puis qu'il me plait  
Bien est droiz que joye en ait  
Mon cuer, quant par sa franchise  
21 J'en fais du tout a ma guise.

Prince, j'ay ami si fait  
Que tache ne le deffait  
Et, ou que je soye assise,  
25 J'en fait du tout a ma guise.



## XLI. — L'AMANT

PLUSIEURS jours a passez que ne vous vy,  
Dame plaisant, dont je ne suis pas aise,  
Car ne me truis de nul bien assouvy  
4 Se ne vous voy, car riens n'est qui me plaise,  
Mais je ne sçay a quoy il tient  
Et, je vous pry, mandez moy dont ce vient,  
Car j'ay paour que on vous ayt mis en cage  
8 Par faulx raport et par mauvais langaige.

Ha! Faulx Parler m'aroit il ja servi  
De ses durs mais, et fault il que je taise  
Le desplaisir sans l'avoir desservi  
12 Qu'aucuns m'ont fait? et riens qui leur desplaise  
Faire n'ose, et quant me souvient  
Que vostre honneur de m'en vengier me tient  
Je muyr de dueil; si ay tout ce dommage  
16 Par faulx raport et par mauvais langaige.

Mais, s'ainsi est que tout mon bien ravi  
Me soit par eulx, je jure saint Niquaise  
Que telz y a, leur promet et plevi,  
20 Acheteront mon angoisseux malaise. *f. 384 d*  
Hé las! mon mauvais temps revient!  
Mais la cause, dame, qui vous detient,  
Sache, pour Dieu! et se ay cest avantage  
24 Par faulx raport et par mauvais langaige.

Ha! Dieu d'Amours, n'aye pas tel oultrage  
26 Par faulx raport et par mauvais langaige.



## XLII. — LA DAME

MON ami plaisant et doulz,  
Que aim plus que chose qui soit,  
Hé las ! et que ferons nous ?  
4 Car bien voy que on aperçoit  
Nostre amour, dont trop me poise,  
Ainsi plus ne nous verrons,  
Car on veult que hors m'en voise,  
8 Je ne sçay que nous ferons.

Et tant me tient le jaloux  
Courte que, s'il ne me voit,  
Il enrage de courroux;  
12 Mais se forsener devoit  
Vous verray ja, pour sa noise  
Ne lairay, jouer yrons,  
Mais se on voit que o vous revoise  
16 Je ne sçay que nous ferons.

Au fort se mesdisans tous,  
(Aviengne qu'avenir doit !)  
L'avoient juré, si vous  
20 Verray je souvent, or voit  
Si qu'il puet, quelque courtoise  
Voye nous y trouverons;  
Mais, se ce parler n'acoise,  
24 Je ne sçay que nous ferons.

Je ne les prise une boise ;  
Au fort nous entr'amerons ;  
Du surplus je m'en racoise :  
28 Je ne sçay que nous ferons.

*f. 385 a*



## XLIII. — L'AMANT

J<sup>E</sup> muir de dueil, toute joie m'eslongne  
Quant ma dame voy de moy eslongner.  
Las ! que feray se on la maine en Gascongne,  
3 Je suis perdus, en plours fauldra baigner  
Mon dolent cuer qui doit bien ressongner  
Le departir pour perdre tel depport ;  
7 S'ainsi avient, certes vé me la mort !

Et, se ne fust que son yre ressongne  
Et son honneur que je doy espargnier,  
Je croy que oncques si mauvaise besongne  
11 Ne firent ceulx par qui c'est, mais grongnier  
N'en ose, hé las ! je puis bien tesmoignier  
Qu'adès perdray de tout mon bien l'aport ;  
14 S'ainsi avient, certes vé me la mort !

Ha ! desloyaulx langues que l'en vous rongne  
Je pry a Dieu, car pour me mahengner  
Avez ce fait par mainte faulx estrongne  
18 Aler trouvant ; que pouez vous gaingner  
Se celle pers que j'aim sans engigner ?  
Que ne verray plus, je croy, mais, au fort  
21 S'ainsi avient, certes vé me la mort !

Vous m'oublierés, belle, mon doulz ressort ;  
23 S'ainsi avient, certes vé me la mort !

## XLIV. — LA DAME

N<sup>E</sup> pleure plus et ne te desconforte,  
Car ton courroux me mectroit a la mort,  
Trés doulz ami, ains te jue et deporté,



4 Car nostre fait revendra a bon port,  
 Mais il te fault un pou de temps tenir  
 De si souvent la ou seray venir,  
 Combien que sçay que ce t'iert chose dure,  
 8 Mais moult souvent le gaigne qui l'endure.

A moy memes sera chose moult forte *f. 385 b*  
 De m'en tenir, mais pour le faulx raport  
 Des mesdisans d'environ nostre porte  
 12 Il le convient, mais le plaisant recort  
 L'un de l'autre par plaisant souvenir  
 Nous soustendra esperant avenir  
 A nostre vueil, quoy que l'atente en dure,  
 16 Mais moult souvent le gaigne qui l'endure.

En loyauté, sans tenir voye torte,  
 Nous maintendrons toudis en emant fort :  
 Par message secret de gentil sorte  
 20 Conforterons l'un l'autre, ainsi au fort  
 Une saison nous pourrons maintenir,  
 Par ce pourrons a joye revenir,  
 Non obstant que l'atente en soit moult sure,  
 24 Mais moult souvent le gaigne qui l'endure.

Mon doulz ami, on nous fait grant injure,  
 26 Mais moult souvent le gaigne qui l'endure.

#### XLV. — L'AMANT

Pour vostre honneur et pour le mien,  
 Belle, un petit me fault partir  
 De ce paÿs, certes combien  
 4 Que douleur jusque au cuer partir  
 De vous eslongner recevray,



8 Mais, se le corps sera longtain,  
Ou que soye, sachiez de vray,  
Le cuer en ert toudis prouchain.

12 Mais je vous pry sur toute rien  
Que loyauté sans departir  
Me teniez, car n'ay autre bien  
Fors que vous seule, et sans mentir  
Onc, puis que de vous me navray  
Par regart qui me prist a l'ain  
De l'amour ne me decevray;  
16 Le cuer en ert toudis prouchain.

Or nous tenons en ce lien *f. 385 c*  
D'amour tous deux sans alentir  
Loings et près ; je vous promès bien  
20 Que de ma part vueil consentir  
Le faire ainsi tant quan vivray,  
Et, se ne vous voy soir ne main,  
En y pensant si que devray  
24 Le cuer en ert toudis prouchain.

De voz nouvelles je savray  
Et vous de moy, belle que j'aim,  
Jamais autre penser n'avray,  
28 Le cuer en ert toudis prouchain.

## XLVI. — LA DAME

TEL douleur ay, amis, pour ton allée,  
Que je ne sçay se la pourray porter.  
Hé las ! comment, ma doulce amour cellée,  
Seray sans toy ? car un jour deporter  
5 Sans te veoir



M'estoit si grief que ne pouoie avoir  
Bien ne repos; comment endureray  
Un an ou plus, puet estre, ains que te voye ?  
Je ne sçay pas se tant y dureray,  
10 Car bien n'aray jusques je te revoye.

Est il besoing adès que mer salée  
Passes, amis, pour ma joye emporter?  
C'est ton honneur, n'en doy estre adoulée,  
Mais non pour tant ne me puis conforter,  
15 Pour nul avoir,  
De ce que tant seray sans reveoir  
Toy, dont confort, je le te jureray,  
Tant que seras en ceste longue voye,  
Je ne prendray, Dieux scet se pleureray !  
20 Car bien n'aray jusques je te revoye.

Et simplement en atour affulée  
Et en habit seray, ne depporter  
Ne me verra nullui; en recellée *f. 385 d*  
Menray mon dueil, ne homme reconforter  
25 A dire voir,  
Ne m'en pourroit, ainsi dolent et noir  
Aray le cuer et ne procureray  
Chose que soit qui a soulas m'avoye,  
En ce dolent ennuy me meurera,  
30 Car bien n'aray jusques je te revoye.

Mon doulz ami, et si t'asseneray  
D'estre en ce point toudis, ou que je soye,  
Dont année griefve et trop dure aray,  
34 Car bien n'aray jusques je te revoye.



## XLVII. — L'AMANT ET LA DAME

4        **M**<sup>A</sup> dame, a Dieu vous viens dire,  
Baisiez moy au departir  
Et m'acolez, Dieu vous mire  
8        Voz biens et sans repentir  
M'amez, maistresse et amie,  
Mon cuer laiz en vo demour.  
Pour Dieu ne m'oubliez mie,  
Ma doulce loyal amour.

12        — Ha ! doulz amis, oncques pire  
Dueil n'ot autre sans mentir,  
Car mon cuer sent tel martire  
Qu'il est aucques au partir.  
Ce depart me rent blemie  
Et de mourir en cremour.  
16        Pour Dieu, ne m'oubliez mie,  
Ma doulce loyal amour.

20        — Hé ! belle dame, souffire  
Doit ce dueil, plus consentir  
Ne le pourroie, ostés l'ire  
Qui vous fait ce mal sentir,  
De pitié tout enfremie  
Je revendray sans demour.  
24        Pour Dieu, ne m'oubliez mie,  
Ma doulce loyal amour.

*f. 386 a*

28        — A Dieu te dy, suis demie  
Morte, n'en verray retour.  
Pour Dieu, ne m'oubliez mie,  
Ma doulce loyal amour.



## XLVIII. — LA DAME

SEULLECTE a part, de tristece garnie,  
 En durs regrais lasse, pensive et morne,  
 Seray tousjours de leesse banie,  
 Tant que m'amour du voyage retourne,  
 5 Ne n'aray bien,  
 Ou il s'en va, car autre ne m'est rien.  
 C'est mon tresor, ma richesse amassée,  
 Ce que je vueil et quier sur toute rien :  
 9 Il est mon tout, je n'ay autre pensée.

Fors de son fait de riens ne m'ensonnie,  
 La sont tous les labours ou je me tourne ;  
 Pour ce doit bien ma joye estre fenie  
 Quant ce deppart de veoir me destourne  
 14 Son beau maintien  
 Et son gent corps qu'il dit qui est tout mien,  
 Aussi suis je sienne vraie enlassée  
 Ne reconfort d'alieurs je ne retien :  
 18 Il est mon tout, je n'ay autre pensée.

Et pour ce m'a de tout bien desgarnie  
 Son allée qui durement m'atourne,  
 Et, s'il demeure moult, je suis honnie,  
 Car la mort m'est si près que elle m'ajourne,  
 23 Je le sens bien ;  
 Je me mourray ainsi comme je tien,  
 Ains son retour je seray trespasée,  
 Car sans veoir lui seul ne me soustien :  
 27 Il est mon tout, je n'ay autre pensée.

Prince, or voiez a quel meschief je vien  
 Par eslongner m'amour, je suis lassée *f. 386 b*



De vivre, car c'est mon bien terrien :

31 Il est mon tout, je n'ay autre pensée.

## XLIX. — L'AMANT

Q'U'EN puis je mais se suis pensif et mourne,  
Ou que je soye, et seul m'en vois a part

La ou souvent en plourant tel m'atourne

4 Qu'il m'est avis que mon povre cuer part,

Quant de la très plus belle me deppart

Que on peust choisir, si n'est si grant destresse

7 Que d'eslongner sa dame et sa maistresse.

Sa grant beauté qui doucement s'atourne

Et la bonté dont elle a si grant part,

Cent fois la nuit, je croy, ains qu'il ajourne,

11 Me ramentoit souvenir qui ne part

De moy; mais quant je repense qu'a tart

La reverray, m'est vis qu'il n'est tristesse

14 Que d'eslongner sa dame et sa maistresse.

Si n'ay bien fors quant des gens me destourne

Pour fort penser a elle, que Dieux gart !

Et, de sa part aussi, que je retourne;

18 Bien sçay que riens ne lui est aussi tart

Et que pour moy a maint mal main et tart,

Dont me desplaist; si n'est grief qui tant blesse

21 Que d'eslongner sa dame et sa maistresse.

Vrais fins amans, sachiez qu'il n'est aspresse

23 Que d'eslongner sa dame et sa maistresse.



## L. — L'AMANT

O<sup>R</sup> suis venus en contrée lointaine  
 Ou garde n'ay de devenir trop gras,  
 Car pou mengier, dur giste et longue peine,  
 Ouïr souvent dire : « Tu te rendras,  
 5 En combatant ou la vie perdras »,  
 M'en garderont, et le hernois qui poise,  
 Gesir atout au vent et a la pluye,  
 Crier a l'arme et des chevaulx la noise, *f. 386 c*  
 9 Croy que souvent trop plus beau jeu ennuye.

Et en peril de pis, chose est certaine,  
 Estre navré sans conte et sans rebras  
 Dessus l'estrain couchié a courte alaine.  
 Ha ! trop meilleur fait estre entre deux draps,  
 14 Doulce dame, et vous tenir entre bras !  
 Mais froit et chault aray ains que y revoise  
 Se deshonneur n'ay tel que je m'enfuye,  
 Dont Dieu me gart ! mais, quoy que on s'en racoise,  
 18 Croy que souvent trop plus beau jeu ennuye.

Ceste feste souffrir mainte sepmaine  
 Aucunes gens la m'appellent fatras  
 Qui près du feu devisent, mais pas saine  
 N'est, pour ceulx qui le corps taint soubz leurs dra  
 23 En ont de coups ; dire : « Tu y vendras, »  
 Est trop biau jeu, mais petit s'en renvoise  
 Qui le mal sent qu'est plus amer que suye.  
 Non obstant que volentiers on y voise  
 27 Croy que souvent trop plus beau jeu ennuye.

Bons et vaillans, qui savez que ce poise,  
 Quant vous voyez que on vous assault a huye



Et que sur vous maint fort arc on entoise,  
Croy que souvent trop plus beau jeu ennuye.

## LI. — LA DAME

SE j'eusse cuer d'avoir aucun bergier  
Amé ou aultre, en qui tant de vaillance  
N'eust comme en cil a par qui estrangier  
Me fault joye, n'eusse telle dueillance

Que j'ay, mais bien folle estoye  
De me mettre a l'amer, car bien savoye  
Qu'en fais d'armes estoit tout son mestier,  
Puis qu'ay si grant dueil pour sa longue voye  
De tel amer je n'avoye mestier.

Car, se venus or estoit, sans targier *f. 386 d*  
Retourneroit ou que soit; deffaillance  
Oncques ne fist; de par tout voyagier  
Ne s'en tendroit, je croy, pour toute France.

Doncques pour neant larmoye,  
Car convendrai que ainsi souvent me voye,  
Tenir m'esteut de suivre autre sentier  
Ou ainsi fault qu'en grief dueil me desvoye,  
De tel amer je n'avoye mestier.

Et encor plus fait mon mal engrigier  
Le grant soussy que j'ay pour la doubtaunce  
Que son beau corps, ou Amours vult logier  
Mon loyal cuer, ait aucune grevance,

Car, s'ainsi estoit, mourroye.  
Ha! Dieu l'en gart qui le ramaint a joye!  
Car le meilleur est que on peust acointier.



Si ne diray plus, ou grant tort aroye :  
 27 De tel amer je n'avoye mestier.

Ha ! tant m'est tart, amis, que te revoye,  
 Car lors seras de ma joye portier,  
 Ne sera temps de dire mais que y soye :  
 31 De tel amer je n'avoye mestier.

## LII. — L'AMANT

**H**A ! quant vendra le temps que ma maistresse  
 Puisse veoir ! Dieu m'en doit veir l'eure,  
 Car jusques lors n'aray bien a largesse,  
 4 Ja cent mil ans m'a duré la demeure.  
 Las ! je ne sçay en quel point  
 Elle est addès ; nouvelle ouïr m'en doint  
 Dieux qui la gart et son beau corps maintiengne,  
 8 Et que toudis sa loyauté me tiengne.

12

16

Hé ! que sceust elle addès la grant destresse  
 Qu'ardant desir me fait qui me cueurt seure  
 Pour seue amour et souvenir qui presse  
 20 Mon povre cuer que tost vers elle cueure,



Mais je ne puis par nul point, *f. 387 a*  
 Car mon honneur ne le souffreroit point.  
 Non pour tant ay grant desir qu'il aviengne  
 24 Et que toudis sa loyauté me tiengne.

Dieu vueille que tost nouvelles m'en viengne  
 26 Et que toudis sa loyauté me tiengne.

## LIII. — LA DAME

TROP me griefve durement  
 Le songe qu'anuit songoie,  
 Car avis m'ert proprement  
 Que mon doulz ami veoie  
 5 Qui me disoit : « Ne t'anoye,  
 M'amie, prens reconfort  
 Tout le mieulx que tu pourras,  
 Regarde moy, je suis mort,  
 9 Jamais plus ne me verras ! »

Lors navré trop fierement,  
 Palle et taint, l'apercevoye,  
 A piteux contenment.  
 Adont sus lui me gictoie  
 14 .....  
 Criant : « Dieux ! quel desconfort !  
 Mort, viens tost, si m'occiras ;  
 Monde, je te laisse au fort,  
 18 Jamais plus ne me verras ! »

Effroiée tellement  
 Qu'il m'iert vis que je mouroye  
 M'esveillay, mais nullement  
 N'aray jamais bien ne joye  
 23 Jusqu'a ce que nouvelle oye



De cil dont j'ay grant remort  
 De ce qu'il dist : « Tu aras  
 Pour moy maint dolent recort ;  
 27 Jamais plus ne me verras. »

En ce songe ay trop mon sort,  
 Quoy que on les tiengne a fatras : *f. 387 b*  
 A Dieu joye et tout depport,  
 31 Jamais plus ne me verras.

## LIV. — L'AMANT

**I**L a long temps que nouvelles n'oÿ  
 De celle a qui je suis serf homme lige,  
 C'est ce pour quoy tout soulas est fouÿ  
 4 De mon las cuer et tous les jours engrige  
 Le mal que j'ay, car vraie amour m'oblige  
 A ne penser aillieurs, j'y suis contraint  
 7 Par fort amer qui fort mon cuer destraint.

Et ce me fait encor moins resjoÿ  
 Que je sçay bien qu'elle, qui est la tige  
 De loyauté, a cuer taint et broÿ  
 11 Pour mon demour, car depuis de la vis je  
 Qu'elle me dist : « Se le temps ne s'abrigé  
 De ton demour, je sens Mort qui m'estraint  
 14 Par fort amer qui trop mon cuer destraint. »

Et ce soussy a tout en pleur rouÿ  
 Mon dolent cuer, et adès se rengrige  
 Mon grief ennuy, n'oncques puis ne joÿ  
 18 De bien qui soit qu'en parti, or depy ge  
 A vraie Amour, qui m'assault et assige,  
 Que ne soye jusqu'au mourir destraint  
 21 Par fort amer qui trop mon cuer destraint.



23 Ou pressouer d'Amours je suis espraint  
Par fort amer qui trop mon cuer destraint.

## LV. — LA DAME

4 **T**RÉS doulz amy, vostre longue demeure  
Me fait mourir, je ne sçay que je face  
Ne je n'ay bien ne joye, ains adès pleure  
Et ma vie dolente en tel dueil passe  
Que briefve mort mille fois mieulx amasse  
Que plus souffrir ; il deust assez souffire  
Et par raison en doy bien estre lasse,  
8 Car près d'un an suis ja en ce martire. *f. 387 c*

12 Dolente, eimy ! verray je jamais l'eure  
Que près de moy soyés et que j'embrace  
Vostre beau corps, que Dieu gart et secueure !  
Car cent mil ans, me semble, i a d'espace  
Que ne vous vy. Et que feray je, lasse ?  
Se le retour n'est brief, vous orrés dire  
Ma dure mort ; temps est que je trespasse,  
16 Car près d'un an suis ja en ce martire.

20 Mais, doulz ami, se du mal qui m'acueure  
Aviez pitié, en brief temps alegiasse,  
N'en doubte pas, car vous vendriez en l'eure ;  
Mais je sçay bien que vers vous tant de grace  
N'empetreray ja pour riens que je brace.  
Si pouez vous assez savoir, beau sire,  
Comment il m'est et se doi estre grasse,  
24 Car près d'un an suis ja en ce martire.

Ayés pitié du grief mal qui s'amasse  
Dedens mon cuer et m'occit tire a tire



En desirant veoir vo doulce face,  
 28 Car près d'un an suis ja en ce martire.

## LVI. — L'AMANT

O<sup>R</sup> suis je reconforté  
 Puis que de ma dame belle  
 Nouvelles on m'a porté.  
 4 De joye mon cuer sautelle  
 De ce qu'en riens ne chancelle  
 De loyaulté, ce me semble,  
 7 Dieux ! quant serons nous ensemble ?

Ces letres m'ont raporté  
 Joye, puis que j'oz nouvelle  
 Qu'en santé est, n'avorté  
 11 N'est le doulz plaisant bien que elle  
 Me vouloit ; certes c'est celle  
 En qui loyauté s'assemble, *f. 387 d*  
 14 Dieux ! quant serons nous ensemble ?

Mais son cuer desconforté  
 Est, menant dueil a par elle,  
 De ce que tant deporté  
 18 Me suis n'a autre querelle  
 De retourner, si m'appelle  
 Disant : Ha ! qui nous dessemble,  
 21 Dieux ! quant serons nous ensemble ?

Belle, qui ange ressemble,  
 23 Dieux ! quant serons nous ensemble !



## LVII. — LA DAME

4  
7  
DIEUX me doint prouchainement  
Oûir de ma doulce amour  
Nouvelles, et que briefment  
Reviengne, car le demour  
Est trop long, et son retour  
Vueille Dieux que plus ne tarde,  
Car plus que autre riens me tarde.

11  
14  
Hé las ! si piteusement  
Lui avoye ma doulour  
Mandé et que bien briefment  
Lui pleust a venir un tour  
Vers moy, qui si mal m'atour  
Pour lui, et que trop retarde,  
Car plus que autre riens me tarde.

18  
21  
Mais ne me vault nullement  
Le mander, car n'y a tour,  
Bien le voy; ne sçay comment  
Porteray ceste doulour;  
Viengne dont mort sans sejour,  
Puis que du veoir n'ay garde,  
Car plus que autre riens me tarde

25  
Doulz ami, de tous la flour, *f. 388 a*  
Retournez par vo doulçour  
A fin que je vous retarde,  
Car plus que autre riens me tarde.



## LVIII. — L'AMANT

Vo message que m'avez envoyé,  
Belle plaisant, que aussi je vous renvoye,  
A tout mon cuer a joye ravoyé.  
4 Qu'en bonne foy en grant pensée estoie  
Pour ce que de vostre estat ne savoye.  
Si ayez cuer joyeux, aussi l'aray,  
7 Et, se Dieux plaist, bien tost vous reverray.

Et plus n'ayez penser si desvoyé  
En amer dueil, car trop fort m'en ennoye  
Ainçois comment je seray festoyé  
11 A mon retour pensez, et prenez joye  
En bon espoir et la vo cuer s'appoye,  
Car partout suis vostre et tousjours seray,  
14 Et, se Dieux plaist, bientost vous reverray.

C'est pour le mieux que me soye employé  
Ceste saison un pou en longue voye,  
Car mesdisans, qui avoient broyé  
18 Encontre nous dur buvraige, aront voie  
De taire ; addès, doulce amour, si vous proye  
Qu'ayés cuer lié, car de cy partiray,  
21 Et, se Dieux plaist, bientost vous reverray.

A Dieu, soyez, ma dame, l'amour moye,  
Et plus de fois que dire ne saroye  
Me recomment a vous de fin cuer vray,  
25 Et, se Dieux plaist, bientost vous reverray.



## LIX. — LA DAME

IL me va un petit mieulx  
Puis qu'il m'est venu message  
Du bon, bel et gracieux,  
4 Qui ala par mer a nage  
Loings en contrée sauvage,  
Dont m'a falu soustenir  
8 Maint soussy, encor en ay je,  
Dieu lui doit brief revenir !

*f. 388 b*

Puis que sçay, louez soit Dieux !  
Qu'encombrier n'a ne dommage ;  
Au moins n'avoit quant du lieux  
12 Se parti le porteur sage  
Des letres ; ce m'est suffrage  
Grant, mais jusqu'a son venir  
N'aray droit joyeux courage,  
16 Dieu lui doit brief revenir !

Mais lors n'ara soubz les cieulx  
Femme qui se compare  
A moy quant verray des yeulx  
20 Le corps et le doulz visage  
De cil qui me tient ombrage,  
Tant desir a le tenir  
Es bras selon mon usage,  
24 Dieu lui doit brief revenir !

Ha ! quant sera ce voyage  
Acomply si que avenir  
Puisse au mien a heritage,  
28 Dieu lui doit brief revenir !



## LX. — L'AMANT

O<sup>R</sup> suis je joyeux et bault  
 Puis que me voy au retour  
 Vers celle en qui n'a deffault  
 4 De grace, et en tout atour  
 De corps et de doulz viayre  
 Passe toutes, a voir dire.  
 Ha ! de beaulté l'exemplaire,  
 8 Tant a veoir vous desire.

Plus ne crain ne froit ne chault,  
 N'assault de chastel ne cour, *f. 388 c*  
 Ne la mer que passer fault  
 12 Par maint estrange destour,  
 Car riens ne me puet mesfaire  
 Puis que vers elle je tire.  
 Ha ! de beauté l'exemplaire,  
 16 Tant a veoir vous desire.

Si aray tost fait un sault  
 Pour y parler en destour,  
 Non pour tant fault estre cault  
 20 Vers les gens de la entour,  
 Mais qui me devoit detraire  
 Ne m'en pourroye escondire.  
 Ha ! de beaulté l'exemplaire,  
 24 Tant a veoir vous desire.

Dieux me doint tost vers vous traire,  
 Riens tant ne me puet souffire.  
 Ha ! de beaulté l'exemplaire,  
 28 Tant a veoir vous desire.



## LXI. — LA DAME

S'IL est ainsi, comme j'ay ouï dire,  
Que l'armée a retourner se mecte  
Ou mon ami s'en ala en navire,  
4 Plus ne pourray de joye avoir souffrecte  
Quant je verray cil a qui suis de debte :  
C'est mon tresor, ma seulle souffisance,  
7 Mon souverain bien, mon entiere plaisance.

Ainsi l'octroit Dieux com je le desire  
Et qu'a joye mon doulz ami remecte  
En ce pay's, mais de paour souspire  
11 Que ainsi ne soit quant par moy suis seulecte ;  
Mais on me dict qu'il vient, m'amour doulcecte,  
Dont de veoir je suis en esperance  
14 Mon souverain bien, mon entiere plaisance.

Que devendra mon cuer quant mon doulz mire *f. 388 d]*  
Je reverray? certes toute follecte  
Adont seray de baisier et de rire.  
18 Tost aviengne que de ce m'entremette!  
Et il convient qu'a Dieu veu en promecte  
Lui suppliant qu'amaint sans demourance  
21 Mon souverain bien, mon entiere plaisance.

Hé las! venez, m'amour et ma fiance,  
23 Mon souverain bien, mon entiere plaisance.

## LXII. — L'AMANT ET LA DAME

MA douce dame, Dieu vous gart !  
Comment vous est il, belle et bonne ?  
— Bien viengne cil qui est la part



- 4 De tout le bien que Dieu me donne.  
 — Ha ! belle, tant vous desiroye !  
 Oncques puis n'oz bien que party.  
 — Amis, tu es toute ma joye
- 8 N'avoir n'en puis point fors par ty.
- Vous en estoit il aussi tart  
 Qu'a moy, dame, a qui tout m'ordonne ?  
 — Certes, doulz ami, autre part
- 12 Ne pensoie qu'a ta personne.  
 — Loyalle, vraie, simple et quoye,  
 Amours lo qui si m'a party.  
 — Amis, tu es toute ma joye
- 16 N'avoir n'en puis point fors par ty.

- Or suis je venu celle part  
 Ou de tout mon bien est la bonne.  
 — Mon doulz ami, cuer, corps, regart,
- 20 Sauf mon honneur, tout te redonne.  
 — Ma maistresse, plus ne vouloye,  
 Toudis fusse je en ce party.  
 — Amis, tu es toute ma joye
- 24 N'avoir n'en puis point fors par ty.

- Belle, acollez moy toutevoye,  
 Doulz baisier soit cy depparty.  
 — Amis, tu es toute ma joye
- 28 N'avoir n'en puis point fors par ty.

*f. 389 a*

## LXIII. — LA DAME

- A pou que mon cuer ne devient  
 Tout deffailli comme pasmé  
 De la grant joye qui lui vient,  
 Mon loyal ami très amé,
- 4



De ce que, ma très doulce joye,  
 Je te voy vers moy revenu;  
 Mais, plus que dire ne saroie,  
 Tu soyes le très bien venu.

N'en piez mon corps ne se soustient  
 Qui desireux et affamé  
 Estoit de toy ; ores te tient  
 A joye. Hé las ! tant réclamé  
 T'ay, si ay quanque je vouloye  
 Ne sçay que dueil est devenu ;  
 Mais, plus que dire ne saroie,  
 Tu soyes le très bien venu.

Et grant joye ay, il appartient,  
 Car j'entens qu'as esté clamé  
 En ce voyage, et on te tient  
 L'un des meilleurs, doncques blasmé  
 Ne soit mon cuer se a toy s'octroye,  
 Quoy que loings t'en soyes tenu ;  
 Mais, plus que dire ne saroye,  
 Tu soyes le très bien venu.

Je ne sçay, amis, toutevoye  
 Se point de moy t'est souvenu,  
 Mais, plus que dire ne saroye,  
 Tu soyes le très bien venu.

## LXIV. — L'AMANT

DIEU mercy, or ay je ataint  
 Le bien ou tant ay tiré,  
 Dame, se yert que fusse çaint  
 De voz doulz bras et tiré

*f. 389 b*



- 8 Près de vous et que miré  
Me fusse en vo doulz visage  
Pour qui ay tant souspiré,  
Or vous tiens je, belle et sage.
- 12 Et tant est mon cuer rataint  
De joye et dueil adiré  
En recevant baisier maint  
De vous que tel atiré  
Suis que ne sçay que diré.  
Je suis comme homme sauvage;  
Baisiez moy, cuer désiré,  
16 Or vous tiens je, belle et sage.
- 20 En moy cesse tout complaint,  
Plus ne seray aïré,  
Pensif, las ne de dueil taint.  
Puis que vers vous suïs viré,  
Jamais n'en departiré,  
Venir ne me puet dommage;  
Quelque mal que aye tiré,  
24 Or vous tiens je, belle et sage.
- 28 Qui que mon fait empiré  
Eust par desloyal langaige  
Et que m'eussiez adiré,  
Or vous tiens je belle et sage.

## LXV. — LA DAME

- 4 DOULCE chose est que d'amer,  
Qui ayme parfaictement,  
Combien que maint grief amer  
Y ait; mais qui loyaument  
S'i tient, viengne encombrement,



7 Bien ou mal, joye ou pointure :  
Qui bien ayme tout endure.

11 Quoy que on s'en oye blasmer *f. 389 d*  
Souvent riguerousement,  
Mais tout ce fait affermer  
14 L'amour tant plus ardament,  
Puis grant joye, puis tourment  
Y a et mainte aventure :  
Qui bien ayme tout endure.

18 Ne pour batre ou diffamer  
Ne pour tourmenter griefment  
On ne pourroit deffermer  
1 Une amour quant droitement  
Tient au cuer; l'empeschement  
N'y vault riens, car creature  
1 Qui bien ayme tout endure.

5 Pour moy le dy purement,  
Car l'essay m'apprent comment,  
Soit dommage, soit injure,  
Qui bien ayme tout endure.

## LXVI. — L'AMANT

**L**E jour que ne vous voy durer ne puis,  
Doulce dame; si ne me sçay tenir  
D'aler souvent ou vous estes, et duis  
Suis de gaictier que je puisse avenir  
A vous veoir d'aucun lieu revenir  
Ou onque soit, tout non obstant la crainte  
De mesdisans qui m'ont fait paine mainte.



Et tout de gré aucune achoison truis  
 De repairier et d'aler et venir  
 Aucune fois chieux vous, et quant de nuis  
 11 Passe par la, et m'en deust on banir,  
 Je baise l'uis et m'y vois soustenir  
 Et appuyer, mais c'est craignant l'effrainte  
 14 De mesdisans qui m'ont fait paine mainte.

Et, quant vous voy, en mon paradis suis  
 Ne si grant bien ne me puet avenir  
 Mais qu'en voz bras, ou sont tous mes deduis,  
 18 Je puisse estre, Dieu m'y doint parvenir!  
 Et quant, ne puis, au moins par souvenir  
 En suis prouchain mal a gré la restraite  
 21 De mesdisans qui m'ont fait paine mainte.

Mais Faulx Parler m'acuide rebanir  
 D'environ vous pour moy du tout honnir,  
 Et bien m'alast se fust la langue estainte  
 25 De mesdisans qui m'ont fait paine mainte.

## LXVII. — LA DAME

**M**ON doulz ami, se tu ne pues durer  
 Sans moy veoir, saches que moins je dure  
 Sans toy aussi, ce te puis je jurer  
 4 Qu'en bonne foy un jour un mois me dure  
 Se ne te voy. Maudit soit qui procure  
 L'empeschement qui nous en fait garder!  
 7 Mais non pour tant te verray sans tarder.

Car le desir, que j'en ay, endurer  
 Ne me laroit jamais la paine dure



Qu'en ay ; assez puet qui veult murmurer,  
1 Car te verray, je n'ay aillieurs ma cure,  
Mais toutefois te pry que ayes cure  
De mon honneur a quoy dois regarder,  
4 Mais non pour tant te verray sans tarder.

Si te promès, amis, sans parjurer,  
Que tous plaisirs de vraie entente pure  
Je te feray, m'en deust on enmurer,  
8 M'onneur gardant, car n'y pense laidure,  
Ne l'empeschier ne pourroit creature  
Quoy qu'on nous puist noz plaisirs retarder,  
1 Mais non pour tant te verray sans tarder.

3 Grant paine on met, amis, a m'en garder,  
Mais non pour tant te verray sans tarder.

## LXVIII. — L'AMANT

*f. 390 a*

**C**OMBIEN que ja pièça toute donnée  
Vous ay m'amour, je la vous represente  
Avec mon cuer et corps, très belle née,  
Ce premier jour de l'année presente,  
Et quanque j'ay, ma douce dame gente;  
Ce dyamant avec de petit pris,  
Prenez en gré, douce dame de pris.

Bon jour, bon an et bonne destinée  
Vous envoie Dieux et biens a droite rente,  
Et que souvent l'un l'autre ceste année  
Nous nous voions en très joyeuse atente  
Et que jamais vo cuer ne se repente  
De moy amer, tout soye mal apris,  
Prenez en gré, douce dame de pris.



Ne jamais jour no doulce amour finée  
 Ne puist estre, ne vous ne soyez lente  
 A moy donner joye qui redonné[e]  
 18 Vous soit par moy a plantureuse vente,  
 De mesdisans n'ayés ja la tourmente,  
 Avec ce, moy, vo serf lige pris.  
 21 Prenez en gré, doulce dame de pris.

De vous servir a ma vie ay emprís,  
 23 Prenez en gré, doulce dame de pris.

## LXIX. — LA DAME

J<sup>E</sup> te mercy, bon et bel,  
 De ton très gracieux don  
 Que m'as de cest an nouvel  
 4 Fait le premier jour, et don  
 Aussi moy je te redon  
 M'amour toute et t'en estraine.  
 7 Dieu te doint joyeuse estraine !

Et cuer, corps par grant revel,  
 Sauf m'onneur, je t'abandon.  
 Ce rubis en cest annel  
 11 Te redonne en guerredon,  
 Ne sçay que plus demandon,  
 Tu m'as fait de tout mal saine.  
 13 Dieu te doint joyeuse estraine !

*f. 390*

Et en ce doulz renouvel  
 Du temps, ou joye a bandon  
 Est, te donray maint chappel  
 18 De fleurs, mais plus n'atendon



Le doulz baisier; or ça, don.  
Lé departir m'est grant paine;  
Dieu te doint joyeuse estraine!

Je m'en vois de joye plaine,  
Dieu me doint joyeuse estraine!

## LXX. — L'AMANT

S'IL a en moy quelconques bien ou grace,  
Honneur ne sens, combien que petit vail,  
De vous me vient, dame; le gré et grace  
Devez avoir, car prendre a droit detail  
En vo beau corps qui est tour et serail  
De hault honneur, puis vouloir de bien faire,  
Car vous m'estes de tout bien exemplaire.

Et quant je voy qu'en nul temps n'estes lasse  
De bien faire, s'en aucune riens fail,  
Je m'en retray pour suivre vostre trace,  
Et de me duire a valoir me travail.  
C'est bien raison quant si haultement sail  
Comme a l'amour de vous qui me doit plaire,  
Car vous m'estes de tout bien exemplaire.

Et pour mon mieulx Dieu vult que vous amasse;  
Bien m'en avint quant mon cuer en vo bail  
Je mis du tout puis qu'en moy j'en defface  
A mon pouoir toute tache, et se bail  
A vous mon cuer a bon droit, car un ail,  
Se ne fussiez, ne vaulsist mon affaire, *f. 390 c*  
Car vous m'estes de tout bon exemplaire.

Belle, bien doy vous servir et complaire,  
Car vous m'estes de tout bien exemplaire.



## LXXI. — LA DAME

Qui pourroit meilleur choisir,  
Plus bel, plus sage, plus preux  
Qu'est cil ou est mon plaisir?  
4 Ne croy qu'en ce monde deux  
Ses semblables n'apareux  
Ait; chascun ainsi le tient,  
7 Et pour ce mon cuer s'i tient.

Et, quant je pense a loisir  
A lui, mon cuer pour eueux  
Se tient d'avoir son desir  
11 Aresté en lui tout seulx,  
Et il veult quanque je veulx  
Ne d'autre ne lui souvient,  
14 Et pour ce mon cuer s'i tient.

Si n'ay autre desplaisir  
Fors quant Donger le hideux  
Aucune fois dessaisir  
18 M'en vient, et de ce me deulx;  
Mais mes promesses et veulx  
Y sont, d'autre ne me tient,  
21 Et pour ce mon cuer s'i tient.

Et, quant un tel amoureux  
Est de moy, se doulcereux  
M'est le temps, il appartient,  
25 Et pour ce mon cuer s'i tient.



## LXXII. — L'AMANT

C E jour Saint Valentin, ma dame belle,  
Je vous choisy a dame pour l'année  
Et pour tousjours sans que je m'en rappelle;  
4 Combien que ja pieça toute donnée *f. 390 d*  
Vous ay m'amour sans jamais departir,  
A cestui jour, pour maintenir l'usage  
Des amoureux auquel je doy partir,  
8 Je vous retien de rechief, belle et sage.

Le doulz printemps ou tout se renouvelle  
Commence anuit, pour ce a ceste journée  
Tout amoureux doit ou dame ou pucelle  
12 Pour maistresse retenir, mais finée  
Ne sera ja l'amour que sans partir  
Je mis en vous, car c'est a heritage,  
Et, pour monstrer que n'en quier repentir,  
16 Je vous retien de rechief, belle et sage.

Si seray gay en la saison nouvelle  
Pour vostre amour et soir et matinée,  
Car j'ay espoir qu'aray mainte nouvelle  
20 De vous, par quoy grant joye demenée  
Devra estre de moy se consentir  
A mon bon temps voulez vo doulz corage.  
Quoy qu'il en soit, jusques au cuer partir  
24 Je vous retien de rechief, belle et sage.

Souveraine de toutes, sans mentir,  
Amours m'a mis si en vostre servage  
Que pour ce que n'en pourroie alentir  
28 Je vous retien de rechief, belle et sage.



## LXXIII. — LA DAME

TRÉS doulz amy, pour te faire grant joye,  
 Je te choisy de rechief et retien  
 A cestui jour Saint Valentin, ou proye  
 4 Prent volentiers Amours; pour ce le mien  
 Cuer te redon; combien que pieça tien  
 Il estoit tout, je le te reconferme  
 7 Et te promès a amer d'amour ferme.

Pour mon ami a tousjours, ou que soye,  
 T'ay retenu, ne jamais le lien *f. 391 a*  
 N'en ert rompu, si nous mettons en voie  
 11 D'estre joyeux ou doulx temps plain de bien  
 Qui recommence anuit, je te dy bien  
 Que tienne suis; rien n'est qui m'en defferme,  
 14 Et te promès a amer d'amour ferme.

Si est bien droit que ton cuer s'en resjoye  
 Et que pour moy en fait et en maintien  
 Soyés joyeux ou temps que tout s'employe  
 18 A resjouir, car aussi je me tien  
 A doulz deduit que de ma part retien,  
 Car vraie amour m'y a baillé a ferme  
 21 Et te promès a amer d'amour ferme.

Ainsi, amis, suis tienne, et c'est sans terme,  
 Et te promès a amer d'amour ferme.

## LXXIV. — L'AMANT

CERTES, dame, je suis trop a malaise,  
 Ne sçay a quoy je le vous celleroie,  
 Car je me doubte que un autre mieulx vous plaise



4 Que je ne fais ou qu'il en soit en voye,  
Car il m'est vis que un petit je vous voye  
Vers moy changier, et de vous n'ay tel chiere  
Au moins, le m'est avis, que je souloye.  
8 Vous m'occiries, ma doulce dame chiere,

S'ainsi estoit, car seroye ou mesaise  
Qu'ont les jaloux qui n'ont ne bien ne joye,  
Et j'y suis ja ne point ne m'en appaise,  
12 N'appaiseray jusques je vous revoye  
D'autre maintien, ne sçay se querez voye  
Pour m'essayer; la voie m'est trop fiere,  
Car si grant dueil autre avoir ne pourroye;  
16 Vous m'occiriez, ma doulce dame chiere.

Et me semble, quoy qu'assez je m'en taise,  
Qu'un autre voy qui volentiers s'employe  
Environ vous, mais moins je m'en rappaise  
20 De ce que point son fait ne vous envoie *f. 391 b*  
A mon cuidier; mais s'ainsi je perdoye  
Sans mon meffait la riens que j'ay plus chiere  
En vous servant le mieulx que je pourroie,  
24 Vous m'occiriez, ma doulce dame chiere.

Pour Dieu mercis faictes que vous revoye  
Prochainement, car si mectiez renchiere  
Par quoy, qu'il ne vous en chausist, cuidioie,  
28 Vous m'occiriez, ma doulce dame chiere.

## LXXV. — LA DAME

T<sup>R</sup>ÉS doulz ami, qui t'a meü  
D'estre de moy en jalousie?  
Je t'en pry, qui as tu veü,  
4 Soit a matin soit a ressie,



Qui soit taillez a t'estrangier  
 De moy qui n'aime se toy non ?  
 Ce ne seroit pas de legier ;  
 8 N'en soyes point en doubte, non.

Car je t'ay sur tous esleü,  
 Dont loyal amour remercie  
 Qui a mon cuer si pourveü  
 12 Qu'il me souffit, ne t'en souffie,  
 Et ne me verras ja changier  
 Pour homme, tant soit de hault nom ;  
 J'y suis sans jamais deslogier,  
 16 N'en soyes point en doubte, non.

Si ne sçay qu'as apperceü  
 Ne de qui es en frenasie,  
 Mais, se mesdisans deceü  
 20 Ay, n'en ayes mal appaisie  
 Pensée, car c'est pour targier  
 Des faulses langues mon renom.  
 S'a tous faiz chiere sans dongier  
 24 N'en soyes point en doubte, non.

Amours vult tout mon cuer logier,  
 Doulz ami, dessoubz ton penon ; *f. 391 c*  
 Qui que le vueille chalengier  
 20 N'en soyes point en doubte, non.

## LXXVI. — L'AMANT

**A**LER m'en fault un tour, ma douce dame,  
 Je revendray assez prouchainement ;  
 Si pry a Dieu qui vous gart corps et ame,  
 4 Souviengne vous de moy et nullement  
 Ne m'oubliez, et tousjours loyaument



7 Vous maintenez envers moy, fin cuer doulz;  
Mon cuer vous laiz au deppartir de vous.

Ayez cuer lié et ne laissez pour ame,  
Pensant a moy ; je seray ensement  
Pour vostre amour joyeux, et soubz la rame  
11 Yray chantant très amoureusement  
En ce gay bois au renouvellement  
Du doulz printemps qui cuers resjouïst tous ;  
14 Mon cuer vous laiz au departir de vous.

Et souvenir, qui maint fin cuer enflame,  
Sera o moy qui lira proprement  
A mon vray cuer vo biauté ou n'a blasme,  
18 Ce me sera doulz esjouïssement,  
Ayez le aussi, si vivrés liement,  
Et vous gardez de dueil et de courroux ;  
21 Mon cuer vous laiz au deppartir de vous.

A Dieu vous dy, belle, entr'acolons nous,  
23 Mon cuer vous laiz au deppartir de vous.

## LXXVII. — LA DAME

HÉ Dieux ! que souvent avient,  
Doulz ami, ce m'est advis,  
Que tu t'en vas ! ce me tient  
4 Pensif le cuer et le vis,  
Oncques tant aler ne vis  
Homme, car c'est sans cesser :  
7 Tu n'as ailleurs ton penser.

Je sçay bien qu'il t'appartient *f. 391 d*  
A voyagier, mais tous vifs  
Mon cuer en meurt, ne lui tient



11 D'envoisier, je te pleuvis,  
De fort heure oncques te vis,  
Tu m'occis par ton tracer :  
14 Tu n'as aillieurs ton penser.

Hé las ! maint amant se tient  
Sans tant aler, mais envis  
T'en tendroies, ne souvient  
18 A ton cuer comment je vifs  
En dueil quant tu m'es ravis,  
Mais on ne t'en puet lasser :  
21 Tu n'as aillieurs ton penser.

Or en soit a ton devis,  
Bien sçay que tout alouvis  
Es de vaillance amasser :  
25 Tu n'as aillieurs ton penser.

## LXXVIII. — L'AMANT

J<sup>E</sup> pry a Dieu qu'i gart la blanche et blonde  
Ou que elle soit et lui doint bonne nuit  
Comme a la fleur des dames de ce monde,  
4 Jamais son cuer n'ait riens qui lui anuit,  
Car les meilleurs toutes passe, je cuit.  
Dieux ! quant verray la très fresche et nouvelle ?  
7 Que fusse je ore entre les deux bras d'elle !

Ha ! quant je pense au grant bien qui habonde  
En son vray cuer, je y prens si grant deduit  
Que joye, paix, souffisance suronde  
11 Si dedens moy que chose ne me nuit,  
C'est tout mon bien, c'est mon plaisant reduit,  
Mon seul espoir, c'est la bonne et la belle ;  
14 Que fusse je ore entre les deux bras d'elle !



Et si sçay bien que pareille ou seconde  
De loyaulté n'a ou monde, et la duit *f. 392 a*  
Sens et valour, qui d'elle font esponde  
18 Si qu'en tous lieux devant toutes reluit  
Le parfait bien qui y est, c'est conduit  
Et droit aport de joyeuse nouvelle.  
21 Que fusse je ore entre les deux bras d'elle !

Cent fois la nuit, je croy, dis et l'appelle ;  
23 Que fusse je ore entre les deux bras d'elle !

## LXXIX. — LA DAME

Ce mois de May tout se resjoye,  
Ce me semble, fors moy, lassette !  
Qui n'ay pas cil qu'avoir souloie,  
4 Dont je souspire a voix bassette :  
C'estoit ma belle amour doulcette  
Qui ores est si loings de my.  
7 Hé las ! reviens tost, mon amy.

En ce doulz mois ou tout verdoye  
Si yrons jouer sus l'erbette  
Ou orrons chanter a grant joye  
11 Rossignolz et mainte allouette,  
Tu scez bien ou. A voix simplette  
Encor te pry disant : aymy !  
14 Hé las ! reviens tost, mon amy.

Car en ce mois, ou Amours proye  
Prent souvent, m'est vis que c'est debte  
A tout amant qu'il se resjoye  
8 Avec sa dame et s'amiette ;  
Ne la doit pas laisser seulette,



Ce me semble, jour ne demy.  
 21 Hé las ! reviens tost, mon amy.

Pour t'amour mon cuer fent par my ;  
 Hé las ! reviens tost, mon amy.

## LXXX. — L'AMANT ET LA DAME

J E n'ay pas trop demouré  
 A ceste fois, dame chiere, *f. 392 b*  
 Or en soit Dieux aouré  
 4 Quant je voy vo doulce chiere  
 Que j'ay plus que autre riens chiere.  
 Avez esté en bon point,  
 7 Et m'acolerés vous point ?

— Doulz amy, bien labouré  
 Avez, ne fault qu'en enquiere,  
 Dont vous estes honnouré,  
 11 Mais de vo retour entiere  
 Joye ay, or sans renchiere  
 Tirez vous ça sur ce point,  
 14 Et m'acolerés vous point ?

— Belle, dictes quant pourré  
 Vous reveoir, la maniere  
 M'aprenez et g'i courré,  
 18 Car riens n'est que tant je quiere,  
 Et que n'aye autre portiere  
 Fors vous ; bon jour Dieu vous doint,  
 21 Et m'acolerés vous point ?

— Amis, viens par l'uis derriere,  
 Mardi, sans porter lumiere,



25 A dix heures droit a point,  
Et m'acolerés vous point ?

## LXXXI. — L'AMANT

25 TENEZ moy pour excusé  
Se ne puis a ceste fois  
Aler vers vous, car musé  
4 J'ay après gens plus d'un mois  
Qui me maintent a la nois  
Pour un ennuyeux affaire  
7 Que j'ay un petit affaire.

A ce me suis alusé,  
M'amour, et pour ce ne vois  
Vers vous; ne l'ay reffusé  
12 Pour autre cause, et ainçois  
.IIII. jours, qui qu'en ait pois,  
Yré, mais ains ce fault faire,  
14 Que j'ay un petit affaire.

*f. 392 c*

Mais, se vers vous accusé  
J'estoie par quelque voix  
Qu'alieurs me fusse amusé,  
18 Ne le croyez toutefois,  
Car c'est pour quoy ne revois  
Si très tost en vo repaire,  
21 Que j'ay un petit affaire.

Et ne vous vueille desplaire  
23 Que j'ay un petit affaire.



## LXXXII. — LA DAME

A quoy tient ce, mon ami bel et gent,  
Que ne te voy si souvent que je sueil?  
Tu n'en es point, m'est vis, si diligent  
Que t'en ay veu. Ne sçay s'aucun accueil  
Treuves aillieurs par quoy ne te souviengne  
Mais tout de moy, car ne sçay l'achaison;  
Pechié seroit a toy, se ce n'aviengne,  
8 De moy ainsi delaissier sans raison.

J'ay veu le temps que pour or ne argent  
N'eusses laissié, ne pour quelqu'autre vueil,  
A moy veoir, ou fust devant la gent  
12 Tout en passant, ou seulet en recueil,  
Un jour sans plus, mais, qui que ores te tiengne,  
Huit jours passent ains qu'en rue ou maison  
Je te voye, c'est maufait, d'ou qu'il viengne,  
16 De moy ainsi delaissier sans raison.

Dont, je te pry, ne fais tant qu'enragiant  
Voise après toy, contrainte par grief dueil,  
Car ce seroit un mal qui dommariant  
20 Yroit mon corps, mon honneur et my oueil. *f. 39.*  
Si te supply que ton cuer s'en revienngne  
Et nous arons de doulz biens affoison,  
Car il m'est vis que point ne t'appartiengne  
24 De moy ainsi delaissier sans raison.

Pour Dieu, amis, d'autre amer ne te tiengne,  
Car onc ne fis envers toy mesprison,  
Tort aroies, quoy qu'autrement soustiengne,  
28 De moy ainsi delaissier sans raison.



## LXXXIII. — L'AMANT

C E ne fust que je redoubte  
 Le parler de mesdisans,  
 Que mau feu arde et se boute  
 En tous les plus souffisans  
 Tant qu'a mort soient gisans!  
 Hardiement passeroie  
 Et plus souvent vous verroie,

Belle plaisant, mais je doubte  
 Leurs faulses langues cuisans,  
 Par qui ma joye est deroute  
 Souvent, qui pas deduisans  
 Soulas ne m'est n'aduisans.  
 S'il leur mescheust liez seroie  
 Et plus souvent vous verroie.

Et pleust ore a Dieu que goute  
 Ne veissent jusqu'a dix ans,  
 Ou que eussent telle goute  
 Qui au cuer leur fust cuisans  
 Tous ceulx qui sont marchisans  
 Environ vous, si yroie  
 Et plus souvent vous verroie.

S'ainsi estoit, joye aroie  
 Et plus souvent vous verroie.

## LXXXIV. — LA DAME

*f. 393 a*

V ous savez bien que je vous ay promis  
 Que, pour parler ne chose qui puist naistre,  
 Ne vous lairay a amer, doulz amis,



4 Si vous supply qu'environ de cest estre  
 Ne delaissiez le repaire et sentier  
 Pour mesdisans ne pour leur agaitier,  
 Car vraiment, a qui qu'il en desplaise,  
 8 Sans vous veoir je ne porroie estre aise.

Car les chemins sont communs et soubzmis  
 A toute gent, a destre et a senestre.  
 Passer y puet chascun, par quoy desmis  
 12 Vous n'en serés par nul, tant soit grant maistre,  
 Mais, quant est du parler, a moy gaitier  
 Bien vous pouez de eulx, s'il en est mestier;  
 Mais bien sachiez, ou que le die ou taise,  
 16 Sans vous veoir je ne porroie estre aise.

Et me seroit avis qu'un pou remis  
 Seriez de moy amer, se veoie estre  
 De moy veoir vostre cuer endormis  
 20 Plus qu'il ne seult, et, par le Dieu celestre !  
 S'ainsi estoit, Mort vendroit aointier  
 Mon povre cuer, pleur seroit mon mestier,  
 Et vous voyez que riens n'est qui m'appaise,  
 24 Sans vous veoir je ne porroie estre aise.

Amis, fors vous chose n'est qui me plaise,  
 26 Sans vous veoir je ne porroie estre aise.

## LXXXV. — L'AMANT

D OULCE dame, ne vous vueille desplaire  
 Se si souvent ne vois comme je sueil  
 Par devers vous, car tout ce me fait faire  
 4 De mesdisans l'agit, dont j'ay grant dueil  
 Qu'il conviengne que j'eslongne mon vueil



Pour leur parler, mais en toute maniere  
Garder m'en doy se j'ay vostre honneur chiere.

Pour ce me fault un petiot retraire *f. 393 b*  
D'environ vous, combien que je m'en dueil  
Trés durement, mais il est necessaire  
Pour vostre honneur, car trop mieulx perdre l'ueil  
Vouldroie que l'amendrir, dont accueil  
Ne me faictes devant les gens ne chiere;  
Garder m'en doy se j'ay vostre honneur chiere.

Et par ce point les pourrons faire taire  
Quant ne verront que plus aye recueil  
De vous et que n'iray en vo repaire.  
Mais ne pour tant, quant pourray, en vo brueil  
Je vous verray, car autre riens ne vueil,  
Mais moult de près avisent no maniere,  
Garder m'en doy se j'ay vostre honneur chiere.

Toute belle, courtoise, sans orgueil,  
De si souvent environ vostre sueil  
Aler et tant repairier vo mainiere  
Garder m'en doy se j'ay vostre honneur chiere.

## LXXXVI. — LA DAME

BIAU doulz ami, je ne m'en puis plus taire,  
Mais je vous truis tout changé, ce me semble;  
Ne sçay se vous voulez de moy retraire,  
Tel paour en ay que tout le cuer m'en tremble,  
Qu'est ce a dire ? quel achoison vous meut ?  
Car ne vous voy fors a trop grant dongier,  
Et, si ne tient qu'a vous, le cuer m'en deut.  
Je croy que ainsi me voulez estrangier.



Et mon message a tousjours tant affaire  
 A vous trouver, et que soyons ensemble  
 Petit vous chault, ains d'avoir autre affaire  
 12 Vous excusez, quant d'entre les gens m'emble  
 Pour vous veoir vous dictes qu'il ne puet  
 Alors estre, si n'en fault point songier ;  
 Alieurs vous tient autrement qu'il ne seult.  
 16 Je croy que ainsi me voulez estrangier. *f. 393 c*

Et on m'a dit qu'en un certain repaire  
 Alez souvent ; c'est ce qui nous dessemble ;  
 Au moins, je croy, si ne m'en doit pas plaire ;  
 20 S'ainsi estoit, plus que feuille de tremble  
 Seriez legier qui au vent se remeut,  
 Mais je m'en doubt par ce que tout changier  
 Vous voy vers moy, ne sçay qui vous recueut,  
 24 Je croy que ainsi me voulez estrangier.

Je ne sçay pas se delaissier me vuet  
 Vo cuer, mais il m'est vis que de legier  
 Vous passeriez de moy dont dueil m'acueult,  
 28 Je croy que ainsi me voulez estrangier.

## LXXXVII. — L'AMANT

O<sup>R</sup> suis je vers vous venu,  
 Belle dame, aray je paix ?  
 Et ce qui m'en a tenu  
 4 Si longuement ce n'est mais  
 Que pour vostre honneur sans faille,  
 Autre chose ne m'en tient ;  
 Mais il vous semble que faille  
 5 Se de vostre honneur me tient.



Car maint mal est avenu  
Pour tel cause, et pour ce lais  
A y venir; maintenu  
12 Me suis tellement que mais  
N'est parole qui en saille.  
Ainsi faire il appartient,  
Mais il vous semble que faille  
16 Se de vostre honneur me tient.

Et vo cuer s'en est tenu  
Mal content, je n'en puis mais,  
Car a vous garder tenu  
20 Je seray a tousjours mais.  
Ne cuidiez que pour ce baille  
Alieurs mon cuer, ne m'en tient;  
Mais il vous semble que faille *f. 393 d*  
24 Se de vostre honneur me tient.

A Dieu, il fault que m'en aille,  
La nuit s'en va, le jour vient,  
Mais il vous semble que faille  
28 Sede vostre honneu me tient.

## LXXXVIII. — LA DAME

**J**E suis entrée en grant merencolie,  
Mon bel ami, qu'il vous tiengne autre part  
Qu'a mon honneur, dont trop me contralie  
De ce que tant, en commun ne a part,  
5 Que je souloie  
Ne vous voy, mais bien croy qu'il vous anoye  
A plus m'amer, quoy que m'aliez disant  
Que le mieulx soit que plus a tart vous voie  
9 Pour estaindre le parler mesdisant.



Je m'en soussy tant qu'estre ne puis lie,  
 Car il m'est vis que vo cuer se depart  
 De moy, et on m'a bien dit qu'il s'alie  
 A un' autre que voyez tost et tart,  
 14 Et que en sa voie  
 Vous vous mettez souvent si que elle voie  
 Que vous l'amez, quoy que plus souffisant  
 Ne soit de moy, querrez vous autre proye  
 18 Pour estaindre le parler mesdisant.

Et, se a voz yeulx plus belle et plus jolie  
 Elle est que moy. bien sçay que plus grant part  
 De loyaulté n'a pas, mais c'est folie  
 A moy puis que vous n'y avez regart.  
 23 Mais qu'en feroie ?  
 Se vostre goust y est, je ne pourroye  
 Vous en oster pour estre a mort gisant ;  
 Est ce le tour ou vostre cuer s'avoye  
 Pour estaindre le parler mesdisant ?

S'ainsi ma joye *f. 394 a*  
 Pers, il fauldra que durement m'aroye,  
 Car ne pourray porter mal si nuisant ;  
 Ne lairay pas qu'en las plour ne me noye  
 32 Pour estaindre le parler mesdisant.

## LXXXIX. — L'AMANT

**V**ous m'en croirés se vous voulez,  
 Belle dame, mais je vous jure  
 Que plus que vous suis adoulez  
 4 De ce que ne vous voy, ne cure  
 N'ay d'autre, mais pour le murmure



De mesdisans en sus m'en trai,  
Mais pour tant autre amour n'attray.

Et se, si souvent que soulez,  
Ne me voyez, tout a esture  
Le fais pour n'estre reculez  
De vous que plus que creature  
J'ayme loyaument d'amour pure;  
Et a plusieurs choses me tray,  
Mais pour tant autre amour n'attray.

Ne ja n'en seray saoulez,  
Ne le dictes plus : trop m'est dure  
Tel parolle, vous m'affolez,  
De dueil il a partout mesure,  
J'ay maint grant soing et mainte cure  
Par quoy un temps je me subtray,  
Mais pour tant autre amour n'attrai.

D'aler et venir me retrai,  
Mais pour tant autre amour n'attrai.

## LXXXX. — LA DAME

**J**A ne croiray qu'amant parfètement  
Amast sa dame et se tenist un mois  
D'elle veoir, et sans encombrement  
Faire le peust ou l'occiroit ainçois;  
Mais ceulx le font qui n'acontent .ii. nois  
S'ilz sont amez ou non, si vault si vaille, *f. 394 b*  
Ilz vont priant partout puis .ii. puis .iii.,  
Mais ne leur tient au cuer pas d'une maille.

Pour vous le dy, amis, certainement,  
Car ne vous vy pas une seulle fois



Plus d'un mois a, et cuidés tellement  
 12 Par biau parler et par serie voix  
 Moy avugler que vous croye, or congnois  
 Se vous m'amez ou non, ainsi sans faille  
 Le font les faulx qui ont toutes leurs lois,  
 16 Mais ne leur tient au cuer pas d'une maille.

Ha ! Dieu le scet, que vo contenment  
 Fait mon las cuer estre en grief dueil estrois,  
 Car a l'effait mieulx que au parler comment  
 20 M'amez appert, dont je porte tel pois  
 Qu'en muir de dueil, mais n'en donnés un pois;  
 Ne cuidasse que feussiez de tel taille.  
 Ceulx ressembles qui pleurent a la fois,  
 24 Mais ne leur tient au cuer pas d'une maille.

Ha ! doulz amis, sont ce de voz espois ?  
 Aiment hommes d'amour de feu de paille  
 Qui si faignent estre d'amours destrois,  
 28 Mais ne leur tient au cuer pas d'une maille.

## LXXXXI. — L'AMANT

Pour quoy de moy vous doubtez vous, maistre  
 Ne voyez vous qu'autre part je ne vise  
 Qu'a vous seulle pour qui porte la trece  
 4 Et loyaulté en mon port et devise,  
 Couleur de bleu en vestement ?  
 Ne ne fois en riens autrement  
 Ne que je sueil, ce voyez en appert;  
 8 Se je vous aim me semble qu'il appert.

De vous donner si mautemps est simplece  
 Que vous dictes, mais quant je me ravise



Sus me mettez, je croy, ce qui vous blesse; *f. 394 c*

12 C'est faulseté, car vous avez promise

Alieurs vo foy ou l'en me ment,

Car on m'a bien conté comment

Un autre amez, mais, quoy que aye souffert,

16 Se je vous aim me semble qu'il appert.

Si vous gardez de n'estre changaresse,

Car quant a moy je n'ay m'entente mise

Se n'est en vous a qui j'ay fait promesse;

20 Mais, se vous voy de moy amer remise,

Ne dois je dont faire ensement?

Combien que [je] si fermement

M'i suis fichiez, certes, qu'assez appert.

24 Se je vous aim me semble qu'il appert.

Ne scay de quoy tout ce langaige sert,

26 Se je vous aim me semble qu'il appert.

LXXXXII. — LA DAME

Au bleu vestir ne tient mie le fait,

N'a devises porter, d'amer sa dame,

Mais au servir de loyal cuer parfait

Elle sans plus, et la garder de blasme,

5 Et que l'amant ne le die a nul'ame

Fors a la très belle que tenir chiere

Sur toutes riens doit et très redoubter,

Sans autre part viser d'oeil ne de chiere :

9 La gist l'amour, non pas au bleu porter.

Mais puet estre que plusieurs le meffait

De faulseté cuident couvrir soubz lame



Par bleu porter; si vuellent tout a fait  
 Que l'en cuide qu'en eulx n'ait le diffame  
 14 D'en plusieurs lieux penser, mais n'ont la flame  
 D'amours pour tant qui fait changier maniere  
 Aux fins amans, gemir et guermenter  
 Secretement et joye acheter chiere :  
 18 La gist l'amour, non pas au bleu porter.

Certes, si croy que cil qui se refait *f. 395 d*  
 Des habis bleuz, a fin que l'en le clame  
 Loyal amant, a le cuer tout deffait,  
 De loyaulté, car ne once ne drame,  
 23 Ne pou ne grant, n'en a dedens, par m'ame !  
 Il met tout hors a levée baniere.  
 Autrement va, qui veult a droit conter,  
 De ceulx en qui est loyaulté entiere :  
 27 La gist l'amour, non pas au bleu porter.

Prince, je dis que, quoy que un amant quiere  
 Divers habis pour son cuer deporter,  
 S'il n'est loyal, s'amour tiens a legiere :  
 31 La gist l'amour, non pas au bleu porter.

## LXXXXIII. — L'AMANT

J'ay entendu, dame, qu'en autre part  
 Voz biaux semblans departez et donnez  
 Et que tel sçay vous voit souvent a part  
 4 Et bonne vie ensemble demenez.  
 On m'a tout dit l'estat que vous menez :  
 Bien vous savez a plus d'un saint vouer.  
 7 Sont ce des jeux dont vous savez jouer ?

Promis m'aviez qu'a tousjours sans depart  
 Aviez vo cuer tout a moy assenez,



11 Mais je voy bien que j'en ay povre part  
Puis qu'autre part vous le rabandonnez;  
Mais bien est vray qu'assez vous vous penez  
14 De vous couvrir soubz faint couvertouer;  
Sont ce des jeux dont vous savez jouer?

Par quoy congnois que vous savez bien l'art  
De faulx semblant jouer, me pardonnez  
Se je dis voir : plusieurs de vo regart  
18 Sont deceüz, car vous l'abandonnez  
En trop de lieux, n'un seul jour n'en junez,  
Et me cuidiez de faintise douer ;  
21 Sont ce des jeux dont vous savez jouer ?

Savez vous point faire piez embouer? *f 395 a*  
23 Sont ce des jeux dont vous savez jouer ?

## LXXXXIV. — LA DAME

QUI son chien veult tuer lui met la rage  
Assus, dist on, ainsi me veulz tu faire  
Faulx, desloyal, qui dis que mon corage  
4 Se veult de toy, pour autre amer, retraire ?  
Mais tu scez bien certes tout le contraire  
Et qu'en mon cuer n'a grain de tricherie,  
Mais ce es tu mauvais, tu t'as biau taire,  
8 Qui deceveur es plain de menterie.

Car onc en moy n'en semblant n'en langaige  
Tu n'apperceux chose qui fust contraire  
A loyauté : ce n'est pas mon usage.  
12 Tu n'en fais pas doubte, mais, pour moy traire  
En sus de toy, tu veulz telz mots retraire  
Pour mieulx couvrir ta faulse tromperie,



Mais ne suis pas si comme toy faulsaire  
 16 Qui deceveur es plain de menterie.

Ha ! mirez vous, dames, en mon dommage,  
 Pour Dieu mercy ! ne vous laissiez attraire  
 Par homme nul, tous sont de faulx plumage  
 20 En ce cas cy ; si fuiez leur affaire :  
 Au commencier font bien le debonnaire  
 Mais au derrain c'est toute mocquerie,  
 Ce fais tu, dieu d'Amours, pour cuers detraire  
 24 Qui deceveur es plain de menterie.

Mais or me dy, Amours, s'il me doit plaire  
 Que pour amer je doye estre perie,  
 Ce es tu dont, j'en voy bien l'exemplaie,  
 28 Qui deceveur es plain de menterie.

## LXXXXV. — L'AMANT

A<sup>MANS</sup> jolis, je vous supply qu'aprendre  
 Vous me vueilliez comment me maintenir  
 Je doy vers celle en qui n'a que reprendre,  
 4 Qui me daigna pour ami retenir, *f. 395 b*  
 Car plus n'ose tant aler ne venir  
 Pour mesdisans que le corps Dieu maudie !  
 Et, quant lui dis qu'il m'en convient tenir,  
 8 El ne me croit de chose que lui die.

Et lui semble qu'a autre me vueil prendre ;  
 Si me presse de souvent revenir,  
 Mais son honneur, bien sçay, en seroit mendre,  
 12 Du maintenir il me doit souvenir,  
 Car mesdisans, que Dieu vueille pugnir !  
 Sont environ, paour ay qu'on en mesdie,



Dont je ne sçay comment m'y contenir :

16 El ne me croit de chose que lui die.

Il m'anuye comme a elle d'atendre

Si longuement ains que puisse avenir

A la veoir, mais je doubte mesprendre,

20 Car la garder me doit appartenir ;

Pour moy n'est pas, on ne m'en puet banir,

Mais qui ayme ne doit a l'estourdie

Dame servir ; quant ce vueil soustenir

24 El ne me croit de chose que lui die.

Amans, jugiez, se m'en doy abstenir

Ou y aler tout a chiere hardie,

Puis qu'elle veult, et, deusse tout honnir,

28 El ne me croit de chose que lui die.

LXXXXVI. — LA DAME

PAR biau tabour me veult mener aux veilles

Cil qui m'amoit, ce disoit il jadis,

Mais qu'il m'amast ce seroit bien merveilles,

4 Car ne m'en fait semblant fors par ses dis.

Il dit que pour garder honneur toudis

Il ne me voit, mais mallement m'abuse

7 Qui ensement sur mon honneur s'excuse.

Mais ce qu'il dit n'est que vent en oreilles,

Car, se amé m'a, il en est refroidis *f. 395 c*

Ou ses amours sont les plus non pareilles

11 Qu'oncques on veist, car il est si tardis

De moy veoir que pas trois fois en dix

Mois ne me voit, mais bien de moy se ruse

14 Qui ensement sur mon honneur s'excuse.



- Ha ! Fortune ! qui si nous despareilles,  
 Moult est par toy mon biau temps enlaidis,  
 Car pour ma mort a faire lui conseilless  
 18 Tout ce qu'il fait. Faulseté je maudis  
 Par qui je pers mon plaisant paradis,  
 Lequel addès de très grant malice use  
 21 Qui ensement sur mon honneur s'excuse.
- Bien me baille mon ami de la muse  
 23 Qui ensement sur mon honneur s'excuse.

## LXXXXVII. — L'AMANT

- J'AY bien dit a vo message  
 Comment je ne puis aler,  
 Belle, bonne, douce, sage,  
 4 Maintenant a vous parler,  
 Mais ne s'en vueille adouler  
 Vo cuer et je vous verray  
 7 Tout le plus tost que pourray.

- Car perte aroie et dommage,  
 Voire pour tout affoler,  
 Se tost n'aloye en la barge  
 11 Ou il me convient raler,  
 Et mon alée celler  
 Me fault, mais je revenray  
 14 Tout le plus tost que pourray.

- Si vivez a lié visage  
 Sans tant en plour vous fouler,  
 Car en pourriez ains vostre age  
 18 Vostre biau corps affoler.  
 Pensez de vous rigoler



21 Et jouer : o vous seray  
Tout le plus tost que pourray.

23 A Dieu ; je retourneray  
Tout le plus tost que pourray.

## LXXXXVIII. — LA DAME

O<sup>R</sup> sçay toute l'encloeu<sup>R</sup>e  
Et la faulseté prouvée  
De cil qui en paine dure  
4 M'a mis, dont je suis grevée :  
Tant ay quis que j'ay trouvée  
Celle pour qui m'a laissiée,  
7 Dont durement suis bleciée.

Il en est ja grant murmure  
En mainte place eslevée.  
Et la a il mis sa cure,  
11 Quoy que grant bourde ait levée  
Pour s'excuser, ce lui vée  
A moy veoir ou qu'il siée,  
14 Dont durement suis bleciée.

Ha ! le desloyal parjure,  
Il m'avoit tant esprouvée !  
Et plus qu'autre creature  
18 Vraie, loyal, approuvée  
Lui estoie, or me deuée  
S'amour, quoy qu'il lui messiée,  
21 Dont durement suis bleciée.

LXXXXVIII. 6 Ms. laissié — 7 Ms. blecié



23            Pour autre suis delaissée,  
Dont durement suis bleciée.

## LXXXXIX. — L'AMANT

P<sup>AR</sup> faulx raport je suis ou maltalent  
De celle qui tant amer me souloit,  
Dont me desplaist et seray très dolent  
4 Se pers ainsi le bien qu'el me vouloit;  
Mais se acertes de moy bien lui chaloit *f. 396 a*  
Ne croiroit pas, m'est vis, si de legier,  
7 Mais je me doubt que c'est pour m'estrangier.

D'elle veoir, ce dist, suis nonchalant  
Pour autre amer, dont forment se douloit,  
Mais elle a tort, ne suis remis ne lent  
11 De siene amour, et, se mon corps voilloit,  
La verroie souvent mais ne me loit  
Pour son honneur, ne m'en doit ledengier,  
14 Mais je me doubt que c'est pour m'estrangier.

Tort aroie, car tant est excellent  
Que il n'est homs, s'en prouesse valoit  
Et en renom autant que fist Rolent,  
18 Pour dame avoir se d'amer se mesloit,  
Qu'il ne lui deust souffire; elle en parloit  
Et parle encor sans cause a droit jugier,  
21 Mais je me doubt que c'est pour m'estrangier.

Amours me veult mener trop grant dongier,  
23 Mais je me doubt que c'est pour m'estrangier.



## C. — LA DAME

4       A u lit malade couchiée,  
           Tremblant dure fievre agüe,  
           Suis, par estre trop fichiée  
           En amer qui tant m'argüe  
           Que plus venin qu'en sigüe,  
           Me semble, y a, dont je meurs  
 8       Sans jamais passer par rue,  
           Car ja me deffault li cueurs !

12       A Dieu cil qui aluchiée  
           M'a puis faulusement me tue;  
           Encore en soy je vengiée,  
           Car malement m'a deceue.  
           De toutes dames soit sceue  
           Ceste exemple a fin que leurs  
 16       Cuers si faicte amour ne mue,       *f. 396 b*  
           Car ja me deffault li cuers !

20       A Dieu, Amours ; aprouchiée  
           Suis de mort par toy ; j'en sue  
           Ja la sueur, et fichiée  
           Suis ou pas, m'ame perdue  
           Ne soit pas mais de Dieu eue.  
           A Dieu, monde, a Dieu, honneurs,  
 24       J'ay yeulx troubles et voix mue,  
           Car ja me deffault li cueurs !

Priez que de Dieu receue  
 Soie ; a Dieu, freres et seurs,



Je m'en vois sans attendue,  
Car ja me deffault li cueurs!

EXPLICIT CENT BALADES D'AMANT ET DE DAME

## LAY DE DAME

O Amours dure et sauvage,  
Certes, qui te fait hommage  
Se met en divers servage,  
Et si se puet bien attendre  
5 Que par ce dueil et dommage  
Lui vendra, c'est l'avantage  
Que tu fais au las courage  
Qui se laisse a toy surprendre.

Mais bien voy qu'il n'est si sage,  
10 Quant tu veulx, que soubz ta cage  
Ne soit fichiez, quoy que il targe,  
Ne ja Raison tant aprendre  
Ne lui sara que la rage  
De ton desir, plain d'oultrage,  
15 Ne lui livre amer buvraige,  
Ne riens n'y vault le reprendre. *f. 396 c*

Car ta puissance est trop forte,  
Dure et diverse,  
Et si est de telle sorte  
20 Et tant perverse  
Que tout cuer ou es aherse  
Entre en la porte



De dueil et en honneur morte  
Il se renverse.

25 Mais tu es en tous lieux voisine,  
Il y pert par ce que raconte  
Ovide en son livre qui conte  
De ta puissance qui tant monte,  
Dit que meismes n'y pot Messine  
30 Trouver Pluto qui duc et conte  
Estoit d'enfer, mais l'Art, qui dompte  
Fols et sages et qui surmonte

Toute riens, lui mist la racine  
Ou cuer par doulz regart qui mine  
35 Les cuers; si lui fist Proserpine  
Si fort amer qu'il n'ot pas honte  
De la ravir sur la marine.  
Si l'emporta en brief termine  
En enfer ou elle domine.  
40 D'autres plusieurs y a sans compte.

Et mesmement le vent de bise  
Feis tu jadis estre amoureux  
D'Erudisse, en tel devise  
Qu'il en fut mat et langoureux.  
45 Jupiter, le dieu, sans faintise,  
Fu par toy taint et douloureux;  
Et Appollo ot s'amour mise  
En dame dont fu desireux,  
Mais il n'en fist pas a sa guise,  
50 Dont il se tint pour meseureux.

*f. 396 d*

La deffense n'y vault .ii. poires,  
Puis qu'ainsi amerent les dieux



Celestes et meïsmes les vieux  
 Sages, jadis, fust joye ou dieux,  
 55 Si que nous dient en mains lieux  
 Les escriptures et histoires :  
 David et Salomon, ses fieulx,  
 Sanson, Hercules non pas mieulx  
 N'en chevirent, non firent cieulx  
 60 Qui les estoilles des haulx cieulx  
 Congnurent, ce sont choses voires.  
 Il n'est doncques nulz homs mortieulx,  
 Se il a cuer, pensée et yeulx,  
 Qui doubter ne doye en tous lieux  
 65 Tes dars qui cuers font envieux  
 D'estre amez, ce sont choses voires.

Et des sages dames qu'on prise  
 Y puet estre nulle comprise  
 Et ouïl certes :  
 70 Medée, qui fu tant aprise  
 Es sciences, si fut esprise  
 De ces couvertes  
 Flames, et par telle maïtrise  
 Que riens ne lui valu l'emprise  
 75 De ses appertes  
 Sciences, qui que l'en desprise,  
 Par toy fu tellement surprise  
 Que sans dessertes  
 Ama Jason, quoy que reprise  
 80 En fust de raison, mais pourprise  
 Tu l'os acertes  
 En ta très destroite pourprise  
 Ou tu la tenoies pourprise,  
 Fust preu ou pertes.



85                    La non blasmée *f 397 a*  
Roïne, sage et bien'amée  
Dido, qui tant fu renommée  
Qu'en tous lieux elle estoit clamée  
                  La très eslicte  
90                    Roïne, mais l'istoire escripte  
                  Nous dit que par toy fu subgicte  
                  En l'amour Eneas ; merite  
                  Mauvais rendi  
                  Des haulx biens qu'elle lui tendi ;  
95                    Le très faulx gaires n'attendi.  
                  De telz est maint, ytant tendy,  
                  Dont c'est pechié  
                  A toy de souffrir tel meschié  
                  Qu'un faulx amant tiengne empeschié  
100                    Un loyal cuer bien entechié.

                  C'est ta maniere  
                  Qui est fiere,  
                  Si ne fault plus que j'enquiere  
                  Pour approuver  
                  Et prouver  
                  Ce que assez je puis prouver  
                  Des dames qui ont jeu en biere  
                  A pale chiere  
                  Par entiere  
110                    Foy, dont fais a reprouver.

                  Et doncques nul ne s'esmervueille,  
                  Se par toy veille  
                  Et tant traveille  
                  Ne ne sommeille  
115                    Moy qui suis simple creature,



Quant mainte dame non pareille  
 Fault que elle en cueille  
 Dueil et recueille  
 Pleur qui la meuille  
 120 Par mainte diverse aventure  
 Qui amerement la resveille.

*f. 397 b*

O amorsure,  
 Très aspre et dure,  
 Mal vins oncques a mon oreille,  
 125 Car tu me mets en aventure  
 Par ta morsure,  
 Qui trop me dure,  
 De mort obscure,  
 Car desespoir le me conseille.

130 Ains suis a grief dueil livrée,  
 Et delivrée,  
 Bien voy, ne m'en verray jamais,  
 Car desir remais  
 M'est ou cuer, souvenir navrée  
 135 M'a, abuvrée  
 M'ont ces de trop divers mais.  
 Lasse ! et si n'ay mais  
 De nulle plaisance livrée,  
 Et enyvée  
 140 Me sens ainsi pour tousjours mais  
 Sans decevrée.

Le mal que j'ay, et tu le scez, Amours,  
 Me vient d'amer un desloyal ami



Qui me promist qu'il seroit a tousjours  
145 Mon vray amant; lasse! dolente, aimy!  
Je m'y fiay, dont mon cuer fent par my,  
Car son parler attreant, decevable,  
Et son maintien courtois et amiable,  
Me disoient qu'il disoit verité,  
158 Et non faisoit, c'est bien chose prouvable,  
Dont de joye a mon cuer desherité.

Car plus a veu que mon cuer estoit mis  
En siene amour et que bien sienne estoie  
Adont s'est il de moy amer remis  
155 Du tout en tout ne plus n'a quise voie *f. 397 c*  
De moy veoir, et je pleure et larmoie,  
Plaine de dueil et de desir ensemble,  
Pour ce que voy que son cuer se dessemble  
De mon amour et qu'il est faulx et faint,  
160 Et ne m'en puis retraire, ce me semble,  
Car tout y mis mon las cuer qui s'en plaint.

Et pour ce en plourant me demente  
Tant et guermente,  
Sans que je mente,  
165 Lasse, dolente,  
A toy qui si m'as enhaÿe.  
Car tu scez que j'estoie lente  
De mettre entente  
N'avoir attente  
178 En la tourmente  
De tes tours qui m'ont envaÿe;  
Mais cil, ou ne truis nulle aÿe,  
Ains esmaÿe  
M'a et haÿe,  
75 Dont esbaÿe  
Suis si qu'il fault que m'en repente,



M'a par sa parolle traïe,  
Dont muir haïe  
Ou est fouïe  
180 Joye que ouïe  
N'ay pieça, dont dueil me tourmente.

Et qui cuidast qu'en gentil homme  
De tel affaire  
Eust a reffaire?  
185 Car ne cuid que decy a Romme  
En toute somme  
Autre on renomme  
De plus de biens, mès le contraire  
Je puis retraire,  
190 Car son attraire  
Me donne de maulx trop grant somme. *f. 39*  
Si ne sçay comme  
Nul homme on nomme  
Bon ou loyaulté ne repaire.  
195 Si ne puis taire  
Mon grief contraire  
Par lequel pers repos et somme.

Hé las ! si languis durement  
Sans nul espoir d'alegement  
200 Et muir de dueil  
Par son accueil  
Que je ne vueil  
Et ne puis haïr nullement  
Ne vouloir le departement.  
205 Et si m'en dueil  
Tant qu'en recueil  
Plour dont me mueil,  
Ne n'ay bien un jour seulement;  
Si me va bien diversement.



10 Car le regart du très doulz oeil  
Qui m'a mis en ce dur resveil  
    Si persauement,  
    Tant doulcement,  
    Parfectement,  
15 Me navra qu'adès en traveil,  
Ne ne puet despasser le sueil  
    Un seul moument  
    Pour nul tourment,  
    Tart ne briefment,  
20 De mon cuer, dont je m'esmerveil  
Comment je puis avoir tel vueil.

Et quel conseil a ce martire  
    Se Dieu te gart,  
Y pourray je, Amours, donc eslire ?  
25 Car mon cuer art  
De s'amour et adès m'empire,  
    Ne n'ay regart  
Alieurs, lasse ! dont je souspire  
    Seullette a part  
30 Quant ne voy cellui qui a tart  
Me voyt et qui me fait maudire

*f. 398 a*

Ma vie, car il m'est si tart  
Que le voie et ne fois que dire :  
    « Le cuer me part,  
35 Venez vers moy, mon très doulz mire,  
    Ou main ou tart. »  
Mais tout n'y vault riens, car il tire  
    En autre part.  
Si ne me doit mie souffire  
40 D'avoir tel part  
De cellui que je tant desire ?



Mais, se pour mon mal alegier  
Et moy oster de ce dongier,  
Pouoie prendre aucun plaisir  
245 Autre part et lui estrangier,  
Ce me pourroit assouagier ;  
Mais nanil : tout m'est desplaisir,  
Quanqu'autre fait ne puis saisir,  
Autre vouloir n'autre desir  
250 Ne se puet en moy hebergier,  
Car tout li mis sans deslogier,  
Et, en deusse vive enragier,  
En ce point me convient gesir.

Si le me fault ainsi porter  
255 Jusqu'au mourir,  
Bien le voy, puis que depporter,  
Pour moy garir,  
Ne te veulz de moy tourmenter  
Ne acourir  
260 Pour mon bien, mais ma grief complainte  
Au moins il te plaise apoter  
Et tost courir  
A celui qui me fait perir *f. 39*  
Sans arrester,  
265 Combien qu'il n'a nul vueil d'oster  
Ne secourir  
Mon mal, dont j'ay la couleur tainte.

Ainsi fineray mon age,  
Assez juene, en ce malage  
270 Qui m'est rente et heritage,  
Dont ma lasse vie est mendre.  
Et se je te fus ombrage  
Jadis, plus que au feuz l'emplage,



Le me rens de ton paage.  
Nul n'est qui se peust deffendre,  
Bien le voy, c'est le rivage  
De durté ou douleur nage;  
La tu adreças ma barge,  
Fortune m'y fist descendre,  
Ouquel lieu ne truis suffrage  
Ne nul bien, fors le message  
De mort qui corps et visage  
Me fera tourner en cendre.

EXPLICIT LAY MORTEL











## TABLE

---

	Pages.
Introduction.....	I
Note de M. Paul Meyer sur le manuscrit offert par Christine de Pisan à Isabeau de Bavière.....	xxi
L'Oroyson Nostre Dame.....	I
Les XV Joyes Nostre Dame.....	11
Une Oroyson de Nostre Seigneur.....	15
Les Enseignemens moraux.....	27
Proverbes mouraulx .....	45
Le Livre du Duc des Vrais Amans.....	59
Cent Balades d'Amant et de Dame.....	209









*Publications de la SOCIÉTÉ DES ANCIENS TEXTES FRANÇAIS*  
(En vente à la librairie FIRMIN DIDOT ET C<sup>ie</sup>, 56, rue Jacob, à Paris.)

---

*Bulletin de la Société des Anciens Textes français* (années 1875 à 1896).  
N'est vendu qu'aux membres de la Société au prix de 3 fr. par année, en papier de Hollande, et de 6 fr. en papier Whatman.

*Chansons françaises du xv<sup>e</sup> siècle* publiées d'après le manuscrit de la Bibliothèque nationale de Paris par Gaston PARIS, et accompagnées de la musique transcrite en notation moderne par Auguste GEVAERT (1875). *Epuisé.*

*Les plus anciens Monuments de la langue française* (ix<sup>e</sup>, x<sup>e</sup> siècles) publiés par Gaston PARIS. Album de neuf planches exécutées par la photogravure (1875). . . . . 30 fr.

*Brun de la Montaigne*, roman d'aventure publié pour la première fois, d'après le manuscrit unique de Paris, par Paul MEYER (1875). . . . . 5 fr.

*Miracles de Notre Dame par personnages* publiés d'après le manuscrit de la Bibliothèque nationale par Gaston PARIS et Ulysse ROBERT; texte complet t. I à VII (1876, 1877, 1878, 1879, 1880, 1881, 1883), le vol. . . . . 10 fr.

Le t. VIII, dû à M. François BONNARDOT, comprend le vocabulaire, la table des noms et celle des citations bibliques (1893). . . . . 15 fr.

Le t. IX et dernier contiendra l'introduction et les notes.

*Guillaume de Palerne* publié d'après le manuscrit de la bibliothèque de l'Arsenal à Paris, par Henri MICHELANT (1876). . . . . 10 fr.

*Deux Rédactions du Roman des Sept Sages de Rome* publiées par Gaston PARIS (1876). . . . . 8 fr.

*Aiol*, chanson de geste publiée d'après le manuscrit unique de Paris par Jacques NORMAND et Gaston RAYNAUD (1877). . . . . 12 fr.

*Le Débat des Hérauts de France et d'Angleterre*, suivi de *The Debate between the Heralds of England and France*, by John COKE, édition commencée par L. PANNIER et achevée par Paul MEYER (1877). . . . . 10 fr.

*Œuvres complètes d'Eustache Deschamps* publiées d'après le manuscrit de la Bibliothèque nationale par le marquis DE QUEUX DE SAINT-HILAIRE, t. I à VI, et par Gaston RAYNAUD, t. VII à IX (1878, 1880, 1882, 1884, 1887, 1889, 1891, 1893, 1894), le vol. . . . . 12 fr.

*Le Saint Voyage de Jherusalem du seigneur d'Anglure* publié par François BONNARDOT et Auguste LONGNON (1878). . . . . 10 fr.

*Chronique du Mont-Saint-Michel* (1343-1468) publiée avec notes et pièces diverses par Siméon LUCE, t. I et II (1879, 1883), le vol. . . . . 12 fr.

*Elie de Saint-Gille*, chanson de geste publiée avec introduction, glossaire et index, par Gaston RAYNAUD, accompagnée de la rédaction norvégienne traduite par Eugène KOELBING (1879). . . . . 8 fr.



- Daurel et Beton*, chanson de geste provençale publiée pour la première fois d'après le manuscrit unique appartenant à M. F. Didot par Paul MEYER (1880). . . . . 8 fr.
- La Vie de saint Gilles*, par Guillaume de Berneville, poème du XII<sup>e</sup> siècle publié d'après le manuscrit unique de Florence par Gaston PARIS et Alphonse Bos (1881). . . . . 10 fr.
- L'Amant rendu cordelier à l'observance d'amour*, poème attribué à MARTIAL D'Auvergne, publié d'après les mss. et les anciennes éditions par A. de Montaiglon (1881). . . . . 10 fr.
- Raoul de Cambrai*, chanson de geste publiée par Paul MEYER et Auguste Longnon (1882). . . . . 15 fr.
- Le Dit de la Panthère d'Amours*, par Nicole de Margival, poème du XIII<sup>e</sup> siècle publié par Henry A. Todd (1883). . . . . 6 fr.
- Les Œuvres poétiques de Philippe de Remi, sire de Beaumanoir*, publiées par H. Suchier, t. I et II (1884-85). . . . . 25 fr.  
Le premier volume ne se vend pas séparément; le second volume seul 15 fr.
- La Mort Aymeri de Narbonne*, chanson de geste publiée par J. Couraye du Parc (1884). . . . . 10 fr.
- Trois Versions rimées de l'Évangile de Nicodème* publiées par G. Paris et A. Bos (1885). . . . . 8 fr.
- Fragments d'une Vie de saint Thomas de Cantorbéry* publiés pour la première fois d'après les feuillets appartenant à la collection Goethals Vercruysse, avec fac-similé en héliogravure de l'original, par Paul MEYER (1885). 10 fr.
- Œuvres poétiques de Christine de Pisan* publiées par Maurice Roy, t. I, II et III (1886, 1891, 1896), le vol. . . . . 10 fr.
- Merlin*, roman en prose du XIII<sup>e</sup> siècle publié d'après le ms. appartenant à M. A. Huth, par G. Paris et J. Ulrich, t. I et II (1886). . . . . 20 fr.
- Aymeri de Narbonne*, chanson de geste publiée par Louis Demaison, t. I et II (1887). . . . . 20 fr.
- Le Mystère de saint Bernard de Menthon* publié d'après le ms. unique appartenant à M. le comte de Menthon par A. Lecoq de la Marche (1888). 8 fr.
- Les quatre Ages de l'homme*, traité moral de Philippe de Navarre, publié par Marcel de Fréville (1888). . . . . 7 fr.
- Le Couronnement de Louis*, chanson de geste publiée par E. Langlois, (1888). . . . . 15 fr.
- Les Contes moralisés de Nicole Bozon* publiés par Miss L. Toulmin Smith et M. Paul MEYER (1889). . . . . 15 fr.
- Rondeaux et autres Poésies du XV<sup>e</sup> siècle* publiés d'après le manuscrit de la Bibliothèque nationale, par Gaston Raynaud (1889). . . . . 8 fr.
- Le Roman de Thèbes*, édition critique d'après tous les manuscrits connus, par Léopold Constans, t. I et II (1890). . . . . 30 fr.  
Ces deux volumes ne se vendent pas séparément.
- Le Chansonnier français de Saint-Germain-des-Prés* (Bibl. nat. fr. 20050), reproduction phototypique avec transcription, par Paul MEYER et Gaston Raynaud, t. I (1892). . . . . 40 fr.
- Le Roman de la Rose ou de Guillaume de Dole*, publié d'après le manuscrit du Vatican par G. Servois (1893). . . . . 10 fr.
- L'Escoufle*, roman d'aventure, publié pour la première fois d'après le manuscrit unique de l'Arsenal, par H. Michelant et P. MEYER (1894). . 15 fr.
- Guillaume de la Barre*, roman d'aventures, par Arnaud Vidal de Castelnau-dari, publié par Paul MEYER (1895). . . . . 10 fr.



*Meliador*, par JEAN FROISSART, publié par A. LONGNON, t. I, et II (1895),  
le vol..... 10 fr.

*La Prise de Cordres et de Seville*, chanson de geste, publiée d'après le  
ms. unique de la Bibliothèque nationale, par M. OVIDE DENSUSIANU  
(1896)..... 10 fr.

*Œuvres poétiques de Guillaume Alexis*, prieur de Bussy, publiées par  
Arthur PIAGET et Emile PICOT, t. I (1896)..... 10 fr.

---

*Le Mystère du viel Testament* publié avec introduction, notes et glossaire,  
par le baron JAMES DE ROTHSCHILD, t. I-VI (1878-1891), ouvrage terminé,  
le vol. .... 10 fr.

(Ouvrage imprimé aux frais du baron James de Rothschild et offert aux  
membres de la Société.)

---

Tous ces ouvrages sont in-8°, excepté *Les plus anciens Monuments de la  
langue française*, album grand in-folio.

Il a été fait de chaque ouvrage un tirage à petit nombre sur papier What-  
man. Le prix des exemplaires sur ce papier est double de celui des exemplaires  
en papier ordinaire.

Les membres de la Société ont droit à une remise de 25 p. 100 sur tous  
les prix indiqués ci-dessus.

---

*La Société des Anciens Textes français a obtenu pour ses pu-  
blications le prix Archon-Despérouse, à l'Académie française, en  
1882, et le prix La Grange, à l'Académie des Inscriptions et  
Belles-Lettres, en 1883 et 1895.*

















**HECKMAN**  
BINDERY INC.



**NOV 96**

Bound To Please® N. MANCHESTER,  
INDIANA 46962



UNIVERSITY OF ILLINOIS-URBANA



3 0112 005650327